

# Lukas

## Lukas arye, Yesus el laka teleb yupu ati, sekuk yupu

Abuku sekuk deiyoknye bira, Lukas ulamuk. Lukas arye, buku Rasul babye, sekamuk. Lukas ara, Yesus arye webuka deiamuk mapu, sik obarye (12) nang kan-kan ton kum ulamuk bukni, el ap, Paulus ap, neika fil dolamrik. (Pilemon 1:24; Kolose 4:14). Lukas ara, ninye kwetenanye ulamuk. Tonda, Lukas Yahudi yala kumnye, Yunaninye ulamuk. El ka Teofilus ap, yuk dib teneamik ninye ap ati, asurat sekuka dopkwetebuk. Deiyok ara, Yunani ninye babye, diba tenebikcop ura, Allah arye el mapu kipdeipnamle. Ayupu ara, 'Dib tenepnamak' tenen, asurat sekuk.

Lukas arye, 'Yesus ulamuk ning nirya moubuka kel biknamak' tenen, fia teleb kibuka, lilibuka sekuke. Buku Lukas noutamak, aning ara 'Weik mambule' tenen, sekuk ning ara, ninye lyena ning ap, Allah El Dib Kanye ap, talye kankan ninye ap, kilapu ap, Allah morona ap ati yupu weik sekuk. Mitikanun walwal unyabbuk, Injil buku sekeipsik talak ati ara, ninye weika arye tabakuka dib tenenyabe. Markus minop sekuk ura, aminyan ara, Matius arye el buku sekuk. Asirya ara, Lukas arye abuku sekeipsuke.

---

### Asurat deiya kouna ati laka nyabuk yupu

**1** <sup>1</sup>Allah arye, 'Aminyan talak winipnamuk ning ani,' nyamuk ning ara, winitalak nun kan-kan Allah arye, fil weik dolamuk ani, sirya dakuk ning ara, sik ninye weik elilamikce, aning nirya laka nyana ati, yupu sekdeibik ura laka nyanyake. <sup>2</sup>Aning nirya elilamik ning ara, Yesus ara, el fil winiryuk deiya koubuk talak arye, sik asing elilamik nang ap, tonda, el ap, melibuka Allah yupu fil dopra balamik nang ap arye, laka nyalilamsik touk anang arye sekdeibik. <sup>3</sup>Aning ati ara, na babye, 'Yesus el fil deiyok koubuk talak arye, lilibuka biksirye, deiyok koubuk talak arye, dipdongobukce, sirya dakuk tam nirya, Yesus arye petelamukce, winilamuk touk, aning nirya sekdeipnamne' tenen, sekuka deipse.

<sup>4</sup>Teofilus na ka kopropa, anda fia telebe. Ayupu sekuka deipmasa ara, an peterepik ning nirya, ‘Dikprop ulamuk’ tenen, kel biknalum ati, sekdeipse. Ati ayupu nyapnukine.

**Yohanes Pembaptis ara ninye mek dongonanye  
deipnamuka ati, nyapdeibuk yupu**

<sup>5</sup>Yudea mutuku tam nirya weik ninye deiyoknye Raja Herodes talibuka ulamuk talak noutamak arye, Allah arina ati, deiyoknye el si ara Zakaria ulamuk. Zakaria ara, Allah arina deiyok nang<sup>a</sup> bukni, el ap fil dolamik nang yala sik si ara, Abia, Zakaria el kil Elisabet ara, sik apu kopropa Harun yala nang arye deiamik. <sup>6</sup>Zakaria ap, el kil Elisabet ap, Allah yupu nyalilye atouk ubuka diksukumuk ulamrikce, Allah arye, “Wininamlulume, aning kum wininamlulume,” nyapdeiamuk yupu moubuka talyamrikce dolbalamrik. Ayupu nyalul touk ning nirya atonun sirya dakuka fil dolamdik, malye una deice tenebuk ning ababye, kum winilamrik ara, Allah arye sik ti kanye deiamuk. <sup>7</sup>Diksukumuk ulamrik ura, Elisabet ara, you kil ulamuka ati ara, sik mapu ton kum delilamrik, you uk ulamdika ani, akunum wisi danamrik mapu kum deipmanto wamrik.

<sup>8</sup>Tonok talak ara, Allah arina ap, morona ap ati, ‘Fil donamak’ tenen, Zakaria el wipdeibik ura, Zakaria ara, el Allah si erena aik<sup>b</sup> fum fil donmok. <sup>9</sup>Sik Allah arina ati, fil dolamik nang winilamik touk, tonok sum ara, Zakaria arye Allah arina aik fum binuka weklirye, ‘Uku sekuka, nintong teleb ning uku dongonamle’ tenen, Allah arye nyapdeiamuk ura, sik anang arye, Zakaria wipdeibik ura, Zakaria arye, Allah si erena aik fum wekukce, fil donmok. <sup>10</sup>Fil donmoka ani, nintong teleb ning uku dongopnuyuk talak ara, ninye weik anyaik dam bulubuka Allah moronmek. <sup>11</sup>Moronmek ura, Zakaria arye anyaik fum fil donmokbuk, nintong teleb ning uku dongopnuyuk talak sirik tam, Allah el nyapdeipne ning fil dolbananye ap, Allah ati yupu lak lelbananye ap, malaikat tonoknye talye karin arye kutukuka tikilyayuk. <sup>12</sup>Malaikat tikilyayuk ura, Zakaria eibukce, lukdanuka kanye walwal ubuk akarye, ilil weik ubuk. <sup>13</sup>Ilil weik ubuk ati, amalaikat arye Zakaria ati ayupu nyabuk.

“An ilil una meme. An arye, Allah ati morominye ning ara, Allah arye akunum kekepkuke. An kil Elisabet arye sal mi deipnamle. Akunum deiplye ura, el si ara Yohanes nyapnamlyame. <sup>14</sup>Allah el kanye ara, ‘Ami ara weik mambul,’ tenelule. Ati ara, ami ulya deice arye, kanye weik deipmince, kil-kil upkilibuk unamlame. Tonda, an kil arye ami deiplyop

---

<sup>a</sup> 1:5 Allah el si erena ati arina deiyok nang ara, Allah el si eren aik fum fil dolamik. Sik deiyoknye lak len yupu, nomor 14 dipdelulume. <sup>b</sup> 1:8 Allah si erena aik ati, laka nyana yupu ara, laka nyana yupu nomor 15 dindelelume.

ura, ninye weika arye ami ati, kanye fia deipnamake. <sup>15</sup>Deiyok ara ami neplyop ura, mambul fil dolamlye ati, Allah arye anye biti kanye fia delinamle. Ami neplyop ura, anggur mek kanye wangalamak mek ap, yuk talye kanye wangalamak mek ap, fia kum dinamle. Tonda, el winiryuk deiplye talak anirye, do unamle talak nirya ara, Allah El Dib Kanye ami el talima wekuka, langdiplirye fia puto weik ariplyop ura Allah El Dib Kanye arye anye fia talinamle. <sup>16</sup>Israel ninye weik Allah batakuka yuk tam bisik biyikbuk, ami arye neplyop ura elce aninye weike dobuka sik Ni Allah el tam tamubuka delilyanamle.

<sup>17</sup>Minop arye Allah yupu lak nyalamuknye nabi<sup>c</sup> Elia, Allah El Dib Kanye mikip deice arye, Allah yupu peterelamuk touk, ami neplyop ura el babye, atouk wininamle. Yesus ara aminyan yanamla ati, ami arye minop menekuka kintinilinamle. El ulya deice arye, sik Israel nang arye, sik mapu nirya ati, bico tenebuka kanye deibuka unamake. Tonda, sik Allah yupu yanibuka malye ulamice nang ara, ami el winilamlya deice arye, sik malye wininyak ning batakikirye ila tamubuka, Allah diba tenebuka, diksukum unyak nang weik kel arye unyak touk, Allah el tam uk kipronnamake. Awininamla nirya ara, Yesus arye talinamle ninye kintinilina ati wininamle.” Amalaikat arye ayupu nirya Zakaria ati nyabuk.

<sup>18</sup>Nyabukop ura, Zakaria kekebukce amalaikat ati tamubuka nyabuk. “Anyapmanilama ara, yata ning winiptua deice arye, ‘Aning nirya ara, dipkorop winipnamle,’ teneptinye do? Ara, na babye, na kil babye, wisi fia akunum danuma ati, nyapne,” Zakaria arye nyabuk.

<sup>19</sup>Nyabuk ura, amalaikat arye tamubuka nyabuk. “Na ara, talinye kume. Na si ara, Gabriel unune. Na ara, Allah damak unirye, Allah elce dopkwetepmanil ura, laka teleb yupu nyalyanmakine. <sup>20</sup>Anyapmakin ning nirya ara, Allah arye teneamuk talak uk dipkorop winipnamle bukni, ance diba kum tenepmanilama ati, atalak arye dipdongobuka, ami min kum deiamlye talak nirya ara, yupu kum danamkilyebuk unamlame.” Amalaikat Gabriel arye, Zakaria ati nyabuk.

<sup>21</sup>Ayupu tuba talinmarik talak nirya ara, Allah arina ati, aik dam bulubuka wekmek nang arye, ‘Zakaria aik fum fia unmal ning ara, yata arye do?’ tenen, teniltonmek. <sup>22</sup>Sik teniltonmek karen ara, Zakaria aik fum arye kutukuka, buru tam tikilbiyuk ura, yupu ton fia kum nyapmanto ubuk. Yupu kum nyapmanto ubukce, ‘Na yupu nyapnun’ tenen, taruk kununmok. Taruk kununmoka ati, anang nirya arye, ‘E

---

<sup>c</sup> 1:17 *Nabi, Allah el yupu laka nyan nang* ara, Allah arye ‘Ninye kekepnamak’ tenen, elce wibuka deiyamak nang ati, el yupu laka nyabukop ura, anang arye, yuk ninye nirya ati, laka nyalbalamik. Anang ara, nabi nang nyanyabe. Nabi nang sik laka nyan yupu nomor 25 dipdelulume.

lengdar mapmakirye, lengdar deice elilamak ning atonun, Allah arina aik fum arye eipmala ati, unmala' tenen, kel bikik.

<sup>23</sup>Zakaria el Allah arina ati fil dona ap, morona ap talak akunum sirya dakukop ura, el ap, el kil Elisabet ap arye sik mutuku kopropa tamubuka birik. <sup>24</sup>Birik ura, daulamrika ani, Elisabet mi bobukce, el yuk aik fum uk wala pamu barye ulamuk. El yuk mutuku kum balamuk, tonda yuk kilapu arye uruna ati el aik kum yayik. Elisabet el yuk fia ulamuk.

<sup>25</sup>Aulamuk talak ara, ayupu nyalamuk. "Na Ni Allah arye amambul fil akunum dopmanilak mi bopse. Allah arye na ti, bico tenepnukce kanye deipnuk deice arye, mi akunum bopse. Tonda, yuk ninye nirya arye, 'Anda you kile,' nyalammik ura, alye ulamnuka ara, Allah arye akunum kum danipnuke," Elisabet arye nyalamuk.

### Yesus deipnamuka ati, laka nyabuk yupu

<sup>26</sup>Elisabet mi bomuka ani, naku barye wala akunum ubuka talak ara, Allah el im deice fil dona ap, el yupu laka nyananye ap ati, el si Gabriel dopkwetebuk ura, Yudea tam mutuku bukni, Galilea tam noutam asik dolamik asik si ara, Nasaret mutuku laka nyalbiyuk.

<sup>27</sup>Ara, Yahudi yala nang, sik apu kopropa Sisinye, Raja Daud arye deibuk ura, dadeipdanin balamika ani, Daud yala nang arye deibiknye Yusuf ara, elce dopnamne nyalamuk kil, el dam nyalbiyuk. Akil ara, ninye dona kum fia wel kil ulamuk. El si ara, Maria.

<sup>28</sup>Amalaikat Gabriel arye, Maria dam biyukce ayupu nyabuk.

"Na ka kilo telebe. Allah arye an ti kanye deipkukce, fia mambul fil dopnamkile. Allah ara an ap urumunce fia melinamkile," nyabuk.

<sup>29</sup>Malaikat arye nyabuk ura, Maria kekebukce, 'Yata wiripnamnila ati nyapmanil do?' tenen, teninmokce ilil weik ubuka. <sup>30</sup>Ilil ubuk bukni, Gabriel arye Maria ati nyabuk. "Kume an ilil kanye bona meme. Allah arye an ti bico tenebuka, kanye akunum deiamkuke. <sup>31</sup>Allah melipkilya deice arye sal mi bominya ani aminyan talak ami deipminyop ura, el si ara, Yesus nyapnamlyame.

<sup>32</sup>Ami ara aning-aning nirya deice tam ululnye, Allah im deice ulirye aning-aning nirya talilulnye bira, el mi kopropa unamle. Ami ara weik mambulnye anya arye, eibikirye, 'Ara Allah el mi koprop ulule,' nyanamake. Ami ara el apu kopropa Daud,<sup>d</sup> Israel ninye nirya talibuka weik ninye deiyoknye ulamuk touk, el babye, Allah mikip ariplibuk, Israel ninye nirya talibuka, weik ninye deiyoknye unamle. <sup>33</sup>Wini

---

<sup>d</sup> 1:32 *Yesus el apu Daud* nyalamik ning ara, deiyok ani. Maria ap, Yusuf ap ara, sik bitinye arye neika mapmarika ani, Yesus kum deiprik bukni, Allah El Dib Kanye mikip deice melibukba, Maria arye mi bomuka ani, Yesus deibuk. Maria babye, Yusuf babye, Daud yala nang arye deiyamika ati, (Matius 1:16), Yesus ara, Daud yala nang arye deibik nyaptibye.

talibuka unamle talak ara, Israel ninye ara, sik apu kopropa Yakup arye deiamuk ura, dadeipdanin banyak ninye nirya, fia talibuka unamle. Fia kum bataknamle. Elce talinamle ning ara fia talibuka unamla anya arye min kum winipmanto unamle,” Gabriel arye nyabuk.

<sup>34</sup>Nyabuk ura, Maria arye tamubuka asipdeyuk. “Anyapmanilam ning nirya ara, na ninye kum dopse ati yata upnutu do?” nyabuka asipdeyuk. <sup>35</sup>Asipdeyuk ura, malaikat arye tamubuka Maria ati nyabuk. “Allah El Dib Kanye an nong deice deipkilirye, Allah el mikip ara, kanya atonun an nong deice unamkile. Winipnamkila deice arye, mi bominya ani, aminyan talak, malye winin ning tonoknye babye, fia kum wininamle mi deipnamlama ati, ninye nirya arye, ‘Ami ara, Allah el Mi Koprop,’ tenebuka nyanamake. <sup>36</sup>Tonda, an yala kil Elisabet, fia wisi akunum deibuk bukni, el babye, sal mi deipnamle. Elisabet ati, you kil nyalamikbuk, winira mi bobukce wala naku barye akunum upmale. <sup>37</sup>Aning nirya ara winipnamla ara talye ati kume. Deiyok ara ani, aning-aning nirya, Allah ara ikin kum uptue. Allah elda aning nirya kanam uk ulule.” Gabriel arye nyabuk.

<sup>38</sup>Malaikat arye Maria ati ayupu nyabukop ura, Maria arye tamubuka nyabuk. “Na ara, Allah arye, ‘Winiplyame,’ nyanilye ning ara, ‘Teleb’ tenen, kanye deibuka una unun ati, ‘Anyapmanilam touk upnamnile,’ tenepne.” Maria arye nyabuk. Nyabuk ura, amalaikat arye Maria anyak uk batakuka biyuk.

### **Maria arye uruna ati Elisabet dam biyuk yupu**

<sup>39</sup>Atalak aryuk, Maria kintinibuk ura, minopce Yudea noutam weik asik dolamik, mutuku dup awamukce welina ap, koulukuna ap, kipdanin binamuk mutuku biyuk. <sup>40</sup>Biyukce, tonok asik domikak biyuk ura, Zakaria el aik fum wekukce, Elisabet ap eipdarikop ura, “Telebe,” nyabuka kibuk. <sup>41</sup>Maria arye “Telebe,” nyabuk ura, Elisabet kekebuk akarye adip aryuk el mi mun fum tam arye kam lulukuk ura, Allah El Dib Kanye arye Elisabet el kanya talima noutamak yanuka wekukce, langdibuk. <sup>42</sup>Langdibukop ura, Elisabet weik yupu arye nyabuk.

Se, yuk kilapu nirya ara, Allah arye sik ti kanye deililul bukni, an Maria uk ara fia, weik arye melikulule. Tonda, anda sal mi deipnalama babye, Allah arye akunum wibkukce kanye deipkuke. <sup>43</sup>Se na ara yata kil tenepmanilamce nun Ni Allah Israel ninye lyena deiyoknye elin, na dam ara yata ati yanmalam do?

<sup>44</sup>Ance ‘Telebe,’ nyapmanilam ak, kekepmakince adip aryuk mi bopsa ara, ami el kanye deipmalce lulukmale. <sup>45</sup>Allah arye, ‘Winipnamkine,’ nyapdeiamkuk yupu ara, ‘Dipkoprop winipnamnile,’ tenebuka akunum diba tenepnima ati, Allah melipkilye ura kanye deibuka telebuk unalame. Anda weik mambul kile. Elisabet arye Maria ati nyabuk.

**Maria arye, 'Teleb,' nyabuk yupu**

<sup>46</sup>Maria arye ayupu nyabuk.

Na kanye talima nirya tenepmance, na Ni Allah el si erenamane. <sup>47</sup>Tonda, na kanye talima arye, na Lyena Deiyoknye<sup>e</sup> Allah arye lyezmanila ati, na kanye fia deipne. <sup>48</sup>Na Ni Allah, el amuak mitik kil unun ati, elce na ti bico tenepnuk ura kanye deipnukce, weik mambul fil dopnukba, sal mi deipnamna ati, el ti kanye deibuka ara, el si erenamne. Atalak dipdongobuka dotalak unamak ninye babye, na ti 'Elda weik mambul kil,' nyanamniake.

<sup>49</sup>Nyanamniaka ara, talye ati kume.

Ara, na mitik kil ununbuk, Allah im deice fia weik mikipnye birye, mambul fil dopnuka ati, ayupu nyanamniake. Allah elda, talye tuku ak ninye atonunye kume. Elda, fia diksukumnye anya arye, el si ara fia telebe. <sup>50</sup>Yata ninye do nirya, atalak babye, yuk dotalak babye, Allah el ti ilil uplirye amutam ukirye, 'El ara, weik mambul' tenen, el si uk erebuka unyak ninye nirya ara, Allah arye aninye ati luba kina kumce, fia bico tenebuka melilule. Ara, atalak unyak ninye babye, sik arye mapu deibikirye, dadeipdanin, balamice ani, ninye yupa weik upninbanamak kili sal bapye, melilule. <sup>51</sup>Allah el taruk mikip deice arye, weik mambul fil dolamuk. Tonda, sik kanye tenena deice arye, 'Nun weik nang unyabe,' tenebuk, kwalilamik ninye nirya ara, akunum kum danililamukce ara, bisibuka yanilule. <sup>52</sup>Sik weik ninye deiyok nang erepdeipna arye, ulamikak dobuka el amuak deililamuk ura, el amuak ulamik nang ara dobuka ereldelilamukce, teleb ak uk deililamuk.

<sup>53</sup>Tonda, sik aning-aning nirya patalamuk ninye ara, Allah arye sik patapne ning weika arye aribnabuk dololamik ura, boulamuk. Winilamuk ura, sik bona weik talin nang ara, arina kumce talye nong uk dolkwetelamuk. <sup>54</sup>Tonda, el mapu atonun Israel ninye ati, kum lubakilul anya arye, nunda fia malye wininyap bukni, minpola wenena kum usulul bukni, bico tenebuka fia melinauk usulule. <sup>55</sup>Ara, Allah arye nun apu yapu ati, 'Wininamsine,' nyalilamuk touk, akunum winipsile. Ara nun apu<sup>f</sup> Abraham ap, Abraham arye deibuk ura, dadeipdanin, balamika ani winitalak delikce nang nirya ap ati, fia bico tenebuka melinauk ulule.

Ayupu nirya ara, Maria arye nyabuk. <sup>56</sup>Maria ap, Elisabet ap neika ulamdikani, wala winilye akunum maprikop ura, Maria ara el mutuku kopropa Nasaret tamubuka biyuk.

---

<sup>e</sup> 1:47 *Lyena Deiyoknye* Alkitab noutamak ara, Lyena Deiyoknye sekenyaka ara, ton talak Allah tenen ati sekenyake. Ton talak ara, Yesus tenen ati sekenyake bukni, deiyok ara, Yesus el ining arye kilipsuka deice arye Allah arye lyesulule. Lukas arye Allah ati sekuk. Tonda, laka nyana yupu nomor 17 dipdelelume. <sup>f</sup> 1:55 *Yahudi yala nang, sik apu yapu ati*, laka nyana yupu nomor 20 dirume.

### Yohanes mek dongonanye deibuk yupu

<sup>57</sup>Elisabet mi bomuka ulamukani, el mi deipnamuk wala akunum ubukop ura, sal mi deibuk. <sup>58</sup>Atalak ara, el mening dam ulamik ninye ap, el yala ninye ap, “Allah bico tenebuka melyamuka deice arye, sal mi akunum deiple,” nyabik ura kekebikce, sik aninye ap kanye deibik. <sup>59</sup>Sik niryada ulamik ani, pin barye sum akunum ubukop ura, ‘Ami ara Allah el mi unamle’ tenen, Allah arye nyapdeiamuk ura Musa sekamuk touk, ‘El den bam bol mouse ning<sup>s</sup> seknuyap’ tenen, yanmek. Winibikce, el li si uk “Zakaria nyapnuyabe,” nyapdayikce, ami el li si sibik ura, el lin birye nyabuk. <sup>60</sup>“Kumde, ami el si ara, Yohanes nyapnamabe,” nyabuk. <sup>61</sup>Nyabuk ura, aninye nirya arye tamubuka Elisabet ati nyabik. “Ka kilo, an tam ninye nirya ara, asi ton kum si sinyake,” nyabik. <sup>62</sup>Nyabikce, ami el li Zakaria ati, ami ara elce, ‘An mi ara, el si ati, yata si dopdeipnamselyam do?’ tenen, taruk pukdeibikce asipdeyik.

<sup>63</sup>Asipdeyik ura, Zakaria arye tamubuka taruk pukukce, ‘Mitik kail lakase, ara, sekne ning aripnuniyak’ tenen, morobuk. Morobuk ati, aribik ura, Zakaria arye, ‘Ami el si ara, Yohanes,’ nyabuka sekdeibuk. Winibuk ura, abulubuka wekmek nang nirya arye, ‘Se,’ nyabuka ngalukunmek. <sup>64</sup>Zakaria arye, ami si akunum sekukdeibukop ura, adip aryuk Allah arye el sitang teleb kipdeibukce, yupu aribuk ura, atalak yupu deiya koubuka nyanmokce, Allah si erenmok. <sup>65</sup>Winibukop ura, Yudea mutuku noutam sik anoutamak ulamik ninye nirya, awinipmok ning ati, ‘Se, aning ara mambul weik ning’ tenen, malye nyanmekce yupu talilamik. <sup>66</sup>Yupu nyalamik ati yupu kekelamik nang nirya arye, teniltolamikce, fia asildalamik. Elisabet ara Allah el mikip deice arye meilyamuk ura Yohanes deibuke. Deibuk ura, Allah arye ami meilyamukba, fia telep uk ulamuka ati, sik eiyamik nang nirya ara, asildalamikce ayupu nyalamik. “Ami deibuk talak winibuk ning nirya ara, weik mambule ati, ami ara neplirye yatatonunye upnamle do?” Nyalamik.

### Yohanes el li Zakaria arye nyabuk yupu

<sup>67</sup>Allah El Dib Kanye arye, Yohanes el li Zakaria kanye talima wekuka langdibukop ura, aminyan winipnamuk ning ati ayupu laka nyabuk.

<sup>68</sup>Zakaria arye aminyan talak upnamle ning ati, ayupu nyabuk.

Nun Ni Allah ara telebnye ulule. Nun Israel ninye fia kalikuka melisulul Allah ati el si erebuka kipne. Ara, Israel ninye el mapu nun lyena ati, akunum yanuka kintinipmasila ati, el si erebuka kipne. <sup>69-70</sup>Allah arye nun apu kopropa Abraham ati, “Winipnamne,”

---

<sup>s</sup> 1:59 *den bam bol mouse ning sengna* – Ayupu deiyok kel bikna ati, laka nyana yupu nomor 19 dirume.

nyapra deiamuk ura, el yupu nyabuka laka nyalamik nang, nabi nang arye, sekeiyamsik touk, Allah el fil dolamuknye Daud arye deibuka, dadeipdanin, yangalamica ani deipnamlanye bira, nun lyena ati, Lyena Deiyouknye weik mikipnye akunum erepdeipmasile. <sup>71</sup>Elce lyepnamsila ara, ‘Nun lik’ tenen, tapu kouna ap, ona ap usinyak nang arye, talisinyak noutamak ara, Allah arye loplopnamsile. <sup>72</sup>Tonda, Allah arye nun deiyamsik deiyok nang ati, bico tenebukce, kanye talima aryamuka anya arye, aning batakna kumce, lyepsirye arye teleb uk keipnamsile. ‘Israel ninye na ninye,’ tenenunce, “Winipnamsine,” nyapdeiamsukce, afia dilamukani, akunum kintinipmasile.

<sup>73</sup>Allah arye nun apu kopropa Abraham ati, “Winipnamsine,” nyalamuk yupu ara, ani.

<sup>74-75</sup>“Ara, ‘Sikda nun lik’ tenen, ona ap, tapu kouna ap winisikirye, talipsik nang ati, na Allah arye loplopnamsine. Loplopsinye ura, ilil kum arye, na fil uk fia donamlume. Ara, sik yuk ninye arye talye kanye bobuka winilamakto kum bukni, malye winina fia kumce, diksukum upmunce, anggun unamlum talak nirya ara, na arye anggun ti, ‘Wininamlulume aning ara kum wininamlulume,’ nyabuka aryamsise yupu, ‘Moubuka talimunce, na fil uk fia donamlume’ tenen, na mikip arilnamsine.” Allah arye nyalamuk.

“Allah arye nun apu kopropa Abraham ati nyapdeiamuk touk, akunum winipmasila ati, nyapsine.” Zakaria arye nyabuk.

<sup>76</sup>Zakaria arye ayupu nyabukop ura, el mi Yohanes deipmoka ati, ayupu nyabuk.

Na mi Yohanes ara, nun Lyena Deiyouknye ati, el yanamle bisik menekuka kintinilinalama ati, yuk nang arye, ‘Allah aning-aning nirya alip tam ulirye weik mikip ulinye bira ara, el yupu laka nyalulnye nabi bira, Yohanes el ulule,’ nyanamkiake. <sup>77</sup>El bisik kintininalam ara, Yohanes ance, ‘Allah el mapu sik lyen ning kel biknamak’ tenen, laka nyanamlyame. Ara, ninye nirya, sik malye unyak ning ap, malye tenenyak ning ap ati, Allah arye namin kiplirye, kum danipnamle deice arye lyepnamle yupu ara, laka nyanamlyame.

<sup>78</sup>Nun Ni Allah arye ninye nirya ati, minpola wenebuka kum osulul bukni, kanye talima ariplye ura, bico tenebuka melisululnye anya arye, nun malye ning nirya kum kipsilirye lyepnamsile. Berentam talak kiting deiplirye, kuna ak dirina ulamle atonun nun Ni Allah arye nun lyenaNye im deice arye dopkweteplibuk, nun dam yanamsile. <sup>79</sup>Nun kuna ap, dipna ap noutamak unyap ninye dam yalye ura, dirina kipdeipsilirye, lyepnamsile. Nun Lyenanye dirina kipsilirye, nun ap, Allah ap, ‘Teleb kibuka neika unamak’ tenen, bisik peterenamsile. Na mi Yohanes an wininamlam ning ap, nun Lyenanye elce winipnamle ning ap ati, nyapne. Zakaria arye nyabuk.



<sup>80</sup>Yohanes el nong nepnin balamuk talak ara, el kanye talima mikip weik arye wisipnin balamuk. Akunum nepnin balamuk talak ara, ninye ap, mek ap fia kumak dabinuka ulamuka ani, Allah arye ‘Wininamle,’ teneamuk fil, el fil lakak deiyok koubuk talak uk yuk Israel ninye ulamikak biyukba, Israel kili sal nirya elilamikce, er ti kil bilamik.

### Maria arye Yesus deibuk yupu

**2** <sup>1</sup>Atalak ara, Roma mutuku noutamai ulamik ninye nirya talyamuka weik deiyoknye, Roma mutukunye Kaisar Agustus arye, “Nun Roma mutuku nang arye talinyap ninye, ‘Yatato ubuka unyak do?’ tenen, si seknamabe,” nyapdeibuk. <sup>2</sup>Aninye si sekna yupu minop nyapdeibuk talak ara, Siria mutuku talyamuknye, gubernur Kirenus tuba ulamuk talak arye nyabuk. <sup>3</sup>“Anggun si sekna ati, anggun mutuku kopropa tamubuka bilulume,” nyabika ati, amutuku-amutuku ulamik ninye nirya, sik deiamik mutuku uk tamubuka biyik. <sup>4</sup>Aninye nirya biyik touk, Yusuf babye, Daud yalanye anya arye, Galilea tam ulamuk mutuku Nasaret batakuka, Yudea noutamak Daud yala deiyok kouna ati, Betlehem<sup>h</sup> mutuku biyuk.

<sup>5</sup>Yusuf ara, ‘Nun si seknamsiak’ tenen, el dopnamne nyalamuk kil Maria ap, kum dopdanamrik talak, mi mun fum bomuk karen Betlehem mutuku birik. <sup>6</sup>Betlehem mutuku birikce unmarik talak ara, Maria mi deiya koubuka dinmok. <sup>7</sup>Mi deiya koubuka dinmoka ani, Maria arye sal mi minop deibuk. Betlehem mutuku ninye asik nang malamik aik ara lo fia ton kum ubukce, libuk ura, Maria buru tam aik el mi deibukop ura, domba basam dina ati yangabuka deiamikce dina yangabuka arilamik deice deibuk. Tonda, cang butum aling kwelikukabukce, aning arye ami pakubuka deibuk.

### Malaikat arye domba wein nang ati, laka nyalyayik yupu

<sup>8</sup>Maria arye Yesus deibuk sum lukunyan uk, Yesus deibuk aik ara, mitikto yukak upmok ura, domba wein nang sik domba katak mutuku weinmek. <sup>9</sup>Sik domba weinmek ura, Allah el im deice fil donanye, malaikat dopkwetebuk ura talye karin arye sik dam tikilyayuk ura, Allah el dirina weik ubuk akarye kiting sinarya ato ubuk ati, sik ilil weik ubuk. <sup>10</sup>Sik ilil weik ubuk ati, amalaikat arye nyabuk.

“Anggun ilil una meme. Na arye anggun ti laka teleb yupu boyanmasina ara, ninye mutuku-mutuku nirya kekebikirye, weik kanye deipnamake. <sup>11</sup>Ara, Daud el mutuku Betlehem noutamak arye,

---

<sup>h</sup> 2:4 *Betlehem* mutuku ara, Yahudi yala ninye sik apu weiknye Daud deiyamik mutuku. Nasaret arye Betlehem bisik bana ati ning ara, liki winilye sum banmaca ani, Betlehem banyake. (1 Samuel 17:12)

ninye nirya Lyena Deiyoknye akunum deipmasile. Ami ara, weik ninye deiyoknye unamle. Ara, Allah arye ninye weik lyeplirye, sik kanye talima talinamle talak deiyoknye bira, ‘Ami upnamle’ tenen, wibuka deibuk mi ara ani. Ami ara, Kristus ulule. <sup>12</sup>Betlehem mutuku bimunyop ura, ‘Ami ara ani’ tenen, pitin kin ning eipmumce, kel biknamluma ati, butum aling kitibuka domba din tarika deice deipmalyak eipnamlume. ‘Anyapmasu mi ara, ani,’ tenenammlume,” nyabuk.

<sup>13</sup>Ayupu akunum nyabukop ura, Allah arye nyalin yupu laka nyan nang weik arye minop yayik. Amalaikat yupa weik ap, asum yanmok malaikat ap, Allah si erenmekce ayupu nyanmek. <sup>14</sup>“Allah weiknye im deice ululnye bira, fia telebe. Yata ninye do nirya, Allah arye kanye deilinamle ninye nirya ara, teleb updeiplibuk, mambul kanye bona kum arye, kanam kanye bobuka telebuk unamake,” nyabik. <sup>15</sup>Nyabik ura, amalaikat nirya tamubuka im deice biyikop ura, adomba wein nang arye nyabik. “Allah arye nyapmasil ning eipnuyaba ati, Betlehem mutuku dilbinuyabe,” nyabik.

<sup>16</sup>Nyabikop ura, adip aryuk Betlehem mutuku biyikke, Maria ap, Yusuf ap, ami butum aling kitibuka domba basam dina arilamik deice deipmarikak eibik. <sup>17</sup>Akunum eibikop ura, adomba basam wein nang arye, malaikat arye ami ati nyapmek yupu ara, amutuku ulamik ninye kekena ati, laka nyalbanmek. Nyanmek ura, ninye weike kekenmek. <sup>18</sup>‘Ayupu kekenmek ninye nirya ara, adomba wein nang nyapmek yupu ati, se’ tenen, ngalukunmek. <sup>19</sup>Sik ngalukunmek bukni, Maria arye el talima noutam aryuk kanye, fia tenena uk ulamuk. <sup>20</sup>Sik domba wein nang ara, Malaikat arye ayanmek ura, kekenmek ning atouk winipmokak eibik ura, sik mutuku kopropa tamubuka banmek talak ara, Allah si erepnin banmek.

**Maria ap Yusuf ap arye, Allah arina ati, Yesus  
dobuka Allah arilamik aik bobirik yupu**

<sup>21</sup>Ara, Allah arye Yahudi yala ninye ati, “Wininamlulume,” nyalilamuk touk, Maria ap, Yusuf ap, Yesus ap, like pin barye sum akunum mabikop ura, Yesus el den bam bol mouse ning sekna talak akunum ubuka ati, Maria mi kabul kum bomuk talak, malaikat arye, “An mi deipminyop ura, el si ara Yesus nyapnalyame,” nyapdeiamuk touk, ami el si Yesus nyabuka, si siprik. <sup>22</sup>Musa sekamuk yupu<sup>i</sup> noutam arye, ‘Anggun nirya sal mapu deipmunyop ura, anggun teleb kemdina ati, Allah ati arin ning arinamlume,’ nyapdeiamuka anya arye. <sup>23</sup>Yesus el si dobukop ura, Musa arye, ‘Nyamukce winiryuk sal mapu deipmunye talak ara, Allah arina

---

<sup>i</sup> 2:22 *Musa seklamuk yupu* lak len yupu ara, nomor 35 dipdelulume.

aik fum wekna meme,' nyabuka sekamukce<sup>j</sup> nyapdeiamuk touk, Maria el babye, el aik fum uk daulamuk ani, like 40 sum akunum ubukaop ura, 'Nun mi Yesus bobuka, Allah ati aripnamname' tenen, Yesus bobuka Yerusalem mutuku bobirik. <sup>24</sup>Tonda, Musa sekamuk touk, "Yalma maka atonun maka, akumop ura, lon maka atouk maka obuka, Allah ati arinamlume," nyapdeiamuk touk,<sup>k</sup> 'Aripnamnam' tenen, Yerusalem mutuku bobirik.

<sup>25</sup>Sik Yerusalem mutuku birik talak ara, tonoknye el si ara Simeon, Allah fia talibuka diksukumuk ulamuknye aunmok. Simeon ara, Allah lyeptiliryne, nun talima ap, nun Israel tam nirya ap, fia talinamsil talak ara, 'Winitalak yanamle do, yata talak do?' tenen, fia kintinibuka dilamuk. Winilamuka anya arye, Allah El Dib Kanye arye Simeon ati, el mikip weik aryamuk ura ulamuk. <sup>26</sup>Minop talak Allah El Dib Kanye arye Simeon ati nyalamuk. "An min kum dipmamenye talak, 'Ninye nirya lyeptiliryne, sik talima talinamle' tenen, Allah arye dopkwetepnamlanye Kristus bira, an asing arye eipnamlame," nyamuk. <sup>27</sup>Nyamuka anya arye, Allah El Dib Kanye arye Simeon el talima noutam nyapdeibuk ura, Allah ati arilbalamikce el si erelamik aik dam biyuk. Biyukce daunmok ani, Maria ap, Yusuf ap, Allah arye, 'Winamlulume,' nyapdeibuk ura 'Musa arye sekeiyamsuk touk aning winipnunan' tenen, Allah ati arilbalamikce el si erelamik aik dam wekrik ura, Simeon aunmokce eibuk.

<sup>28</sup>Simeon eibukop ura, Yesus dobuka eribukce, Allah el si erebuka ayupu nyabuk. <sup>29</sup>"Na Ni Allah, ance aning-aning talibuka ulyamce an teneamlum touk, aning nirya winilyame. Ance nyapdeiamnulum touk, na asing arye winitalak ance nun tukwak ninye lyena ati dopkwetepsulumnye, na akunum eipmana ati, 'Simeon dadiptue,' tenepniminye ura teleb kanye bobuka dadipnamne. <sup>30-31</sup>Aning ara talya ati kum nyapne. Deiyok ara ninye lyena ati, Lyena Deiyoknye dopkwetepmasilamnye, tukwak lake yalye ura, ninye mutuku-mutuku elinname. Tonda na babye, akunum eipmana anya arye, winitalak ara, na dibina telebuka. <sup>32</sup>Weisa dirina uplibuk ninye teleb ubuka elilamak touk, alyena deiyoknye bira, Yahudi yala kum ninye kekena ati, Allah dipkorop yupu laka nyalamnye ura, dib tenebuka kekepnamake. Kekebice

---

*j* 2:23 *Musa sekeiyamuk yupu* – Minop talak Yahudi yala kilapu, sik mapu weniryuk deipmanop ura, Allah arin aik fum kum weklamik. Ara Musa el sekamuk yupu, mem yupu deice arye sekuk ati, aning kum winilamik. Mana like 40 sum akum upnop ura, kam un ning obuka Allah arina aik deiyok nang arilamikce tonap, anyaik wekuka Allah morolamik. Amem yupu wamuka ati, Maria ababye Yesus deibukce, talya daulamuka ani, akunum 40 sum kibibuk ati, 'Yesus el si laka nyapnimiryne, Allah deice deipnamname' tenen, Yerusalem mutuku Allah arina ap, el si erena ap ati aik weik aik birik (Keluaran 13:2, 12). Tonda laka nyana yupu nomor 35 dipdelelume. <sup>k</sup> 2:24 *Yalma arina* – Imamat 12:8 Yiniplulume.

ura sik talima noutam ara dirina uplye ura, an ti moubuka biknamake. Tonda, mutuku-mutuku ninye nirya arye, ‘Se, Ninye Lyena Deiyoknye, Allah arye Israel ninye noutam arye wipdeiamuka ati, Allah el mapu Israel ninye ara, fia mambul unyake,’ tenenamsiyake.” Ayupu ara, Simeon arye Maria ap, Yusuf ap, sik mi Yesus winilnamuk ning ati nyabuk.

<sup>33</sup>Simeon arye nyabukop ura, Maria ap, Yusuf ap, kekeprikce, ‘Se anyapmasil yupu ara, fia mambul,’ teneprrik. <sup>34</sup>Simeon arye sik bitinye ati, “Allah arye teleb ulinamsile,” nyapdeibukce, Maria el yuk ati ayupu tonap nyabuk. “Allah arye, ami wibuka deibuka deiyok ara, el fil dolamlye ura, Israel ninye kan-kan arye, ton nang el nyalul yupu batakikcop ura, Allah arye amutam kipdeipnamle. Ton ninye arye, ‘Diba’ tenen, kekebuka doprobikce ninye ara, Allah arye aninye lyebuka ereipnamle. Ami Yesus fil dolamlye deice arye, Allah arye ninye weik lyeplirye, kanye talima talinamsil ning lak nyanamsile. Nyapsilyop ura, ninye weika arye, el nyalul yupu ati, malye yupu nyanamake.

<sup>35</sup>Ami ara, el aunamle ning nirya deice arye, ninye kanye talima noutam arye, ‘Allah ati nun like,’ duknubuka tenelamak ning nirya lak kilinamle. Tonda Maria anda, dula ning luksilye ura, uk weik dilamsil touk, an mi ati malye unamak ning deice arye, kanye talima fia sukunamkile.” Simeon arye nyabuk.

<sup>36-37</sup>Atalak ara, tonok fia wisi kil el si ara, Hana ulamuk. Hana ara, Asyer yalanye, Fanuel el kilmu bukni, ninye akunum domukce, kiting tamun tek barye neika ulamrika ani, el sal dibukop ura, yuwak uk ulamukce Allah arye, el ti nyapdeiyamuk yupu laka nyan kil, nabi kil ulamuk. Winilamuk ning ara, kiting noutam babye, lukunyan babye, fia batakna kum arye, Allah morona uk ulamuk. Ton talak ara Allah kina ati, dina kum si tebuka bataklamukce, Allah arilbalamik aik uk ulamukce, Allah morobuka ulamuk. Winipra ulamukani, kiting tamun 84 tahun akunum wise danamukce daulamuk. <sup>38</sup>Winilamuka anya arye, Maria ap, Yusuf ap, anyaik abobuka unmarik talak ara, Hana sik dam yayukce, Allah ati, “Telebe,” nyanmokce, Yesus winipnamuk ning ati laka nyabuk. Tonda, ‘Allah arye nun Yerusalem mutuku unyap ninye lyeptsutue’ tenen, dilamik nang anyasik unmek nang sik kekena ati, Yesus arye aminyan talak winipnamuk ning ati, yupu ton laka nyabuk.

<sup>39</sup>Maria ap, Yusuf ap Allah arye, ‘Wininamlulume,’ nyapdeibuk ura, Musa birye sekamuk yupu noutam nyapdeiamuk touk, akunum winiprikop ura, Yerusalem mutuku batakuka, sik mutuku kopropa, Galilea tam noutamak bukni, asik si ara Nasaret mutuku, tamubuka birik talak ara, Yesus bobuka birik. <sup>40</sup>Birikce, sik daulamika ani, Allah arye Yesus ati, kanye deililamukce melilamuk ura, weik arye nepnin balamukce, el nong mikip ap, Allah winin ning kel bikna deiyok ning ap, el kanye talima noutamak, weik upnin balamuk.

**Allah arilbalamik aik, Yesus el yuk unмок ati, nyabuk yupu**

<sup>41</sup>Ara, Yesus el lin Maria ap, el li Yusuf ap, kiting tamun nirya ara, Yerusalem mutuku balamrik. Ara, Kaplina ati Kwalina<sup>1</sup> ning yuna ati, Yerusalem mutuku balamrik. [Kaplina ati Kwalina ara Paskah nyalamik yuna. Allah arye Mesir mutuku nang sik minyuma mapu opnyuyuk talak ara Israel nang asik kaplibuka biyuk ati, kaplina yuna nyalamik.]

<sup>42</sup>Akiting tamun nirya balamrik touk, Yesus kiting tamun 12 tahun akunum ubuk ura, Paskah yuna ati, Yerusalem mutuku biyik. <sup>43</sup>Aning akunum winibikop ura, Maria ap, Yusuf ap, ‘Nun mutuku tamubuka binuyap’ tenen, sik birik bukni, Yesus ara Yerusalem anyuk unmokka ara, sik kum bikmarikce, ‘Neika teleb arye weik banmak kan-kan banmalarye’ tenen, talye mangkau kanye bobuka banmarik.

<sup>44</sup>Talya mangkau kanye bobuka banmarik ani, tonok sum akunum ubuk ura, bisik noutam banmarik karin aryuk, ‘Nun mi danak unmal do? Nun kayapu ap, nun yala nang ap, Yesus ap daunmak do?’ tenepricke, ‘Yesus dan unmal do’ tenen, sik neika ulamik nang dam dilbirik. <sup>45</sup>Dilbirik bukni, Yesus akum unmokak, kum eiprik ati adip aryuk tamubuka, ‘Yesus danak unmal do?’ tenen, Yerusalem mutuku yanmarikak uk tamubuka elbirik.

<sup>46</sup>Yerusalem birikop ura, liki winilye sum tonap nirya ara, el tonok enmarika ani, Allah ati arilbalamikce, el si erelamik aik ara, Yesus aunmokak eiprik. Yesus ara, sik Allah yupu peterena deiyok nang kan-kan bukmokce, sik nyanmek yupu ara, el kekenmokce asildenmok.

<sup>47</sup>Sik peterena deiyok nang arye el ti asinmekbuk, elce tamubuka sik ti nyanmok yupu nirya kekenmek nang nirya ara, ‘Se yata wiribuka arye ami aning-aning bikam turye laka nyaptu do? Se ami ara, fia kel weik mi,’ tenebuka ngalukunmek. <sup>48</sup>El li ap, el lin ap, eiprikce lukdanuka yukuproprik ura Maria arye ayupu ton nyabuk. “Amio, anda nun ti yata ati winipsulum do? Ani ap, na ap, ‘Se, nun mi dan unmal do?’ tenen, nun kanye imun upsuk ati ekinyame,” nyabuk.

<sup>49</sup>Nyabukop ura, Yesus arye tamubuka nyabuk. “Yata ati, na ni ap, na nin ap anggun bitinye na ti enudurum do? Adip aryuk na Ni Allah el aik unmana ara, kum tenepmanurum do?” nyabuk. <sup>50</sup>Nyabuk ura, sik bitinye akunum kekeprik bukni, ‘Deiyok ara ati nyapmasil’ tenen, kum bikrik.

---

<sup>1</sup> 2:41 *Kaplina ati Kwalina* nyalamik ning ara, deiyok ani. Ara, sik Israel ninye Mesir mutuku noutam tuba ulamik talak ara, Allah arye Mesir mutuku ninye wenena ati, sik minyuma mapu oplobuk. Sik minyuma mapu oplobuk bukni, Israel ninye arye, ining bobuka, sik bublan deice tam ap, danatam-danatam ap, likeibikak eibukop ura, sik aik wekna kumce, talya mangkau kibuka sik aik kaplibuka bisibuka banmokce, sik minyuma mapu kum obuk. ‘Aning nirya, tuba teninamap’ tenena ati, kiting tamun nirya, Israel ninye arye Kaplina ati Kwalina, kwalibuka dilamik.

<sup>51</sup>Amenyan ara, Yesus ap, sik bitinye ap, sik mutuku kopropa Nasaret mutuku tamubuka biyikop ura, el lin el li nyalamrik yupu nirya kekebuka ulamuk. El lin Maria arye, Yesus nyanmok yupu ap, sik elinmarik ning ap, aning nirya ara, el kanye fum tam fia teninmok. <sup>52</sup>Allah arye Yesus ati, kanye deibukce, fia melilamuk ura, Yesus el nong ap, Allah arye winin ning kel kina deiyok ning ap, weik winilamuk ura, ninye nirya arye el ti, kanye delilamik.

**Amenyan ara Yesus yanamuka ati Yohanes arye peterelamuk yupu**  
(*Matius 3:1-12; Markus 1:3-8*)

**3** <sup>1</sup>Roma mutuku nirya weik ninye deiyoknye Kaisar Tiberius talyamuk talak, anirye dipdongobuka, kiting tamun koklom dekin 15 akunum ubuka talak ara, Pontius Pilatus dobuka, ‘Yudea tam talipnamle’ tenen, Gubernur kipdeibuk. Atalakuk Galilea tam talyamuknye, Herodes pemerintah nang deiyoknye kipdeibuk. El weit kopropa Pilipus arye Iturea tam ap, Trakonitis tam ap, talyamuk. Atalakuk Abilene tam talyamuknye bira, Lisaniyas ulamuk. <sup>2</sup>Anang talyamik noutamak arye, sik Hanas ap, Kayapas ap, Allah arina ati, el si erena aik fum fil dona weik deiyok nang<sup>m</sup> ulamrik. Sik afil dobuka ulamrik kiting tamun deice arye, Zakaria, el mi Yohanes ninye kum mutuku ak ulamukba, Allah arye Yohanes ati Yupu nyalyayuk. Apeterelamuk talak ara ayupu peterelamuk. <sup>3</sup>Yupu yanuka nyabukop ura, Yohanes arye Yudea tam noutamak bukni, Yordan mek dana-dana Allah yupu peterepra balamukce, diba tenebik ninye bobuka, mek dongolamuk. Peterepra balamuk talak ara, ayupu peterelamuk.

Yohanes peterelamuk ning ara, ani. “Anggun nirya, anggun kanye talima malye tenelulum ning ap, anggun malye umunye ning ap, batakmunce kanye dangupmunye ura, Allah arye anggun malye winin ning nirya kum kipdeipsilirye, kum daneipsilyop ura, na arye mek dongopnamsine,” nyabuka peterelamuk. <sup>4</sup>Ara talye ati kume. Allah yupu laka nyalamuknye, nabi Yesaya arye nyalilamuk touk, anye bira Yesus yanamuka ati, Yohanes arye afil dolamuk. Yesaya arye nyalilamuk domon yupu ara ani.

‘Na Allah ara na yupu laka nyalinanye birye, ninye kum mutuku ak ayupu nyalule. “Nun weik ninye deiyoknye yanamle bisik ara, kintinipnamlume. Ara ninye deiyoknye yanamle ati, bisik funguk yabuka delinamlulume. <sup>5</sup>Mutuku dokbong-bong ak nirya ara, gon ak arye dalubuka pala kilinamlulume. Mutuku dup nirya ap, dalubuka pala kilinamlulume. Gwalin bisik nirya ara, lepsisikuka funguk

---

<sup>m</sup> 3:2 Allah ati arina deiyok nang, sik weik deiyoknye ati, laka nyana yupu nomor 14 dindelelume.

yalinamlulume.<sup>n</sup> Bisik mutuku lil kwa bisik nirya ara, fum uawamlya ak ara, tuku delinamlulume. Keil dula belyamlya ak nirya ara, lukuka lepsisikuka telebuk ulinamlulume. <sup>6</sup>Amenyan ara, ninye mutuku-mutuku nirya Allah lyeplirye ninye kanye talima fia talinamsil ning deiyoknye eipnamaka” atia.’ Yesaya arye nyabuk. *(Yesaya 40:3)*

<sup>7</sup>Yohanes arye ninye mek dongolamuk talak ara, ninye sik weika arye, ‘Mek dongopnamsil’ tenen, Yohanes peterelamukak kekelbalamik. Balamikce, sik tuba malye ulamik ninye yayik ura, eibukce anang ati ayupu nyabuk. “Anggun yu una ap, tenebuka arye talye yupu nyabuka duknuna ap, winimunya ara, ninye si ton kwatima duknubuka mapmalya arye, si tolamla atonun ululume. Allah arye malye winin ninye wenebuka opnamle ati, ‘Opsilyak’ tenen, ‘Bik-bik abuka bilulume,’ nyabuka laka nyapsuknye bira, yatanye birye do? <sup>8</sup>Anggunce, ‘Nun malye wininyap ning akunum batakape,’ nyabuka, talye yupu deice arye nyapnutum bukni, yo duk moulamlya eklamle touk, dipkorop batakmunce, diksukumuk winiptumbuk, eiptinyeto ura, diba tenepsitinye. Ati, anggun malye winimunya ning adip aryuk batakmunce, telebuk wininamlume.

Tonda, ‘Kume, nun apu kopropa bira, Abraham usulula ati, Allah arye kum wenepnamsile,’ tenebuka kum nyanamlulume. Aning ara utenena meme. Allah arye, ‘Abraham el mapu na doproptinye’ tenen, teneptuop ura, aubuk keil arye dobuka Abraham el mapu kwepdeiptue. <sup>9</sup>Yo wena deiyoknye birye, yo wepnamle ati,<sup>o</sup> el ya dobuka yo deiyok dam kintinipmale. Teleb yo duk kum moulamlye yo nirya ara, weplirye uku dongopnamle.” Yohanes arye aninye nirya ati, adomon yupu nyabuk.

<sup>10</sup>Nyabukop ura, el yupu kekenmek ninye arye tamubuka asipdeyik. “Aning ati ara, ‘Allah arye nun ti, wenebuka opsulyak’ tenen, nun adip aryuk yata wiripnamap do?” nyabuka asipdeyik. <sup>11</sup>Asipdeyik ura, Yohanes arye tamubuka ayupu nyabuk. “Ongon butum bitinye uplinye bira, ongon butum fia kum uplinye biti arepnamlule. Din ning uplinye bira, din ning fia kum uplinye biti arepnamlule,” nyabuk. <sup>12</sup>Tonda, amutuku talyamik deiyok nang arina ati, pajak yo bok bulubuka delin nang ton, “Nun ni peteresinanye guruo nunda, ‘Allah arye lyeptsutue’ tenen, ati ara yata wiripnamap do?” nyabuka asipdeyik. <sup>13</sup>Asipdeyik ura, Yohanes arye tamubuka nyabuk. “Amutuku talina deiyok nang arye, ‘Pajak yo bok ara, winibuka dolonamlulume,’ nyalamak touk, aning uk dolonamlulume. Tonap tabakuka ubula dolona meme,” nyabuk.

<sup>n</sup> 3:5 “*Pung bisik uk yapdeipnin banamlulume,*” nyabuka ara, dipkorop bisik yapdeipnin bana ati kum bukni, ninye sik talima kintinilina ati nyabuk. Ara, sik malye wininyak ning nirya batuka, Yesus diba tenebikirye, “Teleb uk unamak’ tenen, adomon yupu nyabuk.

<sup>o</sup> 3:9 *Yo wena* nyabuka deiyok ara ani. Ara, malye winilamice ninye ara, Allah arye aninye ati wenebuka opnamle talak, akunum dam upmasila ati, adomon yupu nyabuk.

<sup>14</sup>Tonda, yin talin nang arye asipdeyik. “Nunda, yata wiripnamap do?” nyabuka asipdeyik. Asipdeyik ura, Yohanes arye nyabuk. “Anggun deiyok nang arye, anggun fil dona ati, dekna ning arepsikce ninguk, kanye deibuka dolonamlulume. Yuk talye urdem ninye sik ning ton dalubuka doldona meme. Tonda, sik malye kum upmakibuk, telila yupu deice ‘Anggun malye winipmalume,’ nyabuka luluna meme.” Yohanes arye ayin talin nang ati nyabuk.

<sup>15</sup>Atalak ulamik ninye nirya ara, ‘Allah arye Ninye Lyenanye, Kristus dopkwetepnamsil’ tenen, kintinipdeibuka dilamik anya arye, ‘Kristus ara, Yohanes akunum ulul do, kum do?’ tenen, teniltona uk ulamik.

<sup>16</sup>Utenebuka nyanmeka ati, Yohanes arye aninye ati nyabuk.

“Anggun malye ning nirya batakmunye ura, mek dem dongosunun bukni, na ara mitik mambul tonye binya arye, aminyan talak yanamlanye deiyoknye bira, elda weik mambulnye. Na ara, mambulnye kuma ati ara, fia malye fil uk bukni, el sandal kulongon tapu na arye kum loploptinye. Na arye mek dem dongosinibuk, anggun nong nirya mek siknilamle atonunuk, aminyan yanamlanye bira, el mikip fia weike ati, elce Allah Dib Kanye aripsilye ura, anggun kanye talima nirya talinamsile. Uku arye malye ning dilolamle touk, Allah El Dib Kanye arye, anggun malye winin ning nirya dobuka donoksilirye kum daneipnamsile.

<sup>17</sup>Yakong dipnulinye bira, yakong bama labuka uku dongoplirye, yakong nong uk dilamle atouk, Allah arye ninye nirya bokuka atonun winipnamle.<sup>p</sup> Ninye arye din ning teleb ning, yo lalina deice delilamak touk, Allah arye el ti diba tenebuka teleb unyak nang ara, dobuka im deice deiplibuk, el ap neika unamake. Tonda, ninye arye din ning bama labuka uku dongolamak atonun, Allah arye malye un ninye nirya dobuka ukuak dongopnamle. Auku ara fia kum tangaproptue, fia dinamle.” Yohanes arye awekmek nang nirya ati nyabuk. <sup>18</sup>Ayupu ap, yuk yupu ap deice arye, ‘Aninye sik malye wininyak ning batakuka, telebuk wininamak’ tenen, “Yesus ati dib tenebipyop ura, elcuk nun malye ning kum daneipsilirye lyepnamsile,” nyabuka, Allah el laka teleb yupu peterelamuk ura kekelamik.

<sup>19</sup>Ara, aninye kekelamik bukni, amutuku pemerintah weik ninye deiyoknye Herodes, el malye winibuk ning ati, Yohanes arye wenebukba, Herodes arye nyapdeibuk ura, Yohanes tapu koubukabikce, wenena aik dongobik. Yohanes arye Herodes wenebuk ning ara deiyok ara ani. Ara Herodes el weit koprop kil Herodias, ubula dalubuka doprobukce, doprobuk ning ap, ton malye ning fia weik ulamuk ning ap ati, Yohanes arye Herodes ati wenebuk. <sup>20</sup>Herodes ara malye winin ning weike

---

<sup>p</sup> 3:17 *Bace bama* – Allah yupu minop talak sekik ning ara, bace kum nyabik. Sikce, Gandum ning ati, domon yupu nyabik bukni, ayupu deiyok ara, atouka.



akunum winilamuk ura, Yohanes wenena aik dongobuk ning ara, aning deice arye malye ning tonap tabakuka winibuk.

**Yohanes arye Yesus mek dongobuk ning ap, Yesus el yok pununa nang ap ati nyabuk yupu**

*(Matius 3:13-17; Matius 1:1-7; Markus 1:9-11)*

<sup>21</sup>Amutuku ninye weik arye, ‘Yohanes mek dongopnamsil’ tenen, el dam yangalamik talak ara, Yesus ton yayuk ura, Yohanes arye mek dongobuk. <sup>22</sup>Mek dongobukba, lukuka tikuk ura, Yesus arye dinmok talak ara, adip aryuk Allah arye im deice pakibukce, Allah El Dib Kanye ara, yalma maka atonun dayukce, Yesus el nong deice bulyayuk. Bulyayukop ura, Allah im deice arye ayupu nyabuk. “Anda na Mi Koprop ulyame. Na arye an ti fia bicoe tenekenuna anya arye, an ti na kanye fia delikunune.” Allah arye Yesus ati nyabuk.

<sup>23</sup>Yesus deiyok koubuka peterepra balamuk talak ara, kiting tamun yupu tonok kepdonye, taku barye akunum ubuk. Yesus el li bira, Yusuf tenelamik. Yesus el yok pununa nang si ara, ani. Yusuf el li si ara, Heli. Heli el li si ara, Matat. <sup>24</sup>Matat el li si ara, Lewi. Lewi el li si ara, Malki. Malki el li si ara, Yanai. Yanai el li si ara, Yusuf. <sup>25</sup>Yusuf el li si ara, Matica. Matica, el li si ara, Amos. Amos el li si ara, Nahum. Nahum el li si ara, Hesli. Hesli el li si ara, Nagai. <sup>26</sup>Nagai el li si ara, Mahat. Mahat el li si ara, Matica. Matica el li si ara, Simei. Simei el li si ara, Yosek. Yosek el li si ara, Yoda.

<sup>27</sup>Yoda el li si ara, Yohana. Yohana el li si ara, Resa. Resa el li si ara, Zerubabel. Zerubabel el li si ara, Sealtiel. Sealtiel el li si ara, Neri. <sup>28</sup>Neri el li si ara, Malki. Malki el li si ara, Adi. Adi el li si ara, Kosam. Kosam el li si ara, Elmadam. Elmadam el li si ara, Erya. <sup>29</sup>Erya el li si ara, Yesua. Yesua el li si ara, Eleasar. Eleasar el li si ara, Yorim. Yorim el li si ara, Matat. Matat el li si ara, Lewi. <sup>30</sup>Lewi el li si ara, Simeon. Simeon el li si ara, Yehuda. Yehuda el li si ara, Yusuf. Yusuf el li si ara, Yonam. Yonam el li si ara, Elyakim. <sup>31</sup>Elyakim el li si ara, Melea. Melea el li si ara, Mina. Mina el li si ara, Matata. Matata el li si ara, Natan. Natan el li si ara, Daud.

<sup>32</sup>Daud el li si ara, Isai. Isai el li si ara, Obed. Obed el li si ara, Boas. Boas el li si ara, Salmon. Salmon el li si ara, Nahason. <sup>33</sup>Nahason el li si ara, Aminadab. Aminadab el li si ara, Admin. Admin el li si ara, Arni. Arni el li si ara, Hesron. Hesron el li si ara, Peres. Peres el li si ara, Yehuda. <sup>34</sup>Yehuda el li si ara, Yakup. Yakup el li si ara, Isak. Isak el li si ara, Abraham. Abraham el li si ara, Terah. Terah el li si ara, Nahor. <sup>35</sup>Nahor el li si ara, Seruk. Seruk el li si ara, Rehu. Rehu el li si ara, Pelek. Pelek el li si ara, Eber. Eber el li si ara, Salmon.

<sup>36</sup>Salmon el li si ara, Kenan. Kenan el li si ara, Arpaksad. Arpaksad el li si ara, Sem. Sem el li si ara, Nuh. Nuh el li si ara, Lamek. <sup>37</sup>Lamek

el li si ara, Metusalah. Metusalah el li si ara, Henok. Henok el li si ara, Yared. Yared el li si ara, Mahalalel. Mahalalel el li si ara, Kenan. <sup>38</sup>Kenan el li si ara, Enos. Enos el li si ara, Set. Set el li si ara, Adam. Adam kwepdeibuknye el si ara, Allah.

**Isa Mutuku Dongonye birye, ‘Yesus malye winiptue’ tenen,  
asipdeyuk yupu**

*(Matius 4:1-11; Markus 1:12-13)*

**4** <sup>1</sup>Yohanes arye Yesus akunum mek dongobukop ura, Allah El Dib Kanye arye, el talima wekuka langdibuk ura, Yesus Yordan mekin bataka yukak biyuk. Biyuk talak ara, Allah El Dib Kanye arye, Yesus el talima noutamak arye nyapdeibuk ura, mek kumak ati ara, ninye fia kum ulamik mutuku pata mutuku Yesus biyuk. <sup>2</sup>Amutuku noutam ulamuk talak ara, Isa Mutuku Dongonye<sup>q</sup> arye, ‘Yesus ati malye winiptue’ tenen, like yupa tonoknye keba koklomdikin, 40 hari ubuka sum ara, ‘Isa arye malye uptue’ tenen, yanuka asilelamuk. Yesus amutuku ulamuk talak ara, kiting noutam babye, lukunyan babye nirya ara, yupa tonok arye keba koklomdikin malamuk. Amutuku ulamuk talak nirya ara, din bulang uk ulamuka anya arye, like yupa tonok keba koklomdikin akunum ubukop ura, el din fia patabuk. Dina fia uk patabuk. <sup>3</sup>Dina fia patabukop ura, Isa Mutuku Dongonye arye, ‘Yesus asipdenun’ tenen, Yesus dam nyalyayuk. “Anda dipkorop Allah el Mi Koprop ulaminyop ura, atalipmalam keil dopropmince, ‘Kwaning dandoplyam,’ nyapminyop ura, kwaning datu ura, diptume,” nyabuk.

<sup>4</sup>Nyabuk ura, Yesus arye tamubuka nyabuk. “Allah yupu buku noutam sekukak nyasilya ara ani.

‘Ninye nirya kwaning uk dibikirye, kam fia kum unamake. Bukni, Allah arye el yupu nyasilya ning nirya kekebuka, dobolbalamicop ura, kam fia unamake. Din ning ara, mitik mambul bukni, weik mambul ning ara, ‘Allah yupu ati weik ton aupmal ati, din ning uk’ tenena, meme. Allah arye el yupu nyasilya ning nirya kekebuka, dobolbalamicop ura, fia telebe.’ *(Ulangan 8:3)*

Ayupu ara, Allah yupu noutamak ubuk ning ati nyapkine,” Yesus arye nyabuk.

<sup>5</sup>Nyabukop ura, Isa Mutuku Dongonye arye Yesus dobuka, weik mutuku dup bobiyukce, mutuku-mutuku nirya weik deiyok nang talibikce unyak mutuku nirya ara, “Dipdelyame,” nyanmok ura, Yesus arye

---

<sup>q</sup> 4:2 *Isa Mutuku Dongonye* nyanyapnye bira, sik Yahudi yala ninye, sik yupu deice arye Setan nyalamik. Sik Yahudi yala ninye, sik yupu Ibrani yupu deice arye, Setan yupu deiyok ara, atau artinya ning ara, “Ninye Onanye, tonda Minina Yupu, tonda, Lululina Yupu Nyana Deiyoknye ulule,” nyalamik. Tonda, laka nyana yupu nomor 13 dindelelume.

dinmok. <sup>6</sup>Dinmok ura, Isa Mutuku Dongonye arye ayupu ton nyabuk. “Aweik ninye deiyok nang nirya, sik mikip ap sik talinyak ning ap, ninye ap, ton sik urasin fia teleb ulul ning nirya ara, dipkoprop aning nirya talilya deiyoknye bira, na unune. Na ununa anya arye, na tenepne ninguk aning nirya ariptyne. <sup>7</sup>Aning ati ara, anda na kibuka ara, na si erepniminyop ura, aeipmalam ning nirya arepnukine,” Isa Mutuku Dongonye arye Yesus ati nyabuk.

<sup>8</sup>Nyabukop ura, Yesus arye tamubuka nyabuk. “Kume, Allah yupu buku noutam sekukak nyasulul yupu ara nyapnukine. Ayupu ara, ani. ‘Anggun Ni Allah ara, el si uk erebuka talinamlulume. Anggun kanye ara, el deice kanye delinamlulume. El fil uk donamlume.’

*(Ulangan 6:13)*

Allah yupu buku noutam sekuknye ara kunum nyapkine,” Yesus arye nyabuk.

<sup>9</sup>Yesus arye ayupu akunum nyabukop ura, Isa Mutuku Dongonye arye Yesus dobuka, Yerusalem mutuku Allah arilbalamikce, el si erelamik aik, arum deice deibukce ayupu nyabuk.

Anda dipkorop Allah el Mi Koprop ulaminyop ura, atikmanamak arye tuku ak sakedyame. <sup>10</sup>Allah yupu buku noutam arye ayupu nyabuka sekik.

An opkilyak ati, Allah arye el nyapdeipne ning fil dolbananye malaikat ak nyapdeiplibuk tukwak fia moubuka kalikmakiryne tomobuka talipnamkiyake. <sup>11</sup>Ara, ‘An yan gisok babye, keil yan dum dukuka opkilyak’ tenen, kaliknamkiyake. Tomobuka talipnamkiyak anya arye, ‘Mitikto ona ababye, opkilyak’ tenen, an ti kalikinamakiake.

*(Mazmur 91:11-12)*

“Ayupu ara aupmal ati, atikmanamak arye tukwak sakedyame,” Isa Mutuku Dongonye arye Yesus ati nyabuk.

<sup>12</sup>Nyabuk ura, Yesus arye tamubuka nyabuk. “Anyapmalam ning ara aupmal bukni, yuk Allah yupu sekamik ning ara nyapnukine. Ara ani.”

‘Anggun Ni Allah arye, ‘Dipkorop kalekuka melinamsil do, kum do?’ tenen, Allah ati winilden ning winina meme.’

*(Ulangan 6:16)*

“Ayupu nirya ara, Allah yupu sekamik noutamak arye nyapkine,” Yesus arye nyabuk.

<sup>13</sup>Isa Mutuku Dongonye arye, ‘Yesus malye winiptue’ tenen, winilden ning nirya akunum piriptyukop ura, ‘Yata talak arye yuk lo uplye talak tonap, Yesus piriptyenamane,’ tenebukce biyuk.

**Nasaret mutuku ulamik nang arye, ‘Yesus nun lik’ tenen, batakiak yupu**

<sup>14</sup>Allah El Dib Kanye Yesus ati, mikip weik aribuk ura, Galilea tam tamubuka biyuk. Biyukce fil dolamukop ura, amutuku noutamak ulamik ninye weika arye, el winilamuk ning laka nyabik ura, aninye nirya

kekebuka kel biklamik. <sup>15</sup>Atalak nirya ara, Yahudi yala ninye, sik Allah yupu peteren aik<sup>r</sup> wekelbina arye, Allah yupu peterelamuk ura, el yupu kekelamik ninye arye, “Fia teleb ubuka peteresulule,” tenebuka nyalamik. <sup>16</sup>Aninye nyalamik bukni, Yesus el nemuk mutuku Nasaret biyukce, amutuku-amutuku nirya winilamuk touk, Yahudi yala ninye sik dikdik sen sum deice arye, sik Allah yupu peteren aik wekuk. Wekukop ura, el fia winilamuk touk, ‘Allah yupu peterepnun’ tenen, tikukop ura, Allah yupu buku dobuka aribik.

<sup>17</sup>Allah el yupu laka nyalamuknye, nabi Yesaya arye sekiamuk buku arebik ura, Yesus ara tikukabukce, ayupu sekamuk ning eibuka nyanmok. Yesus arye nabi Yesaya sekamuk domon yupu dobuka nyanmok yupu ara ani.

<sup>18</sup>Allah arye na laka teleb yupu dobuka, ‘Talya kankan ninye peterelbinamle’ tenen, akunum wipdeipnuka anya arye, Allah El Dib Kanye arye el mikip weik arepnuk ura unune. ‘Tapu koubuka deiamik ninye lolongona yupu peterelbinamle’ tenen, dopkwetepnuke. Tonda, asing guna ninye asing lalina ap, yaniplobikirye ikin ning sik nong deice delilamak ninye, ‘Melibuka erelina ap, wininamle’ tenen, dopkwetepnuke. <sup>19</sup>Ninye Lyena Deioknye, ‘Ninye nirya kel biknamak’ tenen, Allah arye, ‘Ninye ati bico teneplirye teleb updeipnamne’ tenen, wibuka deiamuk kiting tamun akunum ubla anya arye, el kam bulina yupu, ‘Laka nyalbinamle’ tenen, akunum dopkwetepnuke. Nabi Yesaya arye nyabuka sekamuk. (Yesaya 61:1-2)

<sup>20</sup>Yesus arye ayupu nyabukop ura, Allah yupu buku kitibuka anyaik melinanye aribukce bukuk. Bukukop ura, Yahudi yala ninye sik Allah yupu peteren aik wekuka kekenmek nang nirya arye, Yesus ati fia el uk dinmek. <sup>21</sup>Yesus ati fia dinmekop ura, Yesus arye ayupu nyanmok. “Atupa kekenmalum ak, ayupu deice nyanmasinanye bira, yuknye kume, na ununa anya arye, Allah arye, ‘Winipnamle,’ nyabuk ning ara akunum deiya koupsile atia,” Yesus arye nyabuk. <sup>22</sup>Yesus arye peterenmok ura, ayupu kekenmek nang arye, “Se yupu teleb ubuka peterenmasile,” nyabuka ngalukik akarye kanye deibik. Tonda, “Anye bira, Yusuf arye deibuk mi do?” Tenebuka nyanmek. <sup>23</sup>Nyaldanmek ati, Yesus arye anang ati nyabuk.

“Na dipkoprop nyapsine. Domon yupu anyapnusin yupu ara, aminyan ara ila tamubuka nyapnamnulume. Ara, ‘Ninye kwetena deioknye ance

---

<sup>r</sup> 4:15 Allah yupu peterena ap, kekena ap ati domik aik – Yahudi yala nang, sik Allah yupu peterna aik ara, nun mitik gereja atonun wamuk bukni, mitikto yuk. Ara, sikce hari Sabtu weklamikce, Allah el si erelamik. Tonda yuk-yuk sum ara, Allah yupu kekena ap, peterena ap, ninye wapdanop ura sik yupu lipsisikuka bokoliana ati, anyaik weklamik. Bahasa Indonesia deice arye, ‘rumah ibada’ nyanyake. Anyaik lak len yupu ati, nomor 26 dipdelulume.

an bidamang kwetepdanulyame,' nyapnamnulume. Tonda, 'Kapernaum mutuku noutamak mambul fil dolamlumak yuk nang arye laka nyanyakak kekenyap ara, an babye, neplum mutuku fil dopsiminyak eipnuyabe,' nyapnamnulume. <sup>24</sup>Bukni, na dipkoprop yupu nyapsine. Yata Allah yupu laka nyan nang do yata nabi-nabi nang do nirya, sik bidamang mutuku unyak nang arye, kum bikdatinge.

<sup>25</sup>Allah yupu laka nyalamuknye nabi Elia Israel mutuku noutam ulamuk talak ara, kiting tamun winilye noutam tonap, mok kum celamuk ura, dina fia patalamuk. <sup>26</sup>Dina fia patalamuk talak ara, Yahudi yala kilapu, youwak kilapu weik aulamik bukni, Allah arye sik dam nirya nabi Elia kum dopkwetebuk. Sidon tam noutamak Sarafat mutuku ulamuk youwak kil, Yahudi yala kum kil tonok, el dam melina ati, nabi Elia ayowak kil dam biyuk. <sup>27</sup>Aning ara atonun, Allah yupu laka nyalamuknye nabi Elisa, Israel mutuku noutam ulamuk talak ara, barye suse atonun suse weik delamuk ninye, Yahudi yala ninye ulamik bukni, anirya kum kwetelamuk. Tonoknye, Siria mutuku ulamuknye, Yahudi yala kumnye, el si ara Naman, nabi Elisa arye el anyeuk kwetebuk." Yesus arye nyabuk.

<sup>28</sup>Yesus arye ayupu nyabukop ura, anyaik Allah yupu peteren aik wekmekce kekenmek nang nirya ara, yu fia weik ubuk. Ara, Yesus ayupu nyapmasil deice arye, 'Yahudi yala ninye batak dongobuka, Yahudi yala kum ninye ati, Allah yupu peterelbinamne,' nyanmasile, tenebikce, 'Yata ati nun Yahudi yala ninye batak silirye Yahudi yala kum ninye dam binamle do?' tenen, yu ubuk. <sup>29</sup>Yu weik ubukba, 'Nun mutuku batakuka bitue' tenen, piribuka dopkwetebik. Nasaret asik dolamikak ara, mutuk dup anya arye, 'Yesus amutuku dup deice arye tomobuka, mapu pikipkwetelbinuyabe' tenen, bobiyik. <sup>30</sup>Dobiyik ura, Yesus arye aninye weik wekmek kan-kan pikiplobuka yukak biyuk.

**Yesus arye ninye ak uryamuknye isa ati yakuk yupu**  
(*Markus 1:21-28*)

<sup>31</sup>Yesus arye amutuku batakuka, bisik mapnin banmokce Galilea tam, ninye asik dolamik asik si ara, Kapernaum mutuku biyuk. Biyukce sik Yahudi yala nang Allah el si erena ati dikdik selamik sum, Sabat sum ubuk ura, awekmek ninye ati, Yesus arye peterenmok. <sup>32</sup>'El yupu peterenmok talak ara, abulupmek nang nirya kekebikce, mambul kanye bobuka, se' tenen, ngalukunmek. Ara, Yesus ara, weik kel ap, weik mikip ap deice arye peterenmoka ati, ngalukunmek. <sup>33</sup>Anang ngalukunmek aik, sik Allah yupu peteren aik noutam arye, isa uryamuknye bukmokce akarye, weik yupu nyabuk. Anye bira, isa talipnuryamuka anya arye nyabuk. <sup>34</sup>"Yesus Nasaret mutuku ulyamnye, 'Anda yata ning patapmakil ati yanmalam do? Obuka kum danipsitinye' tenen, yanmalam do? Na kel

bikmakine. Allah arye weipdeiyamkuke. Tonda, malye winina tonoknye babye kum winilyame. An ara, fia Diksukumnye ulyame,” nyabuk.

<sup>35</sup>Isa arye nyabuk ura, Yesus el yupu mikip arye, aisa ati, “An yupu tunimablyame, anye bira talima noutam taliplum ara batakuka bindoplyame,” nyabuka wenebuk. Yesus arye nyabuka wenebuk ura, isa arye atalyamuknye kum obuk bukni, weik arye talibuka lulukunmoka ani, tuku ak dofouklobukce, aisa arye anye el nong fum kupsaka ngalukukce biyuk. <sup>36</sup>Biyuk ura, anang nirya arye eibik. Yesus winibukop ura, abulubuka wekmek nang nirya arye, mambul nyanmekce, asipdanuka ngalukunmek. “Anye birye, awinipmal ning ara, dan peterelamek yupu do? Anye bira, weik mikip ap, weik kel ap arye peterelirye, isa ababye, Yesus arye, ‘Winiplulume,’ nyaplye ninguk kekebuka banyake,” nyanmek. <sup>37</sup>Aning ati ara, anang arye Yesus winibuk ning ati, laka nyalbalamik ura, Galilea tam noutamak ulamik nang nirye kel biklamik.

**Yesus arye uk delamuk ninye kwetelamuk yupu**  
(*Matius 8:14-17; Markus 1:29-38*)

<sup>38</sup>Asum arye Yahudi yala nang, sik Allah si erelamik aik batakuka biyikce, Yesus ap, Simon ap, Simon el aik birik. Birikop ura, anang aik wekmarik talak ara, Simon el yamal kil nong bupu uk dilamuka ati, ‘Yesus arye kweteptue’ tenen, sik awekmek nang arye, adip aryuk Yesus ati morobik. <sup>39</sup>Morobik ura, Yesus arye akil mapmokak biyukce, kanupdongobuka dipdeyuk ura, ‘Anong bupu kum danul’ tenen, “Nong bupu ara, kum dalyame,” nyabuk. Nyabukop ura, adip aryuk akil nong bupu ulamuk ara, kum dayuk ura, akil tikukabukce anang sik din dobuka aribuk.

<sup>40</sup>Asum uk ara, kiting akunum kum ubuk talak ara, amutuku ninye arye uk yala yuk-yuk nirya delamuk ninye, Yesus dam dobuka boyayik ura, el taruk sik nong deice deibukce, ninye tonok-tonok nirya kwetebuk. <sup>41</sup>Tonda, uk adilamuk ninye kan-kan ara, aninye sik nong talyamuk isa nirya kutukuka biyik. Kutukuka biyikop ura, aisa mer arye ayupu nyanmek. “Anda Allah el Mi Koprop ulyame,” nyanmek ati, Yesus arye ayupu sekdobuk. Ara, Yesus arye, aisa nirya, ‘Elda Ninye Lyenanye, Mesias<sup>s</sup> ulule,’ akunum tenepmaniaka ati, ‘Ayupu kum laka nyapnamniyak’ tenen, sik nyanmek yupu sekdobuk. Aisa nirya ara, el Yesus akunum kel bikamik ati, ‘Na laka nyapnicak’ tenen,<sup>t</sup> “Anggun yupu

---

<sup>s</sup> **4:41a** Mesias nyalamik ning ara, deiyok ani. Ara Allah arye, ‘Ninye tukwak ninye sik malye wininyak ning kum daneiplirye, lyepnamle’ tenen, wipdeiyamuknye biti, el si Mesias nyalamik. Tonda lak len yupu nomor 3 dipdelulume. <sup>t</sup> **4:41b** *Laka nyana* – Atalak ara, Yesus arye ‘Na ara Mesias, Ninye Lyena Deiyoknye ununa ara, laka nyan talak min kum upmale ati, aning ara, laka kum nyanamak’ tenen, yupu sekuk.

tunimaplulume,” nyabuk ura, aisa nirya arye yupu kum dayikce fia yupu nyapmanto kum ubuk.

**Yesus arye ninye kum ulamikak binuka, Allah morobuk yupu**

<sup>42</sup>Sik mapmeka ani, kum berekabuk karen arye, tuba kunukmok talak ara, Yesus bukukce, anyasik buru tam biyuk akarye, ninye kum ulamikak binuka, Allah morobuk. Allah moronmok ura, aninye nirya arye, ‘Yesus dan do?’ tenen, epra banmek. Epnin banmek ani, Yesus eibikop ura, ‘Yesus arye nun batakuka yukak bisilyak’ tenen, “Yesus kao nun mutuku batakuka yuk mutuku bana kume,” nyabuka yupu weika arye nyabik. <sup>43</sup>Nyabik ura, Yesus arye tamubuka nyabuk. “Allah arye ninye mutuku-mutuku nirya lyeplirye, sik kanye talima talinamle yupu, laka teleb yupu peterepra bana ati dopkwetepnuk ati, yase. ‘Ayupu peterepra banamne’ tenen, yase anya arye, yuk mutuku nirya peterepra banamne,” Yesus arye nyabuk. <sup>44</sup>Ayupu nyabuka atonun, Yudea tam noutamak Yahudi yala nang, sik Allah yupu peteren aik wekelbinuka peterepra balamuk.

**Yesus arye, ‘Na yupu peterepnamak’ tenen, deiyok koubuka el mapu wipdeibuk yupu**

*(Matius 4:18-22; Markus 1:16-20; Yohanes 1:40-42)*

**5** <sup>1</sup>Tonok sum ara, Yesus Genesaret mekwen,<sup>u</sup> weik mekwen lilun tikuka peterenmok talak ara, ninye fia weik arye, ‘El yupu kekepnuyap’ tenen, el dam wekelyanganmekce, tiklim daraldanmekak Allah yupu peterenmok ura kekenmek. <sup>2</sup>Wininmek talak ara, mekin bal youn nang arye, sik mek lia bukna yo amekwen lilun deipmekce, sik mekin bal ati yangabuka dolamik aling mek likinmek, talak Yesus arye sik mek lia bukna yo deipmekak eibuk. <sup>3</sup>Sik mek lia bukna yo eibukop ura, Simon el mek lia bukna yo fum wekelbiyukce, Simon ati morobukop ura, Simon arye mek lia bukna yo gisibuka mitikto yukak mekwen deice deililbiyuk. Deililbiyuk ura, Yesus arye amek lia bukna yo deice bukuka, awekmek nang nirya ati Allah yupu peterenmok.

<sup>4</sup>Allah yupu peterenmok ani, akunum sekdobukop ura, Simon ati ayupu nyabuk. “Simono, anmek lia bukna yo dobuka mekwen karu noutamak delilbimince, an mekin bal yangabuka youn butum ara, mekin bal weknamla ati mekwen fum dongopnulyame,” nyabuk. <sup>5</sup>Nyabuk ura, Simon arye tamubuka nyabuk. “Naio, alukunyan noutamak nirya ara, na kwit ap, fil fia weikdopmanam bukni, mekin bal tonok babye, ton fia kum wekmasile. Kum wekmasil bukni, ance nyapmasilama ati, na mekin bal yangabuka youn butum ara, mekwen fum dongopnune,”

<sup>u</sup> 5:1 *Genesaret* – Amekwen tonok bukni, ton talak ara, Galilea mekwen nyanyake. Ton talak ara, Genesaret mekwen nyanyake.

nyabuk. <sup>6</sup>Nyabuk ura, mekin bal yangabuka don butum mekwen fum dongopmekani, mekin bal fia weik wekukce, ikin ubuk ura, sik mekin bal yangabuka, don butum aling kwilikmanto ubuk.

<sup>7</sup>Winibukop ura, sik kayapu, yuk mek lia bukna yo deice otam unmek nang ati, ‘Yakirye melipsikibuk dopdopnyap’ tenen, “Yalulume,” nyabuka, taruk langum apdobik. Taruk langum apdobik ura, anang yayik akarye, sik nirya mekin bal wekmokbutum, mek lia bukna yo deice bitinye dongobik ura, fia langdibuk. Langdibuk ura, mekin bal ikin arye mek lia bukna yo mekwen wekmanto ubuk. <sup>8</sup>Simon ap, el kayapu nang nirya ap arye, amekin bal weik dopropmekce ngalukunmek. Ngalukunmekba, Simon Peterus arye aning nirya eibuk ati Yesus dam mek liya yo deice kutam dipdongobukabukce Yesus ati yupu nyabuk. “Se, na deiyoknye Yesuso, na ara malye wininanye ununa anya arye na batakuka yukak binulyame” nyabuk. <sup>9</sup>Ayupu nyabuk ning ara, deiyok ara ani. Ara el ap el kayapu nang ap mekin bal fia weik dopmek ning ati, mambul kanye bobuka ngalukunmekce, el Simon bira, ‘Se anye Yesus ara dipkoprop telebnye,’ tenebuka ayupu nyabuk.

<sup>10</sup>Tonda, Zebedeus el mapu bitinye Yakobus ap, Yohanes ap ara, Simon ap, sik mekin bal youna ati, fil neika dolamik nang, sik babye, ngalukunmarik. Simon Peterus arye Yesus ati, “Na batakuka yukak bilyame,” akunum nyabukop ura, Yesus arye Simon biti tamubuka nyabuk. “Simono, an ilil una meme nyabuk. Winitalak arye dipdongobuka dotalak ara, ‘Allah lyeplirye sik talima talinamle’ tenen, ance ninye weik bulubuka na dam boyanganamlame,” nyabuk. <sup>11</sup>Akunum nyabukop ura, sik mek lia bukna yo bopmek nang nirya, mekwen lilun anyuk lukuka deibikce, aning-aning nirya anyak uk batakuka Yesus melibuka biyik.

**Yesus arye barye suse atonun suse dilamuknye kwetebuk yupu**  
(*Matius 8:2-4; Markus 1:40-44*)

<sup>12</sup>Tonok sum ara, Yesus arye ninye asik dolamik noutamak banmukba, weik barye suse atonun kororoma ara, el nong bol nirya dilamuknye, aunmokak arye, Yesus eibukce yayuk. Yesus dam gutam tuku dipdongobuka bulyayukce, Yesus ati morobuk. “Naio, an kanye deipnutumce, ‘Anye bira kwetepnune,’ tenepnutumto ura, na barye kororoma, adip aryuk kwetepnutume. ‘Akwetepnutum’ tenen, ati moropmakine,” nyabuk. <sup>13</sup>Anye birye nyabuka morobukop ura, Yesus arye anye bira, el nong deice taruk talibuk. Talibukce nyabuk, “Na an ti kanye deibuka kwetepnukine. Winira akunum teleb ubuka kwetepmakine,” nyabuk. Yesus arye nyabukop ura, adip aryuk anye el kororoma atonun dilamuka koroksakukce, mikdobuk.

<sup>14</sup>Yesus arye anye biti, “Na arye akwetepmakin ning ara, yuk nang ati laka kum nyanamlyame,” nyabuka yupu moupdeibuk. Tonda, Yesus arye



nyabuk. “Laka kum nyanamlyambuk, an nong dipdekiliry, ‘Anye bira, akunum telebuk ulule,’ nyapnamkil ati, Yahudi yala nang, Allah arina deiyoknye dam binuka, an nonge lak nyapnulyame. Tonda, uk dilamle ninye uk kum danapnop ura, Musa sekamuk touk, Allah si erena ati, kam un ning obuka arel balamak touk, an babye, arel bilyame. Ara, Allah arina deiyoknye birye, an ti nyapnamkile. ‘Allah ara fia telebnye anya arye, an barye suse dilamkuk talak ara, Allah arye derepsulul tenen, nun neika kum ulamubu bukni, winira Allah arye, an barye suse akunum kumdanmakil ati, nun neika una telebe,’ nyapnamkile. Nyapkilye ura, ‘Yuk ninye kekebikirye, kel biknamak’ tenen, nyapkine. Tonda, ‘Allah arye akunum kwetepmale, tenepnamkiyak’ tenen, nyapmakine,” Yesus arye nyabuk.

<sup>15</sup> Yesus arye akwetebuknye biti, nyabuk bukni, anyabuk ning batakukce, Yesus arye kwetebuk ninguk laka nyapnin banmok ura, ninye weik kekenmek. Ninye weik arye kekenmek ati, atalak deiya koubukce, dana-dana tam nirya arye ninye weik bulubuka, ‘Yesus el yupu kekepnyap’ tenen, tonda, ‘Elce kwetepnusi’ tenen, Yesus dam yangalamik. <sup>16</sup> Ninye weik yangalamik bukni, ‘Ninye weik bulubicak’ tenen, Allah morona ati, ninye una kum mutuku ak, Yesus elcuk Allah morolbalamak.

**Yesus arye nong nirya malye wamuknye kwetebuk yupu**  
(*Matius 9:2-8; Markus 2:3-12*)

<sup>17</sup> Tonok sum ara, Yesus arye peterenmok talak ara, sik Farisi’ nang ap, Allah arye, ‘Aning wininamlulume, aning ara kum wininamlulume,’ nyapdeibuk ura, Musa sekamuk yupu peterena deiyok nang ap, Yesus peterenmokak bukuka kekenmek. Anang ara, dana-dana nirya, Galilea tam ap, Yudea tam ap, ton weik asik dolamik asik Yerusalem mutuku ap, amutuku-amutuku nirya arye yanmek. Sik nirya aunmek ura, Yesus arye peterenmok talak ara, Allah arye, ‘Yesus ara uk delamuk ninye kwetepnul’ tenen, el mikip weik akunum arepmoka anya arye, kintinibuk. Yesus ulamuk aik ara, lo mitik atonun babye, fia kum ubuk. Aik buplan dam, buru tam babye, lo kum ubuk, nirya langdibuk. Winibuk ura, Yesus arye anang ati, Allah yupu peterenmok.

<sup>18</sup> Yesus anyaik fum peterenmok talak ara, dum barye nang pala yo deice arye, nong nirya malye wamuknye baya wibuka boyayik. Ura, ‘Yesus arye nun kwit kweteptue’ tenen, anyaik wekdeyik bukni, ninye

---

v 5:17 *Farisi* nyalamik ning ara, Allah arye minop talak ‘Wininamlulume, aning ara kum wininamlulume,’ nyalamik yupu Musa arye sekeiyamak yupu peterena deiyok nang ulamik. Ayupu ara weikto arye kel bikamik. Tonda laka nyana yupu nomor 10 dindelelume.

weik wekmeka arye, buplan dam diknepmek ati, Yesus dam bobinmanto kum ubuk. <sup>19</sup>Winibuk ati, lyu ubuka domik aik aruma deice welebikce," aik fum Yesus bukmok sukum uk, aruma barabikce, pala yo ap, anye ap talibuka, aik aruma deice arye dopkwetepnin banmek ani, Yesus peterenmok sukum uk, anyaik fum dopkwetebik.

<sup>20</sup>Sikda, 'Yesus arye anye bira kweteptue' tenen, wininmake tenebukce, Yesus arye, 'Sikda na ti dipkoprop diba tenepmaniyake,' tenebuk ura, anye bira min kum kwetebuk talak arye, malye wamuknye ati nyabuk. "Na mio, an malye teneminye ning ap, an malye winiminye ning ap, kum danipmakine," nyabuk.

<sup>21</sup>Yesus arye ayupu nyanmok talak ara, sik Farisi nang ap, Musa sekamuk yupu peterena deiyok nang ap, abukuka kekenmekce, sik kanye noutam ara teninmek. 'Anye bira nyanmala ara, yata ati do? Yesus ayupu nyanmoka deice arye, 'Na Allah atonunye unune,' nyanmoka ati, elda fia malye yupu nyanmasile. Allah elcuk nun malye wininyap ning kum kilisulul ati, yatanye birye tonap afil doptu do?' tenebikce, Yesus ati yu ubuk. <sup>22</sup>Sik kanye talima noutamak nirya tenebik ning ara, Yesus el kanye fum noutamak akunum kel bikuk ura, elce tenebuka ati, elce sik ti nyabuk.

"Ayupu anggun kanye talima fum noutamak tenipmaluma ara, yata ati do? <sup>23</sup>Na kanam arye, anong malye ubuknye biti, 'An malye ulyam ning nirya kum danipkine,' talye nyaploptinye do? Akumop ura, kanam aryuk, 'Tikropmince banulyame,' talye nyaploptinye do? Talye yupu deice arye aning nirya nyaploptinye bukni, 'Afil ara dipkoprop doptu do, kum doptu do?' tenepmanuluma ati, minopce anye kweteipnune. Ara, anggunce na ti, 'Yesus ara ninye tuku ak malye unyak ning ara, kum kilina deiyoknye dipkoprop ulule, tenepnamanulum' tenen, anye kweteipnune. Ati ayupu ton yapnune. Amalye wamuknye ati, 'Tikmince yan yanibuka bilyame,' nyapkine," Yesus arye nyabuk.

<sup>24</sup>Nyabukce, ayupu ton dukdongopra nyabuk. "Bukni, na ara Ninye Mi Koprop Atonunye,<sup>x</sup> na mikip deice arye, tuku ak ninye sik malye ulamice ning nirya ara, 'Dipkoprop kum danipsutue' tenen, biknamanuluma ati, amalye ubuknye biti kwetepnune," nyabuk. Nyabukce, amalye wamuknye ati ayupu nyabuk. "Anda tikukapmince an amsuna dobuka an aik tamubuka bindoplyame nyapkine," Yesus arye nyabuk.

---

<sup>w</sup> 5:19 *aik aruma deice welebik* – Aik aruma deice welebik ning ara, deiyok ani. Amutuku ara, mok mitiktonun celamuka ati, sik aik aruma ara, gat ning arye pala lilibuka dolamik. Tonda, lak len yupu nomor 27 dipdelulume. <sup>x</sup> 5:24 *Ninye Mi Koprop Atonunye* nyabuk ning, ara im deicanye ulamuk bukni, tukwak ninye lyena ati yayuk talak ara, ninye nong dayukce, talya tukwak nang urasin atonunye dayukce yayuk. Ninye urasin kibuka yayuka ati, ayupu nyabuk.

<sup>25</sup>Nyabukop ura, adip aryuk nong malye wamuknye teleb ubuk ura, tikdobukce, el amsuna dobuka awekmek nang nirya, sik adinmek talak ara, anyaik fum arye buru tam binuka, el aik koprop tamubuka biyuk. El aik banmok talak ara, Allah ati, “Se, na Ni Allah, anda fia telebe,” nyabuka, Allah si erenmokce biyuk. <sup>26</sup>Yesus winibuka deice arye awekmek nang nirya, se tenebuka mambul lenmekce, Allah el si erenmek. Tonda, “Awininmeka ara, ninye kum winipmanto ning eipmabe. Aning atonun ning ton kum elilamupe,” nyabuka malye nyabik.

**Yesus arye, ‘Anye bira na yupu peterelbinamle’ tenen,  
Lewi doprobuk yupu  
(Matius 9:9-13; Markus 2:14-17)**

<sup>27</sup>Yesus amutuku batakuk akarye, yukak banmok. Banmokani, tonoknye el si ara, Lewi eibuk. Roma mutuku nang arye amutuku nirya talyamika ati, amutuku nang arye sik yo bok, Roma weik ninye deiyok nang ati arilamik. Lewi ara, Roma mutuku nang arina ati, sik yuk nang arye ayo bok bulubuka deililamik ura, elce pajak yo bok<sup>y</sup> deililamik aik, anyaik fum ulamok ak, Yesus ara yayukce Lewi eibuk. Eibuk ura, Lewi ati, “Anda na melipniminye ura, na ap neika binuname,” nyabuk. <sup>28</sup>Yesus arye nyabuk ura, Lewi adip aryuk el ning nirya anyak uk bataklobukce, tikuka Yesus melibuka dobolbiyuk.

<sup>29</sup>Banmarika ani, Lewi el aik koprop wekelbirik. Ura, Lewi arye, ‘Yesus kipnun’ tenen, weik kwalya kwalibukce ara, el kayapu nang weik yukubuk. Lewi arye yukubuk nang ara, amutuku talyamik nang, Roma mutuku nang ati, pajak yo bok bulubuka arilamik nang ulamik. Tonda yuk nang ap, weika arye yanuka wekik akarye, sik nirya dina neikak dinmek.

<sup>30</sup>Dinmekbuk, Musa sekamuk yupu peterelamik nang ap, Farisi nang ap, tabakuka ulamik nang, tonda Farisi nang kopropa ap, Roma mutuku deiyok nang arina ati, pajak yo bok bulubuka delina deiyok nang ap, tonda yuk malye-malye winilamik nang ap, Yesus ap anyaik wekuka neika din dinmek. Dinmek talak ara, sik Farisi nang arye eibikce, Yesus el melina nang ati asipdeyik. “Yesus ara, pajak yo bok bulubuka delina deiyok nang ara, sikda ubula dolon nang unyaka anye arye, anang ap, malye-malye wininyak nang ap, Yesus anang kan-kan din dinmal ara, yata ati do? Ara malye wininmale,” nyabuka wenebik. <sup>31</sup>Nyabuka wenebik ura, Yesus arye ayupu kekebukce, anang ati nyabuk.

---

<sup>y</sup> 5:27 *Pajak yo bok dolona aik* – Roma mutuku nang arye amutuku nirya talilamika ati, amutuku nang arye sik yo bok, Roma weik ninye deiyok nang ati arilamik. Lewi ara, Roma mutuku nang arina ati, sik amutam ulamik nang nirya arye, yo bok bulu yana aripniba, elce bulubuka delilamik. Ayo bok delin aik, anyaik bukmokbuk, Yesus yayukce eibuk. Sik pajak yo bok dololamik ning ara, ubula weik dololamika ati, israel ninye nirya arye aninye ati, ‘Anang ara, nun like sikda fia malye nange,’ tenelamik.

“Uk din malye ura, aning tenena kum nang ara, ‘Ninye kwetenanye dokter dan do?’ tenen, kum enyake. Akum ura, ‘Se, uk dinmalibuk, nun malye unmabe,’ aning tenenyak ninye ara, ninye kwetenanye dokter ati imun uplye ura enyake. Aning atouk na ara malye winin nang, teleb ulina ati yase. <sup>32</sup> Aning atonun, mitik diksukumuk ulamice bukni, sik talima noutamak malye ning tuba upmalye ning ara, aning tenena kumce, ‘Nunda teleb nanguk unyabe,’ tenenyak ninye ati, ‘Lyepnamne’ tenen, kum yase. Ara anggun Farisi nang ara, ‘Nunda teleb nanguk unyap,’ tenemunya anya arye, uk kwetena nang kum pataplye ati, kum enyak nang atouk ninye ululum ati, ‘Anggun malye umunye ning batakuka balye tam tamupmunce, Allah el tam kiproplulume,’ nyabuka, ‘Lyepnamne’ tenen, kum yase. Bukni, na yase deiyok ara, sik malye uce ning batakuka, kanye dangubuka, ‘Allah el tam kiplulume,’ nyabuka, ‘Lyepnamne’ tenen, yase. Sik malye wininyakce, ‘Se aning ara, nun malye wininyabe,’ tenenyakce, malye kanye bobuka unyak nang ara, ‘Sik malye wininyak ning batakice ura, ato ninye dobuka lyepnamne’ tenen, yase.” Yesus arye nyabuk.

**Kwaning bulang mabuka, Allah morona ati asipdeyuk yupu**  
(*Matius 9:14-17; Markus 2:18-22*)

<sup>33</sup> Yohanes mek dongonanye, elce peterelamuk yupu kekelamikce, melibuka balamik nang ap, sik Farisi nang arye nyapnop ura, kekelamik nang ap arye, sik malye winilamne ning ati, ‘Allah moropnuyap’ tenen, dina bulang mabuka, Allah morolamika anya arye, sik farisi nang arye Yesus ati nyabik. “Yohanes el yupu kekekirye melinyak nang ap, nun Farisi nang, nun yupu nyapnop ura, kekebuka bace nang ap, anang nirya arye, ‘Allah si erena ap, Allah morona ap winipnuyap’ tenen, din bulang, si tebuka Allah moronyake. Sik anang ara wininyak bukni, Yesus an mapu ara, awininyak touk kum wininyake. Sikda kwaning ap, mek ap, talye urdem dinuk unyake. Wininyaka ara yata ati do?” nyabuka asipdeyikce wenebik.

<sup>34</sup> Ayupu asipdeyikce wenebikop ura, Yesus arye anang, domona yupu deice arye tamubuka nyabuk. “Kil donanye dopnulye talak ara, el kayapu ap, el milina nang ap ara, kwalya kwalibuka neika kum dinyak do? Kume, sik kwit, el kil don talak ara, kanye deipmaca anya arye, kwalibuka neika dinyake. Aning atonun, na ara kil donanye atonun ati, na mapu ara kanye imun uplibuk, dina bulang kum unyake. <sup>35</sup> Bukni, na talibuka bobinamiak talak ara, sik kanye ikin uplibuk, din dina kum arye, bulang upnamake,” Yesus arye ayanuka, asinmek nang ati nyabuk.

<sup>36</sup> Ura, Yesus arye sik ti adomon yupu deice arye nyabuk ara ani, Yesus arye, ‘Allah yupu sekamik ning teleb ulul bukni, sik Farisi nang ap, sik apu yapu ap arye, sik bidamang arye telemikce, talya tabakuka

mem ning peterenyak ara, malye ning biknamak' tenen, awekmek nang nirya ati, domon yupu bitinye nyabuk. Tonda Yesus arye, 'Na peterenya ning ap, na wininye ning ap deice arye, kanye tenena winiryuk ning tia biknamak' tenen, awekmek nang nirya ak, ayupu bitinye nyabuk. Yesus arye nyabuk yupu ara, ani.

"Yatanye do nirya, minop butum kwiliklye ura, abutum lipsisikuka wina ati, winiryuk butum kwilikikirye, minop butum deice taplakikirye, kum winyake. Aning atonun winibice ura, winiryuk wipmace ning el urasin yuk, minop butum el urasin yuk ulya ati, aning kum wininyake. Tonda, abutum mek ilikikirye, mikdeipmakiba, akunum miklyop ura, minop butum kwilikilule. Ara, winiryuk butum wipmaca arye winilula ati, winiryuk butum ap ansinibuka kum winyake." Yesus arye nyabuk.

<sup>37</sup>Ton ning ara ayupu nyabuk. "Aning atonun ton, ninye domba bol dobuka potong leklobikirye, dana-dana tam nirya wibicop ura, fumbisik anggur mek kwebuka dikdongobuka deilinyake. Wininyaka ati, ninye arye purubuka, winiryuk kwelamak anggur mek ara, minop domba basam bol fum kum dikdongobuka deilinyake. Winiryuk anggur mek kwebuka minop domba bol fum dikdongopting bukni, dikdongopting ura, anggur mek mikip arye neplirye, domba bol coloplye ura, mek balule. Coloplye balyop ura, anggur mek ap, domba bol ap, kum dalirye malye ulule.

<sup>38</sup>Aning ati ara, winiryuk anggur mek ara,<sup>z</sup> winiryuk domba basam bol fumbisik uk dikdongoptinge. <sup>39</sup>Tonda, yata ninye do nirya, minop anggur ninye kanye wangalamak mek akunum dibicop ura, el mikip ap, to ap, fia teleb anya arye, aminyan ara anggur mek winiryuk ning kum pataplye ati, kum dinyake. Minop ning ara, fia teleb mek ati, winiryuk ning ara kum pataplye ati kum dinyake." Yesus arye nyabuk.

**Yesus arye, "Allah si erena ati fil dona kumce didik sen sum sabat sum deiyoknye bira na akunum unune" nyabuk yupu**

*(Matius 12:1-14; Markus 2:23-3:6)*

**6** <sup>1</sup>Yahudi yala nang sik Allah si erena ati, didik sen sum, tonok, Sabat sum ara, Yesus ap, el mapu ap, yuk nang arye yakong wa wiamika noutamak banmek. Abanmek talak ara, sik kwaning patanmok ati, el mapu arye yakong atonun ning el si ara gandum<sup>a</sup> yakong langabuka,

<sup>z</sup> 5:38 *Winiryuk anggur mek nyabuk ning ara, domon yupu deice arye nyabuk. Ayupu nong ara, ani. Ara Musa arye sekamuk yupu nirya ara, teleb yupu wamuk bukni, Yesus arye peterelamak yupu nirya ara, winiryuk yupu ulamuk. Aning ati ara, 'Ninye nirya arye, Musa sekamuk yupu batakuka, na yupu dobolbanamek,' tenebukce, adomon yupu peterebuk. <sup>a</sup> 6:1 *Gandum ara, mitik yakong atonun bukni, el urasin yuke. Aning ara, mitikto maning atonun bukni, deice tam ara, mitik duk weik moulamle. Aduk el urasin ara, beras atonun ulule. Aduk dobuka, teikukabikirye, mitik kiplobice ura, mek ap tabakikirye din ning el si ara roti dabuka dinyake.**

alip bama labuka batakikop ura, yakong pinpinya akabuka imbik dinmek. <sup>2</sup>Sik yakong dinmek sum ara, Yahudi yala nang sikce Allah si erebuka kina ati, didik senmek sum ak ara, yakong dakuka dipnin banmek. Yakong dakuka dipnin banmek talak ara, Farisi nang eibik akarye ara, ‘Wenepnyuyap’ tenen, asipdeyik. “Anggunda, yakong dakuka dipnin banmaluma ara, yata ati do? Musa sekamuk yupu noutamak ara, ‘Allah si erena ati, didik senyak sum, Sabat sum ara, wa win dam lilbana meme,’ nyabuka sekamsuke. Musa arye nyabuka sekamsuk bukni, anggunda yakong dakuka dinmaluma ara, wa win dam lilbana atonun wininmaluma ati, adeice arye, Allah yupu yaniplume. Awininmalum ning ara, yata ati do?” nyabuka, Farisi nang arye asipdeyikke wenebik.

<sup>3</sup>Nyabuka wenebik ura, Yesus arye tamubuka, Farisi nang ati ayupu nyabuk.

Na mapu, sik awininmaka atonun, Allah yupu buku Samuel noutamak winyamuk ning ara, nyalamlum bukni, kum biklum do? Nun apu Daud ap, el melibuka neika balamik nang ap, kwaning fia patanmok ati, roti ara, Allah arina aik fum dabuka deipmeka ara, Daud arye dobuka dibuk. Tonda, el ap neika banmek nang ati, bokuka aribuk ura, dibik. Ati, Allah yupu buku Samuel noutamak winyamuk ning ara, nyalamlum bukni, kum biklum do? <sup>4</sup>Allah arina ati, Yahudi yala nang arye, din ning roti 12 dabuka, Allah el tenda aik noutamak delilamik ning ara, nyapnusine. Yahudi yala nang arye, din ning roti 12 dabuka,<sup>b</sup> Allah arina ati noutamak delilamik. Aroti ara, Musa arye nyabuka sekamuk touk, Allah arina aik fil dona deiyok nanguk dilamik. Aroti ara, mem ning ati, yuk talye nang ara kum dilamik. Talye nang ara kum dilamik bukni, atalak Daud arye winibuk ning ara nyapnune.

Din ning roti ara, Allah arin aik fum tam dabuka deiyamik ning ara, Daud din patabukba, dobuka dibuk. Tonda, el ap neika balamik nang ati, bokuka arebukba, dibik. Dibik bukni, Daud ap el melina ati neika balamik nang ap, aroti dobuka dibik ning ati, Allah arye anang ati, ‘Malye upmake,’ kum tenebuk. Allah arye, ‘Aning ara telebuka,’ tenebuke. Yesus arye nyabuk.

<sup>5</sup>Yesus arye Farisi nang ati, ayupu akunum nyabukop ura, ayupu tonap nyabuk. “Fil dona kumce ninye didik sena ati, Allah arye Sabat sum wibuka deiamuk sum ara, na Ninye Mi Koprop Atonunye ununa anya

---

<sup>b</sup> 6:4 *roti* – Yahudi yala nang arye, ‘Nun fil dolamibya ani, dolonyap ning ara, dipkoprop Allah arye arisilyak dolonyabe, tenenamap’ tenen, din ning roti 12 dabuka, Allah arina aik, tia domik aik, tenda aik noutamak delilamik ning deiyok ara ani. Ara, Allah si erena ati, minggu-minggu nirya, sik Allah si erelamik sum, Sabat sum deice arye, roti winiryuk ning 12 dabuka, Allah arin aik fum tam delilamik. Aroti ara, talye nang arye fia kum dilamik. Mem ning atonun ulamuka ati. Bukni, minggu akunum upnop ura, Allah arina ati fil dona deiyok nang uk, aroti dobuka dilamikce, winiryuk ning ton dabuka delilamik.

arye, ‘Sabat sum deice winina ara, aning telebe, aning malye,’ nyalya deiyoknye bira, na akunum unune,” Yesus arye Farisi nang ati nyabuk.

### Yesus arye taruk kwalyamuknye kwetebuk yupu

<sup>6</sup>Yuk Sabat sum ara, Yesus arye Yahudi yala nang, Allah yupu peterelamik aik wekuka peterenmok talak ara, sirik taruk kwanyamuknye ton, anyaik fum ulamak. <sup>7</sup>Atalak ara, Farisi nang ap, Musa sekamuk yupu peterena deiyok nang ap arye, ‘Yesus malye uptuop ura, malye upmale nyaptibye’ tenen, Yesus ati fia dil takna uk unmek. Kalikmeka ati, ‘Yesus arye nun Allah si erena ati dikdik sen sum, Sabat sum deice arye, taruk kwalyamuknye kwetepnul do?’ tenen, fia kalikmek.

<sup>8</sup>Kalikmek bukni, Yesus arye sik talima noutamak tenepmek ning akunum bikmok anya arye, Yesus arye ataruk kwalyamuknye ati, nyabuk. “Abukmak nang dinmak ak, urasin dam tikdeo,” nyabuk. <sup>9</sup>Nyabuk ura, tikuk karen ara, Yesus arye awekmek nang nirya ati asipdeyuk. “Musa sekamuk yupu ara, Sabat sum deice arye, dan ning wiriptibye do? Nun winiptibye ning ara, malye winiptibye do, teleb winiptibye do? Tonda, ‘Ninye dinicak’ tenen, ninye lyena teleb do, ninye ona teleb do?” nyabuka asipdeyuk.

Nyabuka asipdeyuk ura, sik farisi nang ara, talye yupu tunimabuka bukmek. <sup>10</sup>Sik Yesus ati lik ubuk ura, dabukmek ani, Yesus arye anang ati, ‘Se’ tenen, fia malye kanye bobuka, yu asing aryuk dipdeyuk. Winibukce, taruk kwalyamuknye ati, nyabuk. “Anda taruk lakuka arepnilyame,” nyabuk. Nyabukop ura, taruk kwalyamuknye birye, el taruk lakuka aribuk ura, adip aryuk el taruk teleb ubuk ura, taruk talipdeibuk. <sup>11</sup>Yesus arye anye bira kwetebuka ati, Farisi nang ara, yu ubuk ura, ‘Yesus yata wiribuka opnamap do?’ tenen, anye aik batakuka biyikce, bulubuka yupu talilamik.

### Yesus arye el mapu 12 nang ati, wipdeibuk yupu

(*Matius 10:2-4; Markus 3:16-19; Rasul 1:13*)

<sup>12</sup>Yuk talak ara, Yesus arye, ‘Allah moropnun’ tenen, tonok mutuku dup welebukce, atonok lukunyan nirya Allah ati moronmok. <sup>13</sup>Allah moronmokani, berekukop ura, ‘Ananguk na fil donamak’ tenen, el yupu kekebuka balamik nang, yukubuk ura welebiyik. Welebiyik ura, anang kan-kan arye, el teneamuk nanguk wipdeibuk. ‘Anang ara, Allah yupu dobuka mutuku-mutuku nirya peterelbinamak’ tenen, erepdeibuk. Ara, ‘Na ap, sik ap, neiktoto ulamibya ani, na arye yuk mutuku dopkwetepnye ura, na yupu dobuka peterelbinamak’ tenen, ‘Anang ara Rasuf

---

<sup>c</sup> 6:13 *Rasul* nang nyanyaba ara, deiyok ani. Yesus arye, ‘Anang, sik 12 wipreipnun ning ara, na yupu dobuka peterena deiyok kouna ati, weik deiyok nang unamak’ tenen, 12 nanguk wipreiyamak. Sal ap, Kilapu ap weike Yesus el upu kekebuka, el peterelamik ning talibuka dobolbalamik bukni, aninye ati ara, “Yesus el yupu kekelamik nang,” nyanyabe. Tonda, “Yesus arye wipreibuk nang, sik 12 nang,” nyanyabe (Lukas 6:14-16). Anang ara weik mambule.

nang unamak' tenen, anang wipdeibuk. Wipdeibuk Rasul nang, sik si ara ani. <sup>14</sup>Tonoknye bira, Simon nyalamik bukni, aminyan ara, Yesus arye anye bira, minyumanye ara, el si pununa ati ara, 'El si ara Peterus,' nyabuk. Adamnye bira, el weit kopropa, Anderias wibuka deibuk. Tonda, Yakobus ap, Yohanes ap, Pilipus ap, Bartolomeus ap, wipdeibuk. <sup>15</sup>Tonda, Matius ap, Tomas ap, Alpeus el mi Yakobus ap, tonda Simon ara, yuk nang arye el ti, 'Patriot' nyalamiknye ap, wipdeibuk. <sup>16</sup>Tonda Yakobus el mi Yudas ap, tonye ara, Yudas Iskariot, ara Yesus opnamika ati, inilbiyuknye wipdeibuk. Obarye arye utam nang 12 nirya ara, Yesus arye wipdeibuk.

**“Teleb unamak nang ani, malye unamak nang ati, Allah arye  
wenepnamle nang ani,” nyabuka peterebuk yupu  
(Matius 5:3-12)**

<sup>17</sup>Yesus arye el doprobuk nang ap, amutuku dup arye kulukikce, lyu ak wekelbiyik. Biyikop ura, Yudea tam noutamak ulamik nang, yupa weika arye unmek. Amutuku-amutuku dana-dana ninye nirya arye bulubuka yayik. Tonda, Yesus el yupu kekebuka dobolbalamik ninye ton aunmek. Sik yayik mutuku si ara, Yerusalem asik ap, tonda laut mekwen lilun mutuku bitinye si ara, Tirus mutuku ap, Sidon mutuku ap, amutuku nirya arye yayik.

<sup>18-19</sup>Sikda, Yesus el fil dolamuk ning kekenmek ati, 'El nyalye yupu kekena ap, uk dilamsilye ning kwetena ap, isa talyamlye ninye, isa yakalkwetena ap, winipnamsil' tenen, yayik. Yesus arye ninye talyamuk isa yakalkwetena ap, uk delamuk ninye kwetena ap, unmok ura, yuk ninye nirya arye, 'Yesus el nong ton taliptibye' tenen, kouldanmekce, talilbisinmek. Wininmeka ara, Allah el mikip weike aribuk ura, Yesus amikip deice arye ninye kwetenmoka ati, wininmek. <sup>20</sup>Yesus arye, el yupu kekebuka dobolbalamik nang ati dipdeyukce, ayupu nyabuk.

Winalak teninamsil ning, talye bona utotoa talina kumnye ara, Allah ninye nirya lyeplirye, kanye talima talinamsil ning dopropmunce, el ap neika unamlume. Allah arye teleb ulinamsil ati, anggun kanye deibuka unamlume. <sup>21</sup>Anggun aning-aning nirya pataplibuk ulalum ninye ara, aminyan ara Allah arye aripsilye ura boupnamsil ati, anggun kanye deibuka unamlume. Anggun winalak kanye imun usiliba engelulum ninye ara, aminyan talak kanye deibuka agu tunamlum ati, kanye deibuka unamlume. Allah arye lyesilibuk teleb unamlum ati, kanye deibuka unamlume.

<sup>22</sup>Na ara Ninye Mi Koprop Atonunye diba tenepnuluma deice arye, yuk nang arye anggun ti, 'Anang ara, fia malye nang. Nun like,' tenebuka, malye yupu nyapsikirye, kanye talima wilipsikirye, fia bataksikce ura, kanye deibuka unamlume. Ara, Allah melipsilirye, teleb ulinamsile ati, kanye delinamlulume. <sup>23</sup>Malye usinyak nang ara, anggun yok punun



nang arye, Allah yupu laka nyalamik nang ati, fia malye ulilamik touk, anggun babye, atonun winisinyake. Aning ati ara, yuk nang arye malye yupu nyabuka, anggun nong deice ikin ning deipsikcop ura, kanye ikin una meme. Kanye fia deibuka kil-kil arye unamlume. Amenyan ara, Allah arye im deice teleb ning weik arye, bona aripnamsila ati, kanye deibuka unamlume.

<sup>24</sup>Bukni, anggun winalak arye, bona weik nang deiyok ninye ara, anggun kanye delin ning akunum dobuka talilamlum ati, se tenebuka kanye imun unamlume. Akunum dololuluma ati, aminyan yuk ning tonap kum doproprnamlume. <sup>25</sup>Anggun winalak aning-aning nirya dimunye ura bousulul ninye ara, kwaning patapsilyebuk, unamluma ati, se tenebuka kanye imun unamlume. Tonda, anggun winalak arye, ‘Mambul ning anye’ tenena kum aryuk, talye kanye bobuka, teleb arye kanye deibuka pinpin asa ulamlum ninye ara, aminyan ara imun kanye bobuka engena uk unamluma ati, se tenebuka kanye imun asa unamlume.

<sup>26</sup>Winalak unyak ninye arye anggun ti, “Anang ara, fia teleb nang,” nyapsiceop ura, se tenebuka kanye imun kanye bobuka unamake. Ara, anggun yok pununa nang arye, tilila yupu uk laka nyalamik nang ati, “Ara teleb nang,” nyalamik touk, sik mapu babye, atonun tenebuka nyanyake. Dipkoprop Allah yupu peteren nang ati ara, “Anang ara teleb nang,” kum tenenamake. Sik kanye delice nang ara, tilila yupu nyanyak nang ati kanye delinyake. Yesus arye nyabuk.

**“Anang ara nun like, tenesinyak nang ara, sik ti bicoe tenebuka  
melinamlume,” Yesus arye nyabuk yupu  
(Matius 5:39-42)**

<sup>27</sup>Yesus ayupu akunum nyabukop ura, ayupu tonap nyabuk.

Na winalak ayupu nyapnusine. Yuk nang arye anggun ti, ‘Opnamabe,’ tenelamsiak nang ati, bico tenebuka melinamlulume. Tonda, yuk nangece anggun ti, ‘Nun lik,’ tenesinyak nang ara, teleb kilinamlulume. <sup>28</sup>Tonda anggun ti, ‘Anang ara merekuka dadipting’ tenen, kanye tenelamsiyak nang ap, anggun nong deice ikin ning delilamsiyak nang ap ati, teleb yupu nyabuka ‘Allah arye lyepnamle’ tenen, moronamlulume. <sup>29</sup>Yu nang arye anggun katam danatam ning bokuka opsikcop ura, ‘Danatam ning ababye, daopsinyak’ tenen, kintinipdeipnamlulume. Ubula donang arye, anggun butum aling dopropsikirye, ‘Nunukna ning tonap doproptibye,’ tenepsikce ura, yupu kum sekenamlulume, aning babye, kwiribuka anang ati arinamlulume. <sup>30</sup>Yata nang do, sik moropsice ninye nirya ara, arinamlulume. Yuk nang arye anggun ‘Na’ tenen ning dopropsicop ura, “Tamubuka nun bidamang arepsululume,” kum nyanamlulume.

<sup>31</sup>Anggunce yuk nang ati, ‘Se winibuka, winipnitinge,’ tenelulum touk, anggun babye, yuk nang ati atonun wininamlulume. <sup>32</sup>Yuk

nang arye anggun ti, bico tenebuka kanye delisinyak nang uk, bico tenepmunyop ura, adeice arye Allah elce, anggun teleb una ati, ‘Talya arepname,’ tenepsuk ning arepnamsil do? Kume, aning ara, sik fia malye nang, sik babye anang ati, bico tenebuka melilanyake. <sup>33</sup>Anggun kayapu nang arye, teleb ubuka melipsikibuk, anggunce tamubuka ananguk teleb ubuka melipmunyop ura, ‘Aning ara teleb winipmabe,’ kum tenenammlume. Allah ati diba kum tenenyak nang, fia malye nang ababye, sik babye sik bidam nanguk ati, teleb ubuka melildanyake. <sup>34</sup>Nun aryamibye ura, ‘Sikce ton tamubuka arepnamsiak’ tenen, ananguk dekeldana meme. Aning uk winipdamunyop ura, Allah arye, ‘Teleb wininmake’ tenen, arinamsil do? Kume, kum arepnamsile. Fia malye unyak nang babye, yuk nang ati arenyak bukni, ‘Aning arepman ning nirya ila tamubuka arepnamniake,’ tenena, deice aryuk areldanyake.

<sup>35</sup>Wininyak bukni, na arye nyapsin yupu ara, yuke. Sikce, ‘Anang optibye,’ tenelamsikce nang ati, bico tenebuka, teleb updeipmunce, ‘Aning tamubuka arinamsiake,’ tenena kum aryuk, talye urdemuk arinamlume. Aning ati ara, anggun Ni Allah im deice ululnye birye, fia malye ninye ap, teleb ubuka melilule, sikce tamubuka, ‘Naio telebe,’ fia kum nyanyak ninye ap nirya ati, bico tenebuka kanye arelul touk, anggun babye, yuk ninye nirya ati, bico tenebuka kanye delinamlume. Anggunce winipmunyop ura, Allah el mapu koprop kipdeipnamsile. Tonda aminyan ara, Allah arye im deice teleb ning weika arye arinamsile. <sup>36</sup>Anggunda, Allah el mapu ulaluma anya arye, anggun Ni Allah arye, ‘Malye nang ara, daupnyake,’ kum tenesilirye, kanye aresulul touk, tonda, talye melisulul touk, anggun babye, atonun wininamlume. Elda fia telebnye ulula anya arye, teleb ninye babye, malye ninye babye, bico tenebuka kanye aresulule. Anggunda el mapu ulaluma ati, anggun babye, wininamlume. Yesus arye el mapu ati nyabuk.

**“Sik babye, malye unyak ning, tenena kum aryuk, yuk nang ati, dipdongobuka lyab-lyab ana meme,” Yesus arye nyabuk yupu**  
*(Matius 7:1-5)*

<sup>37</sup>Yesus arye nyabuk. “Anggun babye, malye winin nang tenena kumce, yuk nang ati sik malye nang tenebuka, ‘Anggunda fia malye nang,’ nyabuka, lyab-lyab ana kum nyanamlume. Anggunce yuk nang ati, fia malye yupu arye, lyab-lyab abmunyop ura, aning atonun Allah arye anggun ti, lyab-lyab abuka wenepnamsile. Aning atonun, anggunce yuk nang ati, ‘Allah arye anang wenebuka optue,’ kum tenepmunyop ura, Allah arye anggun ti atonun, kum tenenammlume. Tonda, yuk nang arye, anggun ti, malye upsikce ning namin kipmunce, tonap kum tenepmunyop ura, Allah arye anggun malye umunye ning ati, kum kipsilirye, tonap kum tenenammlume. Kum danipnamsile.

<sup>38</sup> Anggunce yuk nang ati, talye luparabuka arepmunyop ura, Allah arye tamubuka arinamsile. Arepnamsil ning ara, fia mitiktonun kume. 'Aling fum weike lipnuyap' tenen, taruk arye darapdongobuka lilamak touk, Allah arye weika arinamsile. Anggunce yuk nang ati, bokuka arelalum touk, Allah arye anggun ti arinamsile.

Aning atonun, yuk nang ati, weik arye lyab-lyab nyana ap, sik malye winisinyak ning, fia tenena ap, 'Anang kum arepnuyabe' tenena ap, winipmunyop ura, Allah el babye, amalye winin ning nirya, anggun ti atonun winipnamsile. Ara anggunce yuk nang ati winimunya touk, Allah arye anggun ti, atonun wininamsile," Yesus arye el yupu kekenmek nang ati nyabuk.

<sup>39</sup> Nyabukce ayupu, winipmanto yupu tonap nyabuk.

Tonok asing gunanye birye, yuk asing guna nang ati, bisik talibuka bobitu do? Kume, sik kum talipdanuka bitiringe, sik bitinye nang babye talipdanuka banmatiringbuk, saktiringe. <sup>40</sup> Tonda, kel kin nang ara, sik peterena nang deice tam kum unyake. Bukni, peterelamica ani, sik yupu kekenyak nang, apeterenyak ning nirya akunum kele kibikcop ura, sik peterena deiyok nang wininyak atonun wininyake.

<sup>41</sup> Anggun asing noutamak weik yo gu aupmasutubuk, aning tenena kumce ara, anggun kayapu nang ati, "Anggun asing noutamak yo kita sung-sunga atonun ning aupmakile," nyalalum ning ara, yata ati do?

<sup>42</sup> Yata wiribuka arye anggun asing noutam weik yo gu aupmasilyebuk, anggun kayapu ati, "An asing noutamak yo kita sung-sunga atonun ning doproprnamkine," nyaptum do? Anggun talima noutamak fia malye ning tuba upmasilyebuk, 'Teleb ning winibibye ati, yuk nang eipsikirye, sikda teleb nang tenepnamsiyak,' tenelulum nang atia. Minopce ara, weik yo gu, anggun asing noutam upmasilya doproptumop ura, anggun kayapu asing ak tulukmatu ning, teleb arye eibuka doproptume. Anggun asing noutam weik ning kum doplopmunyop ura, yata wiribuka eiptumce, anggun kayapu ning doproptum do? Yesus arye el yupu kekenmek nang ati nyabuk.

**Yesus arye yo duk mouna ati nyabuk yupu**  
(*Matius 7:16-20*)

<sup>43</sup> Ayupu nyabukce, ayupu ton nyabuk.

Ninye dina ati, teleb yo duk moulamle yo ara, malye yo duk kum mouptue. Malye yo duk moulamle yo ara, teleb yo duk kum mouptue.

<sup>44</sup> Yo yala nirya yo duk mouplibuk eipmunce, 'Ayo yala anyak,' tenelamlume atonun, ninye nirya sik wininyak ning deice arye, eibuka kel kinyabe. Anggun kel kina ati, winipmanto ning nyapnusine. Ara, ninye arye, 'Sumik atonun ning duk daknuyap,' tenebice arye, cunang atonun ning tapu deice daganyak do? Anggur, ara kirikna duk atonun

ning, 'Dakuka dipnuyp' tenen, kirikna atonun ning, tapu deice arye daganyak do? Kume. Aning atonun, dina teleb yo duk moulamle yo ara, teleb yo duk uk moulu bukni, ninye kum dipmanto yo duk moulamle yo ara, malye yo duk uk moulu.

<sup>45</sup>Teleb ninye ara, sik talima noutamak fia teleb winin ninguk tenebuka ulamikibuk, kanye talima langdiplyop ura, teleb ning tuba aubuka arye, telebuk wininyake. Malye wininyak ninye ara, sik kanye talima noutamak, malye winin ninguk tenebuka fia winilamikibuk, aik doplyop ura, malye ning tuba aubuka arye, malye uk ubuka wininyake. Teleb nang babye, malye nang babye, sik talima noutamak aupmal ning deice arye, yupu nyanyake. Yesus arye nyabuk.

**Yesus arye aik dona kel nang ap, walwal nang ap ati, nyabuk yupu**  
(*Matius 7:24-27*)

<sup>46</sup>Yesus arye nyabuk.

Anggunce na ti, 'Na ni, na ni,' talye nyanululum bukni, na yupu moubuka kekepmunce, diksukumuk kum winiluluma ara, yata ati do? <sup>47</sup>Ara, na dam yalirye, na nyapnye yupu kekebuka dobolyanilinye bira, 'El winilul ning kel kipnamluluma' tenen, na winipmanto yupu tonap nyapnusine. <sup>48</sup>Yata nang do nirya, na nyasinye yupu kekebikirye, aning uk wininyak nang ara, aik dona fia weik kelnye atonun unyake. Anyaik dona kelnye bira, 'Aik dopnun' tenen, tuku palibuka mutuku yangan keil deice ayukumna yo ikuka aik do buke. Aik akunum dobukop ura, akaren ara weik mok cebuka, kumanya dobukce, mek obukop ura, anyaik dam yanuka obuka langdibuk bukni, aik ara kum lokuk. Ara mutuku yangan keil deice arye, ayukumna yo ikuka, fia teleb ubuka domuk arye, anyaik ara, kum lokuk.

<sup>49</sup>Bukni, dan nang do nirya, nyasinye yupu kekebuka batakikcop ura, aik dona walwal nang atonun wininyake. Aik dona walwalnye bira, ayukumna yo mek wenenga deica uk ikuka el aik dobuk. Dobuk talak ara, mokcebuka, kumanya dobukce, weik mek deibuka obukce, anyaik dibuk talak ara lokuk. Anyaik lokuk ura, lelim weik nyabuke. Yesus arye nyabuk.

**Yesus arye uk dilamuknye kwetebuk yupu**  
(*Matius 8:5-13*)

**7** <sup>1</sup>Yesus arye ninye weik kekenmekak, ayupu nirya akunum nyabukop ura, anyasik arye banmokani, Kapernaum mutuku biyuk. <sup>2</sup>Biyukop ura, yin nang sik deiyoknye, el fil donanye, fia telebnye anye arye, 'Anye bira na kwit koprop,' tenelamuknye ulamuk bukni, uk fia weik dilamuk anye dipmanto kibuk. <sup>3</sup>Ayin talin nang sik deiyoknye birye, Yesus winilamuk ning akunum kekelamuka ati, 'Yesus arye na

fil melinanye kwetepnute' tenen, nyapdeibuk ura, Yahudi yala deiyok nang wisi nang arye, Yesus dam yanuka morobik. Yanuka morobikce nyabik, "Nun kwit el melinanye uk dilula ati, dipmanto upmal anya arye, kwetelyanute, nyabuka moropkile," nyabuka morobik. <sup>4-5</sup>Sik morobik talak ara, ayupu ton nyabik. "Anye bira, Yahudi yalanye kum bukni, nun Israel ninye ati bico tenelamsukce, nun Allah yupu peterena aik weik arye dolamsuk ati, el moropmakil touk, an kwetelbitume. Nun kanye ara winipminyop ura, aning ara fia telebe," nyabuka morobik.

<sup>6</sup>Nyabuka morobikop ura, Yesus, 'Anye el aik binun' tenen, banmokani, el aik dam akunum yayukop ura, ayin talin deiyoknye birye nyapdeibuk ati, el kayapu nang arye Yesus dam nyalyayik.

Ayin deiyoknye birye nyapkile. "Naio, na ti yanganmalam ara, bataklyame. Na ara, weiknye kumanya arye, na aik fum yanuka kum weknamnyame. <sup>7</sup>Na ara talinye unune ara, adeiyok ati na arye an mening dam yanuka, kum moropmakine. Bukni, ance atikmalamak anyuk, an yupu nyapminye ura, na fil donanye bira, uk kum dalirye teleb upnamale. <sup>8</sup>Na deiyok nang arye nyapnice ura, sik nyapnice touk fil donune. Tonda, na babye, na amutam yin talin nang ati, yupu nyapnye ura, afil uk donyake. Tonda na amutam yin talin nang ati, yupu nyapnye ura afil donyake. Tonoknye biti, 'Bilyame,' nyapnye ura balule, tonoknye biti, 'Yalyame,' nyapnye ura yangalule. Aning atonun, na fil donanye<sup>d</sup> ati, 'Afil dopnilyame,' nyapnye ura, afil uk donulule. Aning ati ara, 'Ance yupu nyaptum ura, na fil donanye teleb uptue,' nyabuk," el kayapu nang arye, Yesus ati nyalyayik.

<sup>9</sup>Ayin deiyoknye birye nyabuk yupu laka nyalyayikop ura, Yesus kekebukce, se tenebukce ngalukuk. Ngalukuka, el melibuka yanganmek nang ati ayupu nyabuk. "Na dipkoprop nyapsine, Israel mutuku noutam balamse talak nirya ara, anye bira Yahudi yalanye kum bukni, weik arye diba tenepmanil atonun, yuk nang ton kum eipse," Yesus arye nyabuk. <sup>10</sup>Nyabukop ura, ayin deiyoknye birye dopkwetebuk nang tamubuka, el aik biyikop ura, el fil melinanye akunum teleb upmokak, eibik.

**Youwak kil el mi tonok dipmok bukni, Yesus arye kam bukeibuk yupu**  
(*Markus 5:21-24, 35; Yohanes 11:1-44*)

<sup>11</sup>Sik daulamika ani, yuk talak ara, Yesus arye tonok asik dolamik asik si ara, Nain mutuku biyuk. El yupu kekebuka dobolbalamik nang ap, yuk talye nang weik ap, bulubuka neika banmek. <sup>12</sup>Sik banmek ani, anyasik

---

<sup>d</sup> **7:8** *fil donanye* – Yo bok deice deklamik ninye ara, bona weik talin nang arye, bona utotoa talina kum ninye ati, yo bok deice arye deklamik. Deklamikba, abona talina kum ninye arye, sik bona weik talininye ati, sik fil talya urdemuk dolamik. Tonda, lak len yupu ara, nomor 36 dipdelulume.

dolamik asik dana-dana poka antanabuka denepdongamikce, wiyamik buplan dam banmek talak ara, youwak kil tonok, el mi tonok deiamuk bukni, dipmok ati, 'Weipnuyap' tenen, akil ap, amutuku ninye weik ap, kitibuka dobuka bobayikak, Yesus arye eibuk. <sup>13</sup>Eibukce, ayouwak kil ati fia bico tenebukce, "Se, nongo engena batakyame," nyabuk. <sup>14</sup>Nyabukce, ami el baya yo deice taruk deibuk ura, ami baya yo bobanmek nang ara, tunimabuka tikik. Tunimabuka tikikop ura, Yesus arye adipmok mi ati nyabuk. "Amio, anda kam bukuka tikdeo," nyabuk.

<sup>15</sup>Nyabukop ura, adip aryuk adipmok mi ara, baya yo fum arye bukukabukce, yupu nyanmok. Winibuk ura, Yesus arye ami tamubuka dobukce, el lin bak aribuk. <sup>16</sup>Yesus arye ami kwetebukop ura, abulubuka wekmek nang nirya mambul nyanmekce, Allah si erenmek. Allah si erenmekce, ayupu tonap nyabik. "Se, Allah yupu laka nyananye nabi atonye, nun kan-kan noutamak kunum kutukuka unmale. 'Allah arye wibuka deibuk ninye ati, melipnun' tenen, Allah arye dopkwetebuk ura, akunum yanmasile," nyanmek. <sup>17</sup>Nyanmeka anya arye, Yesus ami kwetebuk ning ara, eibikce laka nyapra balamik ura, Yudea tam ulamik ninye ap, amutuku dana-dana tam ulamik ninye ap, weik kekelamik.

**"Yohanes Pembaptis mek dongonanye ara, elda mambulnye,"  
nyabuk yupu  
(Matius 11:2-9)**

<sup>18</sup>Yohanes arye diba akunum teneamik ninye, mek dongolamuknye wenena aik fum dongamik ura, daulamuka anya arye, el mapu arye Yesus peterelamuk ning ap, winilamuk ning ap, laka nyabik ura, Yohanes kekebukce, el melin nang bitinye ati ayupu nyabuk. <sup>19</sup>"Anggunda, Yesus dam birumunce, ayupu ara asipdeturume. 'Ninye mutuku-mutuku nirya lyeplirye talinamlanye, yanamle,' nyalamiknye bira, an akunum do? Yuknye ton aminyan yanamle do? nyabuka, asipdenamrurume," Yohanes arye nyabuk.

<sup>20</sup>Nyabuk ura, anang arye Yesus dam binuka asipderik. "Ninye mutuku-mutuku nirya lyeplirye talinamlanye yanamle nyalamiknye bira, an akunum do? Yuknye ton aminyan yanamle do?" nyabuka asipderik. <sup>21</sup>Akaren noutam aryuk, Yesus arye uk delamuk ninye ap, ninye isa talilamuk ning ap, yakal kwetelamukce kwetelamuk. Tonda, asing kuamuk ninye weik asing lalilamuk ura, teleb ulamuk. <sup>22</sup>Atalak arye winilamuk ati, Yesus arye asilyanmarik nang ati, tamubuka nyabuk.

"Anggun amol arye kekelulum ning ap, asing arye elilulum ning ap, Yohanes dam lake nyalbirurume. Ara, asing kuamlye ninye lalilye ura, elinyake; aik bulamice ninye kweteiplye ura, banyake; barye suse atonun suse dilamlye ninye kweteiplye ura, mikilule; amul kunukamlye ninye pakeiplye ura, kekenyake; akunum dipmace ninye kam bulilule; tonda

ninye lyena ati, Allah el lak teleb yupu talye bona utotoa talina kumnye kekena ati peterelye ura, kekenyake. <sup>23</sup>Yatanye do nirya, na wininye ning deice arye kanye kum boktoplirye, teniltona kum aryuk kum bataklinye bira, telebuk unamle,” Yesus arye, Yohanes el melin nang ati nyabuk.

<sup>24</sup>Nyabuk ura, Yohanes el melin nang kekeprikce birikop ura, Yesus arye el dam wekmek nang ati, ayupu nyabuk.

Yohanes ati yupu nyapnusine. Yohanes ninye kum noutam, Yohanes peterelamuk ura, kekelbalulum ara, yata ning ‘Eipnamap’ tenen, balalum do? ‘Kumanya balirye maning lulukunmalyeak eipnuyp’ tenen, dilbalalum do? <sup>25</sup>Akumop ura, yata ning, ‘Eipnuyp’ tenen, dilbalalum do? ‘Tonoknye fia teleb ongon butum ongoplibuk eipnuyp’ tenen, dilbalalum do? Kume, weik teleb ongon butum ongonyak nang ara, ‘Talya kanye bopnuyp’ tenen, fia teleb ning talipra, talye uk unyak anya arye, weik ninye deiyok nang sik aik unyake. Yohanes winilamuka atonun ara, kum wininyake.

<sup>26</sup>Akumop ura, ‘Allah el yupu lak nyananye nabi eipnuyp’ tenen, dilbalalum do? Winira, dipkorop Allah yupu lak nyananye, nabi elilamlume. Bukni, anye bira, yuk Allah yupu laka nyan nang atouk kum ulule. Sikda mitikto mambul bukni, Yohanes ara, fia weik mambulnye ulule. <sup>27</sup>Minop arye, ‘Anye bira yanamle’ tenen, Allah arye nyapdeibuk ura, Maleaki arye ayupu sekamuk. Maleaki arye Yohanes ati, ‘Na yupu laka nyalinanye yanamle’ tenen, sekamuk yupu ara ani.

‘Allah arye nyabuk. Na yupu laka nyalinanye minop dopkweteplye ura, binamlya ani, an aminyan benalyame. Na yupu laka nyalinanye birye, an binalam bisik ara, kintinipdeipnamkile.’

*(Maleaki 3:1)*

Yesus arye Maleaki sekamuk yupu dobuka, el mapu ati nyabuk.

<sup>28</sup>Yesus arye nyabukop ura, ayupu ton dukdongobuka nyabuk.

“Aning ati ara, na dipkoprop nyapsine. Minop dorapce dipdongobuka winitalak nirya, kilapu nirya arye delilamik nang nirya ara, mitikto mambul winilamik bukni, Yohanes el uk ara fia weik tonye ulule. Ara, minop talak ulamik nang ara, Musa sekamuk yupu uk kekebuka, aning uk talibuka ulamika atia. Bukni, ninye mek dongolamuknye Yohanes ati ara, Allah el kanye ara, ‘Elda, mitik mambul,’ tenelule. Ara, na ara Ninye Lyena Deiyoknye, tuku ak mutuku min kum yanamse talak ara, na yangana ati, Yohanes arye na laka nyalinanye ulula ati, elda mitik mambule.

Winitalak arye, dipdongobuka dotalak nirya ara, Allah ninye nirya lyeplirye talinamle talak weknamak nang noutamak ati, yuk nang arye aninye nirya ara, ‘Weik mambul,’ fia kum tenenyake. Kum tenenyak bukni, na dipkoprop nyapsine. Allah el kanye ara, ‘Im deice welepnamak ninye nirya ara, weik mambul unyake,’ tenelule, ‘Yohanes ara, teleb fil

dolul bukni, elda mitik mambul uk ulule,<sup>e</sup> tenelule.<sup>e</sup> Deiyok ara, tuku ak fil donyak nang ara, mitik mambul bukni, im deice welebana ara, weik mambul ati nyapsine,” Yesus arye nyabuk.

<sup>29</sup> Yesus arye ayupu nirya akunum nyabukop ura, el yupu kekenmek nang nirya babye, talye nang babye, amutuku talyamik nang ati yo bok dololamik nang ara, malye nang winilamik bukni, sik babye, “Yesus nyanmasil yupu ara, fia telebe. Allah el bisik ara, diksukum bisik uka,” tenebuka nyanmek. Ayupu nyanmek nang ara, sik malye winin ning batakamikce, Yohanes arye mek akunum dongolamuk. Anang arye, ayupu nyanmek. “Yesus nyanmasil yupu ara, fia telebe,” nyanmek.

<sup>30</sup> Anang arye, ‘Allah el bisik ara telebe,’ nyanmek bukni, sik Farisi nang ap, Musa sekamuk yupu peterena deiyok nang ap ara,<sup>f</sup> Allah arye, ‘Aninye babye, lyeptinye,’ teneamuk bukni, sikce, ‘Aning ara, nun like,’ tenebuka batakik. Utenebuka batakik ati ara, sik malye winin ning kum batakik ura, Yohanes arye anang mek kum dongamuk.

<sup>31</sup> Winilamik anya arye, Yesus arye anang ati ayupu nyabuk.

Anggun teneipdelulume. Atalak umunye nang ara, anggun umunye ning atonun ning ati, winipmanto yupu nyapnusine. <sup>32</sup> Anggunda, kota nang arye din ning bulubuka deibikirye deklamakak ara, mapu asik deice bulubikirye, arikal dolamak touk winilalume. Ton mapu arye yuk mapu ati, nyanyake.

“Kanye deibuka, ‘Mot senamap’ tenen, bingkong nyana atonun ning nyabipye ura, anggun lik ati batakmasulum ura, nun ap mot kum sepmabe. Atonun ton, talya ati, ‘Ninye dipmace ura, mot nyabuka engelmanak atonun engepnamabe’ tenen, mot nyabuka engenmapu ara, anggun lik ati, batakmasulum ura, nun ap kum engepmabe. Nunce ‘Winipnyuabe,’ tenepmabye ning nirya ara, anggun lik ati, bataksumume.” Amapu arye nyanyake.

<sup>33</sup> Amapu lik uplibuk, batakklamak touk, anggun babye, atonun ulalume. Ara, Yohanes arye, dina teleb ning roti ap, anggur mek ap, kum delamuk ura, el ti diba tenena kum nang arye, “Anye bira, isa arye el kanye talima talibuka ulule,” nyanyake. <sup>34</sup> Bukni, Yohanes aning winilamuk touk, na kum wininune. Na ara, Ninye Mi Koprop Atonunye birye dina teleb ning ap, anggur mek ap, dibuka ununbuk, na ti diba kum teneninyak nang arye, “Anye bira din tulanye ulule. Elda, kanye wangalamak mek fia

---

<sup>e</sup> 7:28 *Yohanes mitikto mambule* – Winitalak ara, Yesus yupu ap, Yesus winilamuk ning ap deice arye, diba tenebicop ura, Allah arye lyeptiliryne, nun kanye talima talinamsile. Allah ap fia unamak ninye nirya ara, weik mambule. Allah el fil uk bukni, tukwak mutuku fil donyak ninye ara, nabi nang ababye, mitikto mambule. Bukni, im deice binamak ninye ara, weik mambule. <sup>f</sup> 7:30 *Musa sekamuk yupu peterena deiyok nang*, weik tam nang ara, Farisi nang ulamik. Sikce, Musa sekamuk yupu, mem yupu ati nang ara, “Deiyok ani-ani,” nyabuka peterelamik. Sikce, Yesus ati, ‘Anye bira nun like,’ tenelamik.



ton dilulnye ulule.” Tonda, nyaninyake, “ ‘Amutuku talina deiyok nang doproprnamak’ tenen, tuku dekne yo bok bulubuka delilamak nang ap, malye-malye wininyak nang ap arye, Yesus ara neika ansinibuka, amalye wininyak nang ap neikak ulule. Anye bira fia malye winilule,” nyaninyake.

<sup>35</sup>“Na dipkoprop nyapsine. Weik kel nang arye teleb unyak ning ati, yuk walwal nang arye, ‘Aning ara malye,’ nyanyak bukni, aminyan talak ara, sik weik kel nang arye wininyak ning nong akunum uplyop ura lakak oplyop ura, ninye nirya arye, ‘E, sikce teleb winilamika’ tenen, bikilinyake. Aning atouk, na ti diba tenena kum nang arye ayupu nyaninyak bukni, na ap, amalye winin ninye ap, neika upmapya ani, aminyan ara, na yupu dib tenebikirye, sik malye winin ning batakuka diksukumuk ubikibuk, eipmunyop ura, kel kipnamlume. Na fil donye ning nong uplye talak aryuk kel kipnamlume. Na arye aninye ap neika unmana ara, telebuka,” Yesus arye nyabuk.

**Fia malye winilamuk kil arye, nintong teleb mek Yesus el yan deice dikdeibuk yupu**

*(Matius 26:6-13; Markus 14:3-9; Yohanes 12:1-8; Matius 18:23-24)*

<sup>36</sup>Tonok sum ara, Farisinye tonok, el si Simon, elce Yesus ati, “Na aik din dilyalyame,” nyabuka yupu nyapdeibuk. Yukubukop ura, Yesus arye Simon el aik yanuka din dinmek. <sup>37</sup>Sik tuba dinmek talak ara, amutuku fia malye winilamuk kil tonok kekebukce, nintong teleb mek dekna weik makau bukni, bol kat-kat makau arye kwebuka deiyamuk ara, dobuka yayuk. <sup>38</sup>Dobuka yayukce, Yesus wirikdeibuka bukmokce, yan donokmok damak tikilyayukce, engenmok ura, el asing maka ara, Yesus el yan deice sakanmok. Sakanmok ura, akil potong ara, fia cang potong kil anya arye, el potong arye dobuka, Yesus yan deice asing maka sakmoka ara kilibukce, Yesus el yan deice mutubuk. Mutubukce, atong teleb mek dekna weik mek ara, Yesus el yan deice dikeibuk.

<sup>39</sup>Dikeibukop ura, aFarisinye Simon arye, Yesus yukupmoknye eibukce, el talima noutamak uk tenebuk. ‘Anye bira Allah yupu lak nyananye, nabi ulamtuop ura, el yan talipmal kil, ara fia malye kil teneptue,’ tenebuk. <sup>40</sup>Utenebuk ati, Yesus arye Simon tenepmok ning kel kipmoka anya arye, Simon ati ayupu nyabuk. “Simono, na tenipman yupu ton nyapnukine,” nyabuk. Nyabuk ura, Simon arye, “Telebe naio, danyapnio,” nyabuk. <sup>41</sup>Nyabuk ura, Yesus adomon yupu deice arye nyabuk.

“Tonok sum ara, pajak yo bok arilamuknye, deiyoknye birye ninye bitinye nang ati yo bok tia aribuk. Tonye biti, like 500 sum<sup>g</sup> deice fil dobikce ura,

---

<sup>g</sup> 7:41 500 sum fil dona – Minop talak sekamik buku noutamak ara, sik Yunani yupu deice arye, ‘Denari’ sekik. Denari deiyok ara, sik atalak wamuk keil uang atia. Tonok denari ara, tonok sum deice arye fil donmana ani, inipnop ura, asum fil donman ning dekna ati ara, tonok denari arilamik. Ati 500 denari ara, 500 sum fil dobibyop ura, dekna yo bok aripnamsitinga atonun atia.

dengna arilamaka atonun tia aribuk. Tonye bira, like 50 sum deice fil dobikce ura, dengna arilamaka atouk tia aribuk. <sup>42</sup>Yo bok aryamuk ura daulamrikani, ayo bok tamubuka yuk talak akunum ubukaop ura, sik yo bok fia kum ubuka ati, adeiyoknye birye, sik dopromrik yo bok sik ak, ‘Dawaplye. Na tamubuka arina kum’ tenen, bataklobuk. Winibuk ati, yatanye bak yo bok weik el deiyoknye biti, kanye weik deibuk do?” Yesus arye Simon biti asipdeyuk.

<sup>43</sup>Asipdeyuk ura, Simon arye tamubuka nyabuk. “Na tenepman ning ara, yo bok fia weik diplobuk bukni, deiyoknye birye yo bok si weik diplobuknye biti, anye birye el deiyoknye ati kanye weik delinamle tenepne,” Simon arye nyabuk. Nyabukop ura, Yesus arye Simon ati nyabuk. “An tenepmalam ning ara, dipkoprop nyapnilame,” nyabuk. <sup>44</sup>Nyabukop ura, Yesus akil dipdeyukce, Simon ati nyabuk.

“Simono, akil dipdelyame. Na ara, an aik yanmanu talak ara, na yan sung-sunga palepmanu ura mek ilikna ati, ance mek kum aripmanume. Bukni akil arye engenmorye, el asing maka na yan deice sakmanu ura, el potong cang arye kilipmanile. <sup>45</sup>An aik yanmanu talak ara, na kina ati, taruk kum aripmanumu bukni, na yanmanu talak arye dipdongobuka winitalak ap, akil arye tuba na yan deice mutupmanile.

<sup>46</sup>Tonda, na kina ati, nintong teleb minyak, na gisok deice kum dikmanumubuk, akil aryuk na yan deice nintong teleb mek dekna weik ning, weika arye dikdeipmanile. <sup>47</sup>Aning ati ara, na nyapnukine. Akil arye na ti weika arye bico tenebuka, kanye talima aripmanila anye arye, el malye winin ning fia weika arye winilul bukni, na arye akil malye winilul ning nirya ara, na arye akunum namin kibuka, lyepna arye kum daneipne. Bukni, malye winin ning mitik winilamice nang ara, sik malye winin ning namin kibuka kum kipdeipnyop ura, bico tenebuka kanye delina ara mitiktonunuk kanye delinyake.” Yesus arye Simon ati nyabuk.

<sup>48</sup>Nyabukop ura, Yesus arye akil ati nyabuk. “An fia malye winilaminye ning nirya ara, akunum namin kipdeipkina arye kum daneipkine” nyabuk. <sup>49</sup>Yesus arye nyabukop ura, abukuka dinmek nang nirya arye, sik anang mamun uk asipdayikce nyabik. “Anye bira, yatanye do? Elce, ‘Ninye malye wininyak ning namin kibuka kum daneiptenya,’ nyalye atia,” nyabuka asildanmek. Asildanmekce, Yesus ati yu ubuk. Ara, Yesus arye, ‘Ninye malye winin ning ati namin kilinanye na unune. Aning ababye, unune,’ nyapmok ning ara, sikce el ti, ‘Elda fia malye. Allah elcuk afil dolul’ tenen, Yesus ati derebik. <sup>50</sup>Sikce Yesus ati derebik bukni, Yesus arye akil ati nyabuk, “Ance na ti diba tenepmanilama deice arye, akunum lyepmakina ati, kanye deibuka dabilyame” nyabuk.

**Yala ning dokna ati nyabuk yupu**  
(*Matius 13:2-23; Markus 4:1-20*)

**8** <sup>1</sup>Atalak noutam ara, Yesus arye, weik asik dolamikak ap, ninye mitikanun ulamikak ap, balamukce, Allah arye ninye lyeplirye sik

kanye talima talinamle yupu, laka teleb yupu peterelamuk. Peterepra balamuk talak nirya ara, elce wipdeiamuk nang obarye 12 nang ap, melibuka balamik. <sup>2</sup>Tonda, isa talyamne ura, Yesus arye yakuka dopkwetepna arye kwetelamuk kilapu ap, uk dilamukbuk kwetelamuk kilapu ap, Yesus ap balamik. Tekbarye isa talyamuk kil, el si ara Maria, Magdalena kwetebuk kil ap, Herodes el aik fil dolamuknye Kusa, el kil Yohana ap, Susana ap, ton yuk kilapu weik tonap neika balamik. <sup>3</sup>Tonda, Herodes el aik fil dolamuknye Kusa, el kil Yohana ap, Susana ap, ton yuk kilapu weik ton ap neika balamik. Akilapu nirya arye, sik talilamik ning deice arye, Yesus ap, el mapu ap, sik patapne ning ara, dekuka arelamik. <sup>4</sup>Yesus arye peterenmok ura, el dam yanuka wekmek nang ara, amutuku-amutuku dana-dana tam nirya arye, ulamik nang fia weik bulubuka yanmekce, awekmek ninye ati, el yupu peterenmok. Apeteremok yupu noutamak arye, adomon yupu ton nyabuk.

<sup>5</sup>“Anggun kekeplulume, tonok sum arye wa wibuka, duk yala dokonmok. El yala dokonmok ura, ton yala ara el bobanmok karen bisik noutamak sakuk. Sakamukbuk, yuk nang arye yan yanibikba, talye maka yayik akarye dobuka diprobik. <sup>6</sup>Ton yala ara doknin banmok ura, keil deice arye mirin tuku mitikanun wamukak sakuk. Sakukce daupmok ani, mirin tuku mitikanun uk wamukak arye, minop pabuk. Pabuk bukni, yating tuku ak teleb ubuka kum biyuk akarye, kiting deibuk ura, kiting bupu arye, kel-kel abuka kolubuk.

<sup>7</sup>Atalak aryuk, ton yala ara doknin banmokbuk, tirmangka weiyang-weiyanga kan-kan noutamak sakuk. Dawinipnin balamoka ani, bongopmok ura, tirmangka weiyang-weiyanga weik ubukce, apabmok ning koupdongobukce, angkalung kipdongobuk ura, wen-wen alamuk. Wen-wen alamuka anya arye, duk kum mulamuk. <sup>8</sup>Aning ara kum mulamuk bukni, yala tonok dokuk ning ara, mirin tuku teleb ak sakuk. Mirin tuku deice sakuk ning ara, pabukce nebukop ura, duk moulamuk. Yala tonok-tonok sakuk ura, duk moulamuka ara, yupa fia weike seratus moubuk,” Yesus arye winipmanto yupu nyabukop ura, ayupu ton nyabuk. “Amul aupmasilye ura, ayupu kekepmanto nang ara, ‘Ayupu deiyoknye dan do’ tenen, kekepnamlulume,” nyabuk.

<sup>9</sup>Ayupu akunum nyabukop ura, aminyan Yesus el yuk unmok talak ara, Yesus el dopromuk nang obarye, 12 nang arye, asipdeyik. “Nao, nunda ayupu deiyok ap nong ap kum kekepmapa arye bita kum bikmabe, domon yupu deice arye nyaminnye ning ara deiyok yata ati do? Nun kum kekepmapa atia,” nyabuka asipdeyik.

<sup>10</sup>Asipdeyik ura, Yesus arye tamubuka nyabuk. “Na arye, ‘Allah arye ninye weik lyeplirye, sik talima talinamle,’ nyasinye yupu ara, Allah arye nyapdeipnuk ura, na mapu anggun ti, nong noutamak ning nyasunune. Bukni, yuk talye nang ati aning ara, domon yupu deice arye, bol deice

ninguk nyanune. Anang ati domon yupu deice aryuk nyanuna deiyok ara nyapnusine. Ara, Allah yupu laka nyalamuknye, nabi Yesaya arye, ‘Ninye winipnamak’ tenen, sekamuk touk, winitalak unyak ninye akunum wininyaka ati, sik kekenak ara, domon yupu uk nyanune. Yesaya sekamuk yupu ara ani.”

“Talye asing aryuk elininyak bukni, ‘Deiyok ani,’ tenebuka kum kel bikinyake. Na nyanye yupu ara, bol deice ninguk amol arye kekenyak bukni, ‘Deiyok anye,’ tenebuka kum kel bikinyake. Talye kekeltakanyake.” (Yesaya 6:9)

“Yesaya arye sekiamuk yupu akunum nyapsine. Minop arye sekiamuk bukni, winitalak unyak ninye ati, ‘Wininamak,’ kunum teneyamuka ati, na arye ayupu nyapsine,” Yesus arye nyabuk.

<sup>11</sup> Anggun na mapu ara, yuk talye nang wininyak atonun kum winilalum nang anya arye, yala doknin banmoknye, nyapmanu yupu deiyok ara, laka nyapnusine. Adomon yupu nyapmasunu ara, nong ara lakak nyapnusine.

Yala ning dokonmok ning ara, Allah yupu peterena atia.

<sup>12</sup> Doknin banmok talak, bisik noutam sakmok ning ara, ‘Allah yupu peterenmakibuk, kekepnuyap,’ tenebice talak, Isa Mutuku Dongonye arye malye winin ning deiyoknye birye, adip aryuk sik talima noutam arye, Allah yupu dalubuka dololule. Dololula arye diba kum tenebice ura, Allah arye aninye ara kum lyelule.

<sup>13</sup> Ton ninye ara, yala keil deice sakmokto ning ara, Allah yupu peterenmace ura, kekebikirye kanye deibuka, diba tenebikirye adip aryuk dolonyake. Diba tenebuka dolonyak bukni, yala ning yating tuku ak teleb ubuka kum binamuk arye, koulubuka atonun, anang ara, Allah yupu fia min kum dolokirye, minopce batakanyake. Ara, diba tenebikca ati, yuk nang arye yu uplibuk, ikin ning sik nong deice deililamakop ura, tonda yuk ikin ning yalyop ura, adip aryuk Allah Yupu kekepmace ning ara batakanyake.

<sup>14</sup> Ton ninye ara, Allah yupu kekebuka dolonyak bukni, yala ning tirmangka weiyang-weiyanga kan-kan sakmok ning atonun wininyake. Allah yupu kekekiryte, diba tenebuka dobolbanyak bukni, aminyan sik kanye kum wisilule. Yo duk kum moulamle touk, teleb ubuka kum wininyake. Ara, tuku ak mutuku noutamak arye, ‘Aning arye teleb winiptinye do, aning arye teleb winiptinye do?’ tenen, tenelana deice arye batakanyake. Tonda, “Bona weik doproptinye ura, telebuk uptinye,” nyabuka, sikce talye nyaltakanyake. Tonda, aning-aning yala-yala weik teneplibuk, ‘Winiptinye, aning ton doproptinye,’ tenekca deice arye, Allah yupu batakanyake.

Winikca ara, tirmangka weiyang-weiyanga arye papmok ning koupdongobukce, angkalung kipdongobuk ura, wen-wen anmok touk,

aning-aning nirya fia tenelamaka deice arye, Allah yupu kekelamak ning ara, batakice ura duk kum moulule. Ara, teleb ubuka kum kekekirye, Allah yupu fia kum dobolbanyake.

<sup>15</sup>Anang ara wininyak bukni, yuk ninye ara, yala doknin banmok ura, mirin tuku ak sakuk ura duk weik arye moubukce, yupa fia weik seratus moubuka touk, unyake. Sik kanye talima ara fia teleb nang anya arye, Allah yupu kekebikirye, diba tenebice ura, ikin ning awablye ura, batakna kum aryuk, fia talibuka wininyake. Allah yupu diba tenebuka, kanye deibuka fia dololamak ninye ara, Allah el fil weik arye donyake. Yesus arye el mapu ati nyabuk.

**Yesus arye, ‘Na mapu ara, batakna kum arye, na yupu moubuka kekebikirye, fia talibuka unamak’ tenen, weisa ati, domona deice arye nyabuk yupu**

<sup>16</sup>Yesus arye el mapu obarye 12 nang ati adomon yupu nyabuk. “Anggunda weisa ubukapmunce, aik fum boyangalulum ning ara, kau fumbisik singipdongopnamabe. Tonda amsuna dangabuka, ‘Weisa singipdongopnamap’ tenen, ubuka yangalulum do? Aning ara kumde. Weisa upmunce, abilinga taram ak deililulume. Ara dirina weik uplibuk, aik fum wamlye ning, ‘Laka eipnamak’ tenen, abilinga taram ak deililulume. Na babye, aweisa atonun fil donirye, ninye talima fum tam dirina kilinune. <sup>17</sup>Ara, Allah arye ninye nirya lyeplirye, talinamle ning ara, lak kina kum arye duknyamuk ura, ninye nirya bita kum kel bikinyake. Bukni, Allah arye aning duknyamuk ura, ninye bita tenebuka, kum kel bikinyak ning nirya ara, lak uplyop ura, ninye nirya kel biknamake. Ara, weisa dirina arye, aik fum uplye ning laka uplibuk elilamak touk, na peterenye ning ap, winiye ning ap deice, Allah arye duknupdeiyamuk arye ninye kum tenelamik ning ara, lak upname.

<sup>18</sup>Aning ati ara, na peterepsin yupu ara, talye amol deice arye kum kekenamlulume. “Talye amol arye kekeltakanyap do, moubuka kekenyap do?” tenen, moubuka tenenamlulume. Na yupu peteresinibuk kekemunce, ‘Deiyok anye,’ tenenepmunce talibuka unamlume. Ara talye ati kume. Allah yupu kekena ati, Allah arye kel kina deiyok ning arisilye ura, moubuka kekekirye, aning uk batakna kum arye, talibuka unyak nang ara, Allah arye kel kina deiyok ning weik arye tabakuka arilibuk, weik arye kel biknin banamake. Bukni, yata nang do nirya, lik ati, amol deice kekeltakanyakce, Allah yupu kum talibuka wininyak nang ara, sik min arye mitikanun uk kel bikamice ning babye, kum upname,” Yesus arye nyabuk.

**Yesus arye, “Na nin yape atonun ninye ap, na weit yape atonun ninye ap ara ani,” nyabuk yupu**  
(*Matius 12:46-50; Markus 3:31-35*)

<sup>19</sup>Yesus el lin koprop ap, el weit yape koprop ap arye, ‘Yesus ap yupu talipnuyp’ tenen, Yesus ulamuk aik yayik. Aik dam tikilyayik bukni,

ninye fia weik bulukmeka ati, Yesus dam kum yanmanto ubik. <sup>20</sup>Winibuk ura, yuk nang arye, Yesus ati nyabik. “An nin ap, an weitcapu ap, aik lilun dam tikelyanmakce, ‘Yesus ap yupu taliptibye’ tenen, enmakiake,” nyabik. <sup>21</sup>Nyabikop ura, Yesus arye, “Na nin yapu ap, na weitcapu ap ara, nyapnusine. Ara, dan nang do nirya, Allah yupu kekebikirye, aning uk talibuka dobolbalamice nang ara, sikda, na weitcapu ap, na weit kilapu ap, na nin yapu ap atonun unyake,” nyabuk.

**Yesus arye weik firidipna ap, mok ap wininmok  
ning kum danibuk yupu**  
*(Matius 8:23-27; Markus 4:35-41; Yohanes 6:16-21)*

<sup>22</sup>Tonok sum ara, Yesus arye Galilea mekwen lilun fia peterenmok ani, el mapu 12 obarye nang ati nyabuk. “Nunda mek lia bukna yo deice bukuka, mekwen deice bibirye, otam wekelbinuyabe,” nyabuk. Nyabukce, mek lia bukna yo deice uk bukik ura, el mapu 12 obarye nang babye, el dam uk wekelbiyikop ura, sik dem mekwen deice banmek. <sup>23</sup>Sik banmek karen ara, Yesus ara mapmok. Mapmok ura, sik nirya banmek talak ara, weik firidipna ap, liman ap, mok ap winibukce, mekwen weik arye lonting-lonting anmokce, mek lia bukna yo fum mek wekukce, ikin arye mek lia bukna dobuka, mekwen fum wekmanto unmok.

<sup>24</sup>Aning nirya wininmok talak ara, Yesus ara, mapmok. Yesus mapmok ati, el mapu obarye 12 nang arye, “Buklyame,” nyabuka bukeibik. Yesus ati nyabik. “Naio, nun mekwen dipmanto unmasil ning ara, mambul unmasile,” nyabik. Nyabik ura, Yesus mapmoka bukuka tikukce, weik firidipna donmok ati, “Weik firidipna tunimaplyame,” nyabuk. Mekwen lonting-lonting anmok ara, “Mekwen tunimaplyame,” nyabukop ura, fia tunimabuk.

<sup>25</sup>Anirya akunum tunimabukop ura, Yesus arye el mapu obarye 12 nang ati nyabuk. “Anggun min na ti dib tenepnulum ning ara, dan tam upmasila arye, ilil weik upmasil do?” nyabuk. Nyabuk ura, el mapu arye sik, ‘Se’ tenen, ngalukik, akarye ilil weik ubuka ura, asildanmek. “Yesus ara yatatonye ulul do? Mok firidipna babye, mekwen babye, el yupu nyaplye ura, el nyaplye touk kekebuka kum danalule,” nyabik.

**Tonoknye, el kanye fum tam wekamuk Isa Mutuku Dongonye, Yesus  
arye yakuka dopkwetebuk yupu**  
*(Matius 8:28-34; Markus 5:1-20)*

<sup>26</sup>Weik firidipna ap, limang ap, akunum tunimabukop ura, mekwen deica uk banmek ani, Galilea mekwen otam Gerasa mutuku biyik. <sup>27</sup>Biyikop ura, Yesus ara mek lia bukna yo deice arye, tuku ak tikilbiyuk. Tikilbiyuk ura, amutukunye tonok, isa arye uryamuknye, ninye weilamik keil si dam arye kubuka abukce, Yesus dam yayuk. Anye bira, ninye

aik kum ulamukce, talye nong bananguk ninye weilamik keil fumbisik ulamuk.

<sup>28</sup> Amutuku ulamik ninye arye, ‘Isa uryamuknye nun yana opsilyak’ tenen, kawat rantai tapu arye, el taruk ap, yan ap, tapu koubuka deililamik ura, aisa uryamuka mikip deice arye, el nong mikip kibuka, mikip weik ulamukce, atapu buluklobuka balamuk. Buluplonak arye, bik-bik abuka ninye fia kumak balamuk. <sup>29</sup> Yesus mekwen kup-kup tikilbiyuk talak ara, isa uryamuknye bira Yesus eibukop ura, Yesus dam bik-bik abuka yayuk. Yayukce, weik arye ngalukukabukce, gutam tuku dipdongobukce gisok talipdongobuk.

Yesus arye anye uryamuk isa ati, “Isao, anda anye bira el talima ak talipluma ara batakmince, kutukuka bindoplyame,” nyabukce, ayupu nyanmok talak ara, anye bira el kanye auryamuk isa ara, weik yupu arye Yesus ati labisibuk. “Anda yata wiripnamasilama ati, yanmalam do? Allah el mikip weik ulirye, yuk allah-allah nirya bisilulce, aning-aning nirya deice tam ulul Allah ara, Yesus anda, Allah el Mi Koprop ulyame. ‘Se, weika arye kum opnusilam’ tenen, moropkiayape,” nyabuka, aisa weik yupu arye Yesus ati nyabik.

<sup>30</sup> Nyabikop ura, Yesus arye aisa ati asipdeyuk. “An si ara yatanye do?” nyabuka asipdeyuk. Nyabuka asipdeyuk ura, isa mer arye elak tamubuka nyabik. “Nunda weik wekupu ati, nun si kum nukmanto upsuk. Nun si kum nukmanto anya arye, nun si ara Legion<sup>h</sup> nyasinyake,” nyabik. <sup>31</sup> Tonda, aisa mer arye, ‘Allah arye fia malye ninye ap, malye isa nirya ap, dongopnamla fumbisik dopkwetepsilyak’ tenen, Yesus ati weika arye moronmek. Ayupu nyabuka moronmek ning ara, Yesus arye aisa mer ati, ‘Anye bira talima fum tam talyaluma ara kutukuka bindoplulume,’ nyapdeipmoka ati, moronmek.

<sup>32</sup> Yesus ati moronmek talak ara, ninye arye weilamik basam, yupa fia weik amutuku asik taram tamak tuku dinmek. Basam arye tuku dibuka aunmeka ati, aisa mer nirya arye Yesus ati moronmek. “Aunmak basam nong fumbisik, ‘Wekelbilulume,’ nyapsio. Aning nyapsutumop ura, abasam wekel bitibye,” nyabuka moronmek. <sup>33</sup> Moronmek ura, Yesus arye, “Telebe, anye bira el talima taliplum ning ara kutukuka buru tam bindoplulume,” nyabuk ura, adip aryuk isa talyamuknye talima fum tam arye kutukukabikce, basam nong fumbisik wekelbiyik. Wekelbiyikop ura, abasam yupa weik, amutuku

<sup>h</sup> **8:30** Legion nyanyaka deiyok ara ani. Legion ara, yin talin nang sik kong fia weik ati, isa mer arye, ‘Nun si ara Legion,’ nyabuka si silamik. Aisa ara, yupa weik anya arye, tonok si kum nyabik bukni, Legion uk nyabik.

taram arye bik-bik abuka, kulukuka banmek ani, mekwen fumbisik wekik. Wekikop ura, abasam nirya mekwen dibik.

<sup>34</sup>Abasam weinmek nang eibikke, awinipmok ning nirya ati, ninye asik dolamik noutamak ap, bisik ak ap, laka nyapnin banmek ura, ninye weik kekebikke, ‘Awinipmok ning eipnamap’ tenen, Yesus dam dilyayik. <sup>35</sup>Yesus dam dilyayikke, isa yupa weik talyamukak, Yesus arye kwetebuknye, kanye deibukke ongon butum ongobuka bukmokak eibik. Eibik ura, ilil weik ubuk. <sup>36</sup>Min aunmeka eibik nang arye, winiryuk yanmek nang ati, anye bira isa uryamukbuk, Yesus arye kwetebuk ning ap, basam nong wekik ura, mekwen fumbisik wekik ning ap, anirya dukdongobuka laka nyabik. <sup>37</sup>Laka nyabik ura, anang nirya kekebikop ura, ilil fia weik ubuk ati, ‘Yesus ara nun Gerasa mutuku nirya abatakuka, yukak bindoptu’ tenen, Yesus ati moronmek.

<sup>38</sup>Winibuka moronmeka ati, Yesus tuba tamubuka mek lia bukna yo deice biyuk ura, mek lia bukna yo deice bulbinuyuk talak ara, isa talyamukak, Yesus arye kwetebuknye birye, ‘Na ap, Yesus ap bitinimnye’ tenen, Yesus ati morobuk. <sup>39</sup>Nyabuka morobuk ura, Yesus arye anye biti nyabuk. “Kume, ance tamubuka an mutuku kopropa nang ap, an aik nang ap ati, Allah arye bico tenepmakilce, fil weike dopmakil ning ara, laka nyalbinulyame,” nyabuk. Yesus arye nyabukop ura, anye birye, el mutuku tamubuka biyukke, anyasik-anyasik noutam nirya, ayupu laka nyapnin balamuk ura, aninye nirya kekelamik.

**Yesus arye, tonok kil, ining balamuk kil ap, dipmok kilmu ap,  
kwetebuk yupu**

*(Matius 9:18-26; Markus 5:22-43)*

<sup>40</sup>Yesus binmok bisik uk, mek bukna yo deice tuba tamubuka yayukke, Galilea mekwen deice yayuk. Yayuk ura ninye yupa weika arye, ‘Yesus tamubuka yanamal’ tenen, akunum bulubuka dinmekak arye, bisik dilbanmek. <sup>41</sup>Sik nirya Yesus ap aunmekbuk, tonoknye el si Yarius yayuk. Yarius ara, Yahudi yala nang Allah yupu peterelamik aik, anyaik sik deiyok nang weik ulamikbuk, el ton ulamuk. Yarius yayukke, Yesus eibukop ura, ‘Yesus ati kipedonun’ tenen, Yesus yan dam gutam dunupdongobuka, Yesus ati weika arye moronmok. <sup>42</sup>“Na kilmu akunum dipmanto unmanila ati, ance na aik yaminyop ura, na kilmu kwetepnutume,” nyabuka moronmok. Anye bira el kilmu ara, (12) obarye kiting tamun akunum nemuk. Akilmu dipmantu unmok ati moronmok, ura Yesus ap banmek ati, abulubuka wekmek nang nirya ap, neika banmekce, Yesus dam dana-dana nirya lipmekak arye banmek.

<sup>43</sup>Abanmek nang kan-kan noutamak ara, uk dilamukbuk, kiting tamun 12 obarye, deice arye el ining balamuk kil neika banmek. Akil ara, ‘Sikke kwetepniting’ tenen, kweten nang dam weik balamukbuk, sik kum



kwetepmanto wamik arye, uk tuba delamuk. <sup>44</sup> Yesus fil dolamuk ning kekebuka ati, elce utenebuk. ‘Yesus el ongon butum talye bol piptinyeto ura, kwetepnute,’ tenebuk. Utenebuka ati, abanmek nang noutamak arye, Yesus el balye tam tikilyayukce, Yesus el deice ongopmok butum ak bol pibuk. Yesus el ongon butum bol pibukop ura, adip aryuk el ining balamuk ara, tunimabuk ura, teleb kibuk.

<sup>45</sup> Yesus ongon butum bol pipmok talak ara, adip aryuk Yesus arye, tamubuka, ayangan mek ninye nirya dipdonokdeyukce asipdeyuk. “Yata kil, yatanye birye, na ongon butum bol pipmanil do?” nyabuka asipdeyuk. Asipdeyuk ura, el ap balamik nang nirya arye, “Nunce kume,” nyanmek. Nyanmek ura, Peterus arye Yesus ati nyabuk. “Ninye weik an dam lipmaka anya arye, ‘Yata wiribuka arye yatanye birye el ongon butum bol pipnamal do?’ tenen, kum kel kiptibye,” nyabuka asipdeyuk. <sup>46</sup> Nyabuk bukni, Yesus arye tamubuka nyabuk. “Kume, na keke, sal do, kil do, tonoknye birye na bol pilipmanilba, na mikip el nong deice binmale,” nyabuk.

<sup>47</sup> Nyabuk ura, akil ara Yesus kwetepmok ning akunum kel kimpoka anya arye, ‘Mambul fil dopmanila ara kum duknuptinye’ tenen, malye kanye bobuka, Yesus yan dam gutam dungupdongobukce, akil arye winipmok ning nirya ap, Yesus arye kwetepmok ning ap, aninye kekenmekak laka nyabuk. <sup>48</sup> Akil arye aning nirya laka nyabuk ura, Yesus arye tamubuka akil ati nyabuk. “Na ka kilo, an diba tenepmanilama deice arye kwetepmakine. An kanye imun wamkuk ning ara, akunum kwetepmakine ati, telebuk kanye deibuka binamlyame,” nyabuk.

<sup>49</sup> Yesus arye ayupu tuba nyanmok talak ara, Yarius el aik ulamuknye birye, Allah yupu peterena aik deiyoknye, Yarius ati laka nyalyayuk. Laka nyalyayukce, Yarius ati nyabuk. “An kilmu akunum dipmakila ati, apeterenanye Yesus ati, yupu tonap kum nyapnulyame. Batakuklyame,” nyabuk. <sup>50</sup> Anye birye ayupu nyabuk ura, Yesus kekebukce, ‘Danyablye’ tenen, luba kibukce Yarius ati nyabuk. “El nyapmal yupu ati, kekepmince ikin kanye bobuka, ilil una ap, teniltona ap meme. An kilmu kum dipmale. Ilil asa kum unulyam bukni, dib tenebuka talye kanye bobuka uminyop ura, an kilmu na arye kwetepnamkine,” nyabuk.

<sup>51</sup> Nyabukce, sik nirya, ‘Yarius aik binuyap’ tenen, banmek ani, Yarius aik biyik. Biyikop ura, ayangan mek nang nirya, ‘Sik yacak’ tenen, yupu sekdongobuk ura, sik anyak uk unmekop ura, Yesus ap, Peterus ap, Yakobus ap, el weit Yohanes ap ara, akilmu el li Yarius ap, el lin ap, sik yuk Yarius aik fum biyik. Yuk nang ap Yarius aik kum wekik. <sup>52</sup> Yarius el aik akunum wekik talak ara, anyaik dam unmek nang, sik weik arye engena ap, weik arye ngalukuka malye nyana ap, wininmekbuk, Yesus arye eibuk. Eibukce, anyaik malye nyanmekce, kweldanmek nang ati nyabuk. “Anggun weik arye malye, nyabuka, ngalukuka kweldanmaluma ara, batakululume. Anggun tunimaplulume. Akilmu ara kum dipmale.

Urдем mapmale,” nyabuk. <sup>53</sup>Nyabuk ura, aunmek nang arye, akilmu akunum dipmoka ara, akunum bikmeka anya arye, Yesus ati akutunmek.

<sup>54</sup>Akutunmek ura, Yesus arye akilmu taruk talibukce, ayupu nyabuk. “Na kilmu tiklyame nyapmakine,” nyabuk. <sup>55</sup>Yesus arye nyabuk ura, adip aryuk adipmok kilmu kanya bindopmoka ani, tamubuka el nong ak uk yanuka wekukce, kam bukuk. Wekukop ura, akilmu tikuk. Winibuk ura, Yesus arye nyabuk. “Akilmu el dina ariplulume,” nyabuk.

<sup>56</sup>Yesus arye akilmu kwetebukop ura, akilmu el lin ap, el li ap, se tenebuka, ngalukunmarik. Bukni, Yesus arye anang bitinye ati, “Awinipman ning ara, yuk ninye ati nyapra bana meme,” nyabuka yupu sekdongbuk.<sup>i</sup>

**Yesus arye, ‘Na yupu dobuka peterepra banamak’ tenen, el mapu obarye 12 nang, Rasul wibuka dopdeibuk yupu**  
(*Matius 10:9-15; Markus 6:8-11; Matius 14:1-2; Markus 6:14-16*)

**9** <sup>1</sup>Ara, Yesus elce wibuka deiamuk nang, obarye 12 nang, el yupu peterelbana ati Rasul nang, el dam yangana ati, yukubukce, ‘Na fil dopnin banamak’ tenen, yuk-yuk dopdeibuk. Anang dopdeibuk ning ara, ‘Isa nirya bisibuka yakanamak’ tenen, tonda, ‘Uk yala-yala nirya kwetepnamak’ tenen, winin ning deiyok bitinye aribukce, el mikip sik nong deice deibuk. <sup>2</sup>Ara, anang ara, “Allah arye ninye nirya lyeplirye, sik kanye talima talinamle,” nyabuka, ‘Laka peterelbinamak’ tenen, tonda ‘Uk dilamlye ninye kwetepna banamak’ tenen, el mapu 12 nang dopdeibuk. <sup>3</sup>Tonda wininamika ati, laka nyabuk yupu ara ani.

“Amutuku-amutuku nirya banamunye talak ara, aning-aning nirya kum libuka banamlulume. Ara, anggunce, ‘Se aning-aning nirya ara, yata wiribuka arye doproptibye do?’ tenen, weik arye tenena meme. Allah arye anggun patapsilye ning ara arinamsile. Kama sirika ap, aling ap, anggun kwaning ap, yo bok ap, butum aling bitinye ap, libuka kum bopnamlulume,” Yesus arye el mapu 12 nang ati nyabuk.

<sup>4</sup>Nyabukce ayupu ton nyabuk. “Tonok asik domicak bimunyop ura, tonok aik uk wekuka anyaka uk manmamunya ani, yuk mutuku banamlulume. Anyasik mapmana, orasik mapmana, uasik mapmana kina meme. <sup>5</sup>Yata mutuku do nirya, asik dolamicak bimunye ura, telebe nyabuka, anggun yupu kum kekepsikirye, kum yukupsikcop ura, winipnamlulume. Ara amutuku tuku anggun yan deice palipmasilye ning ara miningdam anyuk kilibuka abatakmunce amutuku batakuka yukak

<sup>i</sup> **8:56** *Laka nyana meme* – Yesus arye, “Akilmu kwetepman ning ara, yuk nang ati, laka nyalbana mem,” nyabuk ning deiyok ara, ani. Ara, ‘Ninye nirya arye, na Yesus ara, Ninye Lyena Deiyoknye, Mesias aulule, tenepnikirye, kel kipnamninyaka’ tenen, nyabuk. El laka nyanyak talak kabula anya arye, ayupu nyabuk.

banamlulume. Winipnamluma deiyok ara ani. Ara anang arye, ‘Allah yupu batakmba ara, fia malye upmaba ati, nun yan tuku yanibuka, kiliplopmasiyaka atonun, Allah arye nun nong wenebuka opnamsile, tenepnamake’ tenen, wininamlulume,” Yesus arye nyabuk.

<sup>6</sup>Yesus arye ayupu nyabukop ura, kekebek, ninye nirya sik kanye talima malye tenelamika ap, sik malye ulamika ap batakikirye, kanye tamubikirye, diba tenebice ura, ‘Allah arye sik kanye talima talinamle’ tenen, Allah yupu peterepra balamik. Tonda, amutuku-amutuku nirya peterepra balamikce, uk delamuk ninye weik kwetelamik.

<sup>7</sup>Yesus el mapu arye peterepra balamika ati, ninye weika arye, Yesus el winilamuk ning ap, el si ap, kekelamik. Tonda, amutuku nirya talyamuknye, weik ninye deiyoknye Raja Herodes ababye, kekebuk. Ton ninye ara, Yesus arye ninye winipman kum fil dolamukak, eibika ati, sikce nyabik. “Kume, Yohanes Pembaptis akunum diamuk bukni, ila tamubuka kam bukuk akarye, ninye winipman kum fil dolule,” nyalamik.

<sup>8</sup>Yuk nang ara, “Kume, anye bira, Allah yupu ap, Allah arye aminyan winipnamle ning ap ati, laka nyalamuknye nabi Elia ulule,” nyalamik. Ara, yuk ninye ara, “Nabi Elia kum ura, Allah arye winipnamle ning ap, el yupu ap ati laka nyalamik nang akunum diamik nabi nang kan-kan arye, tonoknye kam bukuka akunum yanmasile,” nyalamik. <sup>9</sup>Nyalamik ura, Herodes kekebukce kanye teniltolamuk bukni, Raja Herodes arye ayupu nyabuk. “Se, Yohanes Pembaptis akunum ya arye seklopsa ati, anye bira, mambul fil dobuka anye biti nyaninyaka ara, yatanye birye afil dolul do?” nyabuk. Utenebukce, ‘Na ton eiptinye’ tenen, piriptyuk.

**Yesus arye ninye yupa weik 5.000 ninye kwaning aribuk yupu**  
(*Matius 14:13-21; Markus 6:32-44; Yohanes 6:5-13*)

<sup>10</sup>Yesus arye wibuka deibuk ura, el yupu dobuka peterepra balamik nang, Rasul nang peterepra balamikani, tamubuka Yesus dam yayikce, sik peterepra balamik ning ap, sik fil dolamik ning ap, Yesus ati yanuka laka nyanmek. Yesus arye, sik yuk nang daunmakibuk, ‘Na ap, na mapu Rasul nang ap, nun uk tonok mutuku si Betsaida mutuku binuyabe’ tenen, bisik banmek ani, bisik noutam arye, ninye una kumak biyik. <sup>11</sup>Sik yuk banmek bukni, sik sakwetebuka, banmek talak eibik nang arye, laka nyanmekata ati, yuk ninye weik kel bikik akarye, ‘Epdanamap’ tenen, sik babye, aminyan banmek. Yesus Betsaida mutuku akunum biyukop ura, ayupa weik aminyan wekelbiyik nang ati, telebe nyabuka, “Allah arye ninye lyeplirye, sik talima fia talilule,” nyabuka peterelamuk yupu tonap peterenmok. Tonda, sik uk delamuk ninye weik kwetenmok.

<sup>12</sup>Peterenmok ura, kiting kumupnamok talak ara, Yesus el wipdeibuk nang, sik 12 nang arye, Yesus dam nyalyayik. “Naio, ninye kumak unmaba anya arye, kiting akunum kumupla ati, abulupmak nang

dopkwetebibye ura, amutuku noutamak yuk-yuk aik malbiting akarye, sik din ning dekuka diptinge,” nyalyayik. <sup>13</sup>Nyabik bukni, Yesus arye el mapu 12 nang ati nyabuk. “Angguncuk sik din ning ariplulume,” nyabuk. Nyabukop ura, sikce tamubuka Yesus ati nyabik. “Kume naio, nunda din ning roti pamu barye ap, mekin bal bitinye ap, anyuk upmasila ati, yuk din ning kum dekeipyop ura, aninye fia weik ati aning uk kum ariptybye,” nyabik.

<sup>14</sup>Atalak ara, ninye yupa fia weike sal dem 5.000 bulubuka unmeka ati nyabik. Nyabik ura, Yesus arye tamubuka nyapdeibuk ati, el mapu arye ayupa weik wekmek nang ati nyabik. “Anggun yuk-yuk yupa pamu barye kibuka, (ara ninye 50 nukuka) tuku deice ak bokuka yuk-yuk buklulume,” nyabik.

<sup>15</sup>Nyabik ura, awekmek nang arye bokuka bukikop ura, ton tam yupa weik pamu barye bukik. Ton tam babye, atonun yupa weik pamu barye bukik. Anang nirya ara, yupa weik 5.000 ninye bokuka bukik. (Awekmek nang nukik bukni, kilapu ap, mapu ap, kum nukik.) <sup>16</sup>Akunum bukikop ura, Yesus el mapu arye, roti pamu barye ap, mekin bal bitinye ap, aripnamek ning ara dobuka im deice dipdeyukce, Allah ati, “Telebe,” nyabuk akarye, aroti ara toptalibukce, el mapu obarye 12 nang arye, ‘Abukmek nang aripnamak’ tenen, aribuk. Tonda, amekin bal bitinye sekuka el mapu aribuk ura, abukmek nang ati, aroti ap, amekin bal ap bokuka arinmek.

<sup>17</sup>El mapu arye abukmek nang ati, aning bokuka arinmek ura doprobikce dinmekani akunum boubukop ura, ton batakik ning ara, bulubuka deibikce, dobuka tonok ak deibik. Yesus el mapu 12 nang arye bulubuka libuka deipmek ning ara, aling atonun ning, el si ara bakul, weik ning 12 deiamika arye libuka deibik.

**Peterus arye Yesus ati, “Anda Ninye Lyena Deiyoknye ulyame,” nyabuk yupu**

*(Matius 16:13-16, 21-28; Markus 8:27-9:1)*

<sup>18</sup>Tonok sum ara, Yesus ap, el mapu ap, sik yuk unmekce Allah moronmekop ura, Yesus arye el mapu ati asipdeyuk. “Yuk nang arye na ti yatanye tenebuka nyaninyak do?” nyabuk. <sup>19</sup>Nyabuk ura, sik nirya arye tamubuka nyabik. “Ton nang ara, ‘Yohanes Pembaptis ulule,’ nyakinyake, ton nang ara, ‘Elda Allah yupu laka nyalamuknye nabi Elia,’ nyakinyake, ton nang ara, ‘Allah el yupu ap, elce winipnamle ning ap ati, laka nyalamik nang kan-kan arye diamik bukni, tonoknye kam bukuka ulule,’ nyakinyake,” nyabik.

<sup>20</sup>Nyabik ura, Yesus arye el mapu 12 nang ati tamubuka asipdeyuk. “Ton nang ara, ayupu nyakniyak bukni, anggunce na ti, yatanye tenebuka nyanululum do?” nyabuka asipdeyuk. Asipdeyuk ura, Peterus

arye tamubuka nyabuk. “Naio, anda ‘Ninye mutuku-mutuku nirya, ninye weik lyeplirye talipnamle’ tenen, Allah arye wipdeiamkuknye, anda Ninye Lyena Deiyoknye, Kristus ulyame,” nyabuk. <sup>21</sup>Peterus nyabuk ura, Yesus arye sik nirya ati nyabuk. “Aning ara, yuk nang ati laka kum nyalbinamlulume,” nyabuka yupu moup deibuk.’

**Yesus arye el aminyan opnamika ati, laka nyabuk yupu**

<sup>22</sup>Yesus arye anyapmok yupu moupdeibukce, el nong deice ikin ning deipnamik ning ap, kanye imun ning upnamuk ning ap, el mapu obarye 12 nang ati, deiyok koubuka lak nyabuka peterenmok. “Na ara Ninye Mi Koprop Atonunye unune.<sup>k</sup> Sik Yahudi yala nang sik deiyok nang ap, Allah arina ati deiyok nang ap, Allah arye, ‘Winipnamlulume, aning kum winipnamlulume,’ nyapdeibuk ura, Musa arye sekamuk yupu peterena deiyok nang ap, anang nirya arye na ti bataknikirye, opnamniyake. Opnikcop ura, dipmanya ani, lik winilye mapmanya ani,<sup>l</sup> Allah arye tamubuka kam bukeipnamnile,” nyabuk. <sup>23</sup>Ayupu nyabukop ura, ayupu tonap, nyabuk.

Yata nang do nirye, na ti dib tenepnikirye na melibuka dobolyanganamniak nang ara, sik ning ati, ‘Aning mambul,’ kum tenenamake. Sik babye, winibuka obice, dipnamak nang uk, wanwanun yo dobuka talye balamikirye, anang arye, ‘Akunum oplopnamak ara, telebuka,’ tenenyak touk, na mapu babye, ‘Opnamsiak do?’ tenena kum arye, sik kam un ning ap, sik pataplye ning ap, adip aryuk kum tenenamake. Yesus dib tenebikca deice arye Yuk malye-malye nang arye na mapu obikcop ura, ‘Ara mambul,’ kum tenenamake. Na yupu uk kekebuka dobolyanganamake.

<sup>24</sup>Aning ati ara, yata nang nirya ara, na ti dib tenepnica ati, yuk nang arye “Opnuyabe,” nyabikiba, ilil uplya ati, sikce, ‘Nun kam una ap, nun patapsilye ning ap, aning uk mambule. Nun ning uk,’ tenebuka ulamice ninye ara, aminyan Allah arye weneplirye opliba, dipanamake. Aminyan talak ara tuba tonap, sik kam fia kum unamake. Bukni, na ti dib tenebikca deice arye, yuk nang arye na mapu obikce ura dipnamak ninye ara, aminyan ara fia kam unamake.

---

j 9:21 *laka kum nyanululume* – Yesus arye el mapu 12 nang ati, ‘Laka kum nyalbinululume,’ nyabuk. Ayupu nyabuk ning deiyok ara, ani. Ara Yesus arye, ‘Na ara Mesiasnye, Ninye Lyena Deiyoknye ununa ara, na lak akarye, laka nyanamne talak ara, kabula,’ tenebuka ati, ayupu nyabuk. <sup>k</sup> 9:22a *Ninye Mi Koprop Atonunye* nyabuk ning ara, im deice anye ulamuk bukni, tukwak ninye lyena ati yayuk talak ara, ninye nong atonun dayukce, talya tukwak nang urasin atonunye kibuka yauka ati, ayupu nyabuk. <sup>l</sup> 9:22b *like winilye sum* – Sik Yahudi yala nang arye, nuklamik touk, ara Jumat lukunyan ap, Sabtu lukunyan ap, anyapce ubuka ara, minggu berentam talak akunum berekukba, ‘Like winilye akunum uple,’ tenelamikce nyalamik. Sikce aning atonun nuklamika ati ara, ‘Like winilye sum,’ nyabik.

<sup>25</sup>Tonoknye birye, aning-aning yala weike talyamtu ani na ti diba tenena kumce, dipturye, uku din mutuku bitop ura, atalyamtu ning nirya arye lyeptu do? Aning nirya arye teleb kum updeipmimitue. <sup>26</sup>Yata nang do nirya, anggun anang kan-kan upmunce, na nong ap, na yupu ap ati, ‘Yesus ati diba tenebibe ura yuk nang arye nun nong deice ikin ning deipsicak do, opsicak do?’ tenen, anggun ilil ati alye usilye ura na ti bataknunyunyop ura, aminyan sirya talak ara ikin weik upnamsile. Ara Allah daunmalya ani, na Ninye Mi Koprop Atonunye birye aminyan talak, ‘Anang ara, na mapu kume,’ nyabuka anggun ti bataknamsine. Ara, na ni el urasin fia teleb ulirye, dirina weik ulya atonun, na babye, atouk upnyop ura, Allah arye kwepdeibukak im deice unyak nang malaikat ap, ansinipropbibirye, tukwak yanamap talak ati nyapsine. Yesus arye awekmek nang ati nyabuk.

<sup>27</sup>Nyabukce, ayupu ton nyabuk. “Na dipkoprop yupu nyapsine. Anggun mening dam atikmalum nang kan-kan arye, ton nang ara Allah arye ninye mutuku-mutuku nirya ninye lyeplirye, el mikip deice sik talima talipnamle talak min kum winipmalye talak ara, kum dipnamlume. Sik aninye ara aminyan awinipnamle ning eipnamake.” Yesus arye awekmek nang ati nyabuk.

**Yesus el urasin yuk ubuk yupu**  
(*Matius 17:1-8; Markus 9:2-8*)

<sup>28</sup>Ayupu nyabukop ura, daulamika ani, naku barye sum akunum mabikop ura, Yesus arye winilye nanguk doprobukce, ‘Allah moropnyup’ tenen, weik mutuku dup welebik. Yesus ap mutuku dup welebik nang si ara, Peterus ap, Yakobus ap, Yohanes ap, Yesus ap, sik uk amutuku dup welepmek. <sup>29</sup>Sik amutuku dup welebikop ura, sik awinilye nang wi ubuk ura, mapmek. Sik mapmek talak ara, Yesus arye Allah moronmok karen ara, Yesus urasin yuk ubuk. Urasin yuk ubukce, el butum ongon aling kurubukce, bebeya lingum alamle touk dirina weik ubuk.

<sup>30</sup>Winibuk ura, sik awinilye nang mapmek dam arye, minop ulamik nang ara, Allah el im deice dirina ubuk deice arye, nabi Elia ap, Musa ap, Yesus dam tikilyarik. ‘Tikilyarik ura, Allah arye Yesus ati, Winipnamle’ tenen, akunum wipdeiamuknye ati, yupu talipmek. Ara, Yesus ap sik neika tikikce, yupu talipmek. <sup>31</sup>Allah el im deice dirina ubuk deice arye yarikce, sik yupu talipmek ara, Yesus Yerusalem mutuku biyuk ura opnamik ap, el tamubuka kam bukukce, im deice binamuk ning ap ati, ayupu talipmek.

<sup>32</sup>Sik Peterus ap, Yakobus ap, Yohanes ap ara, amutuku dam mapmeka winiryuk wi walwal bukikop ura, wi walwal upmok arye, wi dung-dung anmek, ak adirina weik ubuk ura, lukdanuka dung-dung abik. Akunum dung-dung abik karen ara, Yesus el urasin yuk ubuk ning ap, el dirina

weik ubuk ning ap, abitinye nang el ap neika tikmekak arye, yupu talipmek ning ap, eibik. <sup>33</sup>Sik nabi Elia ap, Musa ap, Yesus ap, ayupu talipmekce, abitinye yanmarik nang binurik talak uk, Peterus arye Yesus ati nyabuk. “Naio, nun aunmaba ara, fia teleb ati, nun winilye nang arye buru aik ton doptibye. Ton aik ara an ti, ton aik ara Musa ati, ton aik ara Elia ati doptibirye, anyak uk ulamtibye,” Peterus arye nyabuk. (Peterus arye ayupu nyabuk ning ara, Yesus el urasin yuk ubuk ning ap, Musa ap, nabi Elia ap yanmarik ning ap, yupu nyaprik ning ap, nirya eibikce, ‘Se’ tenen, ngalukik ura, Peterus arye bita bikna kumce, talye yupu nyabuk.)

<sup>34</sup>Peterus ayupu tuba nyanmok talak ara, dua arye sik tikmek mutuku nirya libukce, adua arye yanuka siknipdongobuk ura, aning ati Yesus el mapu ara, ilil weik ubuk. <sup>35</sup>Adua kan-kan ara, Allah arye ayupu nyabuk. “Aunmalanye bira, na Mi Koprop ulule. Na arye el wibuka deiamsa ati, el yupu fia moubuka kekenamlulume,” nyabuk. <sup>36</sup>Allah arye ayupu nyabuk ura, adip aryuk sik awinilye nang arye, sik tikmekak dana-dana dipdeyik ura, ayanmarik nang bitinye ara, kum eibik. Sik winilye nang ap, Yesus ap sik uk atikmek. Amutuku dup arye tamubuka kulukuka yayikce, aunmek talak ara, Yesus el mapu winilye nang arye awinipmok ura eipmek ning ara, yuk nang ati, laka kum nyalamik. Sik uk kanye fum tam biklamik.

**Yesus arye isa talyamuk mi kwetebuk yupu**  
(*Matius 17:14-18, 22-23; Markus 9:14-27*)

<sup>37</sup>Sik welepme mutuku deice arye kouluka yanuka mapmeka berekukop ura, ‘Ninye weik Yesus el yupu ton kekepnuyap’ tenen, bulubuka yanuka wekmek ura, epdayik. <sup>38</sup>Awekmek nang kan-kan tonoknye birye Yesus ati ayupu nyabuk. “Naio, na mi tonokuk dinmala ati, dipdetumce kwetepnutume. <sup>39</sup>Na mi isa talilyangalye talak nirya ara, isa mikip arye weklirye ura ngaluklirye, tuku deice dobuka poukloplye ura, si kamula sakalule. Tonda, si lingdarap abliirye, sirim bir-bir abuka, el nong nirya malye kilule. Aisa arye na mi batakna fia kume. Fia opmanto ulule. <sup>40</sup>Winilul ati, ‘An mapu arye aisa yakwetepnamak’ tenen, weika arye moropman bukni, sikce kum yakwetepmanto upmake.” Ami el li birye Yesus ati nyabuk.

<sup>41</sup>Nyabuk ura, Yesus ayupu kekebukce, atikmek nang nirya ati lik ubuk ura, ayupu nyabuk. “Anggun winitalak ululum nang ara, dib kum tenelalum nang ati, yata talak arye, fia aunamne do? Tonda, ‘Teleb unamak do?’ tenen, batakna kum arye yata weribukap talak arye fia neika unamap do? Ati, ami ara na dam boyalulume,” nyabuk. <sup>42</sup>Yesus arye nyabuka ati, anang arye ami dobuka Yesus dam boyayik talak aryuk, ami talyamuk isa ara Yesus eibukop ura, ami dobuka tuku deice pouklobuk akarye, aisa mikip deice arye sirim weik arye talipmok.

Sirim donmokce tuku deice dokuka poubukce, tuku deice bongoltonmok akarye, si kamula barukunmok. Ami wininmok ura ami talyamuk isa ara, Yesus arye yakuka dopkwetebuk ati isa ami talima fum tam kutukuka biyuk. Biyuk ura, ami ara teleb ubuk ati, Yesus arye el li bak tamubuka aribuk. <sup>43</sup>Winibukop ura, awinipmok ning nirya eibik nang arye, ‘Se Allah el mikip ara fia weik ulule,’ tenebuka ngalukik.

<sup>44</sup>Yesus arye nyabuk. “Na nyapnusin yupu ara moubuka kekepnululume. Luba kina meme. Ninye Mi Koprop Atonunye, ninye yupu delilbice ura, opnamniyake,” nyabuk. <sup>45</sup>Yesus arye ayupu nyabuk ura el mapu ara, kekebik bukni, bita kum kel bikik. Allah arye ayupu deiyok duknubuk anya arye sik bita kum kel bikik. Tonda, sik ilil ubuk ati, “Anyapmasilam yupu deiyok ara, laka nyapsilyame,” nyabuka Yesus ati kum asipdeyik.

**Yesus el mapu arye, “Nun kan-kan aryuk, yatanye bak deiyoknye kipnamasil do?” nyabuka, nyapdayik yupu**  
(*Matius 18:1-5; Markus 9:33-40*)

<sup>46</sup>Yuk talak ara, Yesus el mapu sik uk yupu talipmekce, yupu nyanmek. Sik yupu nyanmeka deiyok ara, ‘Nun kan-kan arye, yatanye tiklirye, nun deiyoknye kipnamsil do?’ tenen, sik arye nyaldanmekce, yupu talinmek. <sup>47</sup>Yesus arye sik kanye talima noutamak tenenmek ning akunum kel kibuka ati, tonok mitik mi dobuka sik kan-kan arye tikdeibukce ayupu nyabuk. <sup>48</sup>“Yatanye do, yata kil do, amitik mi atonun ninye ati, bico tenebikirye, na si deice arye telebe nyabuka mililamicop ura, ara na ti melinamniyake. Na ti melinamniyak nang ara, na tibuk kume. Na ti milipnicop ura, ara na dopdeipnuknye, Allah ati melinamake. Yatanye do, yata kil do, ‘Na weiknye upnamne,’ tenenyak nang ara, ninye amutam unyakce, yuk ninye nirya ati, bico tenebuka melinauk unamake. Atouk uplinarye bira, Allah el kanye ara, ‘Anye bira fia mambulnye,’ tenelule,” Yesus arye nyabuk.

<sup>49</sup>Yesus arye nyabuk ura, Yohanes arye tamubuka nyabuk. “Naio, tonoknye elce ninye talilamuk isa ara, an si deice arye yaklamuk ak, eibupurye, anye bira nun ap kum banyapnye biti, ‘Anda bataklyame,’ nyabupe,” Yohanes arye nyabuk. <sup>50</sup>Nyabuk ura, Yesus arye tamubuka nyabuk. “Ato nang ati anggunce yupu kum sekenamlulume. Yata ninye do nirya, na yupu kum yanisinyak nang ara, nun ap neika fil donyap ninye utotoa unyake.” Yesus arye nyabuk.

**Samaria mutuku tonok asik Yesus kum melibik yupu**

<sup>51</sup>Yesus im deice tamubuka welepnamuk talak dam akunum kibuka ura, yuk ning tenena kumce, ‘Adip aryuk Yerusalem mutuku



abinune,' tenebukce, bisik banmal. Tonda, el melina nang bitinye wibuka, 'Na ti aning kintinip deipnamnirak' tenen, dopdeibuk. <sup>52</sup>Dopdeibuk ura, sik banmarik ani, bisik noutamak Samaria mutuku<sup>m</sup> asik tonok dolamikak birik. <sup>53</sup>Anyasik dam binuka wekrikce, 'Anyak uk Yesus el ning kintinipnuname,' teneprik bukni, sik Samaria mutuku ulamik nang arye, 'Kume, sik deiyoknye Yesus, Yerusalem mutuku binamala ati, aning winipnurak' tenen, kel bikikce, Yesus ati "Kume, an ara, Yerusalem mutuku binamlyama ati, nun ap neika una kume," nyabuka kum yukubik. <sup>54</sup>Kum yukuprobik ati, Yohanes ap, Yakobus ap eiprikop ura, Yesus ati ayupu asipderik. "Naio, Allah moropnimnye ura, 'Allah im deice arye uku dopkwetseptuba, anang niryra ara dipdoptue' tenen, Allah moropnunam do?" nyabuka asipderik. <sup>55</sup>Bukni, Yesus arye tamubuka anang bitinye ati, "Winina ara, fia malye," nyabuka wenebuk. <sup>56</sup>Wenebukop ura, sik niryra amutuku batakuka, yuk asik dolamikak biyik.

**"Yesus el ti melibuka fil donamak nang ikin upnamle," nyabuk yupu**  
(*Matius 8:19-22*)

<sup>57</sup>'Yerusalem mutuku binuyap' tenen, bisik banmek talak ara, tonoknye birye Yesus ati ayupu nyabuk. "An banalamak niryra ara, na arye melibuka dobolbanamkine," nyabuk. <sup>58</sup>Nyabuk ura, Yesus arye tamubuka anye biti nyabuk. "Mabil mana atonun ning do yuk talye buru tam ulamle ning do niryra ara, tuku palibuka aik dobikirye unyake. Maka yala niryra ara, sik aik ara, yo duba dobuka unyake. Wininyakbuk na ara Ninye Mi Koprop Atonunye bira," na aik kopropa kum ati, na man aik ton lo kum upnuke," Yesus arye nyabuk. <sup>59</sup>Tonye biti, Yesus arye, "Na melibuka dobolyanilyame," nyabuk ura, anye birye tamubuka nyabuk. "Deiyok, teleb bukni, na ni dipmala ati, minop weipniryre. Na ni weipneyop ura, aminyan talak, an ti melibuka dobolyanamkine," nyabuk.

<sup>60</sup>Nyabuk ura, Yesus arye tamubuka nyabuk. "Dib tenena kum ninye ara, dibinyak ninye atonun unyak anye arye, sik dibikce ninye ara, aninye arye weiptinge. Anda, 'Allah arye ninye weik lyepliryre, anggun

---

<sup>m</sup> **9:52 Samaria mutuku** – Yahudi yala ninye arye Samaria mutuku ninye ati, 'Aninye fia nun like,' tenelamika ati, sik niryra neika fia kum ulamikce, kum melilamik. Yahudi yala ninye arye, 'Yerusalem mutuku weik kwalina talak ati bisik binuyabe,' tenebuka, bisik balamik talak ara, Galilea tam eitam mutuku batakuka, liki winilye sum deice arye utam bisik balamika ani, Samaria tam bisik noutam wamuka ati, amutuku noutam balamik. Samaria tam ninye arye, Yahudi yala ninye ati, fia kum melilamik. <sup>n</sup> **9:58 Ninye Mi Koprop Atonunye** – Yesus arye, el biramang ati, ayupu weik arye nyalamuk. Ara im deice yayuk bukni, ninye nong atonun dayukce, tukwak mutuku yayuka ati, nyabuk. Tonda, ninye tukwak ninye ati, Ninye Lyena Deiyokeye ulula ati, ayupu nyapdayuk.

kanye talima talinamsil talak akunum yanmale,' nyabuka, Allah el kai teleb yupu ara, peterelbilyame," nyabuk. <sup>61</sup>Tonye birye Yesus ati, ayupu nyabuk. "Naio, aminyan ara, na arye an melibuka dobolyanamkin bukni, winira min, na mutuku kopropa tamubuka bitinirye, na yala nang ap, na kayapu nang koprop ap ati, 'Telebe anggun daululume,' nyapdeipnirye," nyabuk.

<sup>62</sup>Nyabuk ura, Yesus arye winipmanto yupu tamubuka nyabuk. "Yata ninye do nirya, weik yo kan-kan wa deiyok koubuka wipnin balamikirye, ikin uplye ura, 'Se afil tuba kum doptinye ati, bataknun do?' tenen, tamubuka wa min arye wiamikcak caknam ati tenebikirye, tamubuka dilbanyak nang ara, atonun ninye ara na fil kum doptinge. Tonda, 'Allah arye ninye weik lyeplirye sik kanye talima talinamsil' tenen, Allah el fil kum doptinge." Yesus arye ayupu nyabuk.

**Yesus arye, 'Na yupu dobuka peterepra banamak' tenen, yupa weik 70 nang wipdeibuk yupu**

*(Lukas 9:3-5; Matius 11:21-27; Matius 13:16-17)*

**10** <sup>1</sup>Yesus arye, 'Na aminyan peterepra banamne mutuku nirya ara, sik minop peterepra banamake,' tenebukce, el mapu yupa weik 70 nang wibuka dopdeibuk. Anang ara, bitinye-bitinye kibuka, weik asik dolamikak weik kota ap, tonda ninye mitik ulamikak ap, dopdeibuk.

<sup>2</sup>Anang dopdeibuk talak ara, anang ati adomon yupu nyabuk.

"Kwaning nong ara, fia weik akunum wisibuk bukni, kwaning lin nang ara, fia mitik anya arye, awa deiyoknye 'Allah arye el wa win dam lin nang ton wibuka dopkwetepnamle' tenen, moronamlume." Yesus arye, ayupu nyabukop ura, ayupu ton nyabuk.

<sup>3</sup>Ara, anggun anang ara, akunum wibuka deipmasina ati, anggunda yuk mutuku weik dapeterelbinamlume. Domba basam dobuka bai kam kan-kan dongobice ura, adip aryuk domba olamle touk, na arye dopkwetepsin ak, peterepra banamlum mutuku nirya ara, malye nang arye opsikcak ati, anggun kanye moudoplulume. <sup>4</sup>Anggun peterepra banamlum talak ara, anggun nun 'Na' tenen ning lina ati, wasia ap, aling lina ap, yan ongon ning ap, kum libuka banamlume. Ton bisik banmamunya noutamak yuk ninye ton eibdamunyop ura, 'Telebe,' nyabuka, anang ap yupu nyana meme. Anggunda, mambul fil dolbanmaluma anya arye, talya kirikuka pola banamlume.

<sup>5</sup>Bisik banmamunya ani, asik dolamikcak bimunce, tonok aik uk wekmunyop ura, minop ayupu nyapnamlulume. 'Allah weika arye lyesilibuk, anyaik nang nirya teleb kanye uk bobuka unamlum' tenen, Allah moropsiape, nyanamlulume. <sup>6</sup>Nyapmunyop ura, anyaik deiyoknye birye, Allah yupu kekepturye, 'Allah arye melipnilibuk, na diksukumuk unamne' tenen, pataplinye aulyop ura, Allah arye anyaik ninye nirya

ati teleb ulinamle. Bukni, anyaik deiyoknye birye, ‘Allah yupu ara nun like. Allah arye lyeplnye ura, telebuk uptinye,’ kum teneplyop ura, anyapnamlum ning ara, ila tamubuka doplopmunce, anggun nong deice uk upnamsile. Atonok aik uk ulamice ninye ati, Allah arye teleb kum ulinamle. <sup>7</sup>Anggun akunum wekmunye aik ara, anyak uk din ning ap, mek ap, sik aripsice ninguk dobuka dinamlume. Ara, sik fil dobice ninye dekna dololamaka atonun ati, anyasik nang arye aripsice ninguk dobuka dinamlulume. Winina ara telebe. Or aik mapmana, ei aik mapmana, utam aik mapmana kina meme. Aik talye sakaldana meme.

<sup>8</sup>Sik asik dolamicak wekmunye ura, telebe nyabuka, yukubdobsicop ura, sik aripnamsiak ninguk dobuka dinamlume. <sup>9</sup>Amutuku uk dilamlye ninye kwetepnamlulume. Tonda, “Allah ninye weik lyeplirye sik kanye talima talinamsil talak ara, akunum dam upsile,” nyabuka peterenamlume. <sup>10</sup>Bukni, yata mutuku do nirya, asik domicak bimunyop ura, telebe nyabuka kum kipsikirye, anggun yupu kum kekepsicop ura, winipnamlulume. Sik asik dolamicak bimunce, amutuku tuku anggun yan tatang palipmasye ning ara, miningdam uk kilibuka batakmunce, amutuku batakuka yukak binamlulume. Winipmunyop ura, sik amutuku nang arye, ‘Se Allah yupu batakmba ati, nun yan tuku yanibuka, kiliplopmasiyaka atonun, Allah arye nun amutuku unyap ninye ati wenebuka bataknamlsile, tenepnamake’ tenen, winipnamlulume. Yesus arye nyabuk.

<sup>11</sup>Tonda, nyabuk. “Ara, ‘Anang kekepanyak’ tenen, ayupu ton nyapnamlulume. ‘Amutuku tuku nun yan tatang palipmasil ning ara miningdam anyuk kilibuka batakmba. Aning atouk anggunce, ‘Allah el yupu nun like,’ nyapmasulum ati, Allah arye anggun babye, bataknamlsile. Ati amutuku batakuka yuk mutuku banamabe. Anggun batakmasulum ati binuyap bukni, anggun dipkoprop moubuka tenenululume. Allah arye ninye weik lyeplirye, kanye talima talinamsil talak ara, akunum dam upsile,’ nyapnamlulume,” Yesus arye nyabuk. <sup>12</sup>Ayupu nyabukop ura, ayupu ton nyabuk. “Na dipkoprop nyapsine, Sodom mutuku ulamik nang fia malye ulamik ura, Allah arye ninye nirya obuka wenebuk talak ara, Sodom mutuku ulamik nang fia malye ulamik ura Allah arye amutuku ninye obuka kum daneibuk bukni, Allah arye ninye nirya bokuka wenepnamle talak, sirik talak ara, Sodom mutuku ulamik nang ara, mitik weik mambul arye wenepnamle. Sik bataknamlsiak mutuku nanguk ara, weik arye wenebuka opnamle ati, sik weik ikin upnamle,” Yesus arye nyabuk.

<sup>13</sup>Nyabukce, ayupu ton dukdongobuka nyabuk. “Anggun Korasin mutuku umunye nang ap, Betsaida umunye nang ap, Allah arye opnamsile ati, anggunce, ‘Se,’ tenebuka, mambul kanye bopnamlume. Anggun dilamlum talak ara, anggun mutuku noutamak ninye winipman

kum fil dolamsa ara, Tirus mutuku ap, Sidon mutuku ap, noutamak fil dolamtinyeto ura, sik amutuku ulamik nang nirya arye, mambul kanye bobukatingce, sik malye ning batakra kanye tamubuka, na ti diba tenelamninge. Bukni, aning nirya kum elilamika ati, diba kum tenelamike.

<sup>14</sup>Bukni, na dipkoprop nyapsine. Anggunda aning-aning nirya elilulum nang anya arye, Allah arye ninye nirya ati, bokuka deiplirye wenepnamle talak ara, sirya talak ara, Tirus mutuku nang ap, Sidon mutuku nang ap, mitik kanam arye wenepnamle. Anggunce na ti, 'Anye bira nun like' tenen, batakanululum nang ara, fia ikin weik arye wenepnamsile. Anggunda, fia ikin arye wenepnamsile. <sup>15</sup>Anggun Kapernaum mutuku nang ara, 'Nun teleb nang anya arye, Allah arye erebuka im deice deipnamsile,' tenelamlum do? Kume, Allah arye wenebuka uku din mutuku dongopsilibuk, uku arye dibuka, sirya daknamsile." Yesus arye nyabuk.

<sup>16</sup>Nyabukce, el mapu 70 nang ati nyabuk. "Aning ati ara, na dipkoprop nyapsine. Anggunce na yupu dobuka peterepra banamlumbuk, kekenamak nang ara, na ti kekenamake. Aning atouk, anggun peteremunyebuk kekebikirye, yaniltanamak nang ara, na ti yanibuka batakanamniake. Tonda, na yanibuka bataknamiak nang ara, na tibuk kume. Na dopkwetepnuknye Allah ati, yanibuka bataknamake." Yesus arye wipdeibuk nang 70 nang ati, nyabuk.

<sup>17</sup>Nyabuk ura, sik anang arye peterepra balamikani, tamubuka Yesus dam yayikce, weik kanye deibik ura ayupu nyabik. "Se, naio ninye talyamuk isa babye, nunce an si deice arye yupu nyalamubu ura, kekelamikce, nun nyapne touk winibike. Nun mikip arye nyabupu ura nun yupu kekebuka nun amutamuk kipdobike," nyabik. <sup>18</sup>Nyapmek ura, Yesus arye tamubuka anang, 70 nang ati nyabuk. "Anggunce aning elilamlumce, 'Se aning ara weik mambule,' tenelamlum bukni, na ara im deice minop bebeya lingum alamle touk, mutuku-mutuku nirya balul Isa Mutuku Dongonye arye, minop im deice arye sakuka eiamse. <sup>19</sup>Na mikip ap, deiyok ning ap aripsisibuk, ninye si ton kwatima ap, tanga ap, yaniptum ababye, ton kum si tonamsile. Aning atouk, na arye kalikuka melisinyeba, Mutuku Dongonye isa arye, el fia malye ulamle ning mikip deice arye, malye kum updeipsutue. <sup>20</sup>Anggunce yupu nyapmunye ura, isa mer nirya kekebuka kutuksakuka bura banyak ning ati, 'Se aning ara weik mambule' tenen, kanye kum delinamlulume. Dipkorop weik mambul ning ara, Allah arye anggun si dobuka im deice bukuu noutamak akunum sekeipsuka ati, aning ara kanye delinamlulume," Yesus arye, sik 70 nang ati nyabuk.

<sup>21</sup>Yesus arye ayupu nirya nyabukop ura, Allah El Dib Kanye arye, el kanye talima lukdanuka talibuk ura, fia weik arye kanye deibuk. Kanye deibukce el li Allah ati morobuk deice arye ayupu nyabuk.

“Naio, anda im deice ap, tukwak mutuku nirya ap, talipluma deiyoknye ulyama ati, na arye an ti, ‘Telebe,’ nyabuka, an si erepkine. Tonda, an nyasilyam yupu noutam ning ara, kel bikna kanam nang ap, weik kel nang ap ati, duknulyam bukni, mitik mapu atonun unyakce, talima mitanga arye unyak nang ati, lake kibuka nyasilyame. Diba na nie, winilyam ning ara, ‘Winipnamne,’ tenelyam touk ati, aning arye an talima kanye deilikunune. Ati telebe nyapkinne.” Yesus arye, Allah morona deice ara, ayupu nyabuk.

<sup>22</sup> Allah morobukop ura, el yupu kekenmek nang ati, ayupu ton nyabuk. “Aning-aning nirya ara, na Ni Allah arye akunum aripnuke. Ninye nirya tonoknye ton, Allah el Mi Koprop arye, el kanye talima noutamak tenelul ning ara, kum kel kiptinge. Allah el Mi Koprop kanye talima ulul ning ara, Allah elcuk kel kilule. Ninye nirya tonoknye ton, na Ni Allah el kanye talima noutamak tenelul ning ara, kum kel biktinge. Na Ni Allah, el kanye talima noutamak tenelul ning ara, na ara, el Mi Koprop arye kel bikinune. Bukni, yuk nang ton kum biktinge. Tonda, ‘Na arye laka nyabuka peterenye ura, na ni kel kipnamak’ tenen, wibuka deipse nang uk, na Ni Allah arye tenelul ning kel biktinge.” Yesus arye nyabuk.

<sup>23</sup> Yesus arye ayupu nyabukop ura, elce wipdeibuk mapu, sik 12 nang ati, ayupu tonap nyabuk. “Na mapu anggunda, ne wininun ning, anggun asing arye teleb kubuka elinululume. Anggun winitalak umunce, na donye fil nirya elinululum ninye ara, anggunce aning-aning nirya, fia mambul ning elilaluma ati, anggunda fia mambule. Ati, fia teleb kanye bobuka unamlume. <sup>24</sup> Ara urdem ati kum nyapne, na dipkoprop nyapsine. Minopce Allah yupu lak nyalamik nang, sik nabi nang weik ap, lipsisikuka ulamik nang weik ap, winitalak anggun elilulum ning ara, fia patalamuk ura, ‘Se aning eiptibye,’ tenelamik bukni, kum elilamik. Tonda, winitalak anggun kekelulum yupu ara, fia patalamuk ura, ‘Se aning kekeptibye,’ tenelamik bukni, kum kekelamike. Ati, winitalak anggun teleb ubuka kekena ap, dina ap, umunye nang ara, anggunda, fia mambul anya arye, fia teleb kanye bobuka unamlume. Allah arye teleb ulinamsile,” Yesus arye nyabuk.

**Musa sekamuk yupu peterena deiyoknye birye, Yesus  
ati asipdeyuk Yupu  
(Matius 22:34-40; Markus 12:28-31)**

<sup>25</sup> Yesus arye el mapu ati ayupu akunum nyabukop ura, sik daulamikani yuk talak ara, Allah arye, ‘Aning winamlulume, aning ara kum wininamlulume,’ nyapdeibuk ura, Musa sekamuk yupu peterena deiyoknye tonok, Yesus dam biyukce, ‘Yesus malye nyaptu’ tenen, Yesus ati asipdeyuk akarye ayupu nyabuk. “Anda peterena telebnye ulyame. Bol

koplobuka fia kam una ati, na arye yata teleb fil doptinirye deice arye, fia kam una deiyok ning doproptinye do?” nyabuka asipdeyuk. <sup>26</sup>Asipdeyuk ura, Yesus arye tamubuka nyabuk. “Bol koplobuka fia kam una dolona ati aning ara, Allah arye, ‘Aning wininamlulume, aning ara kum wininamlulume,’ nyapdeibuk yupu noutam arye, ance kel bikamluma ati, yata tenepmalam do?” nyabuka asipdeyuk.

<sup>27</sup>Asipdeyuk ura, anye birye tamubuka nyabuk. “Allah arye nyapdeibuk ura, Musa sekamuk yupu noutamak arye, fia kam un ning dolona ati ara, ‘Wininamlulume,’ nyapsuke.”

‘Allah arye nyabuke. Anggun Ni Allah ara, el tonok ulule. Anggun kanye bokoltona kumce, anggun kanye talima, Allah el nong deice delinamlulume. Tonda, Allah el deica uk, anggun kanye deibuka unamluma ati, anggun nong nirya ap, anggun mikip deice fil dolulum ning ap, anggun kanya ap, anggun kanye tenen ning ap, anirya ara, Allah ati aripmunce, el fil uk donamlume. Tonda, anggun dam unyak nang ati ara, bico tenebuka melinauk unamlulume. Anggunce, anggun bidamang ati, kanye deipdamunce melilalamlum touk, anggun dam unyak nang, yuk nang ati bico tenebuka kanye deipmunce, melinamlulume.’ Allah arye nyabuk.

*(Imamat 19:18)*

<sup>28</sup>Anye birye nyabuk ura, Yesus arye tamubuka nyabuk. “Anda dipkoprop teleb ning akunum nyapmanilama ati, anyapmanilam touk winipminyop ura, Allah arye bol kobuka fia kam una deiyok ning aripkilye ura, kam fia unamlame,” nyabuk. <sup>29</sup>Yesus arye nyabuk bukni, anye bira, ‘Yesus arye na ti, el malye ulule,’ tenepmanila ati, ‘Na malye wininye ning kum biknilirye, telebnye uk, tenepnunile’ tenen, ayupu tamubuka nyabuk. “Yo, deiyok ara, Allah yupu deice arye, ‘Anggun bidamang unyak nang,’ nyalulul ara, dipkoprop ara yatato nang ati nyalul do? Yata nang ati bico tenebuka kanye deipnamne do? Yata nang ati, melinamne do?” nyabuka asipdeyuk. <sup>30</sup>Nyabuka asipdeyuk ura, Yesus arye Allah yupu deice, ‘Anggun dam unyak nang, yuk nang nyalula deiyok ara, laka nyapnun’ tenen, tamubuka winipmanto yupu deice arye nyabuk. Ayupu ara ani.

Tonok Yahudi yalanye bira, ‘Yerusalem mutuku arye Yeriko mutuku binun’ tenen, bisik noutamak banmokbuk, ubula don nang bisik tikmeka arye, tomobikce bokuka obik. Onmek talak ara, el ongon butum nirya tarakuka batakiyce, bokuka onmeka ani, dipmanto ubukop ura, abatakuka biyik. <sup>31</sup>‘Akunum dipmala’ tenen, bindobik talak ara, Yahudi yalanye, Allah ati arina deiyoknye bira, abisik uk aminyan banmoka arye eibuk. Eibuk bukni, anye bira arup oplopmake tenebukce, eibukcuk leibuka biyuk. <sup>32</sup>Aning atouk, yuk Yahudi yalanye ton, elda Allah arilbalamik aik noutamak fil dolamuknye tonok, Lewi yalanye abisik uk

yanganmok ani, aoplopmeknye eibuk bukni, eibukce, el babye leibuka biyuk.

<sup>33</sup>Sik abitinye Yahudi yala nang ara winiprik bukni, tonok Samaria mutukunye, ara Yahudi yala kumnye bira, abisik uk yanganmok ani, oplopmeknye bira eibuk. Eibukce, 'Anye bira Yahudi yalanye anye arye, ne like,' tenena kumce, 'Se' tenen, bouku sukubukce, fia bico ubuk.

<sup>34</sup>Bico tenebukce, opmeknye dam biyukce, el suse kitibuka kweten ning, suse deice deibukop ura, aniryia kitibuka teleb updeibuk. Winibukop ura, oplopmeknye bira tomobuka, el keledai basam balye deice deibukce bobanmoka ani, bisik noutamak ninye asik nang tia malamik aik binuka deibuk. Binuka deibuk ura, anyaik mapmarik.

<sup>35</sup>Mapmarika berekukop ura, aSamaria mutukunye birye, weik keil uang peraknye bitinye dobuka, aninye asik nang malamik aik talibuka ulamuknye biti aribuk. Aribukce ayupu nyabuk. "Ance anye biti melibuka kwetenmaminya ani, aminyan na tamubuka yanyop ura, el kwetena ap, el manak ap ati, an yo bok weik tonap aryaminyop ura, na arye yo bok tonap punupnamkine." Yesus arye winipmanto yupu deice arye nyabuk.

<sup>36</sup>Nyabukop ura, Musa sekamuk buku peterena deiyoknye biti asipdeyuk. "Na arye nyapmakin yupu noutamak arye, sik oplopmeknye winilye nang arye eibik ura, Allah yupu noutamak, 'Anggun bidamang unyak nang, yuk nang ati bico tenebuka melinamlulume,' nyapdeiamuk touk, danye birye aning dipkoprop winibuk do?" nyabuka asipdeyuk.

<sup>37</sup>Yesus arye asipdeyuk ura, Musa yupu peterena deiyoknye birye tamubuka nyabuk. "Kume, aopmeknye ati, Samaria mutukunye birye, bouku sukubukce bico tenebuka, kwetebuka melipmoknye, el uka," nyabuk. Nyabukop ura, Yesus arye anye biti tamubuka nyabuk. "Aning ati ara, an babye, atonun yuk nang ati bico tenebuka melinauk unamlyame," nyabuk. Nyabukop ura, Yesus ap, el mapu ap, 'Yukak binuyap' tenen, bisik banmek.

### **Marta ap, Maria ap, Yesus sik aik unmokce nyabuk yupu**

<sup>38</sup>Ara, atalakuk ara, Yesus ap, el mapu ap, bisik banmek ani, tonok asik dolamikak biyikop ura, anyasik ulamuk kil el si Marta arye, yukupdobukce, "Na aik yalulume," nyabuk ura biyik. <sup>39</sup>Wekuka bulbiyik talak ara, Marta el weit kil Maria ara, Yesus el yan dam bukmokce, el peterenmok yupu fia moubuka kekena uk unmok. <sup>40</sup>Maria wininmok bukni, el dukul Marta ara, 'Yesus el yupu kekeptinye,' tenenmok bukni, 'Se, ninye asik nang na aik yanmaniyaka atia,' tenenmok akarye, kintinin fil weik donmok deice arye, Yesus yupu kum kekenmok. Wininmokce, 'Na weit kil kum melipmanilce talye uk bukmales' tenen, lik ubuka ati, Yesus ak ayupu nyabuk. "Naio, na weit kil Maria ara, na uk batakanil ura fil donmana ara, kum melipmanila ati, 'Aning mambule,' kum

tenepmanilam do? Ance nyaptum ura, na weit kil arye melipnunile,” nyabuk. <sup>41</sup>Nyabukop ura, Yesus arye Marta ati tamubuka nyabuk. “Marta, Martao, fil weik donmalmace, aning-aning nirya ati, ‘Se, yata wiripnun do?’ tenen, kanye bokoltonmakil akarye, kanye imun deice arye nyapnilame. <sup>42</sup>Bukni, weik mambul patasilye ning ara, tonok ulule. Maria arye weik mambul ning, Allah yupu keken ning akunum wibmalce, na nyanmane yupu kekebuka unmala ati, aning yupu sekuka kum dopronune.” Yesus arye nyabuk.

**Yesus arye Allah morona ati, peterebuk yupu**  
(*Matius 6:9-13; Matius 7:7-11*)

**11** <sup>1</sup>Tonok sum ara, Yesus arye Allah moronmokani, el mapu arye kekenmek. Kekenmek ura, Yesus akunum morobuka sirya daknuyuk karin ara, el mapu kan-kan tonoknye birye, Yesus ati nyabuk. “Naio, Yohanes Pembaptis arye, el yupu kekelamik nang peterelamuk touk, ance ton nun ti, ‘Allah morona ara, winibuka moroplulume,’ nyabuka peterepsutume,” nyabuka morobuk. <sup>2</sup>Anye birye ayupu asipdeyuk anya arye, Yesus arye el mapu nirya ati tamubuka ayupu nyabuk.

Anggun Allah moronamlum talak ara, nyabuka moronamlume.

Nun Ni Allah, im deice ulyamnye, ‘Nun babye, yuk nang nirya babye, an si uk erebuka unamap’ tenen, moropkiayabe. ‘Minpola yamince, ninye mutuku-mutuku nirya talibuka unamsilam’ tenen, moropkiayabe. Tonda, ‘Ance mutuku-mutuku nirya ap, nun tuku ak nang nirya ap, talipsimince, nun Weik Deiyoknye an tonok unamsilam’ tenen, moropkiyabe. <sup>3</sup>Asum-asum nirya nun kwaning ap, yuk ning ap, patasilye touk, ‘Melibuka aripsiminye ura dobuka dinamabe’ tenen, moropkiyabe.

<sup>4</sup>‘Yuk nang arye, nun ti malye winipsikibuk, namin kinyap touk, ‘Ance ton, nun malye wininyap ning ara, namin kibuka, kum kipdeipnamsilame’ tenen, moropkiayabe. ‘Malye winipnyak do?’ tenen, ‘Weik ikin winilen ning kum aripnamsilam’ tenen, moropkiayabe. Tonda, fia Malye Winin Ning Deiyoknye, Isa Mutuku Dongonye birye, malye updeipsilye ura, malye ubibyak’ tenen, ‘Ance kalikuka disimince melinamsilam’ tenen, moropkiayabe.

“Ayupu atonun nyabuka Allah moronamlume,” Yesus arye el mapu ati nyabuk. Nyabukce, ayupu winipmanto ning ton nyabuk.

<sup>5-6</sup>Anggun kwit el aik aunmatubuk, tonok sum fia lukunyan noutamak, el aik dam bitumce, “Kao, na ninye asiknye yuk mutuku arye yanmanilbuk, na din ning kum ati, ance kwaning winilye aripnutume,” nyabuka moroptume. <sup>7</sup>Moroptumop ura, anyasiknye birye el atamubuka, “Kume, na bulina bataknio. Bublan akunum tirikdongopmanurye, na ap,



na mapu ap, neika mapmaba anya arye, an moropmanilam ning ara, kum arepnukine,” nyaptue. <sup>8</sup> Anye bira, fia maplukmaturye wi dukunmatu anya arye, ‘Na kwit koprop’ tenen, kum aripkutubuk, fia batakna kumce, morona uk unmatumop ura, ‘Yata ati fia nyanmanil do?’ tenen, lik upturyuk, an patapkatu touk weik arye aripkutue.

<sup>9</sup> Aning ati ara, na arye nyapsine, anggun patapsilye ning moropmunyop ura, Allah arye aning uk arinamsile. Anggun patapsilye ning ati, ‘Danaka eipnamap do?’ tenen, elsumunyop ura, eipnalume. ‘Anyaik wektinye’ tenen, lourum-lourum abuka piripmunyop ura, Allah arye buplan kukeipnamsile. <sup>10</sup> Wininamluma ara, talye ati kume. Na dipkoprop nyapsine. Yata nang do nirya, Allah ati morolulnye bira, Allah arye ariplye ura doproprname. Elsulululnye bira, Allah arye meliptye ura eipnamle. ‘Anyaik wektinye’ tenen, lourum-lourum abuka pirilulnye bira, Allah arye abuplan pakeipsilye ura, weknamlume.

<sup>11</sup> Anggun tenipdelulume. Anggun awekmalum nang kan-kan, yatanye el mi arye el li biti, mekin bal moroplibuk kwatima uk aripnamlum do? <sup>12</sup> Tonda, el mi arye maka duk moroplibuk ninye si ton tanga aripnamlum do? Kume, anggun mapu arye moropsice ninguk arilulume. <sup>13</sup> Anggunda, talima noutamak malye ulalum nang ara, anggun mapu ati, teleb ning arina ara, akunum kel biklume. Winilalum ning ara, mitik teleb, mitik arilulum bukni, anggun Ni Allah, im deice ululnye birye, el ti morobikke ning arinamsil ning ara, weik arye el Dib Kanye arinamsile. Yesus arye el mapu ati nyabuk.

**“Yesus ara Isa Mutuku Dongonye el mikip deice arye fil dolule,”  
nyabik yupu**

*(Matius 12:22-29, 43-45; Markus 3:23-27)*

<sup>14</sup> Tonok sum ara, yuk nang arye, lubnye tonok Yesus dam boyayik. Anye bira, isa el talima talyamuka deice arye, lubnye ulamuk. Kiting tamun weik isa talyamuk ura, luba ulamukbuk, Yesus arye aisa kwetebuk ura, atalak aryuk, anye bira yupu teleb ubuka nyanmok. Yupu teleb ubuka nyanmok ura, abulubuka wekuka kekenmek nang arye, ‘Se’ tenen, ngalukunmek. <sup>15</sup> Ngalukunmek bukni, ton nang arye ayupu nyabik. “Kume, aisa yakalula ara, isa nirya, sik deiyok Isa Mutuku Dongonye arye, el si ton Belesebul,<sup>o</sup> el mikip deice arye, Yesus arye isa nirya yakalule,” nyabik. <sup>16</sup> Ton nang ara, ‘Yesus ara, dipkoprop Allah el Mi Koprop kum ulule,’ tenebika ati, Yesus asilena ati ayupu nyabik. “Im deice noutamak arye, ninye winipmanto kum fil dopsutumop ura, nunce an ti, ‘E, diba Allah el mikip deice dib fil dolule,’ tenepkitibye,” nyabuka asipdeyik.

---

<sup>o</sup> **11:15 Belesebul** – Isa Mutuku Dongonye el si bitinye anya arye, ton ning ara el ti, Belesebul nyanyake.

<sup>17</sup>Ayupu nyanmeka ati, Yesus arye anang sik talima noutamak tenebik ning bikmoka ati, Yesus arye, anang ati nyabuk. “Dan mutuku do nirya, tonok weik deiyoknye birye talilul kili sal noutamak bokikirye opdacop ura, sirya dakdanamake. Akili sal nirya arye opdacop ura, tonoknye birye, yata wiribuka taliptu do? Neika kum uptinge bukni, yuk-yuk bindoptinge. Aning atonun, yata yala nang do nirya, sikce opdacop ura, sirya dakdanamake. Yata wiribuka neika upting do? Akunuma bokuka yuk-yuk bindoptinge. Ati angguncce, ‘Yesus ara, Isa Mutuku Dongonye el mikip deice arye, isa mer yakalule,’ nyanululum ning ara, kum winipmanto anye arye, talye yupu uk nyanululume.

Isa si eremunya ara, Allah El Dib Kanye mikip deice aryuk yakanune. Yata fil do nirya, Isa Mutuku Dongonye, el mikip deice arye fil kum donune.” Yesus arye nyabuk. Nyabukop ura, Yesus arye adomon yupu deice arye anang ati ayupu nyabuk.

<sup>18</sup>Anyapman ning atonun, Isa Mutuku Dongonye ap, Isa Mutuku Dongonye arye el mapu koprop, isa mer ap, sik mamun oldatingce, Mutuku Dongonye el mapu koprop ati, yakuka dopkwetep top ura, sik mikip fia kum uptue. Isa Mutuku Dongonye el mikip kum uptuop ura, ninye ton kum taliptue. Aning ati ara, isa mer yakanyak ara, Belesebul el si ton Isa Mutuku Dongonye, el mikip arye kume, Allah El Dib Kanye mikip deice aryuk afil donune. Anyapmasina ara, ‘Isa Mutuku Dongonye el mikip deice arye isa mer dolkwetelule,’ nyalamnuluma ati, ayupu nyapsine. Anggunda, talye yupu nyanmalume.

<sup>19</sup>Isa mer nirya yakuka dolkwetenya ara, ‘Isa Mutuku Dongonye el mikip deice arye dolkwetelule,’ tenepmanulum bukni, anggun Farisi nang, anggun milina nang babye, isa yakuka dolkwetenyaka anye arye, aning aranda? Anang ara, yatanye mikip deice arye, isa mer yakuka dolkwetenyak do? Anggun yupu kekebuka milisinyak nang arye, isa mer yakuka dolkwetenyaka deice arye, akunum lake upmasile. Anggun kanye wililtona meme. Anggun mapu babye, na babye, atouk fil donyapa ati, Allah el mikip deice aryuk isa mer yakuka dolkwetenyabe. Anggunda tilila nyalalum nang anye arya.

<sup>20</sup>Kume, na isa mer nirya yakuka dolkwetenya ara, Mutuku Dongonye mikip deice arye kum dolkwetenune. Allah el mikip deice arye yakuka dolkwetenune. Aning ati ara, Allah ninye weik lyeplirye, sik kanye talima talinamle talak akunum deiyok uple. Anggun dam akunum yanmale. Na isa mer bisibuka dolkwetenuna deice arye, laka akunum eiplume.

<sup>21</sup>Anggun nyapmanulum ning kum winipmanto ati, winipmanto yupu ton nyapnusine, Yesus arye nyabuk.

Ninye tonok weik mikipnye birye, ‘Yuk nang arye na aik wekuka, na ning ubula doprobicak’ tenen, ninye on ning yin ap, parang ap, kintinipturye, el tenepce kaliktop ura, yuk nang arye el ning ton kum doproptinge. <sup>22</sup>Anyaik

deiyoknye, weik mikipnye bukni, fia weik mikipnye ton yaturye, anye bira tapu kouploptop ura, el ning ubula doproptue. Tonda, anyaik deiyoknye birye, ayin ap, parang ap deice arye, 'Lyepdatinye,' tenelamtu ning nirya, yuknye, fia weik mikipnye doproptuop ura, akaik el ning nirya dalubuka dopropturye, ubula doproptunye, el kayapu nang ati, bokuka ariptide. Aning atouk, Isa Mutuku Dongonye ara mikipnye ulul bukni, na ara weik mikipnye kum ulamtinyop ura, Isa Mutuku Dongonye, el mapu kum yakuka dopkwetepinye. Bukni, ninye tapu koulamak touk, Mutuku Dongonye bisipnirye, isa el mapu dolkweteneune. Yesus arye, Farisi nang awekuka nyanmek nang ati nyabuk.

<sup>23</sup>Nyabukop ura, ayupu tonap nyabuk. "Na ap neika kum fil dolulnye bira, yupu sekuka bisbisibuka, yaniplobuka balamak atonun ulule. Tonda, kwaning yongobuka tonok ak bulubuka deibikce talak ara, el ap bulubuka kum delilulnye bira, yamubuka donokolamak atonun ulule. Na ap, anggun ap, neika kum fil dolbilyop ura, wininyak nang atonun, na yupu yaniplobuka atonun ululume." Yesus arye nyabuk.

<sup>24</sup>Ayupu nyabukop ura, ayupu tonap, nyabuk. "Anggunda, kanye mouplulume. Isa nirya ninye talima noutam talyamlya ani, kutukuka balirye, 'Dan dikdik septinye do?' tenen, mek fia kumak balamlya ani, teleb ak kum eiplyop ura, ila tamubuka el min talyamline dam yangalule. <sup>25</sup>Yanuka dinmalirye, el min arye ulamlye aik noutamak ara, amsuna ap, delin ning nirya ap, teleb wamlirye, ninye ton una kum ati, 'E, anyaik ara lo tuba upmala ati, anyak uk unamne,' tenebuka ulule.

<sup>26</sup>Uteneplirye, elda mitik yubuk, weik yu isa tek barye binuka dobolyalyop ura, anye bira el talima noutamak wekuka unyake. Anye bira el talima talyamice ning, min arye mitikto malye ulamuk winitalak, ara, fia weik malye unamle. Ayupu nyapmasin touk, anggun babye, min arye malye ulamlum ning mitikto akunum batakum bukni, talima lo upmasilye ning ara, Allah arye ninye nirya talinamle talak nyasinye yupu ara, kum talipmunyop ura, aminyan ara fia malye unamlume," Yesus arye nyabuk.

<sup>27</sup>Yesus arye ayupu tuba nyanmok talak ara, awekmek ninye kan-kan arye tonok kil yupu weik arye nyabuk. "An deipkukce, moum dinyamkuk kil ara, fia mambule. Akil ara, Allah arye fia teleb ulinamle," nyabuk.

<sup>28</sup>Nyabukop ura, Yesus arye akil ati tamubuka nyabuk. "Kume, yata ninye do nirya ara, Allah yupu moubuka kekebikirye, diba tenebuka, diksukumuk unyakce Allah ati dobolbanyak ninye ara, sikda fia mambule. Aninye ara, Allah arye teleb ulinamle," Yesus arye nyabuk.

**'El ninye winipman kum fil dopsutubuk, diba tenep tibye' tenen,  
tenepce, Yesus asipdeyik nang ati, Yesus arye nyabuk yupu  
(Matius 12:39-42)**

<sup>29</sup>Ninye fia weik tonap, Yesus dam yanganmekop ura, Yesus arye abulubuka yanganmek nang ati nyabuk.

Anggun winitalak ululum nang ara, Allah yupu yanina uk ululum nang anya arye, ‘Ninye winipmanto kum fil dopsutubuk, adeice aryuk diba teneptibye’, nyabuka moronululume. Bukni, ninye winipmanto kum fil, tonap kum fil dopnamsine. Na ti diba kum tenepnulum nang anya arye, anggun winilulum ning atonun ning nyapnusine. Ara, anggun malye nang arye, fia malye ninguk talibuka winilulume. Anggunce bataknuluma ati, nyapsine. Allah yupu laka nyalamuknye, nabi Yunus ulamuk talak winibuk ning ara, awinibuk ning atonun ning ara, aminyan winipnamle ning ara, eipnamlume. Yuk pitin kemna ning ton kum aripnamsine. <sup>30</sup> Ayupu ara, talya ati kum nyapsine. Deiyok ara ani, weik mekin bal arye Yunus amkorokuk ura, mekin bal mun fumbisik, like winilye daulamok ani, amekin bal arye Yunus el nonge duklobuk.

Awinibuk ning nirya eibikce, Niniwe mutuku ulamik ninye diba teneamik touk, na ara Ninye Mi Koprop Atonunye wininye ning deice arye, winitalak unyak ninye diba tenenamake. Yunus ulamuk talak winibuk touk, na ara Ninye Mi Koprop Atonunye opnikce ura, tuku fumbisik mapmanya, like winilye akunum uplyop ura, tamubuka kam buknamne.

<sup>31</sup> Weik ninye deiyok kil, Seba mutuku talyamuk kil arye,<sup>p</sup> ‘Raja Salomo weik kel arye nyalul yupu ara, na ton kekeptinye’ tenen, fia yuk mutuku bukni, Salomo dam kekelyayuk. Winibuk ati, sirya talak Allah arye ninye nirya bokuka wenepnamle talak ara, akil arye tikukapliiry, anggun atalak umunye nang ati, ‘Anggunda fia malye ulalum nang,’ nyapnamsile. Na dipkoprop nyapsine. Dipkoprop Salomo ara, mitik kelnye ulamuk bukni, tuba na ti diba kum tenenululume.

<sup>32</sup> Aning atouk ton, Niniwe mutuku nang ara, Yunus mitik mambulnye bukni, Allah yupu peterebuk ura kekebikce, sik malye ulamik ning bataki. Winibuka anya arye, Allah arye ninye nirya bokuka wenepnamle talak ara, Niniwe mutuku nang arye tikuka, anggun atalak umunye nang ati, ‘Anggunda, fia malye ulalum nang,’ nyabuka lak akarye nyapnamsiake. Yunus mitik mambulnye peterebuka deice arye Niniwe mutuk ulamik nang diba tenelamik bukni, winitalak ara, weik mambulnye bira, na akunum yase bukni, tuba diba kum tenenululume. Yesus arye abulubuka wekmek ninye ati nyabuk.

**Yesus arye, “Anggun nong upna atonun ning ara, asing upsuke,”  
nyabuk yupu  
(Matius 6:22-23)**

<sup>33</sup> Yesus arye ayupu nyabuk. “Anggun nirya kele, ninye nirya ara, sik weisa ubukabikirye aik fum boyangalamaka ara, ‘Kau fumbisik

---

<sup>p</sup> 11:31 *Seba mutuku talyamukce weik deiyok kil*, el yupu ara 1 Raja-Raja pasal 10 noutamak dipdelulume. Seba mutuku nyalamik ning ara witalak amutuku bukni, yuk si Yaman mutuku nyanyake.

singipdongopnamap' tenen, ubuka yangalamak do? 'Yuk nang arye aweisa kum eipmanto ak uk deipnuyabe' tenen, do? Tonda, amsuna dangabuka, 'Weisa singipdongopnamap' tenen, ubuka yangalamak do? Aning ara, kumde. Weisa ubukabikirye, abilinga taram ak deibice ura, dirina weik uplirye, anyaik wekmakce ninye nirya elinyake. 'Ninye nirya eipnamake' tenen, upna deililamake.

<sup>34</sup>Anggun nong upna atonun ning ara, asing upsuke. Asing teleb upsutop ura, bisik teleb ninguk eibuka bitume. Bukni, asing malye upsutop ura, asing kubuka dengkepdanin, malye bisik uk bitume. Aning atonun, anggun kanye talima noutamak, malye ning atibuk dib tenepmunyop ura, aminyan unamlum ning nirya malye unamsile. Anggun asing noutamak dirina kum weksutop ura, kuna uk binamlume. Atouk, anggun kanye talima noutamak malye ning atibuk tenepmunye ura, malye ninguk wapsilyop ura, anggun fia malye uk unamlume.

<sup>35</sup>'Anggun talima noutam dirina usul ning ara kunuksilyak' tenen, anggunce moupropmunce unamlulume.

<sup>36</sup>Anggun kanye tenena, ap, anggun talima noutamak ap, dirina uk upsilye, tonok ak babye, fia dirina uk upsilye ura, telebuk unamlume. Wininamsil ning ara, upna ubice ura dana-dana nirya ap, sik nong deice ap, dirina weik ulamlye ura, teleb bisik uk balamak touk, anggun kanya talima noutamak, dirina upsilye ura, telebuk unamlulume." Yesus arye nyabuk.

**Yesus arye Farisi nang ati, 'Se,' tenebuka, "Ikin kanye bopnamlume," nyabuk yupu**

<sup>37</sup>Yesus arye ayupu nirya akunum nyabukop ura, Farisinye tonok arye, na aik din dilyalyame, nyabuka morobuk ura, Yesus arye el aik binuka bukukce din, dinmok. <sup>38</sup>Dinmok ura, Yesus el taruk mek kum likmokcuk dinmoka ati, aFarisinye dinmokce ngalukunmok. (Ara, sik Farisi nang arye, 'Kume, taruk mek likna ara, mem ning ato ning ati, aning kum winibiyop ura, Allah arye derepsilyak ati, kum bataktibye' tenen, taruk mek likna ning weika arye peterelamik touk, sik babye, ton winilamik.) <sup>39</sup>AFarisinye ngalukun moka ati, Yesus arye anye biti nyabuk.

Se, anggun Farisi nang ara, anggun kanye talima noutam malye ning aupmasilyebuk, 'Teleb nang tenepnamsiyak' tenen, nong bol deice ninguk teleb winilalume. Anggun mek makau ap, piring ap, 'Malye upmasilye mangkau arye dipnyak' tenen, bol deice tam ara teleb-teleb ubuka mek likilulum bukni, anggun kanye talima noutam ara, fia malye wini ning ap, yuk ninye ning ubula dona ap, awabsilibuk, aning tenena kum aryuk talye kanye bobuka ulalume.

<sup>40</sup>Anggun fia walwal nang ululume. Lakak ulul ning ap ninye asing arye kum eipmanto ning ap, aning-aning nirya kwepdeibuknye bira,

Allah uka. Ati ara, nong bol deice ning babye, ninye talima noutamak ulye ning babye, kwepdeibuka ati ninye talima noutam ulye ning niryra ara disulule. Aning tenilena kum arye malye tuba winilulum do?

<sup>41</sup> Anggun mek makau ap, anggun piring ap, noutamak dimunye ning ara, bokuka talye kankan unyak ninye ati, aryamtumto ura anggun un ning niryra ara, diksukumuk unamlume. ‘Nong bol deice atibuk tuba’ tenena, meme. Dikprop winin ning ababye, winamlulume. Awinipmunyop ura, Allah arye kanye deipnamsile.

<sup>42</sup> Anggun Farisi nang ara, anggun talima noutamak malye ning aupmasilabuk, ‘Teleb nang tenepnamsiyak’ tenen, nong bol deice ninguk teleb winilulume. Anggun bicoe, Allah arye wenebuka opnamsila ati, ilil kanye bobuka unamlume. Anggun malye winimunye ning ara ani. ‘Aning-aning niryra ara, Allah elcuk aresulul’ tenen, fia mitik ning bukni kuma ap, babok ap, erica ap bokuka, Allah ati ton arilulume. Winilulum bukni, weik mambul winin ning ara, batakalulume. Anggun batakalulum ning ara, Allah arye ninye niryra bico tenepsiliryne melisulul touk, ninye bico tenebuka kanye talima arina ara, anggun batakalulume. Tonda, ninye awinipmakce touk yupu lipsisikuka nyana ap, yupu bokolina ap aniryra ara, Allah yupu noutamak aubuka bukni, batakalulume. Amitik ning Allah ati arimunya ara, teleb bukni, aning batakna kum arye, weik mambul ning babye, winipnalulume.

<sup>43</sup> Anggun Farisi nang ara, ‘Se’ tenebuka, imun kanye bobuka unamlume. Ton malye winilaluma ara, Yahudi yala nang Allah yupu peteren aik, Allah yupu peteren talak ara anggunda, ‘Yuk nang eipsikirye, teleb nang tenepnamsiyak’ tenen, weik nang bukmantoak, ninye urasin dinak uk bulbalulume. Tonda, ninye niryra din ning deibuka dekenmakcak, ‘Pasar noutam arye banmabikuk, ninye niryra arye kinamsiyak’ tenen, kil-kil kanye arye bobuka balalulume.

<sup>44</sup> Se, anggunda, fia malye ulalume. Ninye arye dipne ninye weina ati, tuku palibuka ninye baya yo akunum deibikce ura, tuku singnina kum arye, bataktingop ura, yuk nang mangkau arye yanibuka atuku fumbisik sakuka opdatenge. ‘Winibikcak’ tenen, bata delilamak ning kum deibikcop ura, aminyan ara yuk nang mangkau kanye bobuka banmakce ani, aweipmakce ning mangkau arye yaninyake. Aning atonun, anggun babye winilulume. Ara, anggun malye winimunye ning ap, tenepce arye peteremunye ning ap deice arye peteremunyebuk, yuk ninye arye talye mangkau kanye bobuka, malye winin ning kel bikuka unyake. Yesus arye Farisi nang ati nyabuk.

<sup>45</sup> Yesus arye nyabuk ura, el ap neika din dinmek nang, tonoknye birye nyabuk. “Na ni Guruo, atonun yupu nyapsiminyop ura, ‘Nun tibuk nyapsil’ tenen, malye kanye bonyabe,” nyabuk. Ayupu nyabuknye bira, Allah arye, ‘Aning wininamlulume, aning ara kum wininamlulume,’

nyapdeibuk ura, Musa arye sekeiyamuk yupu peterna deiyoknye birye, Yesus ati nyabuk. <sup>46</sup>Nyabuk bukni, Yesus arye dukdongobuka ayupu tonap nyabuk.

Allah arye nyapdeibuk ura, Musa sekamuk yupu peterena deiyok nang ara, bicoe. Allah arye wenepnamsila ati, kanye imun asa unamlume. Anggunda, anggung kanye tenena deice anyuk tabakuka, 'Winipnamlulume,' nyabuka, mem yupu petereluluma deice arye, ninye nirya sik nong deice ikin ning weik deililulume. Ikin fia weik anya arye, ayupu kekebuka kum dobol binmanto unyake. Ninye nong deice ikin ning weike deililulum bukni, ninye ikin uplye ning ara anggunge, 'Nun arye anggung ti melipnuyabe,' tenepmunce, tonok mitik fil babye, anggunge ton fia kum melilulume.

<sup>47</sup>Allah arye wenebuka opnamsile ati, anggung, 'Se,' tenebuka, imun kanye bonamlulume. Deiyok ara ani. Allah yupu laka nyabuka, laka nyalamik nang, nabi nang ara anggung apu yapu arye olamikce, weilamikak ara, winitalak ara anggunge anabi nang kina ati, ninye wein aik, urasin teleb aik dolulume. Anggung teleb ninye wein aik dolulum bukni, anggung apu yape arye anang olamike. <sup>48</sup>Nabi nang olamik ning ara, ninye wein aik urasin teleb ning domunya deice arye, 'Nun apu yape arye Allah yupu laka nyalamik nang olamika ara, telebe uka,' nyalulume. Ara, anggung apu yape arye, anang olamikbuk, anggunda anang sik wein aik, teleb aik doluluma ati, nyapne.

<sup>49</sup>Allah el weik kel arye nyalamuk. "Allah yupu lak lebuka laka nyan nang, nabi-nabi nang ap, Allah yupu dobuka peterepra banamak Rasul nang ap, sik Yahudi ninye dam dopkwetepnamne. Dopkwetepnye ura, ton nang ara, olonamake. Ton nang ara, 'Optibye' tenen, sik nong deice ikin ning weike delinamake," nyalamuk. Allah arye minop talak nyalamuk touk, anggung winitalak akunum winilulum akarye, akunum winilulume.

<sup>50</sup>Winiplum ning ap, wininamlum ning ap ati ara, Allah arye wenebuka opnamsile. Ara yata nang do nirya, Allah arye tukwak mutuku kwepdeiyamuk talak arye dipdongobuka, minop talak arye dipdongobuka, danoutam talak arye oltakalamik nabi-nabi nang nirya, sik ining ara, anggung winitalak malye winilulum nang anggung deice upnamsile.

<sup>51</sup>Ara, sik diksukum ulamik bukni, Habel arye obik dipdongobuka opnin yangalamik ani, winitalak Zakaria Allah arina ati delilamak sukum obiknye ap, anang nirya sik ining ara, anggung winitalak ululum nang anggung taruk deice upnamsile.

Aolamik nang nirya ati, Allah arye wenepnamsile. Winipnamsila ati na dipkoprop nyapsine. Aoltaklamik nang, sik ining ara, anggung winitalak ululum nang, anggung taruk deice upmasila ati, Allah arye anggung winitalak ululum nang ati wenebuka opnamsile. Yesus arye Farisi nang ati nyabuk.

<sup>52</sup> Yesus arye ayupu nyabukop ura, kirikuka ayupu tonap, Musa sekamuk yupu peterena deiyok nang ati nyabuk. “Allah arye wenebuka opnamsile ati, anggun bicoe. Anggun malye umunye ning ara, nyapnusine. Ninye arye, ‘Aik weknuyap’ tenen, aik buplan kukne ning, kunci arye buplan kukuka weklamak touk ‘Allah diba tenena, kel bikna deiyok ning doproptibiryne kel kipnuyabe,’ tenenyak ning ati, kunci ato ning akunum ubula dopropmalume. Allah el yupu nirya kel kina ati deiyok ning kum laka nyabuka laka nyalulume. Ati anang tuba walwal uk tuba unyake. Tonda anggun babye, ton Allah arye ninye lyeplirye, sik kanye talisilya ara, dib tenebuka kum wekmalumce, anggunce na bataknulume.

Tonda, yuk ninye arye, ‘Se, nun Allah kel kina deiyok ning kel kiptibiryne, Allah talinamsilak weknuyabe,’ tenenyak nang ara, yupu sekeldongolulume. Tonda, ‘Nun dib tenebuka Allah talinamsilak weknamabe,’ tenenyak nang babye, anggun Yahudi yala deiyok nang arye malye winimunya deice arye yuk nang ati yupu sekeldongolulume.”

Yesus arye Farisi nang ap, Musa sekamuk yupu peterena deiyok nang ap ati nyabuk.

<sup>53</sup> Yesus arye ayupu nyanmok ura, atalak dipdongobuka otalak nirya ara, sik Farisi nang ap, Musa yupu peterena deiyok nang ap arye, yu weik ubuk ati, ‘Yesus yupu yanibuka amutam kiptibye’ tenen, asina weik asilanmek. <sup>54</sup>Sik winilamik ning ara, ‘Yesus malye yupu nyaptubuk, anye bira, malye winilulnye nyapnamap’ tenen, asilamik.

**Yesus arye, talima kwa dina yupu ap, wenena yupu ap ati nyabuk yupu**  
(*Matius 10:26-33*)

**12** <sup>1</sup>Yuk talak ara, ninye yupa weike fia kum nukmanto Yesus dam yanmek anya arye, lipmokce min nang nong deica uk yanildanmek ura, Yesus arye el mapu 12 nang ati nyabuk. “Sik Farisi nang ara, sik malye unyak ning ara, nong bol ati teleb unyak bukni, dipkoprop sik talima noutamak ara malye ning weik atupa aulule. ‘Farisi nang winiyak touk, nun babye aning malye wininyap’ tenen, fia kalikuka dilanamlulume. Winipmanto yupu nyapnusine. Roti nena deiyok ning mitikanun uk, roti bun noutam aupmalibuk, weik upnin balamle atonun, sik Farisi nang malye wininyak ning ara weik upnin balamlye ura, ninye weik malye wininyake. Ati sik Farisi nang wininyak ning ati fia kalikuka dinamlulume,” nyabuk.

<sup>2</sup>Ayupu ton nyabuk. “Ninye nirya, ‘Yuk nang arye kel biksicak’ tenen, talima noutam tenebuka duknulamak ning nirya ara, Allah arye lak kipdeipnamle. Lak noutam arye laka nyanamle. <sup>3</sup>Ninye nirya ‘Yuk nang arye kekepsicak’ tenen, lukunyan noutamak duknubuka sisiklamak yupu nirya ara, aminyan ara Allah arye kiting noutam arye, lak lebuka laka



nyaplye ura, kekepnamake.<sup>4</sup> Tonda, sik aik fumbisik arye duknubuka murmur nyalamak yupu nirya ara, Allah arye laka kiplirye, asik deice ak ninye nirya kekenmakcak arye laka nyapnamle,” nyabuk. [Yesus arye, ‘Ninye mutuku-mutuku nirya sik duknubuka unyak ning ap, duknubuka nyanyak ning ap, Allah arye lak kipdeipnamle’ tenen, nyabuk.]

<sup>4</sup>Nyabukce, ayupu ton nyabuk. “Aning ati ara, na ti ara, malye yupu nyabuka, anggun nong deice ikin ning deipnamsiak nang ati, ilil una meme. Anggun nong akunum opsicop ura, yuk ikin ning ton kum upsitinge. Anggun kanye kum opsitinge anya arye, anang ati, ilil una kume. <sup>5</sup>Bukni, anggun kwaranamlumnye bira, nyapnusine. Ninye nong ap, kanya ap obuka, sirya daksilirye, uku din mutuku dongopnamsilnye bira Allah ati ilil unamlume. ‘Allah arye fia opsilyak’ tenen, el ti ilil kanye bonamlume.” Yesus arye nyabuk.

<sup>6</sup>Nyabukce ayupu tonap nyabuk. “Kukalima maka ara, fia mitik keil uang deice arye pamu barye dekenyabuk, amaka babye, Allah arye, ‘Diptue,’ kum teneplyop ura, tonok ning babye, dipturye tukwak kum saktue. Mitik maka ababye, anggun Ni Allah arye kum luba kilule.

<sup>7</sup>Kukalima maka ara, weik uptu ura, mambul fia kume. Bukni, ninye nirya yuk-yuk ara, weik mambul anya arye, Allah bicoe tenepsukce, ‘Na’ tenen, anggun gisok potong nirya babye, akunum nukuka kel biksuke. Aning ati ara, ilil una kume. Anggun patapsilye ning nirya ara Allah arye kum luba kinamsile,” Yesus arye nyabuk. Nyabuk ura, ayupu ton nyabuk.

<sup>8</sup>“Yata ning do nirya, ninye yuk nang dam bikirye, ‘Yesus ara, dipkoprop na deiyoknye ulule. Na arye el yupu kekebuka unune,’ nyanyak nang ara, na Yesus arye, na Ni Allah el nyapdeiblye fil dolbana nang, malaikat sik kekena ati, ‘Anye bira dipkoprop na mi ulule,’ nyapnamne. <sup>9</sup>Bukni, yata nang do nirya, ‘Yuk nang arye akutupsicak do, opsicak do’ tenen, ‘Na Yesus mi kum unune,’ nyabice nang ara, na arye na ni el nyapdeiblye fil dolbana nang, malaikat sik dam, ‘Anang ara, na ti diba kum tenenyaka ati, na mapu fia kum unyake,’ nyapnamne.

<sup>10</sup>Yata nang do nirya, na ara Ninye Mi Koprop Atonunye na ti, malye yupu nyapnice nang ara sik malye nyapnice ning ara, sik batakice ura, Allah arye kum kipdeiplirye namin kipnamle. Bukni, sik anang arye Allah El Dib Kanye el fil dolye ning ati, malye yupu nyabuka, ‘Aning ara, Isa Mutuku Dongonye arye el mikip deice arye fil donyake,’ nyabice ura, Allah arye sik malye nyanyak yupu ara kum daneiplirye, namin kum kipnamle. Aning atouk, sik kanye talima noutamak ayupu fia tenebice ura, aning fia tuba aupnamle, Allah arye sik ti wenepnamle. Ayupu

---

<sup>4</sup> 12:3 *Lak noutam laka nyana* – Ninye mutuku-mutuku nirya sik dungnubuka wininyak ning ap, dungnubuka nyanyak ning ap, sirya talak ara, Allah arye lakak kiplirye, aning nirya leke kipnamle lak nyapnamla ati, Yesus arye ayupu nyabuk.

nyanyak nang ara, kum lyeptomanto ning wininyaka ati, nyapsine,” Yesus arye nyabuk.

<sup>11</sup> “Anggunda, ‘Yupu talina deiyok nang arye wenebuka opnamak’ tenen, tapu koubuka arel binamsiake. Tonda, Allah yupu peterena aik noutamak bobinamsiak ap, ura, na ti diba tenepmanuluma ati, ‘Anang arye opnamak’ tenen, weik ninye deiyok nang, Gubernur nang ap, sisinye weik ninye deiyok nang, Raja nang ap, sik dam bobinamsiak ap ati, ilil una meme. Yata talak do nirya, anggun tapu koubukapsikiryey, yupu bokolin nang dam bobisikcop ura, yupu kabul nyapnumunye talak ara, ‘Yata ubuka nyapnuyap do?’ tenen, mambul kanye kum bopnamlulume. <sup>12</sup> Allah El Dib Kanye arye anggun talima noutamak atalak nyapsilye ninguk nyanamlulume. Ara, anggun Ni Allah, El Dib Kanye mikip aripsilye ura, amikip deice arye anggun yupu nyapnamluma ati nyapsine,” Yesus arye el mapu ati nyabuk.

**Bona weik talinanye ulamukbuk, walwal  
ubuk ati, Yesus arye nyabuk yupu**

<sup>13</sup> Yesus arye ayupu nirya akunum nyabukop ura, aninye weik wekmeka kan-kan arye, tonoknye birye ayupu nyabuk. “Naio, ance na du koprop ati nyapminye ura, na ni deibuk talak batakuk ning bokuka arepnamnila ati, moropkine,” nyabuk. <sup>14</sup> Nyabuk ura, Yesus arye anye biti nyabuk. “Amio, ‘Yupu bokolina deiyoknye unamsil’ tenen, yatanye birye wibuka deipnuk ati, nyapmanilam do?” Yesus arye nyabuk. <sup>15</sup> Nyabukop ura, awakuka kekenmek nang nirya ati ayupu nyabuk.

“Anggun nirya, anggunce anggun ti, ilil una ap, anun una ap, upsilya ati, kanye talima kalekuka dildanamlulume. Ninye kam una ap, ninye teleb una ati, mambul ning ap ara, aning-aning bona talinanye kina deice arye teleb kum updeipsute.” Yesus arye nyabuk.

<sup>16</sup> Asum nyapmok yupu “Teleb kum kel kipnamak’ tenen, tonda anyapmok yupu ara ‘Moubuka kel kipnuyak’ tenen, adomon yupu tonap nyabuk.

Tonoknye birye, wa wibuka kouamuk ura pabukce nong weik ubuk ura, awa wina libukce aik boyayuk. <sup>17</sup> Boyayukce, ‘Se na din ning delin aik lo kum ati, dan ak deipnun do?’ tenen, teniltonmok. <sup>18</sup> Teneltonmokce, utenebuk. ‘Na minop arye domsirye din ning delilamse aik ara, mitik anye arye, ulubukapnirye fia weik aik dopnamne. Winipnyop ura, na bona ning nirya ap, din ning nirya ap anyaik fum delinamne. <sup>19</sup> Winipnyop ura, na aik na yuk ati tenenamne. Ara, akunuma, aminyan upnamle talak nirya ara, aning-aning nirya fia weik akunum deipsa ati, din telebuk dipnirye, mek dibuka fia kanye deibuka, talye kanye bobuka unamne,’ tenebuk.

<sup>20</sup> Anye bira, utenebuk bukni, Allah arye anye biti nyabuk. ‘Kume, awinilyam ning ara, fia walwal winilyame. Alukunyan aryuk an kam

una deiyok ning tamubuka dopropkinye ura, dipnalame. Dorkiting tamun ati ‘Na mutan’ tenen, aning-aning nirya bulubuka deiplum ara, akunum dipminyop ura, yatanye birye dopropnamle do?’ Allah arye anye biti nyabuk. Yesus arye nyabuk.

<sup>21</sup> Yesus arye adomon yupu nyabukop ura, akekenmek ninye ati ayupu tonap nyabuk. “Anyapmasin ning ara, ‘Na mutan’ tenen, aning-aning weike deiamuk bukni, kum dopromok cuk dibuk touk, yata nang do nirya, Allah arye mambul tenelye ning delina ap, kintinina ap una kum arye, sik babye, sik un ning atibuk deililamak nang ara, atonun unamake,” nyabuk.

**Yesus arye kanye imun una ati, nyabuk yupu**  
(*Matius 6:25-33*)

<sup>22</sup> Yesus arye ayupu ton nyabuk.

Anggun unamlum ning nirya ati, ‘Se yata wiripnuyap do?’ tenen, kanye imun una kume. Anggun din ning ap, ongon butum ap ara, mitik mambul bukni, anggun nong ap, kam una ap ara, weik mambul anye arye, Allah arye anggun patapsilye ning ati melinamsile. Aning ati ara, ‘Se, nun yata mek ap, yata din ning ap, dinamap do? Nun ongon aling, yataton ongon butum ongopnamap do?’ tenen, kanye imun kum unamsile. <sup>23</sup> Ninye kam una ap, ninye teleb una ati, mambul ning ap ara, aning-aning nirya, din ning dina deice arye teleb kum updeipsute. Tonda, ninye nong teleb una ara, ongon butum ongona deice arye, teleb kum updeipsute. Din ning ap, ongon butum ap patapsilye ning, aupmalye ura, aning ara, mambul kume. Weik mambul ara, teleb una atia.

<sup>24</sup> Sik maka unyaka nirya ara tenenammlume. Maka ara yala kouna ap, nong lina ap, din ning deilina ‘Na’ tenen, delina ap, fia kum unyak bukni, sik Ni Allah arye amaka sik din ning tuba arilibuk, dinyake. Maka ara, mitik mambul bukni, ninye nirya ara weik mambul anye arye, Allah arye anggun patapsilye ning nirya ati melinamsile. <sup>25</sup> Anggun awekmalum nang noutamak yatanye birye, el kanye imun uptu deice arye, liki tonok talak tonap kam uptu do? Ara kum winipmanto. <sup>26</sup> Afia mitik fil uk ara anggunce kum fil doptuma ati, weik mambul ning ara, ‘Yata wiripnamap do?’ tenen, mambul kanye bomlum ning ara, yata ati do?

<sup>27</sup> Anggunda, moubuka teniplulume. Mutmuta kan-kan arye ulamle kurun ning ara, tenenammlume. Akurun ning urasin ara, fia teleb ululbuk, aning ara fil dona ap, ongon butum ongona ap, kum ulule. Afil kum dolulbuk, weik ninye deiyoknye Raja Salomo ongolamak ongon butum ara, urasin mitik teleb bukni, akurun ning urasin ara, fia weik telebe. <sup>28</sup> Mutmuta noutamak talye ulul kurun ning ara, arup arye kita popmalya ani, ambusum ara kiting deiplirye kuluplye ura, uku

dongonyak bukni, Allah arye urasin fia teleb ubuka kwelilule. Aning ara mambul kum bukni, anggunda weik mambul anya arye, Allah arye anggun ongon butum patapsilyop ura arinamsile. Bukni, anggunda Allah ati, weik arye dib kum tenelulume. Anggunda, 'Nun patapsilye ning Allah arye arinamsile,' tenelalum ning ara, mitik uk usulule. <sup>29</sup>Allah arye dipkoprop melinamsila anya arye, anggun unamlum ning ati, 'Se' tenemunce, 'Nunda, yata ning ap, mek ap, dinamap do?' tenen, kanye imun kum unamsile. Anggun talima ap, kanye ap, aning talye-talye ning deice kum delinamlulume.

<sup>30</sup>Ayupu ara talya ati kum nyapsine. Tukwak ulye ning ati, ninye nirya patalul ning ara, Allah ati 'Diba' tenena kum nang arye, 'Aning uk dopropteipye,' tenebikirye, sik kanye talima aning deice uk deilinyake. Wininyak bukni, anggun na mapu ara anggun, patapsilye ning nirya anggun Ni Allah arye akunum tenepsiliryte, arinamsil ati, talye tukwak ning ati kanye imun kum unamsile. <sup>31</sup>Aning uk tenebuka kum unamlum bukni, weik mambul ning ara, Allah arye 'Wininamake,' tenesilye touk diksukum una ap, lyepsiliryte nun kanye talima talibuka unamsil ning ap, aning uk minopce tenepmunyop ura, fia moubuka talipmunyop ura yuk yala ning nirya babye, elcuk arinamsile.

<sup>32</sup>Aning ati ara, na mapu, Allah arye kanye akunum deipsuk ati, el lyesiliryte kanye talima talinamsil ning ap, el fil donamlum ning ap, anggun patapsilye ning ap, dipkoprop elce arinamsil anya arye, anggun kanye imun una ap, ilil una ap meme. <sup>33</sup>Anggun taliplum ning ara, dekukapmunce, yo bok doropmunye ura, talye bona utotoa talina kumnye ati arinamlume. Anggunce anggun ning ati wasia, malye upmanto kum ning kintinilinamlulume. Ara, Allah arye mambul tenelye ning ara, im deica uk moubuka deilinamlulume. Anggun mambul ning ara, tuku ak mambul ninguk bulubuka, 'Na' tenen, kum deilinamlulume. Tukwak mambul ning nirya ara, sisilya rang ap, sing arye dina ap, yuk nang arye dolona ap deice arye, malye kiplye ura kum danalule. Tonda, upula don nang arye, sik buplan kukuka wekikirye, ubula dolonyake. Bukni, im deice moubuka deilinamlum ning ara, malye fia kum unamle. <sup>34</sup>Ara talya ati kum nyapsine. Anggunce, 'Mambul' tenen, kanye delinamlumak ara anggun bona, dina anirya asukum uk unamle. Yesus arye nyabuk.

**Yesus arye, "Anggunda kanye moubuka, kalekuka dinamlulume,"  
nyabuk yupu**

*(Matius 25:1-13; Markus 13:33-37; Matius 24:43-51)*

<sup>35</sup>Yesus arye ayupu nyabukop ura, adomon yupu ton nyabuk.

Aik deiyoknye birye kil tapua yuna ati, yunak binmalya, ara 'Tamubuka talye karin arye yasilyak' tenen, el melina nang arye teleb butum ongobuka, weisa ubuka, 'Dan tam arye yanul do?' tenen,

kintinibuka dilamak touk wininamlume. <sup>36</sup>Ara, ‘Nun deiyoknye yalirye, buplan lorum-lorum ablyop ura, buplan adip aryuk kukibice ura, wektu’ tenen, wininyake. Anggun babye, atouk ‘Nun ni dan talak tamubuka yanamle do?’ tenen, dina uk unamlulume. <sup>37</sup>Yata nang do nirya, ‘Nun deiyoknye yanul do?’ tenen, dinmakibuk, el yalyop ura sik deiyoknye birye, anang ati kanye deiplirye, teleb ulilule. Anye birye el fil melina nang ati, kanye deiplirye, fil don ongon butum ongoplirye, el melina nang ati, ‘Dina dinak bulyalulume,’ nyaplirye, sik din ning ati aripnamle.

<sup>38</sup>Yata fil don nang do nirya, sik deiyoknye lukunyan yanamalye ning babye, elda upmalya ani, lukunyan dukduk alamle talak yanamalye ning babye, sikce ‘Nun deiyoknye dan talak yanamle do?’ tenen, kintinipdeibuka dinmakibuk yalyop ura, teleb ulinamle. <sup>39</sup>Bukni, na nyapnusin yupu ara, moubuka kekenamlulume. Aik deiyoknye birye, ‘Ubula donanye alukunyan noutamak ara, akiting deice arye ubula dolyanamanile’ tenen, kel kipmatuto ura, mana kum arye fia kalekuka dinmatuto ura, ubula donanye birye, el ning yanuka ubula kum doproptue. <sup>40</sup>Aning atonun na babye, Ninye Mi Koprop Atonunye yanamne talak ara, anggun talye kanye bobuka unmamunye kiting deice aryuk yanamna ati, kanye talima kintinubaka dimunce, kanye moubuka fia kalekuka dinamlulume, Yesus arye el ti diba tenelamik ninye ati nyabuk.

<sup>41</sup>Nyabuk ura, Peterus arye tamubuka asipdeyuk. “Naio, adomon yupu nyapsilam ning ara, nun uk ati, nyapsilam do? ‘Ninye nirya kekepnyak’ tenen, nyapsilam do?” nyabuka asipdeyuk. <sup>42</sup>Asipdeyuk ura, Yesus arye tamubuka nyabuk.

Aik deiyoknye tonok arye, yuk mutuku binuyuk talak ara, el fil donanye tonok ati, ‘Fil winibuka donamlume. Na fil milina nang nirya ati, sik din pataplye talak ara, bokuka arinamlume,’ nyabuka bokdeibuk. <sup>43</sup>Anyaik deiyoknye tamubuka yanamle talak ara, el fil donanye ati yupu nyapdeibuk touk, fil dolamlyop ura, anye biti teleb updeipnamle. ‘Na ning nirya talipmince, deiyoknye atonun kibuka, na fil donamnilame,’ nyabuka adeiyoknye birye el fil donanye dobuka ereipnamle. <sup>44</sup>Na dipkoprop nyapsine. Anyaik deiyoknye birye, ‘Wininamlulume,’ nyapsuk touk, el fil donanye birye, diksukumuk fil dolamlyop ura, adeiyoknye el talyamlye ning nirya anye biti ariplibuk, elce taliplirye, deiyoknye atonun unamle.

<sup>45</sup>Akumop ura, afil deiyoknye birye nyaplye ura, kekebuka fil dolinye bira malye uplirye, malye uptop ura, ‘Kume, na deiyoknye akunum biyukce daulula anya arye, sik asa okiting tamun uk yanamle,’ teneptue. Utenepturye el ap fil donyak nang ap, kilapu ap ati, bokuka oplirye, kanye wangalamak mek din nang ap, neika dibuka utop ura, ‘Na deiyoknye, el akiting yanamle,’ kum tenepturye, talye kanye boblye

sum ara, el deiyoknye tamubuka yanamle. <sup>46</sup>Adeiyoknye tamubuka yalyop ura, amalye upmalinye el nong oplirye, sekuka mitik-mitik kalipsingipnamle. Winiplirye, anye bira el kanya ara, Allah diba tenena kum nang unamakak, uku din mutuku dongopnamle. Yesus arye nyabuk. <sup>47</sup>Nyabukce ayupu tonap nyabuk.

Yata fil don nang do nirya, sik deiyoknye birye fil diamlye ning akunum kekebikirye, bita kekamikiryuk bukni, el nyalamle touk kum winilamiceop ura, sik deiyoknye yalyop ura, fia weika arye weneplirye nong bol deice dem opnamle. <sup>48</sup>Bukni yata fil don nang do nirya, sik deiyoknye birye fil diamlye ning moubuka kum kekebikirye, bita kum kel kiyamikce deice arye walwal arye, malye winilamiceop ura, sik deiyoknye yalye talak ara, mitika arye wenebuka nong bol deice dem opnamle.

Ara talye ati kume. Allah arye aning-aning nirya ap, kel kina deiyok ning ap, weika arye aryamuk ninye ati, 'Na fil weika arye dolamik do, kum do?' tenen, asiplirye weik winipdenamle. Aning atonun, Allah arye tia talak 'Na fil dopnamniak' tenen, aning-aning nirya aryamuk ninye ara, aning deice arye, 'Na fil dipkoprop dolamik do, kum do?' tenen, asiplirye weik winipdenamle. Ati, anggun nirya arye kanye moubuka unamlume. Yesus arye nyabuk.

**Yesus arye, "Na ti diba tenepnikce nang ati, mal pinamake,"  
nyabuk yupu  
(Matius 10:34-36)**

<sup>49</sup>Yesus arye nyabukop ura, adomon yupu tonap nyabuk.

Na fil donyak deice arye, 'Mutuku-mutuku sirya im sirya, nirya uku dinamle' tenen, uku boyasi. 'Tuba akunum iptinye ura, dinmatu' tenen, kanye imun upnile. <sup>r</sup> <sup>50</sup>Na ara, weik kanye imun ning upnamak ning ara, <sup>s</sup> aupmala bukni, min sirya kum dakdongopman talak ara, fia kanye imun unulule. <sup>51</sup>Anggunce na ti, 'E, Yesus ara ninye mutuku-mutuku nirya tonok kanye uk bobuka, kanye deipdakirye talye tunimabuka, talye-talye uk unamake tenen, yayuke,' kum tenepnamnulume. Na yupu dobuka yuk nang ati peterepra bamunyop ura, sik kanye yuk tenenyak nang arye ayupu ati, 'Nun lik' tenen, yu uplye ura waldana ap, oldana ap wininamake. Winibikirye yuk-yuk bokuka unamake.

<sup>52</sup>Atalak arye dipdongobuka dotalak nirya ara, tonok aik ninye ara, pamu barye unmakibuk, bitinye nang arye, ton winilye nang ati,

---

<sup>r</sup> **12:49** *kanye imun upnile* – Yesus arye, 'Mutuku-mutuku nirya uku dipnamle' tenen, yase nyabuk upu deiyok ara ani. Ara uku arye maningtoa diliba anirya kum danalilamle touk, Yesus arye, 'Malye winin ning nirya kum daneipnutu ura, tukwak mutuku nirya telebuk uptue' tenen, nyabuk.    <sup>s</sup> **12:50** *Kanye imun ning* – Yesus arye, 'Kanye imun ning upmanile,' nyabuk deiyok ara, malye nang arye, wanwanun yo deice opnamik ning ati nyabuk.

waldana ap, oldana ap winildanamake. <sup>53</sup>Kume na nyanye yupu ap, na ti diba tenepnamniyaka deice ap, tonoknye birye el li koprop ati, ‘El diba tenelula ati, na lik’ tenen, mal finamle. Aning atouk tonda el li birye el mi koprop ati mal pildanamake. Tonda, tonok kilmu arye, el lin ati, ton tonok kil arye el kilmu ati, ‘El diba tenelula ati na like’ tenen, mal finamle. Tonda, tonoknye el mi, el kil arye el yamal kil ati, tonda, el yamal kil arye, el mi domlye kil, ‘El dib tenelya ati na lik’ tenen, mal finamle. Ara, talye ati kume. Ara, na ap, na yupu ap, ati talima mal finamle. Yesus arye nyabuk.

### Yesus arye aminyan sirya talak kel kina ati nyabuk yupu

<sup>54</sup>Yesus arye ayupu nyabuk.

Berentam talak im sukuplirye,<sup>t</sup> dua kunuklyop ura, ‘Arup ap, ambusum ap mok deneplirye cenamle,’ nyapmamunye touk, mok deneplirye celule. <sup>55</sup>Tonda, anggunda, sintam uplye talak im kunukuka kiplirye,<sup>u</sup> mutuku sirya-sirya kiplyop ura, ‘Ambusum dou mapnamale,’ nyalamlum touk dou malule. <sup>56</sup>Anggunda im deice ulul ning ap, tukwak ulul ning ap, eipmunce, ‘Winipnamale,’ tenebuka, nyalulum ara, anggunda, talima noutamak fia malye ning aupmasilibuk, ‘Teleb nang tenepnamsiyak’ tenen, nong bol deice ninguk teleb winin ning winilulum nang atia. Mok cena ap, dou mana ap ati aning ara, mutuku urasin eipmunce, kel kilulum bukni, na wininye ning ap, peterenye yupu ap, ‘Deiyok ani,’ tenebuka, atalak akunum upsilye ning fia dipkoprop kum bikilulume. Yesus arye nyabuk.

<sup>57</sup>“Anggun babye, ‘Diksukum winin ning ani,’ tenebuka kum kel kiluluma ara, yata ati do?” Yesus arye nyabuk. <sup>58</sup>Nyabukop ura, ayupu ton nyabuk. “Anggun deresice nang arye dobuka bobisikce talak ara, minopce anggun adip aryuk yupu talimunce, telebuk ulinamlulume. Dobuka bobasikce talak bisik noutamak arye, teleb kum kipdeipmunyop ura, derepsilinye birye, yupu bokolina deiyoknye aripsilye ura, anye birye wenebuka, yin talin nang aripsikcop ura, wenena aik dongopnamsile. <sup>59</sup>Aning ara tenepnalume, ‘Yo bok winibukap aripnamsulume,’ nyasilya atonun, nirya min kum arepmamunye talak ara, wenena aik noutam arye kum loplopnamsiyake. Afia unamlume.

Ati, minop deresice ning ara, adip aryuk teleb kilinamlulume. Anyapsice atonun, ‘Allah arye wenebuka opsilyak’ tenen, anggun malye

<sup>t</sup> 12:54 *im sukuplirye* – Minop sekik buku ara, nyabik ning ara, “Kiting wekelbamlamle tam arye, dua weleplyop ura, mok cepnamale,” sekik ning ara, Israel ninye ulamik mutuku winilamuka ati nyabik. <sup>u</sup> 12:55 *im tong-tonga oplirye* – Minop sekik buku noutamak nyabik ning ara, “Dabu mutuku tam arye, kum doplyop ura, dou mapliba tin weik upnamle,” sekik. Asekik ning ara, Israel kili sal ulamik mutuku winilamuka anya arye nyabuka sekik.

umunye ning batakuka, Allah el yupu kekebuka telebuk wininamlume. Lo tuba uplye talak uk, anggun malye ning lobuka batakmunce, diba tenenammlume,” Yesus arye nyabuk.

**Yesus arye, “Anggun malye winimunye ning kum batakmunyop ura, dipmunye babye, kam fia kum upnamlume,” nyabuk yupu**

**13** <sup>1</sup>Yesus arye el yupu peterenmok talak ara, ton nang arye ayupu nyabik. “Galilea tam nang, ton nang ara, ‘Nun malye winin ning Allah arye namin kipnamsile’ tenen, kam un ning obuka, Allah ati arinmek noutam ara, Pilatus arye nyapdeibuk ura, el yin talin nang arye aGalilea tam nang oplobik. Oplobik ura, anang sik ining ap, sikce, ‘Allah aripnamap’ tenen, obuka arinmek ning ining ap, tabakuka ansinibuka biyuke,” nyanmek. <sup>2</sup>Nyanmek ura, Yesus kekebukce, ‘Ayupu nyapmaniyak nang ara, sik Galilea tam oplobik nang ara, fia malye ulamika deice arye oplobik, tenepmakce nyanmaniyake,’ tenebuk ura ayupu nyabuk.

“Sikda, yuk nang ton weik ulamik bukni, ‘Sik Galilea tam akunum oplobik nang ara, fia malye winilamika ati, oplobike,’ tenepmalum ning ara, kume. <sup>3</sup>Na dipkoprop nyapsine. Anggun babye, anggun malye winilulum ning batakuka, kanye tamuna kumop ura, aminyan ara Allah arye oplopsilibuk dipmunyop ura, ila tamubuka tonap kam fia kum upnamlume.” Yesus arye ayupu nyabuk.

<sup>4</sup>Nyabukop ura, ayupu tonap nyabuk. “Tonda, Siloam mutuku noutamak, weik cang aik domikbuk, lokuka bayukce, 18 nang obuk ning ara, Yerusalem mutuku ulamik nang ton mitik malye ubuka, ulamik nang ton aulamikbuk, ‘Anyaik lokuka obuk nang ara, fia malye winilamika arye,’ teneluluma ara, kume. <sup>5</sup>Na dipkoprop nyapsine. Anggun babye, anggun malye winilulum ning batakuka, kanye tamuna kumop ura, aminyan ara Allah arye oplopsilibuk, dipmunyop ura, ila tamubuka tonap, kam fia kum upnamlume,” Yesus arye nyabuk.

<sup>6</sup>Ayupu akunum nyabukop ura, adip aryuk adomon yupu ton nyabuk. Tonoknye bira, el wa wiamuk noutamak arye kwarang yo tonok kuamuk. Kouamukce daulamuk ani, ‘Duk moupmanil do?’ tenen, tuba-tuba dilbalamuk. Dilbalamuk bukni, duk fia kum mulamuk. <sup>7</sup>Duk kum moubuka ati, el wa wibuka kouamukbuk, melibuka dola kwelamuknye ati, ayupu nyabuk. “Kiting tamun winilye deice arye, ‘Akwarang yo duk moupnamnil’ tenen, fia dilyangalamse bukni, duk tonok babye, kum moubuka ati, adip aryuk weploplyame. Tuku teleb ak koupse bukni, talye bok uk bolula ati, weploplyame,” nyabuk.

<sup>8-9</sup>Nyabuk ura, el melibuka awa dola kwelamuknye birye tamubuka nyabuk. “Kume naio, ayo dawamlya ani, ‘Orkiting tamun duk moupnamle do’ tenen, na arye tuku palibuka ap nirye, finga deipdenibuk, orkiting



tamun duk mouplyop ura, ‘Na’ tenen, daupnamle. Kumop ura, anyapmanilam touk, weplopnamne,” nyabuk. Yesus arye adomon yupu nyabuk.

**Yesus arye isa talyamuk kil, Sabat sum deice kwetebuk yupu**

<sup>10</sup>Yuk talak ara, sik Yahudi yala nang Allah kina ati, fil dona kumce dikdik selamik sum, Sabat sum deice Yesus arye, Yahudi yala nang sik Allah yupu peterena aik wekelbiyukce, Allah yupu peterenmok. <sup>11</sup>Yesus arye peterenmok talak, anyaik noutamak tonok kil isa talyamuka deice arye, nong amnyok dukamuk kil unmok. Akil ara, kiting tamun yupa weik 18 tahun deice arye fia amnyok dukamuk arye, amnyok sisikuka tikropman kumto ulamuk. <sup>12</sup>Yesus peterenmok aik ara akil bukmokak eibukce, “Abukmek nang urasin dam tikilyayo,” nyabuk ura tikilyayuk. Tikilyayukop ura, akil ati ayupu nyabuk. “Akilo, isa talipkukbuk, amnyok dukamuk ara, akunum kwetepkine,” nyabuk. <sup>13</sup>Yesus arye ayupu nyabukop ura, akil nong deice taruk deibuk ura, adip aryuk akil sisikuka amnyok tikrobukce, Allah si erenmokce, Allah ati, “Telebe,” nyabuk.

<sup>14</sup>Yesus arye akil kwetebuk ura, anyaik Allah yupu peteren aik talibuka ulamuka deiyoknye birye eibuk akarye, anyaik bukmek nang ati nyabuk. “Nagup sum deice aryuk fil donyapa noutam arye, ‘Anyaik fum kwetepsutue’ tenen, yangana teleb bukni, nun Allah si erena ati, dikdik senyap sum ara, ninye kwetelina ara, fil dona atonun anya arye, ‘Sabat sum deice arye kwetepnusile’ tenen, anyaik yangana kume,” nyabuka wenebuk. <sup>15</sup>Nyabuk ura, Yesus arye anyaik deiyoknye biti tamubuka nyabuk.

“Anggun Farisi nang ara, anggun kanye talima noutamak fia malye ning aupmasilibuk, ‘Yuk nang arye nun ti, teleb nang unyake, tenepnamsiyak’ tenen, nong bol deice uk teleb winilalum nang atia. Anggun nirya ara, Sabat sum deice babye, anggun sapi basam ap, anggun keledai basam ap, aik dongopmamunya ani, ‘Mek dipnul’ tenen, aik buplan kukuka mek kin kum kirikilbalulum do? Diba anggun weilulum kam un ning nirya ara, sabat sum aupmalye babye, melibuka teleb kibuka melilulume.

<sup>16</sup>Diba anggun aning awinilulum touk, Abraham yala nang arye deiamik kil ara, kiting tamun 18 tahun deice arye isa talyamuk arye, amnyok dukamuk ak, kwetepmana ati, malye tenepmaluma ara, yata ati do? Sabat sum deice babye, anggun keledai basam lobuka, mek kin kirikilbalalum atonun, aisa talyamuk kil ara, yata ati, Sabat sum deice kum kweteptinye do?” Yesus arye anang ati, ayupu nyabukce wenebuk.

<sup>17</sup>Nyabuka wenebukop ura, Yesus yupu yanipmek nang kekebibkce, alye ubuk ura, tunimabuka wekmek bukni, yuk nang ara, Yesus arye afia teleb fil donmokak eipmek nang, sik nirya arye, Yesus ati fia kanye deibik.

**Yesus arye, “Fia mitik yo duk bukni, beteklirye, weik yo nelule,”  
nyabuk yupu  
(Markus 4:30-32; Matius 13:31-33)**

<sup>18</sup>Yesus arye ayupu nyabukop ura, awekuka kekenmek nang ati, adomon yupu tonap nyabuk.

“Ara, Allah arye ninye nirya lyeplirye anggun talima talinamsila ara, ‘Anggun tenepnamlum’ tenen, winipmanto yupu ton nyapnusine. Allah arye ninye talinamsil atonun ning ara, ani.

<sup>19</sup>Tonoknye birye, kabalye yo duk” mitik bukni, wa wibukce, dokamukbuk, akabalye kwakuka nebuk ura, akabalye kwa lekukce, weik nebuk ura, maka yala-yala nirya ataruk deice uk malyangalamik. Kabalye yo duk mitik bukni, weik nelamle touk, Allah arye ninye weik lyeplirye, sik kanya talima talipnamla ara, ninye yupa fia weik upninbanamle.” Yesus arye nyabuk. <sup>20</sup>Ayupu nyabukop ura, adomon yupu ton nyabuk. “Allah arye ninye lyeplirye anggun talima talinamsil atonun ning ton nyapnusine. <sup>21</sup>Tonok kil arye, ‘Roti dapnun’ tenen, roti nena deiyok ning mitiktonun dobuka aroti bun deipmoka noutamak dongobuk ura, danmoka ani, aroti ara, weik arye nebuk. Ara roti nena deiyok ning ara, fia mitik ninguk bukni, aning weik nelamle touk Allah arye ninye lyeplirye nirya talinamla ara, ninye yupa fia weik upninbanamle.” Yesus arye nyabuk.

**Yesus arye mitik buplan bisik wekna ati nyabuk yupu**

<sup>22</sup>Atalak arye dipdongobuka, Yesus arye, ‘Yerusalem mutuku obinamne,’ tenebukce, bisik mapnin banmok talak ara, mitik asik dolamikak ap, weik asik dolamikak ap, mapnin balamukce peterepnin banmok. <sup>23</sup>Bisik mapnin banmokce, peterepnin banmok talak ara, tonoknye birye Yesus ati asipdeyuk. “Naio, Allah arye ninye mitikanun uk lyeprnamle do, weik do?” nyabuka asipdeyuk. <sup>24</sup>Nyabuka asipdeyuk ura, Yesus arye ayupu kekenmek nang nirya ati tamubuka nyabuk.

Na dipkoprop nyapsine, Allah arye ninye lyeplirye sik kanya talima talinamsil talak ara, ninye weika arye, ‘Se, nun ton wektibye’ tenen, pipridenamak bukni, kum wekmanto upnamake. Allah ap neika unamabak ara, wekna buplan bisik ara, buplan fum fia mitik anye arye, ‘Anyaik

---

v 13:19 *Kabalye duk* – Minop sekik buku noutamak ara, kabalye duk kum sekik. Aning ara sik mutuku kum ulamuk. Sikce sekik ning ara, fia mitik duk maning duk atonun ning sekik. Bukni, aning kouamikba weik yo nebuka ati ara, sik Eipomek kili sal moubuka tenena ati ara, kabalye yo duk sekupe. Deiyok ara, duk ning fia mitik bukni, aminyan talak nepmalyani, tiklamle yo ara weik cang yo tiklamle. Ayupu deiyok ara, Allah yupu ara mitik atonun ning bukni, aminyan ara, ninye fia weik tenebicop ura, Allah el mapu ara, fil weik upra banamak.

wektinye' tenen, fia pi deibuka mikip deice arye piripdenamlume. <sup>25</sup> Anyaik deiyoknye birye buplan akunum dekdongoplyop ura, anggunda, buru tam buplan dam tikilbimunce, 'Naio nun ton wektibye' tenen, patapsila anya arye, "Nun ti buplan kukdeipsilyame," nyabuka, lorum-lorum abuka weik arye moropnamlum bukni, anyaik deiyoknye birye tamubuka, "Anggun dan mutuku arye yanmalum nang do? Na ap neika kum ulamubu ati, anggunda na fia walwale. Na tam nang kum ululume," nyapsiliryne bataknamstile.

<sup>26</sup> Nyapsilyop ura, anggunce tamubuka nyapnamlume. "Kume naio, nunda an ap ulamubu talak ara, din ning ap, mek ap, neika dilamuburye, nun asik dam Allah yupu peterelamsulum ura kekelamupe," nyapnamlume. <sup>27</sup> Nyapnamlum bukni, adeiyoknye birye tamubuka nyapnamstile. "Anggun dan mutuku arye yanmalum nang do? Na ap neika kum ulamubu ati, anggunda na fia walwale. Na tam nang kum ululume. Anggunda, fia malye winilalum nang anya arye, anggun adip aryuk yuk-yukak bindoplulume. Na dam kum unamlume," nyapnamstile.

<sup>28</sup> Nyapliiryne, fia buru tam dopkwetepsilye karen, yukak bimunyop ura, Abraham ap, Isak ap, Yakup ap, Allah yupu laka nyalamik nang sik nabi-nabi nirya ap, Allah fia talinamsilak neika unamaba eipmunce, fia imun kanye bobuka, gisok talibuka engepmunce, yuk anye bopnamlume. <sup>29</sup> Anggun Farisi nang ara, fia buru tam dopkwetepnamsilbuk, yuk nang ara, kiting yangan tam ap, kiting wekelban tam ap, dabu tam ap, iknapye tam ap, yanganamake. Yakce ura, Allah ninye nirya talinamsilak kwalibuka deiplye ura, 'Dinamak' tenen, Allah arye akunum kintinepdeipsuk ak, bulyanganamake.

<sup>30</sup> Tonda aning ton nyapsine. Winitalak ninye arye, 'Anang ara mambul kum nang' tenen, sikda bicoto ubuka amuak unyak nang ara, aminyan talak ara, Allah arye anang ereipliryne, fia sisin nang kipdeipnamle. Aning atonun, winitalak yuk nang arye, 'Anang ara sisin nang' tenen, erenang kipdeibiceba unyak nang ara, aminyan talak ara Allah arye amutam kipdeipleba, sikda mambul kum nang unamyake. Yesus arye nyabuk.

### **Yesus arye Yerusalem mutuku ulamik nang ati, bico tenebukce nyabuk yupu**

<sup>31</sup> Yesus arye ayupu nyabuk talak ara, sik Farisi nang Yesus dam yayikce, ayupu nyabik. "Amutuku weik deiyoknye Herodes arye, 'Anye bira, optine,' tenekulule anya arye, amutuku batakuka yukak binamyame," nyabik. <sup>32</sup> Nyabik ura, Yesus arye anang ati tamubuka nyabuk. "Herodes ara, tenepce arye talye yupu nyaltakalulnye ati," na nyapnusin yupu dobuka, el dam laka nyalbinamlulume."

---

<sup>w</sup> 13:32 *Herodes* – Minop sekik buku noutamak ara, domon yupu ati, Israel mutuku ulamuk binatang si gaja sekik. Alkitab TB noutamak ara, serigala si sekik. Akam ning ara, mitiktonun bai tam talye daulamle kam ato ning el, si sekik. Bukni, nunce ayupu deiyok ninguk sekupu. Ara anggun moubuka tenena ati sekupu.

“Yesus arye an ti nyakelule, ‘Na arye, arup ap, ambusum ap, orsum ap ara, ninye talyamuk isa yakuka dolkwetena ap, uk ninye kwetena ap, unamne. Winipnin balamnya ani, na tenepse fil sirya binuka daknamne,’ nyalule. Yesus arye ayupu nyapkebuk. Ayupu bobuka, Herodes dam nyalbinamlulume,” Yesus arye nyabuk. <sup>33</sup>Nyabukce, ayupu ton nyabuk. “Herodes arye na ti ‘Anye bira optinye,’ tenepnutu bukni, na kabula, min kum opnamnile. Na fil dopnin balamnya ani, Yerusalem mutuku dipkoprop binamne. Ara talye ati kum nyapne. Allah yupu lak kibuka laka nyanyak nang sik nabi-nabi nang ara, yuk mutuku kum onyake. Yerusalem mutuku noutam uk onyaka ati, Yerusalem mutuku noutam binamnarya nyapne,” Yesus arye nyabuk.

<sup>34</sup>Nyabukop ura, ayupu tonap, dukdongobuka nyabuk.

Ara, anggun Yerusalem mutuku ululum ninye ara, Allah yupu laka nyabuka peteren nang Allah arye nabi-nabi nang weik, anggun dam dolkwetelul bukni, anggunce anabi sik nong deice keil dobuka ona ap, tonda, talye oltakana ap winilulume. Na arye anggun Yerusalem mutuku ululum nang ati, ‘Ayam amaka el mapu irilamle touk, na wiamse kili sal, kalikuka melipnamsin’ tenen, patasiliba anggun ti tuba tenesinye bukni, anggun Yerusalem deiyok nang arye, ‘Anye Yesus bira nun lik’ tenen, batakanululume.

<sup>35</sup>Aning ati ara, anggun Allah ati arilbalalum aik ara, Allah arye batakye ura anyaik ara talye lo uk upnamle. Ara talye ati kume. Na arye anggun batakuka bisinyop ura, dotalak nirya ara, na ton kum eipnamnulume. Daulamunya ani, na si erenamnulume talak ara eipnamnulume. Atalak ara, anggunce, ‘Se, Ninye Lyenye, Mesias<sup>x</sup> nyanyapnye akunum yanmasile,’ tenen, biknamnulume talak ara, ayupu nyapnamnulume. ‘Allah el mikip ap, el si ap deice arye yanmasilinye bira, weik mambulnye anye arye, fia telebuk unamle,’ nyabuka, na si erenamnulume talak ara, atalakuk eipnamnulume. Yesus arye sik Farisi nang ati nyabuk.

#### Yesus arye Farisinye aik bukmokce nyabuk yupu

**14** <sup>1</sup>Tonok Sabat sum deice arye, Farisinye tonok weiknye, el aik fum Yesus ara din dibuka bukmokop ura, yuk nang arye, ‘Yesus el malye winipnul do?’ tenen, kalekuka dinmek. <sup>2</sup>Sikce Yesus kalekuka dinmek talak ara, weik uk dilamuk anyak nong bol nirya nemuk ati aik bulamuknye Yesus dam bukmokak eibuk. <sup>3</sup>Yesus arye aik ulamuknye eibukce, Farisi nang ap, Musa sekamuk yupu peterna deiyok nang ap, awekmeka ati nyabuk. “Allah arye, ‘Winamlulume, aning ara, kum

<sup>x</sup> 13:35 *Mesias* nyalamik ning ara, Ninye Lyena Deiyoknye biti nyalamik. Ara Yesus atia, yuknye kume.

wininamlulume,' nyapdeibukba, Musa sekamsuk yupu noutam ara, yata nyasulul do? Sabat sum deice ara, fil dona kumce Allah el ti kinyap sum anya arye arup ara, ninye kwetena teleb do, malye do?" nyabuka asipdeyuk. <sup>4</sup>Asipdeyukbuk, sik urdem tunimabuka buna uk unmeke anya arye, Yesus arye aik bukamuknye dobuka kwetebukce, "Dabilyame," nyabuk ura, tikuka biyuk.

<sup>5</sup>Anye bira biyukop ura, Yesus arye awekmek nang ati nyabuk. "Anggun mapu do, sapi basam do, Sabat sum deice' arye weik tuku fumbisik sakingop ura, adip aryuk kum dobuka deiptum do?" nyabuk. <sup>6</sup>Yesus arye nyabuk bukni, sikce, 'Yata yupu nyapnuyap kuma' tenen, tunimabuka bukmek. <sup>7</sup>Sik din dipnuyik talak ara, Farisi nang arye weik nang bukmantoak uk wibuka bukmekak, eibuk. Yesus eibukce adomon yupu nyabuk.

<sup>8</sup>"Sikda, weik yuna kwalibikirye, 'Anggunda dilyalulume,' nyapsikcop ura, weik nang bukmantoak uk wibuka kum bunamlulume. Anggunda mitik mambul ululum bukni, yuna deiyok nang arye, weik sisin nang akunum yukupmating ati, aminyan yatunye bira, weik nang bukmantoak ara, 'Anggun bukmaluma anya arye, anggunda lopdeiplulume. Asisinanye anggung bukmalumak buknuke,' nyapsice ura, anggung uk alye unamsulule. <sup>9</sup>Akwalina deiyoknye birye, weik sisin nang akunum yukupmatop ura, anggung bukmalum buna ara, weik nang yanuka buknuyaka ati, 'Anggun lopra dongo tam bunak bulbinululume,' nyapsutuop ura, alye upsutue. Dongo tam talye bona utotoa talina kumnye bukmakcak bunamlulume.

<sup>10</sup>Anggun arye, 'Teleb ak uk buknamap' tenena, meme. Aning ara kum wininamlum bukni, yuna ati yukupsilyop ura, kankan ninye bulamakak binuka buknamunye ura, ayuna deiyoknye birye, 'Weik nang bunakak bulyalulume,' nyapsilyop ura, sik awekmakce ninye nirya arye, 'Anye bira weiknye,' tenepsikce ura, fia teleb ak uk bulbinamlulume. <sup>11</sup>Ara talye ati kum nyapsine. Yata ninye do nirya, sikce sik bidamnye ati erelilalamak nang ara, aminyan talak Allah arye anang dobuka amu kipdeipnamle. Bukni sik talima darapdongobuka amutam ulamice nang ara, aminyan talak Allah arye anang erebuka teleb ak deipnamle." Yesus arye nyabuk. Nyabukop ura, Yesus arye el bukmok aik deiyoknye biti nyabuk.

<sup>12</sup>"Anggun yuna kwalibuka deipmamunye talak ara, anggung kayapu nang ap, anggung weitcapu silip ap, anggung yala nang ap, bona talin nang ap, 'Yuna dilyanuyak' tenen, ananguk kum yukupnamlulume. Ato nanguk yukupmunyop ura, sikce tuba tamubuka anggung ti kwalibuka

---

v 14:5 *Sabat sum* – Farisi nang arye, 'Allah ati si erenyap sum, Sabat sum deice arye, fil mitika ababye kum doptibye. Aning ara malye,' tenelamik bukni, Yesus ara, aning kum peterelamuk. 'Ninye kwetena ap, yuk nang melina ap wininyap ning nirya ara, asum-asum nirya deice arye fil dobuka winina ara telebuka,' nyabuka peterelamuk.

delinamsiak anya arye, ‘Elce tamubuka yuna kwalibuka deipnamnile,’ tenepmunye nanguk kum yukupnamlulume. <sup>13</sup> Anggun yuna kwalibuka delinamlum talak ara, talye bona utotoa talina kumnye ap, yok kwalin ninye ap, aik bun ninye ap, asing guna ninye ap, ‘Sik nirya dilyanuyak’ tenen, yukupnamlulume. <sup>14</sup> Winilamunyop ura, Allah arye anggun ti teleb ulinamsile. Ato ninye ara, sikce tamubuka, yuna kwalibuka kum deipsiting bukni, Allah arye sik diksukum wininyak ninye kam bukeipnamle talak ara, Allah arye sik aryamuk ning dekna ati, mininga ning weike urdem arinamsile.” Yesus arye el bukmok aik deiyoknye biti nyabuk.

### **Weik yuna kwalina ati, winipmanto nyabuk yupu**

<sup>15</sup> Yesus arye ayupu nyabukop ura, Yesus ap dinmek nang kan-kan tonoknye birye, ayupu nyabuk. “Allah arye ninye lyeplirye, aning-aning nirya talinamla talak, weik yuna kwalibuka deiplibuk dinamlanye bira, weik mambule. Allah arye atonye biti, teleb kilinamle,” nyabuk. <sup>16</sup> Anye birye nyabuk ura, Yesus arye el yupu kekenmek nang ara, ninye dib tenebicop ura, ‘Allah arye sik kanye talima talibuka ulul ning kel kipnamak’ tenen, winipmanto yupu deice arye nyanmok. Yesus arye nyanmok.

<sup>17</sup> Adeiyoknye birye, ‘Na yuna dilyanamak’ tenen, min arye akunum nyapdeiamuk nang ati, akunum kintinibukop ura, el melina nang dopdeibuk ura, nyalbiyik. Anang arye, “Winira, nun deiyoknye birye aning-aning nirya akunum kintinipmasila ati, anggun dilyalulume,” nyalbiyik. <sup>18</sup> Anang arye, “Winira, dilyanulume,” nyabuk ura nyalbiyik bukni, el nyapdeiamuk nang arye lik ubuka ura, “Nun kum yanamabe,” nyabuka anang nirya tonok-tonok arye lik ubuk ura, yuk-yuk biyik. Sik yuk-yuk biyik ura, sik nirya arye tenepce yupu deice arye, “Nun kum diptibye,” nyabik. Tonye birye, na wa tuku winiryuk dekmanu ati, dilbinune. Winipnamne anya arye, kum yanune, nyabuk. <sup>19</sup> Tonye birye, “Kume, ‘Na fil don sapi basam pamu barye winiryuk dekmanu ara, fil teleb kibuka dopnamniak do?’ tenen, pirildelbinun anya arye, kum yanune. Talya moropmanila anya arye, elda kum yanamale, nyapdeipnilyame,” nyabuk bukni, tenepce arye talye yupu nyabuk. <sup>20</sup> Tonye birye, “Kume, na kil winiryuk dopmana anya arye, na babye, kum yanune. Talya moropmanila anya arye, elda kum yanamale, nyapdeipnilyame,” nyabuka tenepce arye talye yupu nyabuk.

<sup>21</sup> Sik anang-anang nirya arye nyabik ura, anyaik nyalbiyuknye kekebukce, el deiyoknye dam laka nyalyayuk. Laka nyabukop ura, akwalina deiyoknye birye, yu weik ubuka ura, el melinanye ati ayupu nyabuk. “Minpola weik bisik ap, mitik buru bisik ap nirya, bimunce eipdamunye talye bona utotoa talina kumnye ap, yok kwalin ninye ap,

asing guna nang ap, aik bun nang ap, anang nirya ati, ‘Nun deiyoknye yuna kwalibuka deipmala ara, dilbilulume,’ nyapmunce, dobuka boyanululume,” nyabuk.

<sup>22</sup>Nyabuk ura, el melinanye birye el nyapdeibuk touk, bisik bokolanak nirya banmokce, elinmok nang nirya bulubuka el li aik biyik. Biyikop ura, amilinanye birye, el li koprop ati nyabuk. “Naio, ance nyapmanilam touk akunum winipman bukni, aik lo tuba upmale,” nyabuk. <sup>23</sup>Nyabuk ura, akwalina deiyoknye birye tamubuka nyabuk. “Aning ati ara, fia mitik buru bisik ap mitik mutuku unyakak ap fia karen mutuku ap bimince, ninye ton aunmakcop ura, aninye nirya mikip yupu arye yukupminbuk, yakcop ura, na aik lipnamnile. <sup>24</sup>Yuk ninye yakce na aik lipnilyop ura, na minop arye yukupse ninye nirya, tonok babye, na kwalibuka deipmanye ning kum dipnamake,” akwelina deiyoknye birye nyabuk. “Ayupu akunum nyapsine,” Yesus arye nyabuk.

**Yesus arye, “Na ti diba tenepmunce, dobolyanamnulum ning ara, ikin unamluma anye arye, moubuka tenenamulume,” nyabuk yupu**

<sup>25</sup>Yesus arye peterepra banmok talak ara, ninye fia weike arye ‘Yesus el yupu kekebuka el ti dobolbanabe’ tenen, melibuka banmek ura, Yesus arye el ap neika abanmek nang ati ayupu nyabuk. <sup>26</sup>“Yata nang do nirya, sik ni yapu ap, sik nin yapu ap, sik kilapu ap, sik weitcapu silip ap, sik mapu ap ati, weik arye kanye talima delilul bukni, na ti ara, kanye talima mitikanun delinululce na ti bataknicip ura, anang ara, na mapu kum uptinge. <sup>27</sup>Tonda yata nang do nirya, na dobolyanganamak talak ara, sik babye wanwanun yo bobuka, na yupu kekebuka na ti kum dobolyanganamniak nang ara, na mapu kum uptinge. Ara, sik mining ning atibuk, ‘Aning ara teleb anye arye, mambul ulule,’ tenebikirye, ‘Yuk nang arye nun opsicak’ tenen, lik tenebikirye, na yupu kum dobolyanganamak nang ara, na mapu kum uptinge.” Yesus arye nyabuk. <sup>28</sup>Nyabukop ura, awinipmanto yupu tonap nyabuk.

Yata nang do nirya, ‘Nun weik aik dopnuyap,’ tenebice talak ara, ‘Teleb ning ara dipdetinirye, yo bok aupmanil ning deice arye sirya daktinye do?’ tenepnamake. <sup>29</sup>Aning kum dipdetingop ura, deiyok kouptingce dolamting ani, ayukumna yo ap, aik abilinga yo noutamak ning ap, akunum doptingce, nirya sirya kum daktingce, batakingop ura, yuk nang eiptingce, yupu lyek-lyek abuka, anang ati akutupnamake. <sup>30</sup>Akutubukaptingce, “Anye bira, ‘Weik aik dopnun’ tenen, deiyok koubuka dopnin balamuk bukni, suktalibukce, kum sirya dakmanto ubuka ati, batakuka ati ara, walwalnye ulule,” nyabuka akutunamtinge.

<sup>31</sup>Aning ara, atonun, tonok weik ninye deiyoknye birye, ‘Yuk nang opbisipnamne,’ teneptu talak ara, minopce tenipdetue. Ara, ‘Na ap, na yin talin nang 10 ribu nang ap arye, omutuku 20 ribu nang

olyangalamsiak nang ara, opbisiptibye do, kum do?’ tenen, tenipdenamle. <sup>32</sup>Tenipdeturye, ‘Kume ninye weik anya arye, kum opbisiptibye’ tenen, teniploptu ura, 10 ribu nang sik deiyoknye birye yupu sekna ati, ninye dopdeiptu ura, 20 ribu nang bisik yanamatingak bikirye, “Nun neika teleb una ati, nyalin yupu nyapdatibye. Nun olana kumce, teleb ubuka neika unamabe,” nyabuka yupu moropnamake. Yesus arye winipmanto yupu deice arye nyabuk. Nyabukce ayupu ton dukdongobuka nyabuk.

<sup>33</sup>Adomon yupu nyapmasin nang wininyak touk dipkoprop deiyok ara ani. ‘Ara aminyan yata wiripnamsil do?’ tenen, fia moubuka tenenammlume. Aning ati ara, yata nang do niry, sik talyamice ning kum batakikcop ura, na kum dobolyanganamake. Ara Na mapu kum uptinge.

<sup>34</sup>Garam uwa teleb nyalamle ning kum uptu bukni, ila tamubuka teleb kipdeiptum do? Kume, aning ara fia kum winipmanto ati, kum diptinge. <sup>35</sup>Talya buru tam donokice ura, ninye arye aning deice yanibuka banyake. Garam uwa akunum mitang nyaplyop ura, yata ning do, niry yuk ning babye, teleb kum updeiptue. Yuk ning arye lipsisikuka teleb kum updeiptue. Aning atouk, anggunda Allah yupu nyasye touk kum winipmunce, malye ninguk winipmunye ura, yuk nang eibikirye, Allah winin ning kum kel biknamake. Tonda, anggun malye uk winimunya nang ara, Allah arye bataknamstile. Ati, anggun amul usilye ura, ‘Ayupu deiyok ani’ tenen, ayupu kekepmanto nang ara, moubuka kekepnamlume. Yesus arye ayupu niry nyabuk.

### Domba basam tonok tunimamuk ati, el biyuk yupu

**15** <sup>1</sup>Atalak-atalak niry ara, Israel tam talyamik deiyok nang, Roma mutuku nang ati, pajak yo bok bulubuka arilamik nang ap, sik yuk nang arye, “Aninye fia malye ninye,” nyabuka tenelamik nang ap, ‘Yesus el yupu nun ton kekepnuyap’ tenen, bulubuka, Yesus dam tonap weik wekelyanganmek. Tonda, amalye-malye ulamik nang niry ap, Yesus ap neika ansinibuka dina dinmek.

<sup>2</sup>Awinilamik touk, Yesus ap, amalye winin nang ap, dinmek ura, sik Farisi nang ap, Allah arye, ‘Aning wininamlume, aning ara kum wininamlume,’ nyapdeibuk ura, Musa arye sekamuk yupu peterena deiyok nang ap arye, pajak yo bok bulubuka delin nang ap, malye-malye winilamik nang ap, Yesus ap, neika dina dinmeka eibikop ura, nyabik. “Anye bira Yesus ara, pajak yo bok bulubuka delin nang ap, malye-malye unyak nang ap, ‘Anang ara malye unyak nang,’ tenena kumce, neika dina dinmaka ara, yata ati do? Awininmala ara, fia malye unmale,” nyabuka wenebik. <sup>3</sup>Nyabuka wenebikop ura, Yesus arye ayupu nyanmek nang ati winipmanto yupu nyabuk.

<sup>4</sup>“Anggun kanye ara, yata tenepmalum do? Tonoknye bira el domba basam 100 ulamice ura, tonok ning ton yukak banmalye ani,



tunimaplyop ura, domba basam 99 ning abatakuka tunimap malye ning ati elbalul do, ‘Dawaplye’ tenen, batakalul do? Kume ‘Tunim ap malye ning eipnun’ tenen, epnin banmalya ani, eiplyop ura, ‘Akunuma eipmane,’ tenelule. <sup>5</sup>Akunum eiplyop ura, el domba basam 99 yukak kum banmakiryte, tuba anyuk unmaca ati, mitik kanye delilul bukni, tonok tunimap malye ning eiplyop ura, fia weik kanye deibuka, tomobuka boblyop ura, el aik tamubuka bobalule. <sup>6</sup>El aik tamubuka bilyop ura, el kayapu nang nirya ati nyalule. ‘Na domba basam tunimapmanua ara eipmana ati, nun nirya kanye weik arye deipnamabe,’ nyanyake.” Yesus arye nyabuk.

<sup>7</sup>Nyabukce ayupu tonap nyabuk. “Adomon yupu nyapmasin touk, anggun Ni Allah im deice ululnye el kanye ara, ninye tonoknye babye, ton, el malye winilul ning batakliryte, diksukumuk ulyop ura, kanye fia teleb delilule. Yuk ninye yupa weike 99 malye kum unyakce, tuba telebuk unyak nang ara, el kanye mitik teleb delilul bukni, malye ulamice nang arye sik malye una ning batakuka diksukum ubikcop ura, weik kanye delilule.” Yesus arye sik Farisi nang ap, Musa sekamuk yupu peterena deiyok nang ap ati ayupu nyabuk.

#### **Keil uang tonok tunimabuk ura, enmoka ani, eibuk yupu**

<sup>8</sup>Yesus arye ayupu nyabukop ura, adip aryuk winipmanto yupu tonap nyabuk. “Anyapmasin yupu atonun, tonok kil dekna weik keil uang perak taku barye 10 deiamtu bukni, tonok ning wangaptuop ura, kum eibtu do? Kume weisa upturyte, el aik fum nirya ara, amsuna dangabuka moubuka epra banmatua ani, keil uang akunum eiptop ura, fia kanye deiptue. <sup>9</sup>Akeil uang eiptop ura, el asik dam ulamting nang ap, el kayapu nang ap, yukuptu ura, anang yatingop ura, ‘Na dengna weik keil uang tunim nyapmanu akunum eipmana ati, nun nirya kanye deipnuyabe,’ nyaptue. <sup>10</sup>Aning nyaptu touk, na dipkoprop nyapsine. Malye ulamice nang noutam arye, tonoknye babye, ton, el malye ulul ning bataklyop ura, Allah arye nyalin yupu laka nyana ap, fil donanye ap unyak nang malaikat nirya arye, kanye deilinyake.” Yesus arye nyabuk.

#### **Tonoknye birye, ‘Na mi tunimabuk ara, akunum dipnuke,’ tenebuk yupu**

<sup>11</sup>Yesus ayupu nyabukop ura, winipmanto yupu tonap, nyabuk.

Tonok talak ara, tonoknye el mapu bitinye deibuk ura neprik. <sup>12</sup>Neprik ura, daulamika ani, tonok sum arye, dunye bira kum bukni, weiknye birye, ayupu nyabuk. “Naio, an taliplum ning ara, ‘Na dipnunye talak ara aripnamne,’ tenepnulum ning ara, winitalak uk aripnunilyame,” nyabuka morobuk. Morobukop ura, anyasik deiyoknye birye, el mapu bitinye ati, el talyamuk ning bokuka aribuk.

<sup>13</sup>Aribuk ura, daulamrika ani, wala bitinyeto, winilyeto ubukop ura, el weit koprop arye el talyamuk ning nirya bulubukabukce, ‘Na yuk mutuku unamne’ tenen, leibuka biyuk. Yuk mutuku biyukop ura, aning-ning nirya dengna ap, malye ubuka una deice ap arye, el li arebukak dopromuk ning nirya kum daneibuk. <sup>14</sup>El dopromuk ning nirya kum danibuk talak ara, yuk mutuku noutam arye, din ning nirya kum ubuka ura, dina patabuka ati, anye bira ikin weik ubuk.

<sup>15</sup>Ami ara el dopromuk ning nirya kum ubuka anya arye, ikin weik ubuk ura, yuk mutuku noutamak tonoknye ulamukak biyukce, “Ance na fil nuknutum ura doptinye,” nyabuka morobuk. Morobuk ura, anye birye el basam weinanye kipdeibuk.<sup>z</sup> <sup>16</sup>Basam weinanye kipdeibuk ura, basam weilamuk talak ara, yuk nang arye el din ning kum arilamik ati, ‘Abasam dina dilamikce, dina si sekdoxa mitik-mitika uk bulubuka diptinye,’ tenelamukce dilamuk.

<sup>17</sup>Ikin weik ubuk talak ara, kanye moubuka tenebukop ura, utenebuk. ‘Se, na yata ning deiyok ati, malye ulamse do? Na ni el fil talye melinyak nang ara, din ning weik dinmaca ani, bouplyop ura, sirya ara batakanyak bukni, na tonok ara din ning kum upnuka deice arye, dipmanto unune,’ tenebuk. <sup>18</sup>Aning ati ara, na ni dam tamubuka binirye, nyapnamne. “Naio, Allah ap, an ap ati fia malye winipse. <sup>19</sup>Na fia malye winyamsa anya arye, ance, ‘Ara na mi,’ tonap kum nyapnamnilam bukni, an milina nang atonun kipdeipnutum ura, talye fil ababye, doptinye.” ‘Ayupu nyapnamne,’ tenebuk.

<sup>20</sup>Utenebukce, amutuku batakuka el li dam biyuk. Bisik ak ouyanganmok ura, el li asik dam tikuka dinmokce, el mi uk ouyanganmokak eibuk. Eibukop ura, el mi ati bico ubuka ati, bik-bik abuka biyukce, binuka erebuka mutubuk. <sup>21</sup>Winibukop ura, el mi arye el li biti nyabuk. “Se naio, Allah ap, an ap ati, fia malye awinyamsa anya arye, aminyan talak nirya ara, ance na ti, ‘Ara na mi,’ kum nyapnamnilyame,” nyabuk.

<sup>22</sup>Nyabuk bukni, ami el li birye, el fil melina nang ati ayupu nyabuk. “Anggunda, ‘Weik nang kipnamap’ tenen, arilamak butum ongona aling ati fia teleb ning ara, minopce dobuka yamunce, na mi ati ongopdeipnulume. Tonda, ‘Anyaik deiyoknye atonun ulule, tenepnamake’ tenen, taruk dukdongon ning dobuka boyamunce ongopdeipnamlulume. Tonda, ‘Anye bira, talye melinanye kume, weiknye ulule, tenepnamak’ tenen, el yan ongon

<sup>z</sup> 15:15 *basam* – Yahudi yala ninye sik kanye ara, ‘Basam ara fia malye ulul ning anya arye, fia kum weinamabe,’ tenelamik. Tonda, minop talak, Allah arye nyapdeibuk ura, Musa arye mem yupu sekeiyamuk ning noutamak ara, Allah arye Israel nang ati, “Basam weina ap, dina ap ara, fia meme,” nyapdeiyamuk. Ati, sik Yahudi ninye ara, ‘Basam fil nirya ara fia malye fil uka,’ tenelamik. Ati ara, anye birye fia malye kanye bobuka, aflil dobuka ulamuk.

sandal boyamunce ongopdeiplulume. <sup>23</sup>Winipmunyop ura, ‘Weik sum yuna kwalibuka dipnamap’ tenen, weinyaka ak weik arye nebuk sapi basam ara, obuka kwalipnamlulume. Obuka kwalipmunyop ura, nun nirya kanye deibibirye, pinpin asa arye dipnamabe.

<sup>24</sup>Ara talye ati kume. Na mi yanmanila ara, dipna nang atonun ulamukbuk winitalak ara, kam ulamak nang atonun upmale. Tonda, na mi tunimapnuk bukni, akunum yanmalak eipmana anya arye, yuna kwalimunya ura, kil-kil arye dipnuyabe,” nyabuk. Nyabuka ati, sik nirya kanye deibikke, yuna deiya koubuka kwalinmek.

<sup>25</sup>Sik anang nirya arye yuna deiya koubuka kwalinmek talak ara, anye el du bira wa tuba winmok. Wa winmokani, asik tam tamubuka yayukop ura, sik kil-kil asa kwalipmekce, mot nyanmekak kekenmok. <sup>26</sup>Kekenmok anya arye, elce el li melinanye tonok yukubukba, yayuk ura, “Sik yata deiyok ati wininmak do?” nyabuka asipdeyuk. <sup>27</sup>Asipdeyuk ura, amelinanye birye tamubuka nyabuk. “Kume, an weit korop, tunimabuk ani, winitalak ara, akunum teleb arye tamubuka yanmala ati, ani birye, ‘Sapi basam weik nebuka ara, obuka kwaliplulume,’ nyapmal ati, obuka kwalipmakce wininmake,” nyabuk.

<sup>28</sup>Nyabuk ura, winiryuk tamubuka yanmoknye el du koprop arye, yu weik ubuka ati, ‘Na ara anyasik kum binune,’ tenebuk. Utenebuka ati, el li anyasik fum arye, el mi dam biyukce, ‘Aik yanul’ tenen, morobuk. <sup>29</sup>El li birye morobuk bukni, el mi dunye birye tamubuka nyabuk. “Kume, ance deiamlum tok, an fil weik dolamsibuk, dolamse kiting tamun noutamak nirya ara, ‘El ap, el kayapu nang ap kwalipnamak’ tenen, tonok kambing mi babye, kum aryamnulume.

<sup>30</sup>Na teleb fil uk dolamsibuk, yun ning kum aryamnulum bukni, na weit koprop, an taliplum ning akunum aryamlum ak, dobuka binamukce, aning-aning weik dengna ap, kil talye yona ati dengna ap deice arye kum danibuka ati, tamubuka yanmakilbuk adip aryuk weik arye nebuk sapi basam obuka, kwalip deipmalume. Winipmaluma ara yata ati do?” nyabuk. <sup>31</sup>Nyabuk ura, el li birye tamubuka nyabuk. “Na mio, atalak-atalak nirya an ap, nun neika unyama anya arye, na talinye ning nirya ara, an babye, talilyame. Na ning ara an ning atonun kilule.

<sup>32</sup>Ara, an weit koprop ara, dipne nang atonun ubuk bukni, kam ulamak nang atonun upmale. Tonda, fia tunimamuk bukni, yanmalak, eipmana anya arye, el ti kanye deipmapce, yuna kwalipmapa ara, fia telebuka.” Anye el li birye, el mi dunye kopropa ati nyabuk. Yesus arye awinipmanto yupu deice nyabuk.

**Tonoknye birye, ‘Na fil kum dopnilyop ura, aminyan talak yata wiripnamne do?’ tenebukce, winibuk ning ati nyabuk yupu**

**16** <sup>1</sup>Yesus arye, el yupu kekebuka neika balamik nang ati winipmanto yupu nyabuk. Tonok sum ara, bona weik talinanye,

el yo bok moubuka delina deiyoknye fil malye-malye ubuka dolamuk deice arye, yo bok weik tunimalamuk. Tunim alamuk ura, yuk nang arye, ‘Abona talinanye ati duknubuka,’ tenenalyikce, nyapyayik. “An yo bok moubuka delina deiyoknye birye, fil malye dolya deice arye, an yo bok weika arye kum ulule,” nyalyayik. <sup>2</sup>Nyabikop ura, bona weik talinanye birye, el yo bok delina deiyoknye yukubuk ati, yayukop ura, ayupu nyabuk. “Yuk nang arye, ‘El fil malye ubuka dolya deice arye, an yo bok kum ulule,’ nyakinyak ara, yata wiriplum deice arye na yo bok kum danalul do? Anda na yo bok moubuka delina deiyoknye tuba kum unamlama ati, na yo bok deice fil dolamlum ning nirya ara, ‘Winibuka, winibuka fil dolamse,’ nyabuka, laka nyapnunyame,” nyabuk.

<sup>3</sup>Nyabukop ura, ayo bok moubuka delina deiyoknye birye, utenebuk. ‘Se, na deiyoknye birye, na donye fil ara, el bidamnye birye doproplirye, na bataknamnila ati, yata wirinamne do? Na ara mikip kumnye ati ara, tuku palibuka wilamak wa ara, fil kum doptinye.’ Tonda, ‘Na alye upnilyak’ tenen, yuk nang ati, “Talya aripnululume,” nyabuka, ‘Kum moronamne,’ tenenmok. <sup>4</sup>Winibuka tenenmoka ani, ‘E, aning ara, winipnune,’ tenebukop ura, nyabuk. “Na deiyoknye arye, na donye fil doproprnilyop ura, yuk nang arye na ti melibuka yukupnamniak ati, winipnun ning ara, akunum tenepne,” nyabuk.

<sup>5</sup>Utenebukce nyabuka ati, el li kopropa ning tia domik nang ati, yukubuk ura, tonok-tonok yanganmek. Yanganmekop ura, anang ati atonun yupu nyabuk. Minopce yayuknye biti, asipdeyuk. “Na ni birye aripkuk ura, tia dopromlum ning ara, yata barye do?” nyabuka asipdeyuk. Asipdeyuk ura, anye birye tamubuka nyabuk. <sup>6</sup>“An deiyoknye birye, fia weik mekwen makau si, tampayan ara, 800 liter minyak zaitun kwebuka arepnuk ura, tia dopromse,” nyabuk. Nyabuk ura, ayo bok moubuka delina deiyoknye birye nyabuk. “Ati, ‘Winibuka dopropse,’ nyabuka, nukuka si sekuka aryamlum ura, na ni birye deiamuk kertas ara, dopropmince, minopce 800 liter sekuk ning kilibuka empat ratus uk (400) liter sekuka deiplyame,” nyabuk.

<sup>7</sup>Aning nyabuk touk, bitinanye yayuk ura, ayupu nyabuk. “Na ni birye aripkuk ura, tia dopromlum ning ara, yata barye do?” nyabuka asipdeyuk. Asipdeyuk ura, anye birye tamubuka nyabuk. “An deiyoknye birye, roti dana deiyok ning el si ara, yakong yamubuka lipdongobukce, weik karung yupa weike seribu (1.000) karung anyak arepnuk ura dopromse,” nyabuk. Nyabuk ura, ayo bok moubuka delina deiyoknye birye nyabuk. “Ati, ‘Winibuka, winibuka dopropse,’ nyabuka, nukuka si sekuka aryamlum ati, na ni birye deiamuk kertas ara, dopropmince, minopce 1.000 karung kilibuka, 800 karung uk sekuka deiplyame,” nyabuk.

<sup>8</sup>Nyabuk ati, aning ara, ayo bok moubuka delinanye, el weik deiyoknye birye nyabuk. “Sik tia domik ning ati, kilibuka yuk sekuk

ning ara, malye bukni, anye birye ‘Aminyan talak na fil kum dopnilyop ura yata winipnamne do? Na arye sik tia domrik nang ati, melipnyop ura, aminyan talak ara tia domrik nang arye na ti yukupnamniyake,’ tenebuk ning ara, telebuka. Weik deiyoknye birye nyabuk.” Yesus arye winipmanto yupu deice arye nyabuk.<sup>a</sup>

Yesus arye winipmanto yupu nyabukop ura, ayupu dukdongobuka nyabuk. “Na dipkoprop nyapsine. Allah dirina deice arye unyak nang ara, sik fil ati yupu talibikirye, wibuka delinyaka ara, atalak un ninguk tenenyake. Sikda aminyan talak upnamle ning ati kum tenenyake. Ati diba tenebuka dirina noutam unyak nang ara mitikto kel arye wininyake nyapne.

Bukni, sik dib tenena kum ninye arye, ‘Aminyan talak bona utotoa talin ninye unamap’ tenen, sik kayapu nang ak, ‘Yata wiriptibya arye, nun kayapu nang melipsikca deice arye, bona utotowa talin ninye unamap do?’ tenenyake. Tonda, sik fil ati, yupu talibikirye wibuka deilinyaka ara, weik kel arye wininyake. Ara sikce, ‘Aminyan talak yata wiripnamsil do? Ikin unamap do, telebuk unamap do?’ tenen, moubuka tenenyaka ati nyapsine,” Yesus arye nyabuk.

<sup>9</sup>“Ati, yata ning do nirya, Allah arye arisilye ning nirya, yo bok ap, talye tuku ak ning nirya ap, yuk nang ati bico tenebuka, melibuka talye arildamunya deice arye, anggun kayapu nang koprop kilinamlulume. Awinilamunye ura, aminyan talak talye tukwak ning nirya kum uplyop ura, anggunce yuk ninye ati melildamunya ning ati, ara Allah arye anggun im deice binalum talak ara, teleb nyabuka yukupnamsile.” Yesus arye nyabuk.

<sup>10</sup>Yesus arye ayupu nyabukop ura, ayupu tonap dukdongobuka nyabuk. “Yata nang do nirya, sik deiyok nang arye, ‘Winibuka, winibuka fil dopnamlume,’ nyabuka mitikto ning dobuka aribice ura aning dobuka fil bita teleb ubuka donyak nang ara, sik deiyok nang arye weik mambul ning weika arye ariptingop ura, aning dobuka fia telebuk fil donamake. Bukni, yata nang do nirya, sik deiyok nang arye mitik ninguk aribice ura, aning dobuka duknubikirye, tilila yupu nyabikirye ubula dopdopbice ura, anang ara sik deiyok nang arye weik mambul ning ababye, weika arye ariptingop ura dungnubikirye tilila yupu nyaltakana uk unamake. Ara sik kanye malye nang arya.

<sup>11</sup>Aning ati ara, anggun babye, atonun, tukwak dekna ninguk aripsikce ura, bita teleb ubuka kum fil dopmunce ubula dopmunyop ura, aminyan

---

<sup>a</sup> 16:8 *winipmanto yupu* – Yesus arye winipmanto yupu nyabuk ning deiyok ara, ani. Ara, ‘Tilila yupu nyana ara telebuka, tenepnamak’ tenen, kum bukni, ‘Aminyan talak yata wiripnamsil do?’ tenebikirye, sik weik ninye deiyoknye Allah tenelye ninguk tenebuka, diksukumuk ubicop ura, ‘Aminyan talak Allah arye anggun ti kanye deipnamsile tenen, kel bikinamke,’ tenebukce nyabuk.

ara yatanye birye dipkoprop weik mambul ning im deice ning arepnamsil do? Ara kum winipmanto. Anggunda kanye malye nang ati ara im deice arye weik mambul ning ara Allah arye kum aripnamsile. <sup>12</sup>Tonda, aning atonun anggunce yuk nang bona moubuka kum talipmunce diksukumuk kum umunye ura, yatanye birye, anggun ning kopropa arepnamsil do? Ara kum winipmanto. Anggun malye winimunye nang anya arye, kum arinamsile” Yesus arye nyabuk.

<sup>13</sup>Nyabukce ayupu ton nyabuk. “Tonok fil donanye birye, el deiyok nang bitinye nang utiringop ura, tonoknye birye abitinye nang fil kum doptue. El deiyok nang bitinye nang ati, kanye deibuka, tonye fil dobuka, tonye fil dobuka, kum winiptue. Ato fil don nang ara, ton deiyoknye biti, kanye deibuka, ton deiyoknye biti, lik tenebuka unamake. Tonda, sik deiyok nang bitinye kibikce, ton deiyoknye biti, fia talibuka unamake.

Ton deiyoknye biti, lik uplibuk, bataknamake. El fil deiyok nang bitinye nang utiringop ura, tonye biti lik tenebuka batakliroye, tonye biti kanye deiplirye meliptyop ura fil donamle. Tonye bira, bataknamle, tonye bira, fia talinamle. Ayupu nyapmasin touk, Allah ap, yo bok do, talye tuku ak ning nirya ap ati, neika talibuka kum fil doptume. Tonok ning ara wibuka talinamlulume,” Yesus arye nyabuk.

<sup>14</sup>Yesus arye ayupu nyanmok talak ara, sik Farisi nang kekenmek. Kekenmek bukni, sikda, yo bok fia patalamuk arye, yo bok ati fia kanye delilamik nang anya arye, Yesus arye ayupu nyanmok ura, ‘Anyapmasil yupu ara, talye nyanmasile,’ tenenmekce, Yesus ati akutunmek akarye, malye yupu nyanmek. <sup>15</sup>Wininmek ura, Yesus arye aFarisi nang ati ayupu nyabuk. “Anggun Farisi nang ara, ‘Yuk nang arye malye nang tenepsicak’ tenen, anggun malye winimunye ning duknumunce, nong bol deice uk teleb fil dolulum bukni, anggun kanye talima noutamak tenebuka duknulum ning ara, malye ning weik tuba aupmalye ning ara, Allah arye kel biksulule. Tuku ak ninye arye, ‘Aning ara mambul’ tenen, pataplibuk kanye delinyak ning ara, Allah aning ati, el kanye ara, ‘Aning ara fia malye, tenebuka like,’ tenelule.

**Yesus arye, “Na nyasinye yupu nirya ara, tonok ning  
babye min kum danamle,” nyabuk yupu**

<sup>16</sup>Minop talak arye dipdongobuka, anoutamak talak nirya ara, Allah arye, ‘Aning ara wininamlulume, aning ara kum wininamlulume,’ nyapdeibuk ura, Musa arye sekamuk mem yupu ap, tonda Allah yupu lak nyalamik nang, nabi-nabi nang arye sekamik yupu ap, peterena deiyok nang arye peterelamik. Atalak nirya ara, ayupu uk peterelamik bukni, Yohanes arye el yupu peterelamik talak arye, deiyok kouprongobuka winitalak nirya ara, min arye, peterelamik ning akunum sirya dakmake. Winitalak ara, Allah el kai teleb yupu peterenyabe. Ayupu ara, Allah

ninye nirya lyeplyrye, sik kanye talima talinamsil yupu ati nyapne. Ayupu peterebibe, ninye weike kekebikirye, ‘Nun ton diba tenebibe ura, Allah arye lyepsutue’ tenen, fia, pi dobuka mikip deice arye pirildenyake.

<sup>17</sup>Im noutamak ulul ning nirya ap, tuku ak mutuku ulul ning nirya ap ara, kum danana ara, mitik caknam uka. Bukni, Allah yupu noutam arye, fia mitik yupu waplye ning babye, kum danana ara fia ikine. Ara kum winipmanto atia. Musa sekamuk yupu mem yupu noutam arye, tonok huruf babye, fia mitik sekna ning ababye, kume kum danamle. <sup>18</sup>Na dipkoprop nyapsine. Yata nang do nirya, sik kilapu koprop batakikirye, yuk kilapu doprobice ura, ninye arye yuk kilapu ubula dalubuka talya yolamak atouk winiluluma ati, winina ara, fia meme. Tonda, yatanye do nirya, yuk nang arye domica ani, batakice kil dobuka doplyop ura, ara yuk nang arye talye ubula yolamak kil atonun ulule.” Yesus arye Farisi nang ati nyabuk.

**Yesus arye, Lazarus ap, bona weik talinanye ap ati, nyabuk yupu**

<sup>19</sup>Yesus arye ayupu nyabukop ura, ayupu dukdongobuka nyabuk.

Tonok talak ara, bona weik talinanye ulamukce, atalak-atalak nirya ara dupsice ubuka ulamukce, sik fia weik bona talinanye nang mirin ongon butum ap, fia teleb ongon butum ap ongolamik touk, el babye, aongon aling ongolamik. <sup>20</sup>Tonda, tonok fia bona utotoa talina kumnye el si ara Lazarus el nong nirya ara, suse fia weik wamuk. Ati yuk ninye arye, ‘Abona talinanye birye, Lazarus talye aripnamal do?’ tenen, yuk nang arye Lazarus bico tenebikce, el dobuka bona talinanye el asik dam bukni, bura tam poka buplan dam delilyanamik ura, bulamuk. <sup>21</sup>Anyak uk bulamukce, ‘Se, bona talinanye el din ning deibuka dinmaliba bun saklye ning ara, na bubuka diptinye’ tenen, patalamuk. Tonda, Lazarus el suse dilamukak ara, kam weik yanakarye, mutulamik.

<sup>22</sup>Atouk ubuka bulamuk ani, sirya talak ara, Lazarus dibuk ura, Allah el im deice fil don nang malaikat arye, Lazarus dobuka im deice Abraham dam boulibiyik. Tonda, abona talinanye dibuk ura, tuku lukik. <sup>23</sup>Tuku lukik ura, el kanya ara uku din mutuku biyuk karen ara, uku dilamuk ati, fia malye nyalamukce dinmokbuk, Abraham im deice yukak unmokak eibuk. Eibuk talak ara, Lazarus babye, Abraham dam tikmokak eibuk. <sup>24</sup>Eibukop ura, bona talinanye weik yupu arye Abraham ati nyabuk. “Se, na ni Abrahamo, bico tenepnimince, Lazarus biti nyaptumop ura, Lazarus taruk duk arye ikip mek burupdongobuka, na sitang deice deililyanutue. Ara, uku dinmanil ak, uk weik dinmanil arye, donmana ati, moropkine,” nyabuk.

<sup>25</sup>Nyabuk ura, Abraham arye abona talinanye ati nyabuk.

Amio, anda teneplyame. An tukwak tuba kam ulamlum talak nirya ara, an patalamkuk ning nirya ara, talilamlum akarye dupsiceto

ulamlume. Lazarus ara, ikin weik ulamuk ati, fia imun kanye uk bobuka ulamuk. Winitalak ara, Lazarus im deice aunmal talak ara, Allah arye el kanye imun un ning kum danibuk ura, telebuk ulul bukni, anuk ara, uku dinmakil ati, imun kanye bobuka unmalame.

<sup>26</sup>Aning uk kume, tonda, an unmalamak utam babye, nun unmapak im deice mutuku bukni, danoutam babye, Allah arye weik kot sekukce weik lo ati, anyaka arye utam kum uku din tam kum binmanto, utam arye anyaka im deice kum yanmanto. Aning ati ara im deice nang arye, ‘Se, utam nang melilil bitibye,’ tenenyak nang ara, uku din mutuku kum bitinge. Atouk uku din mutuku unyak nang arye, ‘Se im deice weleptibye,’ tenenyak nang arye kum weleptinge. Ara kum winipmanto. Abraham arye abona talinanye ati nyabuk.

<sup>27</sup>Nyabuk ura, bona weik talinanye birye tamubuka nyabuk. “Aning ati ara, na fia weik arye moropkine. Ance nyaptum ura, Lazarus arye na ni aik bitu akarye, na du yape ap, na weit yape ap ati, laka nyalbitue.

<sup>28</sup>Na weit yape ap, na du yape ap ara, pamu barye nang unyaka anya arye, na unye mutuku, uku din mutuku anya arye, uk weik disulule. Na weit, ap na du yapu ara mangkau kanye bobuka talye amutuku yakcak ati, ‘Lazarus arye anang dam yupu laka nyapturye, yupu sekelbitu’ tenen, moropkine,” nyabuk.

<sup>29</sup>Nyabuk ura, Abraham arye tamubuka nyabuk. “Kume, Allah arye, ‘Wininamlume, aning ara kum wininamlume,’ nyabukba, Musa arye sekamuk yupu ap, Allah yupu laka nyalamik nang, nabi-nabi nang arye sekamik yupu ap, aupmal ati, ayupu uk kekeptinge,” Abraham arye nyabuk.

<sup>30</sup>Nyabuk ura, bona weik talinanye birye tamubuka, “Kume nai Abrahamo, akunum diamtunye, kam bukturye, sik dam laka nyalbituop ura, ayupu kekeptingce, sik malye winin ning batakuka dib teneptinge,” nyabuk. <sup>31</sup>Abona talinanye birye nyabuk bukni, Abraham arye tamubuka nyabuk. “Kume, Allah arye, ‘Wininamlume, aning ara kum wininamlume,’ nyabukba, Musa arye sekamuk yupu ap, Allah yupu laka nyalamik nang, nabi nang arye sekamik yupu ap, kum kekebikcop ura, dipmatunye kam bukturye, sik dam binuka nyaptu babye, dib kum tenepnamting,” nyabuk. Ara Abraham arye abona talinanye ati nyabuk, nyapne. Yesus arye nyabuk.

### Yesus arye el mapu obarye 12 nang ati nyabuk yupu

**17** <sup>1</sup>Yesus arye el mapu obarye 12 nang ati ayupu nyabuk.

Yata ning do malye upsilye ura, Allah el yupu dib tenebuka dobolbalulum ning ara, yanitalulum akarye malye unamlume. Ayupu malye ulina deiyok ning ara, fia tuba unamle bukni, malye una deiyok ulilamsiyak nang ara, sik fia kanye imun upnamle. Anang ara, Allah



weik arye wenepnamla atia. <sup>2</sup>Yata nang do nirya, sik malye ulamice deice arye, yuk ninye ton eibikirye, ‘Sik unyak atonun nun babye, ton winipnuyabe’ tenen, malye ubicop ura, sik malye una deiyok nang sik wenena ati ning ara, winipmanto ning nyapnusine. Kanam ning ara ani. Ara minop malye ulamika deiyoknye bira, weik keil arye, el ngang kirikuka, laut mekwen noutam dongopting ura, mekwen diptue. Aning ara, mitik ikin bukni, amalye una deiyok nang ara sik malye unyaka ara, yuk nang ati, malye ulinyaka anyapce yuk nang ababye, malye unyak anya arye Allah arye, amalye una deiyok ninye weik arye wenepnamla ara, aning ara ikin fia weik upnamle.

<sup>3-4</sup>Aning ati ara, anggun winin ning ara moubuka tenenammlume. Yuk nang arye malye ubicop ura, “Anggunce malye upmalume,” nyabuka wenepmunye bukni, wenepmunye ura malye unanye el malye winilamlye ning batakyop ura, anggunce el malye winipmalye ning ati, tuba tenena kumce, talya mangkau kibuka unamlume. Tonda, asum bukni, amalye unanye birye anggun ti, like tek barye deice arye malye upmasilye bukni, anggun dam yalirye, “Na malye winipmasin ning ati ara, ‘Duplye’ tenen batakanammlume,” nyabuka laka arye nyabuka, dipkoprop el malye winin ning batakyop ura, tek barye ababye, el malye winipmasilye ning ati, ‘Dauplye’ tenen, batakanammlume, Yesus arye nyabuk.

<sup>5</sup>Nyabuk ura, elce wibuka deiamuk Rasul nang, el mapu sik obarye 12 nang arye tamubuka nyabik. “Naio, nun dib tenenyaba deiyok ning ara, weik aripsutum ura, weik upnin banamsilirce, an ti weik upnin diba tenenamkiyape,” nyabuka morobik. <sup>6</sup>Nyabuka morobikop ura, Yesus arye tamubuka nyabuk. “Sumik yala fia mitik ning bukni, anggunce na ti dib tenepmanulum ning ara, amitik ning atonun mitikanun uk dib tenepnutumop ura, okwarang yo ati, ‘Ancuk erepdakuka, asukum arye otam laut mekwen deice tikilbilyame,’ nyaptum ura, anggunce ayupu anyapmatum touk, ayo el yuk erepdakuka, laut mekwen deice tikilbitue,” Yesus arye nyabuk.

Ayupu nyabukop ura, ‘Na mapu arye, nun ni birye nyasilye touk, nun fil ara teleb-telebuk ubuka, fil donamape, tenepnamak’ tenen, winipmanto yupu ton nyabuk. Yesus arye nyabuk yupu ara ani.

<sup>7</sup>Tonda, yata weik deiyoknye do, el fil melinanye birye, wa win fil ap, basam wein fil ap, wininmalya ani, aik tamubuka yalyop ura, anggunce el ti, “Minpola bukuka din diplyame,” nyaptum do, kum do? <sup>8</sup>Aning ara, kum nyapnamlum bukni, anggunce el ti, nyapnamlume. “Minopce ara, an teleb butum ongapminye akarye, na din ning kintinipnamnilyame. Na din dinmanye talak ara, an talye melibuka bukmaminye ani na din dibuka sirya daknyop ura, an aminyan, dinamlyame,” nyapnammlume.

<sup>9</sup>Tonda, anggunce el ti, “Winibuka fil dopsilyame,” nyapmunye ura, anyapmamunye touk fil dopsilyop ura, anggunce el ti, “E, nun kwit

telebe,” nyabuka kum kilulume. Anye bira, talye fil donanye ati ara, ‘Dawaplye’ tenen, mangkau kildongolulume. <sup>10</sup> Aning atonun anggun babye, atalye fil donanye atonun unamlume. Allah yupu nyasilye touk akunum fil dopmunyop ura, adip aryuk nyanamlulume. “Allah arye nyapsuke atouk fil dopmaba ati, nunda, weik mambul nang kume. Nunda malye fil dona nang uk,” nyanamlulume. Utenebuka, kanye lamabuka namin arye amutam unamlume. ‘Nunda, mambul nang unyabe,’ tenebuka, kanya talima ereldan nang kum unamlume. Yesus arye nyabuk.

**Yesus arye taku barye 10 nang suse dilamukak kwetebuk yupu**

<sup>11</sup> Yesus arye, ‘Yerusalem mutuku binun’ tenen, bisik banmokani noutamak ara, Samaria danatam, Galilea danatam noutam kan-kan bisik kwa delekuka biyuk. <sup>12</sup> Bisik banmokani, tonok asik dolamikak wekelbiyuk talak ara, taku barye 10 nang, barye suse dilamuk anyak unmekak biyuk ura eipdayik. <sup>13</sup> Eipdayik akarye, anang ara, barye suse dilamuka ati ara, ‘Yum nang dam kum yatibye,’ tenepmeka anya arye yukak unmekce, Yesus ati weik yupu arye yukubik. “Nai Yesuso, bico tenepsutum akarye, kwetepsutume,” nyabuka morobik.

<sup>14</sup> Morobikop ura, Yesus el yuk bisik banmobbuk, yukubik ati kekebuk akarye, tamubuka dipdeyukce ayupu nyabuk. “Anggunda, Allah arina ati, weik deiyoknye dam bimunye ura, dipdesikirye, ‘Anang ara suse akunum lopdobuk anya arye ila tamubuka Allah el si eren aik yatinge,’ nyapnamsila ati, anggun nong amul bilulume,” Yesus arye nyabuk. Nyabuk ura, sik barye suse dilamuk nang adip aryuk bisik banmek talak ara, sik suse nirya lopdobuk ura, telebuk ubuk.<sup>b</sup>

<sup>15</sup> Sik barye suse nibuk akarye teleb ubuk ura, tonok suse dilamuknye tamubuka, Allah si erenmokak arye Yesus dam biyuk. <sup>16</sup> Allah si erenmokak arye, Yesus yan dam gutam tuku dipdongobuka Yesus ati, “Telebe,” nyabuk. Telebe nyabuknye bira Samaria<sup>c</sup> tamnye birye nyabuk. <sup>17</sup> Yesus arye kwetebuknye, Samaria tamnye birye Yesus ati “Telebe,” nyabuk ura, Yesus arye ayupu nyabuk. “Na arye taku barye 10 nang kwetepmanu bukni, sik Yahudi yala nang tupne barye (9) nang ara tamubuka kum yanmak nang ara danak unmak do?

---

<sup>b</sup> 17:14 *Suse dilamuk nang* – Atalak ara, sik Yahudi Yala nang arye, ‘Weik suse dilamne nang ati ara, Allah el si eren aik dam yangana meme. Sikda fia malye uka. Sik suse lopdoptop ura, Allah el si eren aik dam tonap yatinge. Ati, Musa arye sekeiyamak touk, Allah arina ati deiyok nang arye, suse dilamuk ninye dipdenak, ‘Suse akunum lopmana eipnop ura telebe. Ur yalulume,’ nyapnop ura, aninye tonap, Allah el si eren aik dam yatinge. Kum lopnop ura, kum yatinge,’ tenelamik. <sup>c</sup> 17:16 *Samaria tam nang* – Yahudi yala ninye arye, Samaria mutuku nang ati, ‘Anang ara fia nun like,’ tenelamik. Anye bibabye, Samaria mutukunye ulamukbuk, Yesus ara Yahudi yalanye birye anye kwetebuk.

<sup>18</sup>Yata ati ninye asiknye Samaria tamnye el tonok aryuk, teleb na ti tamubuka nyanmanil do? Barye suse dilamuk nang ara, taku barye (10) nang kweteipmanu bukni, anye biti tonok aryuk Allah si erebuka 'Telebe,' nyalyanmasile. Sik yuk nang tupne barye nang Yahudi yala nang nirya ara kwetepmanu bukni, teleb nyabuka kibuka si erena ara, batakmasiake," Yesus arye el ap neika banmek nang ati nyabuk. <sup>19</sup>Nyabukop ura, akwetep mok Samarianye biti nyabuk. "Ance na ti dib tenepmanilama deice arye, akunum kwetepmakine ati, bukuka tikdopmince bindoplyame," Yesus arye nyabuk.

**Yesus arye Allah ninye lyeplirye, 'Sik kanye talima talinamne' tenen, yanamle talak ati, nyabuk yupu**

<sup>20</sup>Tonok talak ara, sik Farisi nang arye Yesus ati, "Allah arye ninye lyeplirye, nun talima talinamsil talak ara, yata talak yanamle do?" nyabuka asipdeyik ura, Yesus arye tamubuka nyabuk. "Kume, Allah arye ninye lyeplirye kanye talima talinamsila ara, talye lak akarye kum yanamle. <sup>21</sup>Tonda, Allah ninye lyeplirye kanye talima talisilya ara, ninye kanye talima fum usilye ning atia. Ara talye lakak ning kuma anye arye, yalyop ura, yuk nang arye, 'Oyanuka unmale, ayanuka unmale,' kum nyanamake," Yesus arye Farisi nang ati nyabuk. <sup>22</sup>Nyabukop ura, Yesus arye wipdeiyamuk mapu ati nyabuk.

Aminyan talak ara, anggun nirya arye, 'Se, nun ni koprop Ninye Mi Koprop Atonunye birye tamubuka yalirye arye, talinamsil talak noutamak tonok sum uk eiptibye' tenen, fia patapsilye ura dipra unamlumbuk, kum eipnamlume.

<sup>23</sup>Dou talak noutam ara, yuk nang arye, anggun ti, "E, Ninye Mi Koprop Atonunye amutuku akunum yanuka unmale. Se, Ninye Mi Koprop Atonunye omutuku akunum yanuka unmale," nyanamsiak buk, sik yupu kekebuka diba tenen, adip aryuk bik-bik abuka kum elbanamlulume.

<sup>24</sup>Na ara, Ninye Mi Koprop Atonunye aminyan yanamne talak ara, bebea laklye ura, im sirya dana-dana dirina ulamle atonun, na atalakuk, fia lak ubuka lakak yanamne. Ati, ara yanyop ura, ninye mutuku-mutuku nirya, dipkoprop moubuka biknamake. Ninye arye, 'Yanmal do, kum do?' tenen, teniltona fia kum wininamake. Lakak ayanyop ura biknamake. <sup>25</sup>Minpola yanamne bukni, anoutam talak ara, winitalak unyak nang arye, ikin ning na nong deice delilamnice ani, "Anye bira nun like," nyabuka bataknamniake.

<sup>26</sup>Minopa Nuh ulamuk talak ara, el ap ulamik nang winilamik atonun, na Ninye Mi Koprop Atonunye yanamne talak ara, ninye mutuku-mutuku nirya atonun wininamake. <sup>27</sup>Ara, Nuh ulamuk talak weik mekwen min kum deiamuk talak ara, sik aninye nirya arye, mek dina ap, din ning yala nirya dina ap, kil talye dolana ap, anirya winipnin balamika ani,

Nuh weik mek bukna yo fum wekdopnuyuk sum babye, tuba wininmek. 'Mekwen dipsilyak,' tenena kumce, talye kanye bobuka winipra balamik. Winipra balamik ura, weik mok celamuk akarye, mekwen deibuka weik obuk akarye, aulamik ninye nirya dibuk. (Sik talye mangkau kanye bobuka ulamikbuk, mekwen deibuka dibuk atonun, na Ninye Mi Koprop Atonunye yanamne talak ara, atonun talye mangkau kanye bobuka 'Yesus tamubuka kum yanamle' tenen, unamake.)

<sup>28</sup> Aning atonunuk, Lot ulamuk talak babye, sik yuk nang nirya arye atonunuk winilamik. Sik din ning dina ap, mek dina ap, bona dekna ap, wa wina ap, aik dona ap, ulamikak arye talye kanye bobuka winilamik ura, Lot arye Sodom mutuku batakuka biyuk. <sup>29</sup> Sik talye mangkau kanye bobuka ulamik ura, Lot arye Sodom mutuku batakuka biyuk sum ara, Allah arye uku buk ap, keil lyein ap, im deice arye dopkwetebuk ura, Sodom mutuku ap, aninye ap dibuk.

<sup>30</sup> Sik talye mangkau kanye bobuka ulamik ani, uku im deice arye dopkwetebuk ura, aninye minpola dibuk atonun, na Ninye Mi Koprop Atonunye yanamne talak ara, atonun kum bikmace talak talye karen arye minpola tukwak mutuku tamubuka yanamne. <sup>31</sup> Na yanamne talak ara, anggun aik kopropa kum unmamunye nang ara, aik fum batakumamunye ning tamubuka kum dolbinamlume. Tonda atalak anggun wa winmamunye nang ara, anggun ning aik deipmamunye ning ara, tamubuka aik fum deipmamunyak kum dolbinamlume. <sup>32</sup> Anggunda, moubuka tenenammlulume. Lot el kil ara, Sodom mutuku batakuka, bisik banmokani, 'Na Sodom mutuku tamubuka binun do?' tenen, tamubuka dinmok ura, keil garam atonun ubuk akarye, taiya darabuke. Yesus arye ayupu nirya nyabuk.

<sup>33</sup> Nyabukce, ayupu ton dukdongobuka nyabuk. Aning atonunuk, yata nang do nirya, sik ning atibuk, 'Aning mambul' tenen, sik pataplye ninguk tenebuka, aning uk talibuka winilamice ani, 'Yesus el mapu danana ara, nun like' tenen, bataknice nang ara, aminyan sirya talak ara, Allah arye ato ninye weneplye, oplye ura, dibikiryte, tuba, el ap kam fia kum unamake. Uku din mutuku uk unamake. Bukni, yata ninye nirya, 'Nun koprop ning ap, nun patapsilye ning ap, aning uk mambul' tenena kum aryuk, na yupu uk kekebuka, 'Aning ara weik mambul' tenen, dobolyanganamak ninye ara, aminyan ara sik nong dipnamak bukni, Allah ap neika fia kam unamake.

<sup>34</sup> Winipmanto yupu winilye nyapnusine. Na tamubuka yanamne talak, alukunyan ara, ninye bitinye tonok amsuna mapmarice ani, tonye batakliryte, tonye dem Allah arye doproprnamle. <sup>35</sup> Tonda, atalak ara, kilapu bitinye arye duk ning el si ara yakong teikinmarikirye din ning kintinilinmarice ani, ton kil batakuka, ton kil uk Allah arye doproprnamle. <sup>36</sup> Tonda, atalak ara, ninye bitinye wa winmarice ani, tonye

bira batakuka,<sup>d</sup> tonye dem Allah arye doproprnamle. Yesus arye el mapu ati nyabuk.

<sup>37</sup>Yesus arye nyabuk ura, el mapu arye tamubuka asipdeyik. “Naio, anyapmasilam yupu ara, dan mutuku arye winipnamsil do,” nyabuka asipdeyik ura, Yesus arye tamubuka nyabuk. “Oltakna ning oploplye ura, lyulamirye tong nyalamlyak kata, dei bum weika arye amulamlye ura, ninye arye, ‘E lyun ning anye,’ tenelamak atonun, na yanamna ara, lake yanamna ati, ‘Oyanmal do, ayanmal do?’ kum tenenamnulume. Lakak upnamle ati ara anggunce biknalumca,” Yesus arye nyabuk.

**Tonok youwak kil arye batakna kumce, Allah ati fia morolamuk yupu**

**18** <sup>1</sup>Yesus arye, ‘Na mapu ara, batakna kum arye Allah morona uk unamak,’ tenebukce, ‘Winipmanto yupu nyapnye ura kel biknamak,’ tenebuk ati ayupu nyabuk.

<sup>2</sup>Tonok asik dolamik noutam ninye yupu bokolina deiyoknye ulamuk. Anye bira, Allah dib kum teneyamuka anye arye Allah el si kum erelamuk. Tonda yuk nang ati, bico fia kum tenelamuk. <sup>3</sup>Aning winilamuk ura, anyasik noutam ara, youwak kil tonok ulamukce, ayupu bokolinanye ati, fia morolyangalamukce ayupu nyalamuk. “Yuknye birye malye ubuka deipnuka ati, ance yupu lipsisikuka bokeipnutume,” nyabuka tuba-tuba morolyangalamuk.

<sup>4-5</sup>Asum-asum nirya ayupu uk nyabuka morolyangalamuk ura, ayupu bokolinanye birye, “An yupu kum bokeipnukine,” nyabuka batakalongolamuk. Winilamuk ura, sirya ara, anye birye nyabuk. “Allah diba kum tenenirye, yuk nang ati bico kum tenenun bukni, ayowak kil batakna kum arye, fia tuba-tuba morolyangana uk unilya ati, el ti yupu lipsisikuka bokeipnamne. Elda fia morolyangana uk unilyebuk, lik unilya ati, winira el yupu bokeipnamne,” nyabuk.

<sup>6</sup>Yesus arye winipmanto yupu nyabukop ura, ayupu tonap dukdongobuka nyabuk.

“Ayupu bokolina deiyoknye diksukum kum ulamuk bukni, sirya talak nyabuk ning ara, moubuka tenenammlulume. <sup>7</sup>Allah arye wibuka deiamuk ninye ati, yuk nang arye sik nong deice ikin ning weik delilamikce ura, sik yu nang ati, Allah el mapu arye, ‘Nun Ni Allah arye yupu lipsisikuka bokeipsilirye, telebuk keipnamsile’ tenen, kiting noutam babye, lukunyan babye, tuba-tuba morona uk unyake. Allah el mapu arye wininyaka ati ara, Allah arye sik pirinamle do? <sup>8</sup>Kume, na dipkoprop nyapsine. Allah arye el mapu anggun ikin upsilye ning ati, minopce yupu bokeiplirye,

<sup>d</sup> 17:36 *ton nang bataknamle* – Ayupu bitinye nyabuk ning deiyok ara ani. Ara, Yesus tamubuka yanamle talak ara, ton nang bataknamle bukni, diba tenen nang ara, doproplirye, im deice bobinamle. Ati winipmanto yupu winilye nyabuk.

teleb updeipnamle. Allah arye wininamlebuk, na ara, Ninye Mi Koprop Atonunye tukwak mutuku tamubuka yanamne talak ara, Allah ati diba tenenyak nang tuba aunmakibuk, eipnamne do? Ikin ati batakice ura, diba tenen nang kum dacak eipnamne do?” Yesus arye nyabuk.

**Allah arye, ton ninye ereipnamle, ton ninye ara,  
lungnupdeipnamle ati nyabuk yupu**

<sup>9</sup>Tonda, Yesus arye el yupu kekenmek nang ati, ayupu nyabuk. “Ton nang ara, sik kanye talima ak malye ning aupmalibuk, sikce sik bidamnang ati, nunda fia telebuk unyabe. ‘Nunda fia teleb nang bukni, yuk ninye nirya ara, malye nanguk unyake’ tenen, unyake. ‘Unyak nang ara, sik wininyak ning kel kipnulum’ tenen, winipmanto yupu nyapnusine,” Yesus arye el mapu ati nyabuk. Nyabukce ayupu ton nyabuk.

<sup>10</sup>Tonok talak ara, ninye bitinye, tonye bira, Farisinye ulamuk. Tonye bira, amutuku talinyak deiyok nang, Roma mutuku nang arina ati, pajak yo bok bulubuka delinanye malye winina weiknye ulamuk. Tonok talak aryuk, sik yuk-yukbuk, sik bitinye Yahudi yala ninye arye, ‘Allah el si erena ati, moropnunam’ tenen, Yahudi nang nirya Allah ati arilbalamikce el si erelbalamik aik birik. Birikce, sik yuk-yuk Allah moronmarik talak arye winiprik.

<sup>11</sup>Birikce, Farisinye tikukce, Allah moronmok noutam arye, elce winilamuk ning atibuk ayupu nyabuk.

“Na Ni Allah, yuk ninye nirya malye ulamak touk kum wininune ati, teleb nyapkine. Anang ara, wininyake. Ton ning ara, ‘Weika arye dopropronamap’ tenen, yuk nang tia ariamice ato kum bukni, weik tonap tabakuka tamu dolonyak nang unyake. Ton ning ara, fia malye-malye wininyak nang ap, sik domik kilapu kum bukni, talye kilapu yona nang ap unyake. Sik unyak atonun kum wininune. Tonda, otikmalnye yo bok boyangace buk, ubula dololamle atonun na ara, kum wininune.

<sup>12</sup>Na ara, an si erena ati, minggu tonok noutamak, liki bitinye sum deice arye din ning dini kumce si terbuka, nai Allah an ti morokunune. Tonda, na dololamne ning nirya bokuka, an ti tuba seper sepuluh<sup>e</sup> arikunune. Ara, yata ning do, nirya, sepuluh dopdopnyop ura, tonok bokuka arikunune,” Farisinye birye, Allah ati nyabuka morobuk.

<sup>13</sup>Farisinye birye nyabuka morobuk ura, ‘Amutuku talina deiyok nang arepnamne’ tenen, pajak yo bok bulubuka delinanye birye, mitikto yukak tikukce, ‘Na ara fia malinye’ tenen, mambul kanye bobuka, ‘Allah ulyak kum elinune’ tenen, gisok talipdanuka amnyok dunupdongobuka, Allah

---

<sup>e</sup> 18:12 *Seper sepuluh* nyabuk ning ara, seratus ribu (100.000) waptop ura, sepuluh ribu (10.000) ariptue. Sepuluh ribu waptop ura, seribu ariptue.

morobukce nyabuk. “Se, nai Allah, na ara fia malinye ununa ati ara, bita opnutum bukni, ‘Bico tenepnulumce bataknulumce, lyepnutum’ tenen, moropkine,” nyabuka Allah morobuke. Yesus arye nyabuk.

<sup>14</sup>Nyabukop ura, ayupu tonap dukdongobuka nyabuk. “Ara na dipkoprop nyapsine. Allah arye pajak ayo bok bulubuka delina deiyoknye ati, el malye winin ning kum danibukce lyebuke. Allah arye tenebuk ning ara, anye bira akunum lyepnye ura teleb upnamle, tenebuk. Bukni, Farisinye ati ning ara, Allah arye kum lyebuk. Allah arye tenebuk ning ara, ‘Anye bira, na ara telebnye, tenebuka ati, kum lyepnamne,’ tenebuk. Aning ara, talye ati kume. Yata ninye do nirya, sikce sik bidamang ati, kanye erebuka unyak nang ara, Allah arye anang ara amuak du deipnamle. Bukni, sik kanye talima lamapdongobuka amuak unyak nang ara, Allah arye ereipnamle.” Yesus arye el yupu kekenmek nang ati nyabuk.

#### **Yesus arye el mapu koprop ati nyabuk yupu**

<sup>15</sup>Yuk talak ara, ‘Yesus el taruk sik nong deice deiplirye, teleb updeipnamle’ tenen, sik ni yape ap, sik nin yape ap, sik mitik mapu weika arye Yesus dam boyayik. Boyanganmek ura, Yesus arye wipdeibuk ura el yupu kekebuka melibuka balamik nang arye, amapu sik ni yape ap, sik nin yapu ap ati, “Mapu boyangana bataklulume,” nyabuka, yupu sekenmek. <sup>16</sup>Yupu sekenmek bukni, Yesus el mapu ati wabukce, ayupu nyabuk.

“Mitik mapu ara na dam yanganmaka ara, telebe. Sik amapu ati yupu sekenmaluma ara, meme. Allah lyeplirye talibuka, Allah el mapu unamak nang ara, amitik mapu atonun unyak nang uk, Allah el mapu kipnamake. <sup>17</sup>Na dipkoprop nyapsine. Amapu arye talye lukdanuka diba tenebuka unyak touk kum unyak nang ara, Allah diba kum teneptinga ati, Allah ninye lyeplirye kanye talima talisilya ara, kum dolonamake. Ato ninye ara, Allah arye kum dopdopnamle anye arye kum lyeplie ura, sikda im deice kum weknamake,” Yesus arye nyabuk.

#### **Bona weik talinanye tonok Yesus dam yayukce nyabuk yupu**

<sup>18</sup>Yesus arye amapu ati Allah akunum morobukop ura, sakwetebuka bayuk ani, tonok bona talinanye birye Yesus ati asipdeyuk. “Naio, anda, peterena telebnye ulyama ati ara, yata teleb fil doptinyeba Allah lyepnutu deice arye, bol koplobuka fia kam una deiyok ning doproptinye do?” nyabuka asipdeyuk. <sup>19</sup>Asipdeyuk ura, Yesus arye tamubuka nyabuk. “Mutuku sirya im sirya nirya unyak ninye ara, tonok nang babye, teleb nang ton kum unyake. Allah el tonokuk telebnye ulula ati ara, yata ati, ‘Telebnye,’ nyapmanilam do? <sup>20</sup>Allah arye, ‘Winipnamlulume, anye kum winipnamlulume,’ nyapdeibuk ura, Musa arye sekamuk yupu noutamak mem yupu ubuk ning ara, anda akunum kel kilyame.

‘Ara, kil talye-talye yona meme. Ninye talye oltakana meme. Ubula dolona meme. Yuk nang ati, ubula kisina meme. Anggun ni yapu ap, anggun nin yapu ap ati, bico tenebuka kinamlulume,’ nyabuka sekeiyamsuke. Musa arye sekamsuk yupu<sup>f</sup> ara nyapkine,” Yesus arye bona weik talinanye bitu nyabuk. <sup>21</sup>Nyabuk ura, bona weik talinanye birye tamubuka nyabuk. “Naio, an nyapmanilam yupu ara, na mitik talak arye kekelamsirye winilamse,” nyabuk.

<sup>22</sup>Nyabuk ura, Yesus arye anye bitu tamubuka nyabuk. “Aning ati ara, ‘Diksukumuk utinye’ tenen, patapkilyop ura, na arye nyapnukin ning, bataklum ning ara, winipnululume. Talyamlum ning dekuka bona utotoa talina kumnye aripminyop ura, Allah arye teleb ning, im deice deipkilye ura binuka dopdopnalame. Bona utotoa talina kumnye akunum aripminyop ura, na yupu kekebuka dobolyanganamlyame,” Yesus arye nyabuk.

<sup>23</sup>Yesus arye ayupu nyabukop ura, bona weik talinanye urasin yuprobukce, malye kanye bobuka, dei amua langapdongobuk. Anye bira aning-aning weika arye talyamuknye binya arye, ‘Anyapnil ning ara kum winiptinye’ tenen, malye kanye bobuka dei amua langapdongobuk. <sup>24</sup>Winibukop ura, Yesus arye anye binyak dipdeyukce ayupu nyabuk. “Allah arye ninye weik lyeplirye sik kanye talima taliplirye nyaplye ura, el amuak bukuka unamak nirya ara, bona weik talin ninye ara ikin uplibuk, kanye imun aryuk kekenyake. Ara, bona weik talin nang arye, sik talinyak ning deice, sik kanye delinyaka atia.” Yesus arye nyabuk.

<sup>25</sup>Nyabukce, ayupu ton dukdongobuka nyabuk. “Ara, winipmanto yupu nyapnune. Unta basam ara, nong weik basam bukni, weik unta basam ara, ongon butum wilamak yumce fum wekena ara kanam aryuk wektue. Bukni Allah arye ninye lyeplirye sik kanye ap, talima ap, taliplirye nyapdeiplibuk, el mapu wininamak nirya ara, bona weik talin nang ara kanam aryuk kekebuka kum dobolbitinge. Ikin kanye bobuka unyaka deice arye, Allah el mapu ubikirye im deice banamake. ‘Ara, bona weik talin nang arye, sik talinyak ning ati, nun bona ara fia teleb ning ati, mambul ning’ tenen, aning deice sik kanye delinyaka atia,” Yesus arye nyabuk.

<sup>26</sup>Nyabukop ura, Yesus el yupu kekenmek nang arye, ‘Se,’ tenebuka, Yesus ati asipdeyik. “Aning ati ara, Allah arye yatato ninye lyeprnamle do?” nyabuka asipdeyik. <sup>27</sup>Asipdeyik ati, Yesus arye tamubuka nyabuk. “Ninye mikip deice arye ninye kum lyeprdatinge. Bukni, ninye arye kum winipmanto ning nirya ara, Allah elcuk, kanam arye winilule. Ati Allah arye lyeprnamle ninye ara kanam aryuk lyeprnamle ati, ikin kum uptue.

---

<sup>f</sup> 18:20 Musa arye sekamsuk yupu – Ayupu ara, Ulangan 5:16-20; Keluaran 20:12-16 daupmale.



Aning-aning nirya, Allah el mikip deice aryuk kanam uk winilule. Ikiné kum uptue,” Yesus arye nyabuk. <sup>28</sup>Nyabuk ura, Peterus arye tamubuka nyabuk. “Naio, an melina ati, nun talyamubu ning nirya batakuburye, an yupu kekebuka dobolyangakinyabe,” nyabuk.

<sup>29</sup>Nyabuk ura, Yesus arye el wipdeiamuk nang nirya ati nyabuk. “Na dipkoprop nyapsine. Yatanye do, yata kil do? Allah arye sik lyebuka sik kanye talima talibuka, Allah el bisik dobolbana ati, sik min arye talilamice ning batakikirye, na yupu kekebuka, na balye tam dobolyangalamice ninye ara, sikce batakice ning atonun ning yupa weik, atalak noutam uk dolonamake. <sup>30</sup>Ara, sik ulamice mutuku ap, sik aik ap, sik weit yapu ap, sik du yapu ap, sik nin yapu ap sik ni yapu ap, sik bidamang mapu ap, anirya batakklamik ning ati ara, atalak noutam uk aning atonun ning, yupa weik dolonamake. Tonda, aminyan yanamle talak ara, kam fia un ning doprobikirye fia kam unamake, nyapsine,” Yesus arye nyabuk.

**Malye winin nang arye Yesus opnamika ati,  
Yesus arye laka nyabuk yupu**

<sup>31</sup>Amenyan ara, Yerusalem mutuku binameka ati, yuk nang ara batakukabukce, elce wibuka deiamuk nang, obarye 12 nanguk dobuka yukak biyukce ayupu laka nyabuk. Ara aminyan winipnamik ati, laka nyabuk. “Nun nirya Yerusalem mutuku welebibyop ura, na ara Ninye Mi Koprop Atonunye ati, Allah yupu laka nyalamik nang nabi-nabi nang arye nyalamnik touk winipnamniyake.

<sup>32</sup>Na yukubuka bobinicop ura, Allah arina ati deiyok nang ap, Musa sekamuk yupu peterena deiyok nang ap arye, ‘Opsululume,’ nyabuka, Yahudi yala kum nang amutuku talina ninye deiyok nang ati aripnamniake. Aripnicop ura, nong bol deice nalibuka lyek-lyek ana ap, si maka tuluna ap, kama nong deice ona ap, winipnikiryé, na nong dobuka wanwanun yo deice arye opnamniyake. <sup>33</sup>Opnicop ura, dipmanya ani, like winilye sum akunum upnyop ura na Ninye Mi Koprop Atonunye birye tamubuka kam bunamne,” Yesus arye nyabuk. <sup>34</sup>Yesus arye nyabuk bukni, el mapu obarye 12 nang ara bita kum kekebik. Ara, Allah arye Yesus nyanmok yupu duknubuka ati, Yesus ayupu nyanmok talak ara, ‘Deiyok ani,’ kum tenebik.

**Yesus arye asing kuamuknye lapdeibuk yupu**

<sup>35</sup>Yesus arye nyabuk ura, sik nirya amutuku batakuka, bisik mapnin balamika ani, Yeriko mutuku asik dolamik dam, Yesus ap, yuk ninye yupa weik ap, banmek. Banmekani, asing kuamuknye, sik banmek bisik lilun ulamuk. Ulamukce, abisik banmek nang ati, ‘Yo bok talye ton arinamiyak’ tenen, moronmok. <sup>36</sup>El aulamukce moronmok talak ara, Yesus ap,

banmek nang ara, ninye yupa weik banmeka ati ara, lelim kekebukce, 'Yata ning ati, banmak do?' tenebukce, asipdeyuk. <sup>37</sup>Asipdeyuk ura, yuk nang arye, "Yesus Nasaret mutukunye yanganmale," nyabik.

<sup>38</sup>Nyabik ura, kekebukce weik yupu arye nyanmok. "Yesuso, anda Raja Daud el yala nang arye deipkiknye<sup>g</sup> ati ara, na bico tenebuka melipnilyame," nyabuka moronmok. <sup>39</sup>Nyabuka moronmokani, sik menekuka banmek nang arye, "Moronmalama ara meme," nyabuka yupu sekik. Yupu sekik bukni, 'Elce Yesus arye kekepnunil' tenen, weik arye tonap, ngalukukce ayupu nyanmok. "Anda Daud yala nang arye deipkiknye birye, na ti bico tenebuka melipnilyame," nyabuka weik arye moronmok.

<sup>40</sup>Moronmok ura, Yesus banmokani, kekebukop ura, abinuka tikukce, aunmek nang ati, "Anye bira dobuka na dam boyalulume," nyabuk ura, boyayik. Boyayikop ura, asing kuamuknye biti, ayupu nyabuk. <sup>41</sup>"Anda, 'Yata wiripdeipnutu' tenen, patapmakil ati, moronmanilam do?" nyabuk. Nyabuk ura, asing kuamuknye birye tamubuka nyabuk. "Naio, na asing arye aning-aning elina ati, 'Kwetepnutum' tenen, patanmanil ati moronmakine," nyabuk. <sup>42</sup>Nyabuk ura, Yesus arye anye biti, ayupu nyabuk. "Ance na ti, diba tenepmanilama deice arye, an asing lapdeipkine," nyabuk. <sup>43</sup>Yesus arye ayupu nyabuk ura, atalak aryuk, el asing teleb ubuk ura, aning-aning nirya eibukce, Yesus bisik banmok ati, anye birye aminyan banmokce, "Allah ara fia teleb," nyabuka Allah si erenmok. Yesus arye anye bira el asing lapdeibuk ati, el ap banmek nang nirya eibikce, sik babye, "Allah el fia teleb", nyabuka el si erenmek.

### Yesus ap, Zakeus ap epdarik yupu

**19** <sup>1</sup>Yesus arye asing kuamuknye lapdeibukce, Yeriko mutuku asik dolamik noutamak banmok. <sup>2</sup>Yeriko mutuku banmok talak ara, tonoknye el si ara, Zakeus elce amutuku talyamik nang Roma mutuku nang ati, pajak yo bok bulubuka delina deiyoknye ulamuka ati ara, fia bona weik talinanye ulamuk.<sup>h</sup> <sup>3</sup>Yesus yanganmok talak ara, Zakeus

---

<sup>g</sup> 18:38 *Daud yala nang arye deipkik* – Asing kuamuknye birye, 'Daud yala nang arye deipkiknye' nyabuknye ning ara, urdem ati kum nyabuke. Sik Yahudi yala nang arye, 'Aminyan talak, Daud yalanye, nun Lyena Deiyoknye unamsile,' tenelamika ati, anye birye, Yesus ati diba tenebukce ayupu nyabuk. <sup>h</sup> 19:2 *Pajak delin nang* – Roma mutuku nang arye yudea mutuku nirya talyamika ati, sikce nyapdeibikba, amutuku noutamak ulamik nang arye sik Roma mutuku deiyok nang ati yo bok talya arilamik. Sik arilamik yo bok ara pajak nyalamik. Yudea tam ninye arye pajak yo bok arilamikba, ayo bok bulubuka delina deiyok nang arye, ayo bok bulubuka Roma deiyok nang ati arilamik bukni, sik bidamnang arye, 'Yo bok ton tabakuka aripsululume,' nyabuka ubula dololamik. Ati ara ubula dololamikce bona weik nang ulamik. Ati ara amutuku noutam ulamik ninye nirya arye, sik pajak yo bok dololamik nang ati, 'Anang ara nun like,' tenelamik.

kekebukce, ‘Na ton eipnune,’ tenebuk ura, tikuka dipdeyukce, Yesus ap melibuka yanganmek nang ara, ninye weik langdipdanmek ati, kum eipmanto ubuk. El Zakeus ara, fia bumang anyapce, anang deice kum eipmanto ubuk.

<sup>4</sup>Kum eipmanto ubuk ati, Zakeus minopce menekuka bik-bik abuka biyukce, ‘Yesus eiptinye’ tenen, yo dup welebuka tikukce, Yesus yanuyuk bisik ati dinmok. <sup>5</sup>Dinmok talak ara, Yesus banmokani, Zakeus welepmok yo deiyok dam biyukop ura, erebuka yo dup eidipdeyukce, “Zakeus eitismokak eibuk ura, Zakeus anda adip aryuk kolukuka yalyame. Kolukuka yaminye ura, an ap, na ap an aik mapnaname,” nyabuk. <sup>6</sup>Nyabuk ura, Zakeus kekebukce, adip aryuk kouluka yayukop ura, Yesus ati kanye deibuka, el aik birik.

<sup>7</sup>Sik bitinye nang neik aik birikop ura, abisik banmek nang nirya eibikce, yuprobik akarye ayupu nyanmek. “Anango, Yesus ap, afia malinye ap, birak ara, yata ati do?” nyanmek. <sup>8</sup>‘Anye bira, fia malinye aik binmale’ tenen, nyanmek ura, Yesus ap, Zakeus ap, aik birikop ura, Zakeus arye Yesus ati ayupu nyabuk. “Se naio, na fia malye ulamse ning ara akunum batakne. Winitalak ara, na talinye ning nirya bokuka noutam dopdopnirye, talye bona utotoa talina kum ninye ati arinamne.

Tonda, yuk nang yo bok ubula dololamse, atonun kume, tonap tabakuka arinamne. Ati, tonok dopromsinye bira, dum barye aripnamne. Dumbarye dopromsinye bira, takudekin 16 aripnamne. Aning atonun, na ubula dopropse atonun, sik yo bok dololamse nang nirya ati, tabakuka yo bok empat kali arye tamubuka aripnamne.” Zakeus arye Yesus ati nyabuk.

<sup>9</sup>Nyabukop ura, Yesus arye Zakeus ati nyabuk. “An apu kopropa Abraham arye, Allah yupu kekelamuk touk, arup ara na yupu kekebuka diba tenepmanilama ati ara, arup ara an malye winiminye ning nirya, Allah arye kum danipkilye, akunum lyepkile. <sup>10</sup>Na ara Ninye Mi Koprop Atonunye birye, ‘Allah diba tenena kum nang ati, eibuka lyepnamne’ tenen, na yase. Aning ati ara, arup ara Allah arye an ti akunum lyepkile,” Yesus arye nyabuk.

**Winipmanto yupu deice arye, “Tonok deiyoknye bira, el fil dolamik nang ati, yo bok weik aribuke,” nyabuk yupu**

<sup>11</sup>Yesus aunmok talak uk, Yerusalem mutuku dam binmoka anye arye, el yupu kekenmek nang nirya arye, Allah aning-aning nirya malye kibuka taliplirye, ‘Israel ninye nun weik ninye deiyoknye upnamsil’ tenen, ‘Talinamle talak adip aryuk upnusile, akunum dam uple,’ tenenmek. Utenenmeka ak bikuk ati, Yesus arye winipmanto yupu ton dukdongobuka nyabuk.

<sup>12</sup>Tonok talak ara, ninye yala deiyoknye, el amutam tuba ulamuk talak ara, utenebuk. ‘Yuk karin mutuku binyop ura, omutuku ninye arye,

'Nun raja unamsil' tenen na ti, ninye deiyoknye una ati, erepdeipnice ura, tamubuka na mutuku yanirye Raja unamne,' tenebuk. Utenebukce, el fil melin nang nirya ati yukubuk. <sup>13</sup>Yukubuka ati yayikop ura, el fil melina nang taku barye nang ati, weik yo bok talen ning<sup>i</sup> taku barye (10) yuk-yuk aribuk. Aribuk ura, sik tonok-tonok arye weik yo bok tonok<sup>j</sup> doprobik. Aweik yo bok taku barye (10) kibuka sik yuk-yuk aribukce, ayupu nyabuk. "Na yuk mutuku binamne talak ara, ayo bok deice arye, fil donamlume," nyabuk. Nyabukce biyuk.

<sup>14</sup>Bisik banmok talak ara, el amutam ulamik nang, yuk talya nang arye, ninye wibuka deibik ura aRaja unamuknye biti laka nyalbiyik. "An Raja una ati, erepdeipnukiyak bukni, 'Anda nun weik ninye deiyoknye Raja unamsilama ara, nun like,' nyalyanmakiyabe," nyabik. <sup>15</sup>Nyabik ura, bisik yanganmoknye bira, akaren mutuku akunum yayukop ura, amutuku ninye arye anye dobuka weik ninye deiyoknye, Raja una ati, erepdeibik ura Raja kibuk. Raja una ati erepdeibik ura, anye bira el mutuku kopropa tamubuka biyuk. Biyukop ura, el weik yo bok aribinamuk ura, fil dolamik nang ati yukubuk. Ara, na aribinamsise ura, 'Fil dopluma deice arye, yo bok ton tabakuka deipnamnulume,' nyamse touk, 'Upmaniyak do?' tenen, asipdeyuk.

<sup>16</sup>Asipdeyuk talak ara, minopce yayuknye birye ayupu nyabuk. "Naio, ance weik yo bok tonok aryamnulum ak, fil dolamsa deice arye, taku barye ton tabakuka deipmakine," nyabuk. <sup>17</sup>Nyabuk ura, aweik ninye deiyoknye birye el fil donanye biti, tamubuka nyabuk. "Anda, fil fia teleb ubuka dopnulume. Mitikanun uk aryamkisibuk, fil merekuka dolamnuluma ati, winitalak ara, weik asik 10 dokcak talibuka weik deiyoknye unamlame," nyabuk.

<sup>18</sup>Bitinye anye yayuk ura, aweik deiyoknye birye, atonun asipdeyuk. Asipdeyuk ura bitinye anye birye ayupu nyabuk. "Naio, ance weik yo bok tonok aryamnulum ak, fil dolamsa deice arye, weik yo bok 5 tonap tabakuka deipmakine," nyabuk. <sup>19</sup>Nyabuk ura, aweik ninye deiyoknye birye, afil donanye ati, tamubuka nyabuk. "Aning ati ara, winitalak ara, weik asik 5 dokcak talibuka weik deiyoknye unamlame," nyabuk. <sup>20</sup>Amenyan ara, yuk fil donanye yayukce ayupu nyabuk. "Kume, naio, an weik yo bok tonok aryamnulum touk, tamubuka yana deipkine. Aripnulung ura, adip aryuk ongon butum arye kitibuka moubuka deiamse touk tamubuka tonok ninguk boyakine. <sup>21</sup>Winyamsa ara laka nyapnukine.

---

<sup>i</sup> 19:13a *Weik yo bok* aribuka deiyok ara ani. Ayo bok tonok aribuk ning ara, wala winilye deice fil dobikirye, dolamaka atonun aribuk. Ati, 10 kibuka aribuk ning ara, wala 30 bulan deice fil dopting ura, gaji yo bok doproptinga atonun aribuk. Aning ara sik gaji dekna, kiting tamun bitinye ap, noutamak tonok tonap, tabuka tonak sum arye aribuk. Ayo bok ara, dekna fia weike. <sup>j</sup> 19:13b *weik yo bok tonok* – Ayo bok tonok aribuk ning ara, wala winilye deice fil dobikirye, dololamaka atonun 10 kibuka aribuk.

Ara, anda, yu weiknye ati, na lilil upnuk ura, talye moubuka deiamse. Anda moubuka kum deiplum ning bukni, talye lukdanuka dolona uk ulyame. Tonda, ance kum kouamlum ning bukni, anda talya libuka dilyama ati, ‘Na deiyoknye birye wenepnilyak’ tenen, lilil upnuk ati, an yo bok tonok kitibuka tenepce deipse,” nyabuk.

<sup>22</sup>Afil donanye birye nyabuk ura, aweik deiyoknye birye anyanmuknye biti, tamubuka nyabuk. “Anyapmanilama ati, an nyapmanilam yupu deice arye yupu bokeipnukine. Ance na ti, ‘Elda yunye ulirye, moubuka minop deibuk ning ara, talye lukdanuka dololule. Tonda el minop koubuk ning ara, talye lukdanuka libuka dilule,’ nyanmanilame. <sup>23</sup>Aning ara, akunum kel kipnuluma ati, na weik yo bok aryamkisibuk, fil teleb ubuka dona kum arye, ton tabakuka kum deipmanilama ara, yata ati do?” nyabuk.

<sup>24</sup>Nyabukop ura, el dam tikinmek nang ati, ayupu nyabuk. “Anye bira aripse yo bok, tonok weik yo bok ara, dopropmunce, arup weik yo bok 10 aripmanilanye binyak arilbilulume,” nyabuk. <sup>25</sup>Nyabuk ura, ayupu kekenmek nang arye tamubuka nyabik. “Winipnuyap bukni, anyapmasilamnye bira, weik yo bok 10 akunum upmala ati, yata ati do?” nyabuka asipdeyik. <sup>26</sup>Asipdeyik ura, aweik ninye deiyoknye birye tamubuka nyabuk.

“Na dipkoprop nyapsine. Yata nang do niryia, aning weikanun uplinye bira, Allah arye weika arye tonap ariplibuk fia weik upnamle. Bukni, aning mitikanun uk uplinye bira, Allah arye el mitikanun wamlye ning babye, doproplye ura, talye nong dem unamle. <sup>27</sup>Bukni, ‘Anye bira, nun weik ninye deiyoknye Raja kum unamsile,’ tenepnikce, ‘Anye bira, nun like,’ tenelamnik nang ara, na dam boyanumunce, oplopmunyop ura eipnune. Aninye deiyoknye birye el fil don nang ati nyabuk.” Yesus arye nyabuk. Yesus arye awinipmanto yupu nyabuk ura, el ap unmek nang arye kekebek.

### **Yesus arye Yerusalem asik dolamikak wekuk yupu**

<sup>28</sup>Yesus arye ayupu nyabukop ura, Yeriko mutuku batakuka ‘Yerusalem mutuku binamap’ tenen, Yesus ap, el mapu ap, bisik mapnin balamik. <sup>29</sup>Bisik mapranin balamika ani, asik dolamik asik si ara, Betania asik ap, Betfage asik ap mapnin balamika, ani Zaitun mutuku dup welepnyuyik talak ara, el mapu bitinye nang ati nyabuk.

<sup>30</sup>“Ortam mutuku birumunce, asik dolamikcak anyuk birumunye talak ara, keledai basam mitik ning kirikdeipmacak eipdumunye ura, tapu kirikdongomica ara lobuka, el ngang kirikuka boyanururume. Amitik keledai basam ara, ninye bukuka kum balamikirye, anyuk weilamice keledai basam dobuka boyanururume. <sup>31</sup>Winirumunya ak, yuk nang eipsikirye, ‘Yata ati wininmarum do?’ nyabuka asipdesicop ura, anggunce tamubuka nyapnamrurume. ‘Nun ni Yesus patapmala ati, bobiname,’ nyapnamrurume,” Yesus arye abitinye nang ati nyabuk.

<sup>32</sup>Nyabuk ura, asik dolamik noutam birikke, Yesus arye, “Winipnamale, aning eipnamarurume,” nyapmok touk anirya winibuk. <sup>33</sup>Mitik keledai basam kirikdeipmeka eprikce, binuka lolorik ura, akeledai basam deiyok nang arye nyabik. “Amitik keledai basam lolonmaruma ara, yata ati do?” nyabuka asipdeyik. <sup>34</sup>Asipdeyik ura, sikce “Nun ni kopropa Yesus patapmala atia,” nyaprik. Nyaprika ati, atikmek nang arye mangkau kibukik ura, sikce lobuka bobirik.

<sup>35</sup>Lobuka bobanmarik ani, Yesus dam bobirik ura, sik nong deice ongon butum kwiribuka keledai basam balye deice yangabuka deibik ura, Yesus adeice bukukop ura bobiyuk. <sup>36</sup>Yesus ara Yerusalem mutuku bisik keledai deice bukuka banmok ura, ton nang ara, ‘Yesus si erepnuyap’ tenen, winibiksik deice ongon butum kwiribuka Yesus yanibuka yanamokak yangabuka delinmek. <sup>37</sup>Yesus bisik banmokani, Zaitun mutuku kolukuka bana ati, bisik bokolanak biyuk talak ara, Yesus ati diba tenebikke melibuka banmek nang nirya ara, Yesus arye ninye winipman kumto fil weik dolamuk ura elilamika ati, kanye deibuka Allah si erenmekce, ‘Yesus ara, nun weik ninye deiyoknye Raja kipnamsil’ tenen, ayupu weik arye nyanmek. Ara, Allah yupu laka nyalamik nang nabi nang minop arye sekamik yupu dobuka nyapra banmekce, weik yupu nyanmek. Nyanmek yupu ara ani.

<sup>38</sup>“Allah el mikip ap, el si ap deice arye yanmalanye, ninye deiyoknye bira, Allah weik arye meliplibuk, telebuk unamle.<sup>k</sup> Anye bira weik mambulnye binya arye, ‘Im deice ara, Allah ati si erena ap, fia teleb una ap, dirina weik ulina ap, unamle’ tenen, Allah moropmabe,” nyabuka weik arye nyanmek.

<sup>39</sup>Ayupu nyanmek ura, sik Farisi nang kekebikke, Yesus ati ayupu nyabik. “Ance an ap melibuka yanganmak nang ara ayupu nyanmak ati, weneplyame,” nyabik. <sup>40</sup>Nyabik ura, Yesus arye aFarisi nang ati tamubuka nyabuk. “Ayanganmak nang arye tunimabicop ura, talye aupmal keil ara yupu weik arye nyapnamake,” nyabuk. <sup>41</sup>Yesus arye ayupu nyabukce, bisik banmokani, Yerusalem mutuku asik dolamik dam biyukop ura, amutuku dipdeyukce, bico ubuk ati, engenmok deice arye ayupu nyabuk.

<sup>42</sup>“Se, anggun Yerusalem mutuku noutam ululum nango, Allah ap, ninye ap neika una ati, ninye lyebuka teleb updeipmanto ning diba tenebuka kel kipmatumto ura, Allah arye akunum lyepsutubuk, anggunda, kel bikmanto kum nang ululume. Anggunce Allah ati, bataklum ati, Allah arye, ‘Anang kel bikicak’ tenen, adeiyok ning akunum dungnupmasila ati, ninye lyena deiyok ning kel kum bikmalume. <sup>43</sup>Anggunda bicoe, aminyan talak ara, anggun olyanamsiak nang arye,

<sup>k</sup> 19:38 Ayupu ara Mazmur 118:26 aupmale.

anggun asik noutamak doplumce, dana-dana doplum poka ara, apoka buru tam arye, yo ap, keil ap, tuku ap, deipnin yanganmaca ani, poka deice tam uplyop ura, poka kaplibuka aik fum wekikirye opnamsiake. Danatam babye, danatam babye, kalikuka unamaka ati, anggunce yukak kum binmanto ubnaluma ati, anggun olan nang arye oplopnamsiake.

<sup>44</sup>Anggun opnamsiak talak ara, anggun wisi ninye ap, anggun mapu nirya ap, yan bulbul talibuka tuku deice pouklopsice ura, gisok cobuka kwisi yunga lubuka binamle. Tonda anggun asik dolamlum keil nirya ara, uluplobice ura, yuk-yuk dabindaknamle. Tonok babye, ton nirya fia kum upnamle. Ara ‘Allah arye aninye lyepnamne’ tenen, lo aryamsuk talak ara, kel bikna kumce talya ululuma ati nyapsine,” Yesus arye Yerusalem ninye ati nyabuk.

**Yahudi yala nang Allah ati arilbalamikce el si erelamik  
aik fumbisik Yesus arye winibuk yupu**

<sup>45</sup>Amenyan ara, Yesus arye Yahudi yala nang Allah ati arilbalamikce el si erelamik aik dam biyuk. Tikilbiyukce, Yahudi yala nang, ‘Nun malye unyap ning Allah kum daneipsilirye lyepnamsile’ tenen, kam ning obuka Allah arilamik ning, ining ning dekenmek nang ati, Yesus wabukce yakuka buru tam dopkwetebuk. <sup>46</sup>Wininmok talak ara, aunmek nang ati, ayupu nirya peterenmok. Allah arye nyapdeibuk ura, nabi Yesaya arye sekiamuk yupu ara kum tenelulum do? Ayupu ara ani.

‘Allah arye, na aik ati, “Ninye mutuku-mutuku nirya Allah ati moronyak aik atia,” nyanamake, nyabuk.’ *(Yesaya 56:7)*

Tonda, Yesus arye ayupu nyabuk. “Allah arye nyapdeibuk ura, Yesaya arye, anyapmasin yupu sekamuk bukni, ayupu ton aubuke.

‘Allah arye, na aik bukni, anggunda, ubula nang arye ubula dobuka dungnulamak aik atonun, akunum updeipmalume.’ *(Yeremia 7:3)*

Nabi Yeremia arye nyamuk yupu dobuka nyapsine,” Yesus arye nyabuk.

<sup>47</sup>Yesus asum arye deiyok koubukce, dosum nirya ara, Allah ati arilbalamikce el si erelamik aik dam ulamukce, Allah yupu peterelamuk. Peterelamuk bukni, Allah arye, ‘Aning wininamlulume, aning ara kum wininamlulume,’ nyapdeibukba, Musa sekamuk yupu, peterena deiyok nang ap, Allah arina ati, weik deiyok nang ap, yuk talye weik deiyok nang ap arye, Yesus winilamuk ning ati, elilamikce, yu weik ubuk ura, ‘Dan talak arye Yesus ati oploptibye do?’ tenen, yupu sisiklamikce pirildelamik. <sup>48</sup>Pirildelamik bukni, atalak ara Yesus nyanmoka, kekenmek ninye nirya arye, el yupu moubuka kekenmekce, Yesus ati, fia kanye deipmeka ati ara, amalye nang arye Yesus opmanto kum ulamik.

**Yahudi yala deiyok nang arye, “Yesus ara, yata deiyoknye  
birye nyapdeibuk ati fil dolul do?” nyabuka wenebik yupu**

**20** <sup>1</sup>Tonok sum ara, Yahudi yala nang arye Allah ati arilbalamik aik dam Yesus biyukce, peterenmok. Ara ‘Allah ninye weik

lyeplirye, sik kanye talima talinamle,' nyabuka, Allah el laka teleb yupu, peterenmok. Yesus arye peterenmok ura, Yahudi yala nang Allah arina ati sik ninye deiyok nang ap, tonda Allah arye, 'Aning ara wininamlulume, aning ara kum wininamlulume,' nyapdeibuk ura, Musa sekamuk yupu peterena deiyok nang ap, tonda Yahudi yala nang sik yupu bokolina deiyok nang wisi nang ap Yesus dam yayikce, 'Wenepnamap' tenen, asipdeyik. <sup>2</sup>"Yatanye birye yupu deiyok aripkuk ati, aning-aning niryra fil dolyam do? Tonda, yatanye birye weik deiyoknye una ati, erpdeipkuk ura, afil dolyam do?" nyabuka asipdeyik.

<sup>3</sup>Asipdeyik ura, Yesus arye tamubuka anang ati asipdeyuk. "Na arye anggun ti tonok ning asipdenamsine. Asipdesinyebuk, tamubuka nyapnumunyop ura, na fil donye ning, yupu deiyok aripnuknye bira, 'El si ara ani,' nyabuka, laka nyapnusine. <sup>4</sup>Yohanes arye ninye mek dongolamuk ning ara, Allah arye nyapdeibuk ura afil dopra ulamuk do? Talya ninye arye nyapdeiamik ati, ninye dobuka mek dongolamuk do? Anggunce na ti laka nyapnululume," Yesus arye nyabuk.

<sup>5</sup>Nyabuk ura, aYahudi yala deiyok nang arye, 'Yata yupu nyapnuyap do?' tenen, yupu talipdayik. Yupu talipdayikce nyapdayik. "Yohanes mek dongolamuk ning ara, 'Allah arye nyapdeibuk ura winilamuka,' nyabibyop ura, Yesus arye nun ti, 'Aning ati ara, Yohanes nyalamuk yupu ati diba kum tenelamlum ning ara, deiyok yata ati do?' nyabuka wenepsilyake. <sup>6</sup>Bukni, amutuku noutam unyak nang niryra arye, 'Yohanes ara, dipkoprop Allah yupu lak nyananye nabi ulamuk,' tenenyaka ati, 'Ninye arye,' nyabibyop ura, awekmak nang niryra kekepsikirye, yu uplibuk keil dobukapbikirye nun opsicake." Nyapdayikce, aYahudi yala deiyok nang arye ilil ubuk.

<sup>7</sup>Ilil ubuk ati, adeiyok nang arye, 'Duknubuka laka kum nyapnuyap' tenen, Yesus ati tamubuka talye yupu nyabik. Sikce nyabik. "Yohanes mek dongolamuknye deiyok ara, yatanye birye aryamukak afil dolamuk do nun walwale," nyabik. <sup>8</sup>Nyabik ura, Yesus arye tamubuka anang ati nyabuk. "Nun walwal nyapmanuluma ati, na fil donye ning deiyok yupu nyapdeipnuknye bira, el si laka kum nyapnamsine," nyabuk.

### **Wa tuku tia talibuka wilamik nang, sik malye winibik ning ati nyabuk yupu**

<sup>9</sup>Yesus arye, "Winipmanto yupu ton nyapnusine ati, kekepnuse," nyabukce, ayupu ton nyabuk. Ara Yahudi yala nang arye Allah ati arilbalamik aik dam Yesus tuba atikmok akarye, abulubuka wekmek nang ati, ayupu nyabuk.

Tonok talak ara, anggur duk mouamuka talyamuknye ulamuk. Anggur tapu kouamuk. Aning niryra akunum kintinibuka deibuk ura, 'Yuk nang arye awa ara tia talibuka fil donamake' tenen, yuk nang ati aribuk.



Aribukce awa deiyoknye bira pera yuk mutuku biyuk. Biyuk talak ara, utenebuk, ‘Kume, na anggur wa akunum li talak akunum uplye ura, anang arye anggur duk teikuka amek kwebuka dekikirye, aning pununa ati, yo bok aripnamniake,’ tenebuk. Utenebukce, awa deiyoknye birye pera yuk mutuku biyuk.

<sup>10</sup>Biyukce, daulamuka ani, anggur tapu duk ekna talak akunum ubuk ura, anggur tapu duk mek arye dekuka delice ning, ‘Yo bok ara aripnamnak’ tenen, el fil donanye tonok dobuka deibuk ura el anggur tapu duk wa tia dopromik nang dam biyuk. Biyuk ura, awa tuku tia talyamik nang eibikce, anye bira, el nong talibuka weika arye bokuka obik. Obikop ura, anggur tapu duk arina kumcuk, “An ni dam talye nong dem bindoplyam,” nyabuka dopkwetebik. <sup>11</sup>Winibikop ura, awa tuku deiyoknye birye, el fil donanye yuknye ton, ‘Anang dam binul’ tenen, dopdeibukce, “Bilyame,” nyabuk ura biyuk. Anang dam biyukop ura, anang arye anye babye, weik wenebikce, bokuka obik ura, anggur tapu duk arina kumce el nong demuk dopkwetebik. <sup>12</sup>Winibik ura, awa tuku deiyoknye birye, winilinye ton dopdeibuk ura, anye babye, atonun bokuka opnin balamikani, awa poka buru tam dopkwetebik.

<sup>13</sup>Winilamikani, sirya talak ara, awa tuku deiyoknye birye utenebuk. ‘Se, na yata wiripnamne do? Na mi koprop fia kanye dipsirye, bico tenebuka kanye talima arinunye bira, dopkwetepnibuk, anang arye na mi ara kibuka si erepnamak,’ tenebukce dopkwetebuk. <sup>14</sup>Dopkwetebuk ura, awa tuku tia talye fil dolamik nang dam yanganmokak, eibikce nyabik. “Awa tuku deiyoknye bira diplye ura, el punupnamlanye bira, ayanmal atia. Aning ati ara, nunce el opnamabe. Obibyop ura, awa tuku nun bidamang kipednamabe,” nyabik. <sup>15</sup>Utenebika ati, nyabikop ura, anye bira obikce, el nong ara awa poka domikak buru tam donokik.

<sup>16</sup>Winilamika ati, anggur tapu duk wa tuku deiyoknye birye, el wa dam tamubuka yanamle talak ara, el wa tia talibik nang ati, yata wiripnamle do, kume. Aminyan yanamle talak ara, awa tuku tia talyamice nang oploplirye, awa tuku dobuka yuk nang ati arepnamle. Yesus arye sik Allah arina ati deiyok nang ap, Musa sekamuk yupu peterena deiyok nang ap, sik awekmek nang nirya ap ati, adomon yupu nyabuk.

Yesus arye ayupu nyanmoka ati, ayupu kekenmek nang arye, utenebuk. ‘Se, anyapsil ning ara, talye ati kume. Ara, nun Yahudi ninye batakuka, Allah yupu dobuka Yahudi yala kum ninye ucak peterepra balibuk, diba tenebice ura, Allah arye sik ti el mapu kipdeipnamle,’ tenebuk. Utenebukce ayupu nyabik. “Se, ‘Allah arye anyapmasilye touk winipsilyak’ tenen, malye kanye bobape. Aning ara, kume,” nyabik.

<sup>17</sup>Nyabik ura, Yesus arye tamubuka anyanmek nang dipdeyukce, ayupu tonap nyabuk.

“Daud arye sekamuk buku noutamak sekamukak nyapnusin yupu ara, deiyok kum tenepmalumce nyanmanulum do? Daud arye domon yupu deice sekamuk yupu ara ani.”

Keil aik<sup>l</sup> dolamik nang arye, ‘Akeil ara malye keil’ tenen, bataki keil ara, abilinga dukulongonak delilamak keil, fia mambul ning ara,<sup>m</sup> akunum uple. (Mazmur 118:22)

“Ara, Daud arye sekamuk yupu akunum nyapsine,” Yesus arye Yahudi yala deiyok nang awekmeka ati nyabuk.

<sup>18</sup>Nyabukce, adomon yupu tonap, dukdongobuka nyabuk.

“Aning ati ara, na dipkoprop nyapsine. Yatanye do, anyapmasin keil deice sakuka poulyanamlaye bira, el nonge ap, taruk ap, yan ap, tonok-tonok sekuka yukak poulbinamle. Bukni, anyapmasin keil arye el nong deice sakuka teiklinye bira, el nong bol ton fia kum upnamle. But-buta atonun<sup>n</sup> uplopnamele.” Yesus arye aYahudi yala deiyok nang ati nyabuk.

<sup>19</sup>Yesus nyabuk ura, Allah arina ati deiyok nang ap, Musa sekamuk yupu peterena deiyok nang ap, sik nirya arye utenebik. ‘E, Yesus arye domon yupu deice anyapmasela ara, nun wana ati nyapmasile,’ tenebikce yu ubuk. Yu ubuk ati, ‘Yesus ara, yata wiribuka tapu kouptibirye, optibye do?’ tenen, yu weik ubuka ura, tenenmek. Utenenmek bukni, yuk nang arye Yesus ati, kanye deiamika ati, ilil ubuk ura bataki.

### Yesus arye Roma mutuku deiyoknye Kaisar ati pajak yo bok arina ati nyabuk yupu

<sup>20</sup>Ara yuk talak ara, Yahudi yala deiyok nang arye, ‘Yesus el yupu nyaptu deice arye malye uptue’ tenen, sikce yuk nang wibuka deibikce, ‘Yesus yupu kekebikirye, nun yanuka nyapnamsiyak’ tenen, ayupu maka meilbana ati dopkwetebik. Ara, ‘Yesus malye yupu nyaptu deice arye, tapu koubuka Gubernur dam bobibye ura, elce wenebuka opnamle,’ tenebika ati, anang maka meilbana ati, Yesus dam dobuka deibik.

<sup>21</sup>Dopkwetebik ura, adilban nang arye, Yesus dam biyikce, tenebuka ati, ‘Yesus talye asipdenuyapbuk, malye yupu nyaptue’ tenen, Yesus ati ayupu asipdeyik. “Anda peterenanye ulyamce, yupu

---

<sup>l</sup> 20:17a *Keil aik* dolamik ning ara ani. Ara sik mutuku ara, mok fia mitiktonunuk celamuka anya arye, yo ababye fia kum ulamuk. Yo ababye fia kum ati, weik pala keil dobuka yakuka dolamik. <sup>m</sup> 20:17b *Mambul keil ning ara*, keil dib ati kum bukni, domon yupu deice arye nyabuk bukni, deiyok ara Yesus ati nyabuk. Ati, ‘Urasin fia teleb keil, mikip weik keil ara, Yesus atonun,’ tenebuka, domon yupu deice arye nyalamik.

<sup>n</sup> 20:18 *but-buta atonun* – Sice atouk kibuka mitik-mitik kipnamle. Yesus ayupu nyabuk ning ara, sik bita moubuka kekena kum ati, diba kum tenepce nang ati ara, Allah arye mitiktonun wenebuka opnamle. Bukna, moubuka kekenyakcuk sikce, ‘Nun like’ tenen, lik uplye ati, Yesus ati batakanyak ninye uk ara, Allah arye weiktonun wenebuka fia oplopnamele. Aning ati, Yesus arye adomon yupu nyabuk.

diksukumuk nyalyame. Tonda, an peteremenye talak ara, peterepminye ati kekebikirye, ‘Derepnuniyak do, kanye deipnuniyak do?’ kum tenelyame. An peteremenye talak ara, ‘Anang ara ninye deiyok nang do? Anang ara sisinanye do?’ tenena kum arye, Allah yupu deice arye, ‘Wininamlulume,’ nyasilye touk, diksukumuk peterelyame. Aning ati ara, an ti asipdenukiyabe. <sup>22</sup>Nun weik ninye deiyoknye bira, Kaisar arye, ‘Pemerintah ati, pajak yo bok arinamlume,’ nyasilya ara, arina teleb do, kum do? Apajak yo bok ara pemerintah ati arinamap do, bataknamap do?’ nyabuka talye asipdeyik.

<sup>23</sup>Anang talye tenepce arye asipdeyikop ura, Yesus arye anang sik kanye talima noutam duknubuka nyapmek ning bikukce ayupu nyabuk. <sup>24</sup>“Anggun keil uang el si denarius<sup>o</sup> dobuka aripnumunye ura, dipdenune,” nyabuk. Nyabuk ura, sikce akeil uang dobuka aribikop ura, Yesus arye asipdeyuk. “Anggun dipdelulume. Akeil uang deice el ninye urasin atonun ning ap, el yupu ap puturubuka deibik ning ara, yatanye urasin ap, sekna ap upmal do? Tonda, ninye si sekuka deibik ning ara, yatanye si do?” nyabuka Yesus arye asipdeyuk.

<sup>25</sup>Asipdeyuk ura, sikce tamubuka, “Ara Kaisar<sup>p</sup> el ning,” nyabik. Nyabik ura, Yesus arye anang ati nyabuk. “Aning ara, Kaisar el ning ati, adip aryuk Kaisar ati arinamlume. Ton, Allah el ning ara, adip aryuk Allah ati arinamlume. Aning atonun ton, Kaisar arye, ‘Wininamlulume,’ nyasulul yupu babye, Allah arye, ‘Wininamlulume,’ nyasulul yupu babye, aning uk wininamlume. ‘Ton batakuka, ton ning kekepmunce, talibuka wininamlume, nyapnusi do?’ tenena, meme.” Yesus arye nyabuk. <sup>26</sup>Yesus ayupu nyabuk deice arye, Farisi nang arye dopkwetebik ura, tenebuka nyabik nang ara, ‘El yupu nyaptu deice arye malye winiptue,’ tenepmek bukni, aninye wekuka kekenmek dam ara, teleb arye nyapmasila ati, ‘Malye yupu kum nyapmanto kiple,’ tenebikce, “Se” nyabuka ngalukik. Ngalukikce, tunimabik.

### **Saduki nang arye, ‘Yesus malye nyaptue’ tenen, kil doldana ati, tenebuka arye talye asipdeyik yupu**

<sup>27</sup>Yuk talak ara, Saduki<sup>q</sup> nang arye, Yesus dam asilyayik. Sikce, ‘Ninye dibice ura tuba tamubuka kam kum bunamak,’ tenelamik ning ati ara, sikda, ‘Yesus arye malye yupu nyaptue’ tenen, tenebuka arye yanuka

---

<sup>o</sup> **20:24** *Derianus* nyalamik ning ara ani. Ara mitik keil bukni, el dekna ara weike. Ara tonok sum deice fil dolamikba, fil deiyok nang arye, aripnak, yo bok gaji dololamik ning ubuk. **P 20:25** *Kaisar* – Roma mutuku ninye sik weik deiyoknye. Laka nyana yupu nomor 41 dirume. **q 20:27** *Saduki nang ara*, Yahudi yala nang ulamik bukni, sikda ‘Ninye dibice ura aminyan talak kam buknamake,’ nyanyak yupu ap, tonda ‘Allah el im deice fil don nang malaikat unyake’ nyanyak yupu ara, talya nyanyake. ‘Ara kum winipmanto ning,’ tenelamikce, diba kum tenelamik. Tonda laka nyana yupu nomor 9 dindelelume.

asipdeyik. <sup>28</sup>“Musa sekamsuk yupu ara ani. ‘Tonoknye birye kil dopmalye bukni, anye bira diplyop ura, akil mi delina kumop ura, anye bira el weit koprop arye, el yok pununa ati, el du koprop kil youwak daklirye mapu deipnamdak,’ nyabuka Musa arye sekeiyamsuke. Nyabuka sekamsuk ati, winipmanto ning asipdenukiyabe,” nyabik.

<sup>29</sup>Tonok talak ara, sik weitcapu silip tek barye nang ulamik. Sik du koprop minopce kil domuk bukni, mi delina kumce dibuk. <sup>30</sup>Minye dibukop ura, akil yuwak el weit bitinanye birye yuwak dakuk. Dakukce dobuka daulamuk ani, el babye, mi delina kumce dibuk. <sup>31</sup>Atonun ton winilinye babye, akil yuwak dakuk bukni, mi delina kumce dibuk. Daupnin balamikani, aweitcapu silip tek barye nang nirya arye, atonok kil uk tonok-tonok arye dopra balamikani, mi delina kumce diprongobik. <sup>32</sup>Sirya ara, akil babye, dibuk.

<sup>33</sup>Ati, aminyan ara, Allah arye ninye nirya kam bukeipnamle talak ara, atek barye nang nirya arye akil uk dolamika ati ara, im deice arye, yatanye birye, “Na kil,” nyabuka doproprnamle do? Nyabikce, sik Saduki nang arye tenebuka Yesus ati asipdeyik.<sup>r</sup> Saduki nang arye tenebuka Yesus ati talya asipdeyik.

<sup>34</sup>Ayupu talye asipdeyikop ura, Yesus arye tamubuka nyabuk. “Winitalak ululum ninye nirya ara, kil ap, sal ap doldalulume. <sup>35</sup>Ura, Allah arye, ‘Anang ara teleb nang,’ teneplirye, im deice bobinamle nang ara, aning atonun kum wininamake. Allah arye ninye nirya kam bukeipnamle talak ara, kil ap, sal ap kum dopdanamake. <sup>36</sup>Allah el im deice fil don nang, malaikat, dipna kumce im deice fia kam unyak touk, im deice bobinamle ninye nirya ara, fia kum dipnamake. Fia kam unamake. Allah arye aninye nirya im deice bobinamla ati ara, el mapu koprop unyake,” Yesus arye nyabuk. Yesus ayupu nyabukop ura, yupu tonap nyabuk.

<sup>37</sup>Winira, ‘Diamikce ninye kam kum buknamake,’ tenemunya ara, laka nyapnusine. Musa sekamuk yupu noutam ara, kirikna taica ning kankan uku buk dinmokce, Allah arye Musa ati nyabuk yupu deice arye kel bikilulume. Musa arye, Allah ati ayupu nyamuk. “Abraham ap, Isak ap, Yakup ap arye, Allah el si erenyake. (Keluaran 3:6) Erenyak ura, Allah arye akekelule,” nyabuk ara nun kele. Musa arye ayupu nyabuk talak ara, Abraham ap, Isak ap, Yakup ap, sik nong akunum diamik. Dibikce ninye arye Allah si kum erepting bukni, Musa arye, “Awinilye nang, Allah si

---

<sup>r</sup> 20:33 *Saduki nang arye tenebuk ning ara ani.* Sik tek barye nang nirya arye, akil tonok dolamika ati, tonoknye biryuk akil kum doptue. Ara kum winipmanto. Kum winipmanto ati, Yesus arye, ‘Dibice ninye nirya, Allah arye kam bukeipnamle,’ peterelul yupu babye, kum winipnamle. Ati, ayupu ara, dib kum tenebik. Tonda laka nyana yupu nomor 9 dindelelume.

erenyake,” nyabuk. Ayupu nyabuka deice arye, awinilye nang ara sik kanya im deice tuba kam unyak ning ara, bikinyabe.

<sup>38</sup>“Allah arye diplamak ninye kum talilule. Kam unyak ninye uk talilule. Allah elda, sik nong diplamak ninye babye, sik nong kam unyak ninye babye, sik kanye kam tuba unyakba dilule. Ati, Allah el kanye ara, ‘Sik nirya kam unyak ninye atonun unyake,’ tenelule. Aning ati ara, anggunda ‘Diamikce ninye tuba tamubuka kam kum buknamake,’ tenemunya ara, anggun fia malye tenelulume. Walwal arye tenelulume.” Yesus arye Saduki yala nang ati nyabuk.

<sup>39</sup>Nyabukop ura, Musa sekamuk yupu peterena deiyok nang kan-kan, ton nang arye, nyabik. “Nai guruo, ance teleb ubuka nyanmasilame,” nyabik. <sup>40</sup>Yesus arye ayupu nyabuka ati, sik yuk nang nirya arye ilil ubuk ura, tonok tonap kum asipdeyik.

**Yesus arye Musa sekamuk yupu peterena deiyok nang  
sik malye winilamik ning ati nyabuk yupu**

<sup>41</sup>Yesus ayupu nyabuk talak ara, el yupu kekenmekce, aunmek nang ati ayupu tonap nyabuk. “Musa sekamuk yupu peterena deiyok nang arye, ayupu peterenyake. Ara, ‘Ninye weik lyeplirye sik kanye talipnamlanye, ara Mesias bira, nun apu koprop Daud, el mi uk ulule,’ nyabuka peterenyaka ara, deiyok ara yata ati do? <sup>42</sup>Allah El Dib Kanye Daud el kanye talima ak talibuka deice arye, Daud elcuk ayupu sekamuk. Ara Mesias yanamuknye ati, Mazmur sekamuk yupu noutam arye ayupu sekamuk. Ayupu ara, nyapnusine.”

‘Allah arye na ni koprop Mesiasnye ati nyabuk. Nun bitinye nang arye ninye nirya talibuka unamnama ati, na sirik taruk tam bunamlyame. <sup>43</sup>Abukaminya ani, aminyan ara, an yupu yanikinyak ninye ara, na arye dobuka an amutam deipnye ura, an talinamlyame. An yan baribuka delin ning deice yan baribuka deiliminnye touk, an yupu kum kekekinyak ninye ara, an amutam deipnye ura, ance anang ati bisibuka anang talinamlyame. Anang nirya ara an amutamuk unamake.’

*(Mazmur 110:1)*

“Daud arye sekamuk yupu dobuka nyapmasine,” Yesus arye nyabuk. Nyabukop ura, ayupu tonap nyabuk.

<sup>44</sup>“Daud ayupu nyabuka deice arye, Ninye Lyena Deiyoknye, Mesias yanamuknye ati, ‘Na ni koprop,’ nyabuk. ‘Na ni koprop,’ nyabuka ati, Ninye Lyena Deiyoknye, Mesias ara, Daud el yalanye deibuk bukni, Daud el mi koproba uk kum uptue.” <sup>45</sup>Yesus arye awekmek nang nirya ati nyabuk. Weika arye abulubuka wekmek nang nirya, Yesus arye ayupu nyanmok ura, kekenmek talak ara, Yesus arye wipreibuk ura el yupu kekebuka el melibuka dobolbalamik nang ati nyabuk.

<sup>46</sup>Allah arye, ‘Aning ara wininamlulume, aning ara kum wininamlulume,’ nyapdeibuk ura, Musa arye sekamuk yupu mem yupu

peterena deiyok nang, sik wininyak ning ati, ‘Sik malye wininyak ning arye nun malye updeipsilyak’ tenen, moubuka unamlume. Sik malye wininyak ning nyapnusine. Sikda, ‘Sisinanye tenepnamsiyak’ tenen, deice tam ongoce ongon butum ara, cang weik ning ongobikirye, bakce talak ara luluklamle. Sik awininyaka deiyok ara, ‘Yuk nang eipsikirye sikda weik nang adano tenepnamsiak’ tenen, wininyake. Tonda, ninye bona dekna ati, yupa weika arye bulubuka wekelamak noutamak arye, ‘Babyebuk, kipsikirye, teleb nyapsicop ura, yuk nang arye, anang ara weik nang yanmasiake’ tenen, kil-kil kanye bobuka tenenyake. Tonda, Allah yupu peterena aik<sup>s</sup> fum, ninye sik urasin nirya din tam uk bukibyeba eipdisikirye, ‘Anang ara, weik nang tenepnamsiak’ tenen, weik nang bulamicak uk, bulbanyake. Tonda, weik yuna talak nirya ara, weik nang bulamicak uk, ‘Weik nang tenepnamsiyak’ tenen, fia patapliba bulbanyake.

<sup>47</sup>“Ton wininyak ning ara ani. Sikce talye bona utoto kum kilapu, youwak kilapu ati, nyanyake. ‘Anggunda, anggun talilulum ning nirya, noutam arye bokuka, Allah si erena ati arinamsulume,’ nyaltakanyak bukni, youwak kilapu arye sik ning aribicop ura, anang arye sikce sik bidamang ati bokuka, weik arye dolonyake. Tonda, yuk nang arye, ‘Anang ara, Allah morona weik kel nang, nyapnamsiyak’ tenen, Allah moroce ning ara, yupu cang arye moronyake. Awinice ning nirya ati ara, Allah arye awininyak nang atonun nang nirya ati, fia weik arye wabuka opnamle.” Yesus arye el mapu obarye 12 nang ati ayupu nyabuk.

#### Youwak ulamuk kil arye Allah ati aribukba Yesus arye nyabuk yupu

**21** <sup>1</sup>Yahudi yala nang, sik Allah ati arilbalamik aik fumbisik, Allah arina ati, ‘Yo bok dongopnamak’ tenen, marikna atonun ning moubuka deiamik. Ayo bok dongolyanmek marikna dam, Yesus ap, el mapu ap bukmekce, ayo bok dongolyanmek nang ati, sik wininmek ning urasin dinmek. Sik atenebuka bukmek talak ara, bona weik talin nang arye dekna weik yo bok dongolyanganmek ura, Yesus arye dinmok.

<sup>2</sup>Tonda, youwak ulamuk kil, fia bona utotoa talina kum kil tonok ara, elce keil uang bitinye, dekna fia mitik ning, yangupdongobuk ura, Yesus arye eibuk. <sup>3</sup>Dongobukop ura, Yesus arye el mapu mening dam abukmek nang ati, nyabuk.

“Anggun dipdelulume. Na dipkoprop yupu nyapsine. Bona weik talin nang nirya arye, yo bok weik dongolyanmak bukni, weik yo bok

<sup>s</sup> 20:46 Allah yupu peterena ap, kekena ap ati domik aik – Yahudi yala nang, sik Allah yupu peterna aik ara, nun mitik gereja atonun wamuk bukni, mitikto yuk. Ara, sikce hari Sabtu weklamikce, Allah el si erelamik. Tonda yuk-yuk sum ara, Allah yupu kekena ap, peterena ap, ninye wapdanop ura sik yupu lipsisikuka bokoliana ati, anyaik weklamik. Bahasa Indonesia deice arye, ‘rumah ibada’ nyanyake. Anyaik lak len yupu ati, nomor 26 dipdelulume.

dongopmaka ara, Allah el kanye ara nirya tabakuka nukuna ara mitik uk uple. Bukni, ayouwak ulirye bona utotoa talina kum kil, el dongopmau ara, keil uang dekna mitik ning bukni, Allah el kanye ara, dekna fia weik<sup>t</sup> atonun deiple. <sup>4</sup>Sik bona weik talin nang arye, sik aning-aning weike talibik noutam arye, ‘Na’ tenen, weik aupmalibuk, weik yo bok dongopmak bukni, ayouwak kil ara, fia bona utotoa talina kum kil ati ara, el talibuk ning nirya anyuk akunum dongopmaue.” Yesus arye el mapu ati nyabuk.

**Yesus arye aning-aning nirya kum upnamle talak dam  
uplyop ura, winipnamle ning ati, laka nyabuk yupu**

<sup>5</sup>Yesus arye ayupu akunum nyabukop ura, el mapu ap, Allah arilbalamik aik fumbisik unmek talak ara, el mapu arye anyaik domikak dipdeyikke, ayupu nyabik. “Naio, dipdelyame. Anyaik, weik pala cang urasin teleb keil arye domik. Tonda, Allah si erena ati arilamik ura, anyaik fum dobuka delilamik aik kweiryra ara, urasin fia telebe. Anyaik-anyaik nirya domik ning ara, urasin fia telebe,” nyabik. <sup>6</sup>Nyabik bukni, Yesus arye el mapu nirya ati tamubuka nyabuk. “Weik aik dobikak nirya dipdelulume. Weik cang keil pala arye deibuka welebikke, dobik keil nirya ara, aminyan ara uluplobice ura, keil deice tonok ning babye, kum bataknamake. Anirya uluplopnamake,” nyabuk.

<sup>7</sup>Nyabukop ura, sik nirya arye Yesus ati asipdeyik. “Naio nyapsilyame. Anyaik, ara dan talak arye daklopnamak do? Yata ning winiptu deice arye, ‘Anyaik daklopnamaka ati, dam uple,’ tenen, biktibye do?” nyabuka asipdeyik. <sup>8</sup>Asipdeyik ura, Yesus arye ayupu tamubuka nyabuk.

Ninye weika arye, “Yesus el si deice arye yanganyabe,” nyabikirye, “Mesias yanamle nyalamiknye bira, na uka. Tonda sirya talak ara akunum dam uple,” nyanamak deice arye, ninye weik atilila yupu kekebuka, diba tenenamake. Atilila nang nyanamsiak deice arye, ninye weik sik kanye talima nirya leibuka, yuk tam dobanamsiak ati, na mapu anggun kanye talima moubuka unamlulume. Atilila yupu nyanamak nang ara, sik yupu kekebuka, sik tam kum kilonamlulume. <sup>9</sup>Tonda aminyan talak ninye arye, “Ton tam nang ap, ton tam nang ap

---

<sup>t</sup> **21:3** *Dekna weik ning atonun* – Yesus arye ayupu nyabuka deiyok ara, ani. Aning-aning weik talinyak ninye ara, anoutamak arye bokuka, Allah el arina ati, weika arye arinamaka babye, aning ara el urasin ara, mitik atonun ulule. Deiyok ara, sik tuba talinamak ning ara, weik tuba upnamla ati ara, sik caknam asa aryuk arinyake. Bukni, aning-aning nirya kum talinyak kili sal ara, aupmalye ning noutamak arye bokuka mitik aryuk aribica babye, Allah el kanye ara, ‘Fia teleb ubuka arinyake. Sikce na ti arininyak ning ara, urasin weik atonun ulule,’ tenelule. Deiyok ara, sik bona talina kum ninye tuba talinamaka ara, fia mitik demuk kipnamla ati ara, sik ikin asa aryuk arinyake. Tonda, 1 Korintus 16:2 dipdelulume.

oldanmake,” nyabuka nyanamaka ap, “Nun mutuku talisinyak nang ‘Obuka daknamap’ tenen, oldanmake,” nyanamaka ap, yanuka nyabikiba, kekepmunyop ura, ilil kum unamsulule. Allah arye, ‘Atonun ning wininamle,’ akunum teneamuk ati, wininamle bukni, ‘Sirya talak sirya dakna ning ara, kabula,’ tenenammlulume.

<sup>10</sup> Sirya talak noutamak ara, ton wininamle ning ara, weik ninye deiyoknye, Raja<sup>u</sup> nang arye talinyak mutuku nang arye, ton mutuku nang ati, binuka oldanamake. Tonda, ton yala nang arye, ton yuk yala nang ati, oldanamake.

<sup>11</sup> Winildanmace talak ara, mutuku yuk-yuk weika arye lulukunamle. Tonda, wa wibuka kouamice ning nong kum uplyop ura, din fia patana dem unamle. Tonda, mutuku-mutuku nirya yuk-yuk ninye uk weikto uk dilamlye ura, ninye weik dipnamake. Tonda, im deice upnamle ning eibikirye, ilil fia weik unamle ning ap, ‘Sirya talak akunum uple’ tenen, biknamaka ati, Allah arye pitin-pitin kilin ning im deice deipnamle ap, weik upnamle.

<sup>12</sup> Aning ati ara, aning-aning winipnamle ning ara, moubuka bikmunce, tenenammlulume. Bukni, anyapmasin ning nirya min kum wi nyaplye talak ara, anggunda, ‘Yupu talina deiyok nang arye wenebuka opnamak’ tenen, tapu koubuka arilbanamsiyake. Ara, na ti diba tenepluma ati, anggun nong deice ikin ning weik delinamsiake. Tonda, ‘Anang arye wenebuka opnamak’ tenen, Allah yupu peterena aik noutamak ap, talye wenena aik fumbisik ap, bobanamsiake. Na ti diba teneamnumunya ati, ‘Anang arye opnamak’ tenen, weik ninye deiyok nang, Raja nang ap, Gubernur nang ap, sik dam bobanamsiake.

<sup>13</sup> Anang dam bobisikce talak nirya ara, na arye ninye lyenun yupu, sik anang kekena ati, na si sisibuka laka nyanammlulume. <sup>14</sup> Sikce aweik nang dam bobanamsiak bukni, winitalak ara, tenebuka kintinipnululume. Wenen nang dam bobinamsiak talak ara, sikce opnamsiaka ati, ‘Yata yupu nyaptibye deice arye yupu sektibye do?’ tenen, teniltona meme. Awininamle ning ati ilil una meme. <sup>15</sup> Sik wenepnamsiak talak ara, na arye weik kel yupu anggun kanye talima ak aripsinye ura, nyanamlum yupu ara, anang arye bisibuka yanipmanto kum winipnamsiake.

<sup>16</sup> Anggun ni yapu koprop ap, anggun nin yapu koprop ap, anggun weitcapu koprop ap, anggun kayapu nang koprop ap arye, anggun diba tenenululum ning ati, ‘Ninye deiyok nang arye opnamak’ tenen tomobobinamsiake. ‘Opnamak’ tenen, tomobuka bobinamsiyake. Yukubuka

---

<sup>u</sup> 21:10 *Raja* – Ayupu nyabuk ning ara, minop sekik ning noutam ara, “Kerajaan melawan kerajaan dan negara akan melawan negara,” nyabuka sekik. Ati, mitik mutuku noutamak unyak ninye olana ati kum nyabuk. Ara pala weik mutuku noutamak unyak ninye arye, yuk pala weik mutuku noutamak unyak ninye ati olanamake.



bobasice ura, ton nang ara, adip aryuk oplopnamsiake, ton nang ara talye bataknamsiake. <sup>17</sup>Na ti diba tenenice nang nirya ara, 'Anang ara, Yesus el mapu unyaka ati ara, nun like,' tenebuka bataknamsiake. <sup>18</sup>Winipnamsiak bukni, Allah arye moubuka disulula anye arye, anggun gisok potong tonok babye, ton kum winipnamsile. <sup>19</sup>Anggun ilil una kum aryuk, talye tunimabuka upmunyop ura, Allah arye lyepnamsile. Ara, anggun nong uk ara opsitinge bukni, Allah arye kam una deiyok ning akunum aripsilyop ura, anggun sambala uk fia kum dipnamle. Fia kam uk unamle.

<sup>20</sup>Aning ati ara, sik yin talin nang fia weika arye, Yerusalem mutuku dana-dana tam nirya warikukapsikirye, kintinipsikibuk eipmunyop ura, 'Yerusalem mutuku ulul ning ulubukapsikirye, sung-sunga kibuka opnamsiak talak ara, akunum dam uple,' tenenamulum. <sup>21</sup>Aning uplye talak ara, anggun Yudea tam unamlum nang ara, Yudea batakuka, adip aryuk bik-bik abuka yo kan-kan mutuku duknul bindaknamlume. Anggun Yerusalem asik noutam unamlum nang ara, asik kopropa batakuka, buru tam sakuka dungnul binamlume. Anggun buru tam ulamlum nang ara, tamubuka asik noutam yangana meme.

<sup>22</sup>Aning ara talya ati kum nyapsine. Deiyok ara ani, aning winipnamle talak ara, Allah yupu laka nyalamik nang arye, "Allah arye ninye nirya wenebuka opnamle," nyalilamik touk upnulye talak ati nyapsine. <sup>23</sup>Yesus arye nyabukce, ayupu ton dukdongobuka nyabuk.

Mi bomice kilapu ap, mi moum dinilamice kilapu ap, akilapu ara adip aryuk bik-bik abuka kum binmanto ati, fia ikin unamle. Amutuku noutamak unamak ninye nirya ati, ara Allah el yu weik upliba weneplirye dereplye ura, Allah arye, fia weik arye kanye imun kipdeiplye ura kanye imun asa unamle.

<sup>24</sup>Amutuku yanuka obisipnamak nang arye, Yahudi yala ninye weik parang ya arye olonamake. Ton nang ara tapu koubukabikirye, yuk karen mutuku bobikirye fil dinamake. Yerusalem asik dokcak nirya ara, Yahudi yala kum ninye arye, 'Amutuku ara mambul ak,' tenena kum aryuk, talye yan yanibuka unamake. Winibuka daulamice ura, Yahudi yala kum ninye weik ninye deiyok nang kibikirye, mutuku-mutuku nirya fia talinamake. Allah arye teneamuk talak uk wininamake.

<sup>25</sup>Im deice tam ulul ning ara, kiting ap, kurya ap, wala ap deice arye, weik mambul ning laka nyana ati winipnamle. Laut mekwen nirya ara, mekwen weik arye lonting-lonting ablirye, mekwen mikip weik arye langdibuka weleplirye, weik lelim nyaplyop ura, tukwak mutuku ninye mutuku sirya im sirya nirya arye, 'Mekwen dipsilyak' tenen, weik kanye imun uplibuk, 'Yata wiripnamap do?' tenen, fia teniltona uk unamake. <sup>26</sup>Im deice tam ulul ning nirya ara, lonting-lonting anamle ati ara, ninye mutuku sirya im sirya nirya, 'Yata winipnamsil do' tenen, ilil fia weik uplibuk, gisok biri-biri ablirye dipmanto unamake.

<sup>27</sup>Aning nirya winiplyop ura, na ara Ninye Mi Koprop Atonunye birye, na mikip weik ap, dirina weik ap arye, dua kan-kan yanganyeak eipnamniake. <sup>28</sup>Anyapmasin ning nirya deiyok koubuka winilye talak ara, anggun tikukapmunce, ‘Nun ni, nun Lyena Deiyoknye yanusi’ tenen, kanye etek-etek nyapsilye ura, erebuka dinamlulume. Ara, ‘Allah arye lyepnamsil talak akunum uple,’ tenepnamluma ati, nyapne. Yesus arye nyabuk. <sup>29</sup>Yesus arye ayupu nyabukop ura, adomon yupu tonap nyabuk.

<sup>30</sup>Anggun nirya kele, benalye yo kita’ omlya ani, kulupnulya ati, telil ongoplyop ura, ara ‘Dou mapnamla atia,’ tenelulume. Tonda, ‘Pou upmala anye arye, dou mapnamle’ tenen, nyalulume. <sup>31</sup>Aning dimunce, ‘Dou mapnamale’ tenen, bikililaluma atonun, anyapmasin ning eipmunyop ura, ‘Siryak dakne talak dam uple,’ tenepnamlulume. Ara, Allah arye aning-aning nirya ap, ninye mutuku-mutuku nirya ap, taliplirye, Weik Ninye Deiyoknye unamle talak, ‘Akunum deiyok kuple’ tenen, biknamlulume.

<sup>32</sup>Na dipkoprop nyapsine. Anyapmasin ning deiyok uplye talak eipnamak ninye ara, sik nirya min kum dipmace talak ara, anyapmasin ning siryak dakne talak babye, dipkoprop eipnamake. <sup>33</sup>Im deice tam ulul ning nirya ap, tuku ak tam ulul ning nirya ap ara, kum danamle bukni, na nyasinye yupu nirya ara, tonok babye, ton kum kum danamle. Fia aupnamle, na nyanye touk dipkoprop upnamle.

<sup>34</sup>Aning ati ara, anggun kanye moubuka unamlulume. Malye-malye winina ap, talye kanye bobuka urdemuk una ap, kanye wangan mek talye dina ap, ura, ‘Nun aik, nun ongon butum, nun dina ap, yata wiripnuyap do?’ tenen, teniltona ap deice arye, anggun kanye talima tenena ning ara, ikin weik upsilye, mitang yuksilye ura, na fil dopmanto kum ululum ati, kanye fia moubuka unamlulume. Winipmanto ara, kabang bisik balamlya ak wena wemikce ura, kabang talye mangkau arye balye ura, youlamla atouk, na yanamne sum mangkau kanye bopmamunye talak winipsilyak ati, kanye fia moubuka unamlulume. <sup>35</sup>Tuku ak mutuku-mutuku nirya unyak ninye ara, anyapmasin ning dipkoprop akunum winipnamle ati, anggun kanye moudoplulume nyapsine.

<sup>36</sup>Aning ati ara, fia moubuka kalekuka dimunce, unamlulume. Tonda, ninye nirya ati, upnamle ning upsiliba, ‘Allah batakuka malye winibiyak’ tenen, Allah morona uk unamlulume. Tonda, ‘Ikin weik upsilyak’ tenen, Allah morona uk unamlulume. Ton ikin ning ara, Ninye Mi Koprop Atonunye birye, ninye nirya weneplirye yupu bokipnamla

---

v 21:30 *binalye yo* – Minop sekik buku noutamak ara, binalye yo kum sekik bukni, nun mutuku ulul ning sekmaba ara, ‘Ninye moubuka biktinge’ tenen, sekupe. Sik minop sekik ning ara, yo duk moulamle yo sekik. Tonda, ayo el yo bok siliknye ura, ara dou mapnamala ati tenelamik.

talak ara, ‘El dam bibiryee, alye kum daknamap’ tenen, Allah morona uk unamlulume. Yesus arye el mapu ati nyabuk.

<sup>37</sup>Atalak ara, Yesus arye asum-asum nirya, Yahudi yala nang sik Allah ati arilbalamik aik fum peterenman ak, einipne ura, Zaitun mutuku dup welebuka malbalamuk. <sup>38</sup>Mapmana bereknop ura asum-asum berentam talak nirya ara ninye nirya arye, ‘Yesus yupu kekepnuyap’ tenen, Allah arilbalamik aik wekelyanop ura peterelamuk.

**Yudas arye, ‘Yesus opnamak’ tenen, ninye yukulbiyuk yupu**

**22** <sup>1</sup>Yahudi yala nang Kaplina ati Kwalina sum, el si ara Paskah sum ap,<sup>w</sup> Nena Kum Roti<sup>x</sup> ati Kwalin sum ap, dam ubuk. <sup>2</sup>Yahudi yala nang Allah ati arina deiyok nang ap, Musa sekamuk yupu dobuka peterena deiyok nang ap, anang nirye arye, ‘Yesus optibye,’ tenenmek bukni, weik kwalin sum dam ubuk ura, ninye weik akunum bulupmek ati ara, ‘Sik anang arye eipsicak’ tenen, ilil ubuk. Ara, ‘Yesus obibipyee ura, yuk nang arye wapsicak’ tenen, ilil ubuk. Ilil ubuka ati ara, yuk nang bikina kum ati, ‘Yesus yata wiribibya deice arye duknubuka opnamap do?’ tenenmek.

<sup>3</sup>Ura Yesus wibuka deiamuk nang kan-kan ak bukni, tonoknye el si ara Yudas Iskariot, Isa Mutuku Dongonye arye el kanye talima fum tam wekuk. <sup>4</sup>Wekuka nyapdeibuk ura Yudas arye, ‘Anang arye Yesus olyanamak’ tenen, Allah arina ati deiyok nang ap, Yahudi yala nang arye Allah ati arilbalamik aik kaliklamik nang, sik deiyok nang ap, anang sik dam ninye yukulbiyuk. Ara, ‘Sikce Yesus el ona ati, na arye yata wiribuka Yesus dobuka sik ti ariptynye do?’ tenen yupu sisikinmek. <sup>5</sup>Nyalbiyukop ura, sik anang arye kanye deibikce, fin-fin ubuk ati, “Winipsiminyop ura, yo bok weik arye aripnamkiabe,” nyabik. <sup>6</sup>Nyabik ura, Yudas arye, ‘Winipnamne,’ tenebukce, “Yo,” nyabuka ati, ‘Yata teleb lo uplye talak arye, yuk nang arye kum dinmanice talak aryuk, Yesus dobuka anang areptynye do?’ tenelamukce, dina uk ulamuk.

---

<sup>w</sup> **22:1a** *Kaplina ati Kwalina* deiyok ara ani. Yahudi yala ninye Mesir mutuku noutamak ulamik talak ara, Allah arye anang bobinuyuk lukunyan noutamak ara, ninye mi deiyamik minyuma mapu on malaikat dopkwetebuk. Yahudi yala ninye arye, domba obuka ining kwebuka sik buplan dana-dana ap, deice tam ap likipmeka ati, amalaikat arye aining eibukop ura, sik aik wekena kumce, anyaik kalibuka binmokce, sik minyuma mapu kum obuk. Bukni, sik Mesir mutuku ninye ara, ining sik bisik buplan dam kum likipmeka anye arye, ninye on malaikat arye, minyuma mapu obuk. Aning nirya tuba tenena ati ara, kiting tamun nirya ara, Yahudi yala nang arye Kaplina Kwalina kwalilamik.

<sup>x</sup> **22:1b** *Nena Kum Roti darina* – Sik Yahudi Yala ninye arye, Mesir mutuku ulamubu talak, Allah arye lyebuka bobinusuk talak ara, ‘Nena kum Roti dibupu touk tuba tenenamabe,’ tenen, kiting tamun nirya Kaplina Kwalina yulamik. Mesir mutuku binuyik talak ara, Musa arye nyabuk. “Minpola binuyapa ati, roti nena deiyok ning roti bun dongoptibye bukni, lo kum ati, minop amutuku batakuka binuyapa ati, roti nen ning dana kumce, nena kum ninguk dipnuyabe,” nyabuka ati winibik. Laka nyana yupu nomor 30 dipdelelume.

### Kaplina ati Kwalina dina ati, kintinilin yupu

<sup>7</sup>Sik Yahudi yala nang arye Nena Kum Roti deiyok koubuka kwalina sum ara, sik apu yapu Mesir mutuku batakuka binuyik talak ara, domba basam obuka buplan kup-kup tam dana-dana ining likibik ning ati, ‘Tuba tenepnamap’ tenen, asum arye domba basam tonok obuka Allah ati arilamik. Adomba basam el si ara Kaplina Domba nyalamik. <sup>8</sup>Winilamika ati, Nena Kum Roti deiyok koubuka kwalina sum deice arye, Yesus el mapu bitinye nang, Yohanes ap, Peterus ap ati, ayupu nyabuk. “Kaplina ati Kwalina nun nirya neika dipnamap ati, kintinilbisururume,” nyabuk. <sup>9</sup>Nyabuk ura, sik bitinye arye Yesus ati asipderik. “Anda, Kaplina ati Kwalina ati kwalina ning dipalam ning ara, dan aik kintinilbinunam do?” nyabuka asipderik. <sup>10</sup>Asipderik ura, Yesus arye el mapu bitinye nang ati, ayupu nyabuk.

Anggun Yerusalem asik dolamicak noutamak birumunye talak, ninye tonok mekwena weik makau takunya deice deibuka bobalibuk eibuka eibdanarurume. Eipdamunyop ura, el aminyan tam birumunce, el weknulye aik wekuka, anyaik deiyoknye ati asipdenururume. <sup>11</sup>“Nun Peterena deiyoknye birye asipdenmakile. ‘Na ap, na mapu ap, Kaplina ati Kwalina ati kwalin ning dipnamap ati, an ninye asik nang wekce aik ara dan do?’ nyabuka asipdenamrurume.”

<sup>12</sup>Asipderumunye ura, anye birye el ninye asik nang bun aik laka nyapnamsile. Anyaik, deice, pala lilibuka dobik aik deice alip aik ara,<sup>y</sup> nun unamap ap, din ning dipnamapak ap, kintinipdeipmace ning ara, anggunce eipnamrurume. Anyaik fum nun Kaplina ati Kwalina dipnamap ning ara, kintinipnamrurume. Yesus arye el mapu bitinye nang ati nyabuk.

<sup>13</sup>Nyabuk ura, abitinye nang arye Yerusalem mutuku birikce, Yesus nyapdeipmok ning atonun ubuk ati, eiprikop ura, Kaplina ati Kwalina ati dipnamek ning kintinibuka deiprik. <sup>14</sup>Awinin marik ura, sik din dipnamek kiting akunum ubuk ati Yesus ap, elce wibuka deibuk mapu, sik taku barye 10 Rasul nang ap, Yerusalem mutuku yayik. Yayikce, sik din ning kintinibuka deipmekak, alip aik bukuka, din dinmek talak ara, Yesus arye el mapu 12 nang ati, ayupu nyabuk. <sup>15</sup>“Na kanye imun min kum upmanilye talak, na ap, anggun ap neika, Kaplina ati Kwalina dina ati fia patalamnuk.

---

<sup>y</sup> 22:12 *Aruma deice lu kibuka domik aik deiyok ara ani. Amutuku ara mok kum mitiktonun celamuka anye arye, sik aik aruma ara, kapce bok arye kum dobik. Sik aik aruma ara keil arye dobuka lu kibuka domik. Amutuku ninye sik aik dopnop ura, winilamik. Aik kup-kup tam arye, ubuka alip aik dukulongolamik. Ninye asik nang wekelbana ati, sik aik aruma ara, pala kibuka domika arye, ninye asik nang aik alip aik domik. Winilamik aik ara, Yesus el mapu ap ato aik wekik. Tonda, lak len yupu ara nomor 27 dipdelulume. Gambar ara Lukas 5:19 dipdelulume.*

<sup>16</sup>Ara talye ati kum nyapsine. Na dipkoprop nyapsine. Atalak arye dipdongobuka dotalak nirya ara, Kaplina ati Kwalina tonap kum dinamne. Winibuka daulamnye ani, Allah ninye weik lyeplirye, sik ap, aning-aning nirya ap talinamle talak, Kaplina ati Kwalina dilamice deiyok sirya daklirye, lak upnamle talak uk, na ila tonap dipnamne.” Yesus arye nyabuk.

<sup>17</sup>Aminyan ara, Yesus arye anggur mek makau kwebuka, tonok kintinipdeipmek ning dobuka Allah ati, “Telebe,” nyabukop ura, el mapu nirya ati nyabuk. “Amek makau dobuka aripdanin bamunce diplulume,” nyabuka aribuk ura, amakau tonok arye dipra banmek. <sup>18</sup>Sik amek dipnuyik talak ara, ayupu ton nyabuk. “Anggun yuk anggur mek dipnulum bukni, na ara atalak arye dipdongobuka, dotalak nirya anggur mek ton fia kum dinamne bukni, daulamnye ani, Allah arye ninye weik ap, aning-aning nirya ap talinamle talak akunum uplyop ura, tonap anggur mek dipnamne,” Yesus arye nyabuk.

<sup>19</sup>Nena Kum Roti dipnuyik talak ara, Yesus arye aroti dobuka Allah ati, “Telebe,” nyabukop ura aroti tobuka, el mapu ati bokuka arinmokce ayupu nyanmok. “Anggun lyena ati na nong aripnamne touk, aroti ara, na nong atonun ati aripsine. Dobuka diplulume. Anyaripmasin roti ara, ‘Na nong tenebuka dinamlum’ tenen, aripmasina ati, dobuka diplulume,” nyabuk.

<sup>20</sup>Aning winibuk touk, sik din ning dibuka dakalongoyik ura, anggur mek makau arye kwebuka dobukce, ayupu nyabuk.

“Amek ara, na ining atonun ulule. Na ining deice arye, winiryuk nyalin yupu nyapdeipsine. Bukni, minop talak ara, Allah arye nyalilamsuk ning ara, akunum punuple.<sup>z</sup> Winiryuk nyapdeipsin yupu ara, minop talak nyalin yupu akunum punupmale. Ara anggun ap, ninye mutuku-mutuku nirya ap ati, opnikce ura, na ining saklya deice arye, Allah arye sik malye winin ning namin kiplirye, kum danipnamle. Ninye weik lyeplirye, sik kanye talima fia talinamle.

Bukni, minop talak nyalilamsuk touk kume. Winitalak Allah nyalisilye yupu yuk ulule. Ara, winitalak babye, aminyan talak babye, na ining deice arye ninye malye winin ning kum danipnamle. Ara, ninye weik lyena yupu ati, winiryuk nyalilye ning nyapne,” Yesus arye nyabuk. (Ara, “Ninye mutuku-mutuku nirya noutamak, kili sal weik, sik malye ulamice

---

<sup>z</sup> 22:20 *Nyalin yupu kunupmale* – Minop talak ara, Allah arye nyalilamsuk ara, ani. Ara, minop talak, Allah arye, ‘Wininamlulume, aning ara kum wininamlulume,’ nyapdeibuk ati, Musa sekamuk yupu nirya, Israel ninye arye moubuka kekelamikce, dobolbalamika deice arye, Allah arye sik malye winilamik ning namin kilamuk. Bukni, winitalak aning atonun kum winilule. Winitalak ara, Yesus el ining biyuka deice arye kum daneipsilirye lyesulule. Nun mem fil dona deice arye kum Lyesulule. Aning ati ara, ‘Minop talak nyalin yupu akunum kunubuke,’ nyabuk.

ning ap, malye tenelamak ning ap ati, kum daneipnirye na ining arye lypenamne.” Yesus arye nyabuk.) Nyabukce, ayupu tonap nyabuk.

<sup>21</sup> “Bukni, na ap bukmapce, din dinmalum nang kankan, tonoknye birye, na opnamaniaka ati, ninye yukulbinule. <sup>22</sup> Allah yupu laka nyalamik nang arye, na ti sekamnik touk, na ara Ninye Mi Kopropro Atonunye opnikce ura, dipnamne. Sik laka nyalamnik touk winipnamniak bukni, na ara Ninye Mi Kopropro Atonunye yukupnamlanye bira, yukupnilibuk opnicop ura, Allah arye anye bira, weika arye wenebuka opnamle ati, elda fia bicoe,” Yesus arye nyabuk.

<sup>23</sup> Yesus arye nyabuk ura, sik kekebikce, sik bidamang nanguk asipdayikce, “Yesus opnamaka ati, yukupnamlanye bira, yatanye do?” nyabuka asildanmek. <sup>24</sup> Tonda, sik nyabuk yupu nyanmek talak ara, ‘Nun awekmap nang kankan noutamak arye, yatanye erebuka, nun weik deiyoknye akunum unamsil do?’ tenenmekce, yupu nyaldanmek. <sup>25</sup> Utenebuka nyaldanmek ura, Yesus arye el mapu obarye 12 nang nirya ati bulub deibukce ayupu nyabuk. “Yahudi yala kum nang arye, ‘Nun deiyok nang ani,’ tenenyak nang ara, adeiyok nang arye sik amutam nang ati, yu uplibuk anang yanibikirye, sik nong deice ikin ning deilinyake. Tonda, sik sisinanye nang, deice tam unyakce, sik amutam nang ati, kanye imun ning sik nong deice delinyakbuk, sikce sik bidamang ati, ‘Nunda teleb nang arye, nun amutam nang ati melinyabe,’ tenebuka talye yupu nyaltakanyake.” Yesus arye nyabuk. Nyabukce, ayupu ton dukdongobuka nyabuk.

<sup>26</sup> Sik anang ara wininyak bukni, anggun na mapu ara aning atonun kum wininamlulume. Anggun awekmalum nang noutamak arye, yatanye do, ‘Na teleb deiyoknye unamne’ tenen, deiyoknye atonun uplinye bira, el kayapu amuak buklirye, sik kanye imun uplye ning ati, melinamle. Tonda, sik weiknye unamlanye bira, kanye erena kum arye, adip aryuk, sik amutam buklirye, sik weit atonun unamle.

<sup>27</sup> Anggun tenelulume. Weik mambulnye bira, danye do? Din ning deibuka dilamakak, ulirye dilulnye do, din ning kintinibuka arilulnye do? Kume, din ning deibuka dilamakak minopce ulirye dilulnye bira, weik mambulnye ulule. Bukni, na uk ara weik mambulnye unyebuk, sik amutam uniryte, din ning kintinibuka arilamak nang atonun kanye lamapdongobuka unune. <sup>28</sup> Anggunda, na ikin ulamnuk talak noutamak nirya, anggun ap melibuka neika banyabe.

<sup>29</sup> Aning ati ara, na ni birye, ‘Aning nirya elce talinamle’ tenen, erepdeipnukce, ninye deiyok kin ning aripnuk touk, na arye anggun ti, erebuka deipsinye ura, anggunce na tenepse ning talinamlume. <sup>30</sup> Ara, aning aripsinye ura, aning-aning nirya talibuka unamne mutuku ara, na ap, anggun ap, neika bukuka, din ning dibibirye, weik ninye deiyok nang bulamak ning deice bukmunce, Israel ninye 12 yala nang nirya ati, yupu

bokolina deiyok nang unamlulume. ‘Wininamlum’ tenen, anggung erebuka deipnamsine. Yesus arye el mapu 12 nang ati nyabuk.

<sup>31</sup>Nyabukop ura, Simon Peterus ati ayupu nyabuk. “Simon, Simono, ninye arye deklanye dabikirye, ‘Kala kipman kum dipnuyap’ tenen, malye ning ati kala kokuka batakikirye, duk teleb ninguk dilamak atonun, Simon an babye, Isa Mutuku Dongonye arye, ‘Malye uptu tenen, fia diba tenenamle do, bataknamle do?’ tenen, winilden ning weik winipdenamkile. <sup>32</sup>Winipnamkil bukni, ‘Diba tenebuk ning kum bataknamle’ tenen, Allah moropkise. Amenyan ara, na batak maniminya ani, tuba tamubuka na tam yana kipminyop ura, an kayapu, aunmak nang nirya ati, kanye lamabuka yupu nyanamlyame.”

<sup>33</sup>Yesus arye nyabuk ura, Peterus arye tamubuka nyabuk. “Kume naio, wenena aik dongopniting babye, na opnitinga babye, na kanye ara aning telebuka. Na ap an ap, neika unaname” nyabuk. <sup>34</sup>Nyabukop ura, Yesus arye Peterus ati tamubuka nyabuk. “Kao, dipkoprop nyapkine. Alukunyanak buk, min kum berekablye talak, yim ayam min kum kamupmalye talak ara, an babye, like winilye deice arye, ‘Anye Yesus ara, na walwale,’ nyabuka filipnamanilame,” nyabuk.

<sup>35</sup>Yesus arye nyabukop ura, ayupu tonap nyabuk. “Na arye dopkwetepsibuk, anggung ‘Na’ tenen ning lilalum aling ap, talye din ning lin aling ap, yan ongona ap, kum bopmancuk, na yupu peterepra balalum talak nirya ara, yata ning ton tonok ning kum upsuk ura, patalamsuk do?” Yesus arye asipdeyuk ura, sikce tamubuka, “Nunda aning-aning nirya ara, min kum ubuka ati, kum patalamsuke,” nyabik.

<sup>36</sup>Nyabik ura, Yesus arye tamubuka nyabuk. “Unamlum bukni, winitalak ara, yuk ning nyapnusine. Anggung na tenen ning lin aling ap, talye din ning lin aling ap, awaplyop ura, aning dobuka peterepra banamlulume. ‘Nun aruksilyak’ tenen, bupu kina ati, deice tam ongon butum ara, ‘Aning ara weik mambul,’ tenelulum bukni, aongon butum dobuka yo bok dekmunce, ayo bok dobuka parang ya<sup>a</sup> uk dekelbinululume. Ara, yata ning do nirya min arye, ‘Aning mambul,’ tenelamlum ning nirya ara, ‘Aning mambul,’ tenena kum, batakmunce, dipkoprop weik mambul ninguk kintinipnamlulume. Amenyan ara, kanye imun ning fia weik yanamle atia.” Yesus arye nyabuk.

<sup>37</sup>Nyabukce, ayupu ton nyabuk. “Na dipkoprop nyapsine. Allah yupu laka nyalamik nang, nabi nang arye, nyalilamnik touk, ‘Anye bira, fia malye unanye,’ tenebikirye, dipkoprop malye un nang ap, neika dobuka

---

<sup>a</sup> 22:36 *parang ya* – Yesus arye, ‘Parang ya deklulume,’ nyabuk deiyok ara ani. Ara, ‘Dipkoprop parang ya deklulume,’ tenen, kum nyabuk. Deiyok ara, ani. Aminyan talak yu nang arye ikin ning weik anggung nong deice delinamsika anya arye, anggung kanye moupdoplulume nyana ati nyabuk.

opnamake.<sup>b</sup> Aning nyapmasin tok, Allah yupu laka nyalamik nang, nabi nang arye, 'Winipnamle,' nyabuka sekeiyamnik tok, dipkoprop upnamnile. Aning nirya sirya dakna talak akunum dam uple," Yesus arye nyabuk.

<sup>38</sup>Nyabuk ura, el mapu obarye 12 nang arye, 'Deiyok ani' tenen, bita bikna kum ubik ati, sikce tamubuka nyabik. "Nai, dipdelyame. Nun parang ya bitinye<sup>c</sup> kintinipmap ara ani," nyabik. Nyabik ura, Yesus arye tamubuka, "Aning ara, akunuma," nyabuk.

### Yesus arye Zaitun mutuku dup Allah morobuk yupu

<sup>39</sup>Yesus arye nyabukop ura, el ap, el mapu ap, sikce asum-asum nirya winilamik touk alip aik Yerusalem mutuku sik bukmek aik batakuka, banmek ani, Zaitun mutuku dup biyik. <sup>40</sup>Zaitun mutuku dup welebuka biyikce, Yesus el mapu 12 nang ati nyabuk. "Anggun abukapmunye talak arye, na yukak Allah morolbinune anye arye, 'Isa Mutuku Dongonye arye anggun kanye talima fum tam weklirye malye updeipsilyak' tenen ati, Allah moronululume," nyabuk. <sup>41</sup>Nyabukop ura, sikda asukum uk unmekbuk, el mitikto yukak biyukce, gutam tuku deice dipdongobuka Allah morobuk. <sup>42</sup>Moronmok talak ara, ayupu nyanmok. "Naio, na opnamaniyak talak ikin upnilibuk, donmanya dipnaman ning ara, 'Ance lyepnutum ura, aning kum winipnamniak' tenen, moronmakine. Bukni, na patanmanil ati tenenman ninguk kume. An minop arye tenelamnuluma atonunuk winipnilyame," Yesus arye nyabuka moronmok.

<sup>43</sup>Allah morobuk talak noutam ara, 'Opnikce ura dipnaman ning ara, Allah arye lyepnutu ura kum diptinye' tenen, fia ikin kanye bobuka, Allah moronmok. Wininmok akarye, Allah moronmok talak ara, malaikat im deice talye karin arye tikilyayukce, Yesus el kanye talima melibuk.

<sup>44</sup>El opnamik ning ati, kanye imun upmokce, malye kanye bobuka, mikip arye Allah moronmok ura, el nong mek bongobukce, mek tuku deice sakanmok ning ara, ninye opdakce ura, ining weik balamle touk, nong mek weik bongobukce sakanmok.

<sup>45</sup>Yesus arye Allah moronmoka ani, sirya dakuk ura, el mapu unmekak tamubuka binuka dinmokbuk, 'Nun ni Yesus obice ura dipnamale,' tenenmeka ati, bouku sukun mok ati sik nong mitang upmoka ati mana uk manmekak eibuk. <sup>46</sup>Eibukce, el mapu ati ayupu nyabuk. "Anggun mapmaluma ara, yata ati do? Anggunda buklulume. Isa Mutuku

---

<sup>b</sup> 22:37 Yesaya 53:12    <sup>c</sup> 22:38 *Nun parang ya bitinye* – Yesus el mapu arye, "Nun parang ya bitinye," nyabik yupu ara, Yesus arye domon yupu deice arye, "Ya deklulume," nyabuk ara, el mapu ayupu nong noutam, 'Deiyok anye,' tenen, kum tenepmeka ati, ayupu talya nyaplobik. Yesus arye, 'Parang ya sirika kintinipnamak' tenen, kum nyabuk bukni, sik walwal arye nyabik.



Dongonye arye talima fum tam weksilirye, ‘Nun malye ubibyak’ tenen, kanye wisipdopmunce Allah morona uk unamalulume.” Yesus arye el mapu ati nyabuk.

### Yesus opnuyika ati, tapu koubuka dobiyik yupu

<sup>47</sup>Yesus arye ayupu tuba nyanmok talak ara, Yesus arye wipdeiyamuk nang sik 12 nang kan-kan bukni, anye el si Yudas menekmok ura, Yesus el tapu kupnamek nang weik arye aminyan yanganmek. Yanganmek ura, Yudas arye, ‘Yesus mutupnun’ tenen, el dam tikilyayuk ura, Yesus arye Yudas ati asipdeyuk. <sup>48</sup>“Yudas, na ara Ninye Mi Koprop Atonunye ati, tenepnilamce, ‘Mutuna deice arye yukupnaman’ tenen, yanmanilama ara, yata ati do?” Yesus arye nyabuk. <sup>49</sup>Yesus el mapu arye, ‘Anang ara, Yesus tapu kupnuyaka ati, yanganmaka,’ tenebuka bikikke, Yesus ati nyabik. “Naio, nun parang ya dobuka, anang opnuyap do?” nyabuka asipdeyik.

<sup>50</sup>Asinmek talak ara, Yesus el mapu kan-kan arye tonoknye el parang ya doprakuka, Allah arina deiyok nang, sik weik deiyoknye,<sup>d</sup> anye el amutam fil melinanye, el amul sirik tam ning takipkwetebuk. <sup>51</sup>Takipkwetebuk ura, Yesus arye, “Akunum batakyame, akunuma,” nyabuka yupu sekuk. Nyabukop ura, amul takipkwetepmoka, ara morupdongbukce kwetebuk ura, min arye yum wamuk touk ubuk.

<sup>52</sup>Atalak ara, Yahudi yala nang sik Allah arina ati deiyok nang ap, Allah arilbalamik aik kalikin nang, sik deiyok nang ap, Allah arina ati deiyok nang ap, sik Yahudi yala nang yuk deiyok wisi nang ap ara, ‘Yesus tapu kupnuyap’ tenen, yanmek nang ati, Yesus arye nyabuk. “Anango, angguncu na ti, ‘Amutuku talinyak nang opbisipnamle ati, el deiyok koubuka el mapu bobinmale,’ tenepmanulumce parang ya ap, ninye on yo kama ap, dobuka tomolyanmanulum do? <sup>53</sup>Asum-asum nirya, Allah ati arilulum aik dam peterelamsi bukni, kum tomamnulume. Ara, Allah arye teneamnuuk touk, winipnula ati, isa el mikip deice fil donmasil talak aryuk winipnamanulume.” Yesus arye el tomolyanmek nang ati nyabuk.

### Peterus arye, “Yesus ara na walwale,” nyabuk yupu

<sup>54</sup>Yesus arye nyabukop ura, Yesus adip aryuk talibik. Talibikke, tomobuka Allah arina ati, weik deiyoknye el aik bobiyik. Yesus bobanmek talak ara, Peterus arye aminyan dipnin banmok. <sup>55</sup>Yesus min bobanmekop ura, Peterus ara, aminyan Allah arina ati weik deiyoknye, el asik dam yayukce, yin talin nang uku sekuka peikinmekak yanuka bukuk. Bukukce, el babye, uku peikinmok. <sup>56</sup>Peterus uku peikinmok talak ara, anyaik weik deiyoknye, el fil melibuka dolamuk kil tonok, Peterus unmokak yanuka dinmok.

---

<sup>d</sup> 22:50 Allah ati arina deiyok nang, sik weik deiyoknye ati, laka nyana yupu nomor 14 dindelelume.

Yayukop ura, Peterus uku peikinmok ati, akil arye Peterus dinmokce, el urasin ati maka meinmok. Dipdeyukce, 'Anye bira, Yesus el melinanye, akunuma,' tonok arye ayupu nyabuk. "Anye ap, aNasaretnye ap, neika ulamrike," nyabuk. <sup>57</sup>Nyabuk ura, Peterus arye tamubuka akil ati nyabuk. "Anyapmanilamnye bira, na walwale," nyabuka filibuk.

<sup>58</sup>Daunmekani, mitik yuk talak yuknye ton eibukce, Peterus ati ayupu nyabuk. "Anda, aNasaretnye el melibuka ulamik nang ap, ulamlumnye, an abukmalame," nyabuk. Nyabuk ura, Peterus ayupu kekebukce, "Na kume. Anye bira, na walwale," nyabuka duknubuk. <sup>59</sup>Duknubuk ura, sik nirya daunmekani, Peterus ap tikmek nang kan-kan tonoknye birye, Peterus ati, elce tonap nyabuk. "Anda, Galilea tam ulyamnye ati, anye bira el melibuka balamlumnye bira, an akunuma," nyabuk. <sup>60</sup>Nyabuk bukni, Peterus yupu mikip arye tonap nyabuk. "Anyapmanulumnye bira, dipkoprop fia na walwale," nyabuk. Peterus el ayupu tuba nyanmok talak ara, adip aryuk yim ayam arye, kamubuk.

<sup>61</sup>Ayam yupu nyabukop ura, adip aryuk, Yesus arye Peterus ati dinmokba Peterus arye, Yesus mince nyapmok yupu ara, ila tonap tenebuk. Tenebukce, "Se, Yesus arye, 'Yim ayam like bitinye min kum kamupmalye talak, anye bira na walwale,' nyabuka, like winilye deice arye filipnamanilame," nyapmanu touk, 'Na akunum winipne,' tenebuk. <sup>62</sup>Utenebukce, buru tam binuka el kanye talima fia ikin ubuk ura, weik arye engenmok.

### **Yin talin nang arye, Yesus ati nalinmek yupu**

<sup>63</sup>Aminyan ara, 'Yesus ati bilyak' tenen, Yesus ati, kalikinmek yin talin nang arye, nalinmekce sik taruk pinin arye, Yesus el nong deice sibuka onmek. <sup>64</sup>Ton nang arye, Yesus el asing, ongon butum arye kitibuka lilipdongopmekce, taruk pinin arye onmek talak ara Yesus ati ayupu nyanmek. "Allah yupu ap, Allah arye aminyan winipnamle ning ap laka nyananye nabi ninye ulyama anye arye, laka nyapsilyame. Allah yupu laka nyananye ulyama anye arye, yatanye birye el taruk arye onmakil do?" Nyanmek. <sup>65</sup>Tonda ayupu atonun yupu weik arye tonap, nyanmekce, Yesus ati malye yupu nyabuka nalinmek.

### **Yesus dobuka Pilatus ap, Herodes ap, sik dam bobiyik yupu**

<sup>66</sup>Sik winipmekce daunmekani, berekukop ura, sik Yahudi yala nang, sik weik deiyok nang ap, Allah arina ati weik deiyok nang ap, Musa sekamuk yupu peterena ati deiyok nang ap, 'Nun nirya arye yupu sisikibirye, Yesus yupu bokipnuyap' tenen, bulupmek. Bulupmeka ati, yuk nang arye, Yesus dobuka anang dam bobiyik. <sup>67</sup>Bobiyik ura, anang arye Yesus ati asipdeyik. "Anda, nyapsilyame. Allah arye wibuka dopkwetebuk ura, ninye weik lyeplirye fia talinamsilamnye, Mesias ara, an aulyam do,

kum do?” nyabuka asipdeyik. Asipdeyik ura, Yesus arye, “Asipdenulum ning ara, nyapsitinye babye, diba kum tenepnamanulume.

<sup>68</sup>Tonda, ‘Na ara Ninye Lyena Deiyoknye, Mesiasnye unun do, kum do?’ nyabuka asipdesitinye babye, anggunce tamubuka kum nyapnamanulume. <sup>69</sup>Bukni, na dipkoprop nyapsine. Atalak arye dipdongobuka, dotalak nirya ara, na ara Ninye Mi Koprop Atonunye, Allah el fia Mikipnye birye ereipnilyop ura, el sirik taruk tam arye, aning-aning nirya talibuka fia unamne.” Yesus arye nyabuk.

<sup>70</sup>Nyabukop ura, sik nirye arye Yesus ati asipdeyik. “Aning ati ara, anda, Allah el Mi Koprop ulyam do, kum do?” nyabuka asipdeyik. Asipdeyik ura, Yesus arye tamubuka, “Anggunda dipkoprop nyanmalume, na ara Allah el Mi Koprop unun ani,” nyabuk. <sup>71</sup>Nyabuk ura, sik nirye arye nyabik. “Kume, yuk nang arye tonap nyapnukiak yupu ara, nun patana kume. El bidamnye arye, ‘Allah el Mi Koprop unune,’ nyapmasil anyak, kekepmapa ati, aning ara, akunuma. Ayupu nyapmala deice arye opnamabe,” nyabik.

#### Yesus dobuka Pilatus dam bobiyik ura yupu talipmek yupu

**23** <sup>1</sup>Yahudi yala nang Allah arina ati, weik deiyok nang ap, Musa sekamuk yupu peterena deiyok nang ap, Yahudi yala nang, yuk deiyok nang wisi nang ap, sik yupu akunum nyabikop ura, Yesus dobuka Pilatus dam bobiyik. Ara Yudea tam talyamuknye, ‘Pilatus arye yupu bokeipnul’ tenen, bobinuka aribik. <sup>2</sup>Anang nirya ara, ‘Pilatus arye Yesus opnusil’ tenen, minina yupu arye ayupu nyabik. “Yesus ara, el malye ulya deice arye, nun mutuku noutamak unyak ninye nirya eibikirye sik nirya malye wininamake. Elce malye winilisulule. Tonda, nunce Kaisar yo bok arilamap ning ara, ‘Aning kum wininamabe,’ nyabuka yupu sekeldongosulule.

Tonda, Allah arye dopreipliba ninye weik lyeplirye, talinamle deiyoknye, ‘Mesias ara, na unune,’ Yesus arye nyalule. Mesias ara, Raja atonye unamle ati, ayupu nyasilya deice arye, ‘Na ara weik ninye deiyoknye, Raja atonunye unune,’ nyasulula anye arye, aning ara, fia malye.” Sik anang arye minina yupu deice arye nyabik.

<sup>3</sup>Nyanmeka ati, Pilatus arye Yesus ati asipdeyuk. “Yahudi yala nang sik weik deiyoknye, Raja atonun nyanyaknye bira, an akunum do?” nyabuka asipdeyuk. Asipdeyuk ura, Yesus arye tamubuka nyabuk. “Diba anyapmanilam touk unune,” nyabuk. <sup>4</sup>Nyabuk ura, Pilatus arye abulubuka wekmek nang nirya ap Allah arina deiyok nang ap ati nyabuk. “Nun Roma mutuku deiyok nang arye, ‘Wininamlulume,’ nyanyap yupu ara, dipkoprop malye winibuka deice arye yanipmasil ning ara, min kum nyapmanulum arye kum kekepmane. Anye malye winibuk deiyok ning ara, ton kum kekepmane,” nyabuk.

<sup>5</sup>Nyabuk ura, Allah arina ati deiyok nang nirye arye, ‘Pilatus kekeplirye diba tenepnamal’ tenen, tabakdongobuka mikip arye tonap ayupu nyabik. “Kume, Yesus el malye winilul ning ara, malye-malye peterelya deice arye, Yudea tam unyak Yahudi yala ninye nirya ati, malye ulisulule. Galilea mutuku arye malye-malye winipnin yangalamuka ani, amutuku babye, yanuka tuba malye winilisulule,” nyabuka weik arye nyanmek.

<sup>6</sup>Sik nyabik ura, Pilatus arye ayupu kekepmoka anye arye, “Yesus ara Galilea tamnye ulul do?” nyabuka asipdeyuk. <sup>7</sup>Asipdeyuk ura, sikce, “Yo, Galilea tamnye ulule,” nyabik ura, kekebuka kel bikukop ura, weik ninye deiyoknye Pilatus arye, utenebuk. ‘Aning ati ara, Galilea talibuka na amutam ulul deiyoknye bira, Herodes anye arye, Herodes arye Yesus yupu lepsikra bokipnamle,’ tenebukce, Herodes Yerusalem mutuku tia yanuka unmokak Yesus dopkwetebuk.

<sup>8</sup>Pilatus arye nyapdeibuk ura, yuk nang arye Yesus dobuka Herodes dam bobiyikop ura, Raja Herodes arye Yesus eibukce kanye deibuk. Kanye deiamuknye bira, dorkiting tamun, “Yesus arye ninye winipmanto kum fil dolule,” nyalamik ati, kekelamuka ati, ‘Na dinmatinyak ton afil doptop ura na babye, eiptinye’ tenen, patalamuka ati, Yesus eibukce kanye deibuk. <sup>9</sup>Utenebuka ati, Herodes arye Yesus ati weik asinmok bukni, Yesus ara, yupu tonok babye, kum nyabukce, tunimana uk upmok. <sup>10</sup>Yesus Herodes dam unmok talak nirya ara, sik Musa sekamuk yupu peteren nang ap, Allah arina ati weik deiyok nang ap arye, yu ubuk ura, minin yupu arye, “Yesus el malye winilul ning ara ani,” mikip yupu deice arye nyanmek.

<sup>11</sup>Wininmek talak ara, Herodes ap, el yin talin nang ap arye, Yesus ati, derenmekce nalinmek. Sikce nalinmek talak nirya ara, sik weik nang ongolamak ongon butum atonun ongon butum aling, Yesus nong deice ongopeibikce nalinmek. Winibikce, tamubuka Pilatus dam dopkwetebik. <sup>12</sup>Herodes ap, Pilatus ap ara, daulamrik talak nirya ara, kanye kum deipdanuka ulamrik bukni, Pilatus arye Yesus dobuka, Herodes dam dopkwetebuka deice arye, ‘Na kwit’ tenen, sik kanye deipdarik.

<sup>13</sup>Pilatus dam dopkwetebik ura, Pilatus arye Allah arina ati deiyok nang ap, Yahudi yala nang sik yuk deiyok nang ap, tonda yuk talye daunmek nang ap yukubuk ati, yayikop ura, ayupu nyabuk. <sup>14</sup>“Anggunce Yesus dobuka na ak boyanmalumce, ‘Anye bira el malye winilya deice arye, amutuku talinyak nang Roma nang obisiptibye nyalule,’ nyapmanulum bukni, anggun tuba kekenmalum talak ara, asipdenmanubuk, anggun nyapmalum touk, el dipkoprop malye winilul ning ara, tonok babye ton kum kekepmame.

<sup>15</sup>Tonda, Herodes babye, ninye malye winibice ura ‘Deiyok ara ani’ tenen, olamap ning ara, ‘Aning winipmo do?’ tenen, asipdenmo bukni, el

babye, ayupu kum kekepmo ati, Herodes arye dobuka, nun dam tamubuka dopkwetepmasila ara, akunum eipmalume. <sup>16</sup>Aning ati ara, na arye nyapnye ura na yin talin nang arye talya kama arye el nong deice oplobice ura, Yesus lopdongopnune,” Pilatus arye, sik Yahudi yala deiyok nang ati nyabuk.

<sup>17</sup>Ura, Yahudi yala nang Kaplina ati Kwalina talak noutamak arye, wenena aik dongolamik nang kan-kan bukni, ninye nirye arye, ‘Anye bira lopdongoplulume,’ nyapnanye uk, tonoknye wibuka loltakalamik.

<sup>18</sup>Winilamika anye arye, Pilatus arye ayupu nyabuk ura, el dam ninye weike bulubuka wekmek nang nirye arye, “Kume, Barabas el uk ara lopdongopsilyame, nyaplulume,” nyabuka yupu dilanmek. <sup>19</sup>Barabas ara, ‘Yerusalem mutuku talinyak nang obuka daknamap’ tenen, olanmek talak ara, ‘Na arye ton melibuka kwa dakuka opnun’ tenen, ninye tonok omuk ati, wenena aik dongamikba ulamuk. <sup>20</sup>Pilatus arye, ‘Yesus loploptinye’ tenen, patabuka ati, awekmekce, ‘Yesus opsilyame,’ nyanmek nang ati, Pilatus arye, “Na kanye teleb ning ara, Yesus lopdongopnune,” nyabuka, awekmek nang nirya ati, yupu mikip deice arye nyanmok. <sup>21</sup>Nyanmok bukni, sik awekmek nang nirye arye, weik yupu nyanmek. “Ane nyapminye ura, Yesus dobuka wanwanun yo deice deibuka opnuyake,” nyabuka yupu weik arye nyanmek.

<sup>22</sup>Nyanmek ati, Pilatus arye like winilye ton tamubuka nyabuk. “Yata ning deiyok ati opnuyak do? Nun amutuku talilamap nang arye, ‘Wininamlulume,’ nyanyap ning, dan ning ton yanisilya ati opnuyak do? Elce malye winilamtu ura optibye ning ara, dipkoprop ton kum kekepmana ati, na arye nyapnye ura talya wenebikirye kama arye kulabuka wenebice ura, lopdongopnune,” nyabuk. <sup>23</sup>Pilatus arye nyabuk bukni, sik awekmek nang nirye arye, tuba tonap tapakdeibuka weik yupu arye tonap moronmek. “Ane nyapminye ura, wanwanun yo deice deibuka opnuyake,” nyanmek deice arye, Pilatus nyanmok yupu sekik. <sup>24</sup>Pilatus el kanye ara, ‘Awekmek nang nirye arye, fia pi deibuka nyanmaniaka ati, Yesus dobuka anang aripnyop ura opnuyake,’ tenebuk.

<sup>25</sup>Utenebukce, Barabas lopdongobuk ura, talye biyuk. Ara, Barabas arye, ‘Nun Israel mutuku nirya talisinyak nang, Roma nang obisiptibye’ tenen, pirildelamukce, ninye olamuknye ulamuk. Winilamuka ati, wenena aik fum dongamika anyak, Pilatus arye dobuka lopdongobuk ura, biyuk. Barabas ara talye biyuk bukni, Yesus ara, Pilatus arye, ‘Anang ara, Yesus dobuka opsitinge’ tenen, nyanmaniaka ara, ‘Dawinipnuyake,’ tenebukce, anang ati aribuk. Aribuk ura, yin talin nang arye, ‘Yesus dobuka wanwanun yo deice delilbinuyak’ tenen, aribik.

### Yesus wanwanun yo deice deibuka obik yupu

<sup>26</sup>Yesus wanwanun yo deice deipnameka ati, bisik banmek talak ara, tonoknye el si Simon Kirene mutukunye bai tam unmoka ani, bisik noutamak yangayuk karen eipdayik. Yin talin nang arye Yesus bobanmek ura, Simon ap eipdayikop ura, Yesus el wanwanun yo ikin ubuka ati, sik yin talin nang

arye, Simon Kirene mutukunye ati mikip arye, “An adip aryuk awanwanun yo tomobuka bobilyam,” nyabuka arukik ura, Yesus menekuka banmok ura, Simon arye ayo tomobuka aminyan bobiyuk. <sup>27</sup>Yesus menekuka banmok ura, ninye weik ton aminyan banmek kan-kan arye, kilapu ton Yesus ati, bico tenebikce, kanye bobuka se tenebuka engepnin banmek.

<sup>28</sup>Engepnin banmek bukni, Yesus arye tamubuka akilapu dipdeyukce, ayupu nyabuk.

Anggun Yerusalem ululum kilapu ara, na ti engena meme. Anggun damang ap, anggun mapu ap ati, engenamlulume. <sup>29</sup>Ara talye ati kum nyanmasine. Deiyok ara ani. Aminyan ikin upnamsil talak ara, ayupu nyanamlume. ‘Sik mapu kum deilikiry, you uk unyak kilapu ara, sikda telebe. Tonda, mapu moum dinina kum kilapu ap, sikda, teleb bukni, nun mapu akunum debupu kilapu ara, kum bik-bik abuka bitibye anye arye, ikin weik unyabe,’ nyanamlulume.

<sup>30</sup>Ayupu nyanamlum talak ara, aning ton upnamle. Yahudi yala ninye ara, kanye imun weik uplibuk, mutuku nirya ati, nyanamake. Mutuku dalupmince, ‘Nun yanuka siklipsilyame adip aryuk diptibye. Anggun mutuku dup nirya pakuka singnipsutum ura diptibye.’ (Hosea 10:8) nyabuka malye nyanamake. Yesus arye nyabuk.

<sup>31</sup>Nyabukop ura, domona yupu deice ayupu ton nyabuk. “Yo imbik<sup>e</sup> tuba upmalye talak atonun ati ara, na ti winipmaka ara, mitik kanam bukni, aminyan ara, yo koulupyle talak atonun upnamsil ning ara, fia ikine,” Yesus arye domon yupu deice arye nyabuk.

<sup>32</sup>‘Yesus wanwanun yo deice opnuyap’ tenen, bisik banmek talak uk, ninye bitinye malye ulamrik nang ton, Yesus ap ansinibuka bobanmek. <sup>33</sup>Bisik banmek ani, mutuku si Golgota mutuku biyik. Golgota nyalamik ning ara amutuku urasin ara, ninye gisok yok atonun wamuk mutuku ati nyalamik. Golgota mutuku deice biyikop ura, wanwanun yo tuku deice deibuka, Yesus el nong ayo deice deibik ura tangalialibuka deibikce, taruk dana-dana ap, yan tonok ak ansinibuka deibikce, paku dakik. Winibikop ura, Yesus el nong wanwanun yo deice deipmek yo ara, erebuka tuku palipmek ak fumbisik erebuka dopkwetebikce ikik.

Aning atonun ton, sik malye ulamrik nang bitinye, tonye bira sirik tam, tonye bira kwanim tam deibikce, yuk-yuk ikik. <sup>34</sup>Anang nirye arye, ‘Yesus opnuyap’ tenen, wanwanun yo deice deipmek talak ara, Yesus arye el li Allah ati nyabuk. “Naio, aonmaniak nang ati, kum wenepnamlyame.

---

<sup>e</sup> 23:31 *Yo imbik* – Yesus arye ‘Yo imbik’ nyabuk ning ara, domon upu nyabuk bukni, deiyok ara ani. Ara, na arye malye winin ning tonok babye ton kum winilamsibuk sikce opnuniyaka ara, mitik kanam bukni, sik malye winin ning aupmalbuk, malye kibuka aning-aning kum bataknamak nang ara, aminyan talak Allah arye anang ati wenebuka opnamla ara, dipkorop fia ikin weik upnamle. Yesus aning tenebukce nyabuk.

Sikda, bita kum tenepmakce, wininmaniaka anye arye, sik ti namin kipnamlyame,” nyabuk. Tonda, sik ayin talin nang arye, Yesus deice ongopmok butum aling, ‘Yatanye birye doproprnul do?’ tenen, sik nomor undian donokik anyak ani, aning akunum laka kipne nanguk, aongon butum aling dolonmek.

<sup>35</sup>Atalye wekmek nang arye tuba dinmek talak, sik Allah ati arina deiyok nang ap, Musa sekamuk yupu peterena deiyok nang ap, sik anang arye, Yesus ati, nalinmekce, akutunmek. Sik nyanmek yupu ara ani. “Yesus arye yuk nang ati melibuka lyelamuk bukni, elce el damang kum lyeptatue. Allah arye wibuka dokwecamtu ura, ninye mutuku-mutuku nirya lyeplirye talinamlanye, Ninye Lyena Deiyoknye ara, Mesiasnye ulamtuto ura, wanwanun yo deice lyeptaturye, tukuak saktue,” nyabuka nalinmek.

<sup>36-37</sup>Anang arye nyanmek touk, sik yin talin nang arye ayupu nyabik. “Anda Yahudi yala nang, sik weik ninye deiyoknye, Rajanye ato ulamtumto ura, lyeptatumce saka yatume,” nyabuka nalinmek. Nalinmekce, ‘Uk diplyak’ tenen, uk sekelongona ati, anggur mek yu ning, Yesus ati aribik bukni, Yesus ara kum dibuk. <sup>38</sup>Ninye arye, “Yesus el malye winilul ning ara ani,” nyalamik ning ara, yo lakase deice surat sekuka deibikce, Yesus el gisok deice tam deibik. Surat sekik ning ara, ani. ‘Yahudi yala nang sik weik ninye deiyoknye Raja ara ani,’ nyabuka sekdeibik.

<sup>39</sup>Sik anang nirya nalinmek touk, Yesus noutam dana-dana tam wanwanun yo deice deipmek nang, tonoknye birye Yesus ati, malye yupu weika arye nyanmok. “Anda Allah arye wibuka deiamkuk bukni, Ninye Lyena Deiyoknye, ara Mesias ulyam do? Mesias ulamtumop ura, an biramang arye lyeptatumce, nun ap lyeptsutum bukni, aning ara, kum winiptume,” nyabuka malye yupu nyanmok. <sup>40</sup>Nyanmok bukni, danatam deipmeknye birye, “Sikke el opmak tok, nun babye, opmasiaka anye arye, Allah ati ilil kum unmakil do? <sup>41</sup>Nun dipkoprop malye wininyam anye arye, ur opnusiak bukni, anye bira, malye ning tonok babye, ton, malye kum winilamuknye bibabye, opnuyake,” nyabuk.

<sup>42</sup>Nyabukop ura, anyanmoknye aniryuk Yesus ati nyabuk. “Yesuso, ance ninye nirya ap, aning-aning nirya ap, talibuka unalamak, wekminyop ura, na ti tenepnamnilyame,” nyabuk. <sup>43</sup>Nyabukop ura, Yesus arye ateleb yupu nyanmoknye biti tamubuka nyabuk. “Na dipkoprop nyapkine. Arup aniryuk, na ni dam, fia teleb ak weknye talak ara, an ap na ap neika fia unaname,” Yesus arye nyabuk.

### Yesus dibuk yupu

<sup>44</sup>Yesus wanwanun yo deice deibik ara, kiting dukduk ara, berentam toupne kiting arye deibik. Berentam toupne kiting deice arye, Yesus



wanwanun yo deice deipmek ura, daupmok ani, kiting dukduk an koprop ubuka ura, amutuku nirya inibukce kunukuk. Uku weik kunukmokani, sintam winilye kiting ubuk. Ara, sintam kiting noutam tuba upmok bukni, kiting dirina kum upmukce, kunukna uk upmok.<sup>f</sup> 45 Sintam winilye kiting ubuk ura, Allah arilbalamik aik<sup>g</sup> fum wilina ati, lapkwetamik butum aling ara, eitam arye kwilikuka sakukce, bitinye kibuk.<sup>h</sup> 46 Abutum aling bitinye kibuk talak ara, Yesus weik yupu arye erebuka ayupu nyabuk. “Na Ni Allah, na kanya ara, an taruk deice deipkine,” nyabukop ura, adip aryuk isin dakdobukce dibuk.

47 Yesus dibukop ura, yin nang yupa weik, 100 nang talyamuknye, Yesus wanwanun yo deipmekak deice tam tikmoka anye arye, Yesus weik arye ngalukukce, el dibuk talak winibuk ning nirya eibukce, ayupu nyabuk. “Se, anye bira, dipkoprop diksukumnye ulamuke,” nyabuk. 48 Ninye weik bulubuka dinmek talak, Yesus dibuk ura wininmok ning nirya eibikce, weik kanye imun ubuk ura, gisok talibuka weik arye engenmekce, amutuku batakuka yukak biyik. 49 Sik talye nang nirya biyik bukni, Yesus melibuka balamik nang ap, kilapu ap, Yesus wanwanun yo deice opmeka dam ara, mitikto yukak arye dinmek. Anirya dinmek ninye noutam arye, akilapu nirya ara, Yesus Galilea mutuku arye, Yerusalem yangalamuk talak ara, sik ap melibuka balamik.

### Yesus nong dobuka weibik yupu

50 Yesus akunum dibukop ura, tonoknye el si ara Yusuf, elda Arimatea mutukunye birye, ‘Yesus weilbinune,’ tenebuk. Yusuf Arimatea mutukunye bira, Yahudi yala nang, sik yupu bokolina deiyoknye ton ulamukce, teleb ubuka diksukumuk ulamuk. 51 Yusuf ara, Sandeheren<sup>i</sup> nang ap ansinibuka fil dolamuk bukni sikce, ‘Yesus opnuyabe,’ tenebikce obik ning ara, elce ton, ‘Teleb dawinipnamake,’ kum tenebuk. Tonda, Yusuf el babye, diba tenebuka, ‘Allah arye ninye mutuku-mutuku nirya weik lyeplirye, sik talima talinamle talak yanamle’ tenen, kintinibuka dilamuk.

52 Yahudi yala nang ara, ninye dipnop ura, keil deiya fum weilamik. Sik nirya winilamika ati, Yusuf Arimatea mutukunye bira, ‘Pilatus arye

<sup>f</sup> 23:44 *kunukna* – Kira-kira dari jam 12 sampai jam 3 sore amutuku nirya kunukuk.

<sup>g</sup> 23:45 *Allah ati arel balamikce*, el si erelamik aik laka nyana yupu ara, laka nyana yupu nomor 15 dindelelume. <sup>h</sup> 23:45 *butum aling bitinye kibuk* – Allah ati arilbalamik aik fum ara aik yuk-yuk wilibuka domik. Weik aik, el si Fia Teleb Aik ara, Allah arin nang, sik weik deiyok nanguk anyaik weknamtue. Anyaik lelina ati, cang butum aling dobukabikce, lapkwecamikba, anyaik yuk nang kum wekmanto ulamuk. Bukni, Yesus dibukop ura abutum aling kwilikuka bitinye kibuk. Deiyok ara, ‘Winitalak ara, Yesus dibuka deice arye, Allah el dam yangana teleb’ tenen, ninye biknamak ati, Allah arye abutum aling kwilikuk. Laka nyana yupu nomor 15 dindelelume. <sup>i</sup> 23:51 *Sandeheren nang ara*, Israel ninye sik diba tenelamik ning nirya ati, yupu lipsisikuka bokolina deiyok nang ulamik. Tonda laka nyana yupu nomor 12 dindelelume.



Yesus el nong aripnilyop ura, keil deiya fum weilbinun' tenen, ilil kum arye, Pilatus dam binuka morobuk. <sup>53</sup>Morobukop ura, Pilatus arye Yusuf ati, "Telebe Yesus nong dobuka daweilbilyame," nyabuk. Nyabuka ati, Yusuf ara mitang teleb lyan butum aling dekukce, wanwanun yo deice arye Yesus nong dobuka namin lyan butum arye kitibuka, keil lukamika fum dongobuk. Keil deiya fum, yuk nang ton dipne babye, asukum kum weilamik.

<sup>54</sup>Yusuf arye Yesus el nong weilbiyuk sum ara, Yahudi yala nang Allah si erena ati, 'Sabat sum deice fil kum dopnamap' tenen, dikdik sen sum upnamoka ati, sik kintinibuka delilamik sum akunum ubuk. Kintinibuka delin sum akunum ubuka anye arye, ambusum ato kum fil dopmanto ati, inibuk ura, Yusuf arye Yesus el nong dobuka asum aryuk keil deiya fum dongobuk.

<sup>55</sup>Yusuf arye Yesus el nong dobuka weilbinmok talak ara, Yesus ap Galilea tam arye, melibuka Yerusalem mutuku yanmek kilapu arye, Yesus nong pakubuka weipmokok ara, sikce dinmek. <sup>56</sup>Dinmekani, sik aik tamubuka biyikop ura, 'Yesus el nong deice deipnamap' tenen, nintong teleb mek ap, nintong teleb ning babok atonun ning ap, kintinibuka deibik. Kintinipdeibik bukni, Allah arye nyapdeiyamuk ura, Musa arye sekiamuk atonun winibik. Ara, Yahudi yala nang arye, Allah si erena ati dikdik selamik sum, Sabat sum akunum ubuka ati, dikdik senmek.

### Yesus kam bukuk yupu

**24** <sup>1</sup>Sik niry a damabuka unmeke ani, Sabat<sup>7</sup> sum akunum ubukop ura, Maria Magdalena ap, Yakobus el lin Maria ap, Yohana ap, awinilye kilapu nintong teleb ning kintinibuka deipmekak dobuka, 'Yesus el nong deice dikuka likipnuyap' tenen, bobuka biyik. <sup>2</sup>Minggu sum berentam kuna dakalongoyuk ura, awinilye kilapu Yesus weipmekak binuka, 'Nintong teleb ning el nong deice dikuka likipnuyap' tenen, Yesus weipmek keil deiyok dam biyik. Biyikop ura, erebuka dipdeyikbuk, keil deiya buplan dekmoka weik pala keil ara akunum amuplopmokok eibik. <sup>3</sup>Eibik ura, keil deiya fum yanuka wekikce, dipdeyik bukni, Yesus el nong kum eibik.

<sup>4</sup>Kum eibikce, 'Yesus el nong dan do?' tenen, teniltonmek talak ara, wel nang bitinye bebeya lingum ablirye dirina weik ulamle tok, fia kurun butum aling ongopmarik nang, talye karin arye tikilyarik. <sup>5</sup>Winiprik ura, akilapu eibikce, lukdayikce ilil weik ubuka ati, koupdongobuka tikmek. Ilil weik ubuk ura, anang arye akilapu ati nyaprik. "Diplamak ninye wein dam, 'Yesus aunmal do?' tenen, dilyanmaluma ara, yata ati do?"

---

j 24:1 *Sabat sum* – Yahudi yala nang arye, Sabat sum nyalamik ara, nun winitalak unyap ninye arye, hari Sabtu nyanayabe. Ati, sik Yesus nong weibik keil deiya tamubuka biyik sum ara, hari minggu berentam karen arye biyik.

<sup>6</sup>El asukum kum unmale. El akunum kam bukmales. Anggun Yesus ap, Galilea mutuku noutamak neika ulalum talak nyalilamsuk yupu ara, moubuka tuba bikilulum do kum do? Bitu moubuka tenipdelulume. Yesus arye nyapsuk yupu ara ani. <sup>7</sup>‘Na ara, Ninnye Mi Koprop Atonunye dobukapnikirye, malye un nang aripnice ura, wanwanun yo deice opnicop ura, dipmanya ani, liki winilye sum akunum uplyop ura, tamubuka kam buknamne,’ Yesus arye nyalamsuke.” Abitinye nang arye nyaprik. <sup>8</sup>Nyaprikop ura, akilapu arye, ‘Yesus nyamuk yupu ara anye’ tenen, tamubuka tenebik.

<sup>9</sup>Tenebikke, akeil deiyok dam batakuka banmek ani, sik Yesus arye wibuka deiamuk nang, koklom barye 11 nang<sup>k</sup> unmekak biyikke, awinipmok ning nirya ati, laka nyabik ura, anang koklom barye 11 nang ap, sik ap, yuk nang ap, neika unmek nang ap, kekebik. <sup>10</sup>Ayupu laka nyalbiyik kilapu si ara, ani. Ara Maria Magdalena ap, Yohana ap, Yakobus el lin Maria ap, sik neika dilbiyik kilapu ap arye, sik Rasul nang biti, ayupu laka nyabik. <sup>11</sup>Laka nyabik ura, Yesus arye, ‘Na yupu dibuka peterelbinamak’ tenen, wibuka deiamuk nang, ayupu akunum kekebik bukni, diba kum tenebik. Akilapu arye laka nyanmek yupu ara, ‘Talya motona nang arye nyalamak touk nyanmasiake,’ tenebik. Utenepmeka anye arye, diba kum tenebik. <sup>12</sup>Sik nirya diba kum tenebik bukni, Peterus uk el bira, Yesus weipmekak keil deiyok dam bik-bik abuka dilbiyuk. Biyukop ura, nong kanipdongobukce, keil deiya fum bita dipdeyukce, Yusuf arye mitang butum aling kitibuka weipmok ninguk aupmokak eibuk. Eibukce, el kanye fum tam aryuk, ‘Yata wiripmal do?’ tenen, teninmokce banmok.

### **Emaus mutuku bisik noutamak winibuk ning ak eiprik yupu**

<sup>13</sup>Asum uk ara, Yesus el wibuka deiamuk nang, bitinye nang, ‘Emaus mutuku binunam’ tenen, bisik banmarik. Yerusalem mutuku arye Emaus mutuku bisik ban karen ara, tonok sum noutamak bisik balamak tok, sebelas kilometer wamuk. <sup>14</sup>Sik bisik noutamak banmarik talak ara, aning nirya winibukak, eiprik ning ap, kekeprik ning ap ati, yupu talipdanin banmarik. <sup>15</sup>Sik yupu talipdanin banmarik ura, Yesus sik kum tenepmarik bisik arye yangayukak eiprik. Eiprik ura, sik ap, Yesus ap banmek. <sup>16</sup>Yesus yayuk ura, sik ap ansinibuka banmek bukni, ‘Na yanman ati akunum bikmaniak,’ tenebukce, sik kanye tenen ning duknubuk ati ara, Yesus el urasin eiprik bukni, sikce, ‘Yesus ara anye,’ kum teneprikce, el urasin kum kil bikrik.

---

<sup>k</sup> 24:9 *Yesus wipdeibuk nang, 11 nang* – Asukum ara 11 nang sekuka ara deiyok ani. Ara Yudas Iskariot akunum opdayuk anye, Yesus wipdeiamuk nang ara atalak ara 11 nang tuba unmek.

<sup>17</sup>Sik banmek ani, bisik noutam ara, Yesus arye abitinye nang ati, asipdeyuk. “Anggun bisik banmarumce, yata yupu talipdanin banmarum do?” nyabuka asipdeyuk. Asipdeyuk ura, sik bitinye nang atikilbirikce, ‘Se’ tenen, koupdongobuka tuku ak dinmarik. <sup>18</sup>Winibuka dinmarikbuk, tonoknye Keleopas arye, Yesus ati nyabuk. “Ambusum winipmo ning nirya ara, nun Yerusalem mutuku noutamak unyap nang nirya eibuka kel bikinyap bukni, an tonok ara, kum eiplum arye, kum biklum do? Anda winiryuk Yerusalem mutuku dam yanmalama ati, kum bikmalam do?” nyabuk. <sup>19</sup>Nyabuk ura, Yesus arye tamubuka, “Yata ning ati nyapmanilam do?” nyabuka asipdeyuk. Asipdeyuk ura, sik bitinye nang arye tamubuka nyaprik.

Kume Nasaret nang arye deiyamiknye, el si Yesus ati nyapname. Yesus ara talinye kume. Elda Allah yupu laka nyalamuknye nabi ulamuk. Tonda, Allah nyapdeibuk ura, Yesus arye nyalamuk yupu ap, fil dolamuk ning ap ara, weik mikip deice arye winilamuk. Ninye nirya arye aning nirya elilamuburye, ‘Anye bira mikip weiknye’ tenen kel bikamubu.

<sup>20</sup>Nun Yahudi yala deiyok nang ap, Allah arina ati weik deiyok nang ap arye, ‘Yuk nang arye opnamak’ tenen, Yesus dobuka aribik ura, wanwanun yo deice obike. <sup>21</sup>Se, nunda, ‘Yesus arye, Roma mutuku nang amutam ulamibyak loplopsilirye, Israel ninye nirya lyebuka talipsilirye, nun Weik Deiyoknye el uk unamsil,’ tenelamubu bukni, sik anang arye Yesus obike. Tonda, sikce Yesus obik ura, liki winilye sum akunum uple.

<sup>22-23</sup>Tonda, aning uk kume. Nun tam kilapu arye yupu nyapmasungubuk, kekepmabce, lukdanmabe. Ara, berentam ara, Yesus keil deiya weibikak dilbinmangu bukni, Yesus el nong kum eipmangue. Kum eipmangurye, nun dam ayupu nyalyanmasunge. “Lengdar mana atonun deice arye malaikat eipmabe, ‘Yesus akunum kam bukmale,’ nyaipmasile,” nyapmangue. <sup>24</sup>Nyapmasungu ura, nun kayapu ton nang, Yesus weipmek keil deiya dam dilbinmangue, akilapu nyapmangu touk upmoba, eipmangu bukni, Yesus el nong kum eipmangue. Abitinye nang arye Yesus ati nyaprik.

<sup>25</sup>Nyaprik ura, Yesus arye tamubuka anang ati nyabuk. “Anggun walwal nang ululum ani. Anggun Allah yupu laka nyalamik nang nabi-nabi nang arye sekamik yupu ara, diba kum tenelulumce, lik asa kel bikilulume. <sup>26</sup>Ninye weik lyeplirye, sik kanye talima talinamlanye, Kristus ara, el ti Allah arye utenebuk. Ara, ‘Sik malye nang arye el nong deice ikin ning weik deibiki bukni, donmalya ani diplirye, kam bukuka fia teleb dirinak im deice welepnahme,’ teneamuk ning ara, kum tenepmalumce nyapmanurum do?” nyabuk. <sup>27</sup>Nyabukop ura, Musa ap, Allah yupu laka nyalamik nang, Nabi-Nabi nang ap arye el Yesus ati sekamik yupu ara, ayupu arye deiyok koubuka, Allah yupu noutam ulye yupu nirya arye el Yesus ati seklamik yupu dobuka, Yesus arye abitinye nang ati, laka nyapnin banmok.

<sup>28</sup>Laka nyabuk ura, sik bisik banmek ani, sik binurik asik dam tam bayik ura, 'El yuk bisik binula atia, tenepnuniraka' tenen, Yesus arye el yuk deiyok kobuka bayuk. <sup>29</sup>Yuk bisik baleyuk bukni, sik yupu mikip arye nyaprik. "Kume, akunum inipnin banmala anye arye, anda nun ap mapnuyabe," nyaprik. Nyaprika anye arye, el ap asik binuka neika amabik. <sup>30</sup>Aik unmekce din ning dipnuyik talak ara, Yesus arye roti doprobukce, Allah ati, "Telebe," nyabukop ura, tobukabukce anang ati arinmok. <sup>31</sup>Roti arinmok talak ara, 'Yesus ani', kum tenepmarika ati, Allah arye, 'Yesus biknurak' tenen, sik kanye pakeibukce, asing teleb kipdeibuk ura, Yesus nong bikrik. Kel bikrik bukni, Yesus adip aryuk tunimabuk ura, tonap kum eiprik.

<sup>32</sup>Tunimabukop ura, sik bitinye nanguk yupu talipdarik. "Kume, ambusum el ap bisik noutamak banmapu talak ara, Musa sekamuk yupu ap, Nabi-nabi nang arye sekamik yupu ap, yuk Allah yupu buku ap, laka arye nyanmasubuk, nun kanye talima dukduk anmasu ning ara, deiyok akunum tenepmaname. Ara dipkoprop Yesus el uka tenepmaname," nyaprik.

<sup>33</sup>Uteneprikop ura, adip aryuk amutuku batakuka, Yerusalem mutuku tamubuka birik. Birikop ura, Yesus wibuka deiamuk nang koklom barye 11 nang ap, sik neika ulamik nang ap, sik bulubuka unmek asik binuka wekrik ura eipdayik. <sup>34</sup>Wekrikop ura, anyasik unmek nang arye ayupu laka nyanmek. "Sik akilapu nyapmasungu yupu ara, dipkoprop uk ulule. Nun ni koprop Yesus akunum kam bukukce, Simon dam tikilyayuk ura, eibuke," nyabik.

<sup>35</sup>Nyabik ura, abitinye nang arye, sik bisik noutamak banmarik talak winipmok ning ap, Yesus arye roti tobuka aribuk ura, el nong kel kiprik ning ap, laka nyanmarik.

#### **Yesus arye el wibuka deiamuk nang kan-kan kutukuka tikuk yupu**

<sup>36</sup>Sik nirye arye ayupu tuba nyanmek talak ara, Yesus talye karin arye sik kan-kan kutukuka tikilyayukce, anang nirya ati ayupu nyabuk. "Allah arye teleb updeipsilye ura, anggun teleb kanye bobuka unamlulume," nyabuk. <sup>37</sup>Nyabukop ura, sikce, 'Se, dibik nang kanya eibabe,' tenebikce, sik ilil weik ubuk. <sup>38</sup>Ilil ubuk bukni, Yesus arye anang nirya ati nyabuk. "Yata ati, ilil kanye bobuka kanye bokoltonmasilce, 'Yesus do, kum do?' tenen, teniltonmanulumce ilil upmasil do? <sup>39</sup>Na taruk tatang ap, na yan ap dila dipdenululume. Na aunman ani. Na yok ap, tup ap, aupmanilba, eipmanuluma ati, anggunce talipdenululume. Ninye diplomak nang kanya ara, aning tuba kum ulule," nyabuk.

<sup>40</sup>Nyabukop ura, el taruk tatang ap, el yan ap amubukce, anang ati peterebuk ura eibik. <sup>41</sup>Peterebuk ura, eibikce, weik kanye deibuka, kil-kil unmok ura, fia ngalukunmek akarye, mitikanun ton tuba kanye bokol

tonmok. Wininmok ati, Yesus arye anang ati asipdeyuk. “Din ning ara, anggun ton aupmasil do?” nyabuka morobuk. <sup>42-43</sup>Morobuk ura, sik uku arye dapmek mekin bal arebik ura, doprobukce, sik dinmek talak aryuk dibuk. <sup>44</sup>Yesus amekin bal dibukop ura, ayupu nyabuk. “Na ap, anggun neika ulamuburye, nyalamsise yupu ara, tonap nyapnusine. Yata yupu do nirya, Musa sekamuk yupu ap, Allah yupu laka nyalamik nang, nabi-nabi sekamik yupu ap, Mazmur noutamak sekamik yupu ara, na ti sekeiyamnik touk dipkoprop upnamle,” nyabuk.

<sup>45</sup>Nyabukce, el ti Allah yupu sekamik ning nirya ara, ‘Kel kipnuyak’ tenen, sik kanye talima tenen ning aribuk. <sup>46</sup>Tonda, ayupu nyabuk. “Allah yupu noutamak na ti sekamnik ning ara, ani. Ara ninye weik lyeplirye, sik kanye talima talinamlanye Kristus ara, el nong deice ikin ning weik deibice ura, daunmalya ani, diplirye, like winilye mapmalya, kam buknamle. <sup>47</sup>Kam buklyop ura, el si deice arye ayupu bitinye laka nyabuka peterepra banamake. Ara, ninye nirya sik malye tenenyak ning ap, malye wininyak ning ap batakuka, kanye danguna ap, tonda, Allah arye ninye, sik malye un ning namin kiplirye, kum danipnamle ning ap ara, ayupu bobuka ninye mutuku-mutuku nirya ati peterepra banamake. Ara, Yerusalem mutuku arye deiyok koubuka dana-dana mutuku nirya peterepra banamake. Ayupu nirya ara, na si Yesus deice arye peterelbinamake.”

<sup>48</sup>“Anyapmasin ning nirya ara, akunum winibukak elilulum nang anye arye, aning ara ninye kekenak ati, ‘Dipkoprop akunum uple,’ nyabuka nyalinamlume. <sup>49</sup>Na Ni Allah arye, ‘Na Dib Kanye aripnamsine,’ nyalilamuk touk, na im deice arye dopkwetepnamsine. Dopkwetepsinye ura, anggun kanye talima noutamak weksilirye, mikip weik upnamsil bukni, Allah El Dib Kanye arye min kum weik mikip kum upmasilye talak ara, Yerusalem asik noutam uk unamlume.” Yesus arye nyabuk.

### **Yesus erepdakuka im deice welebuk yupu**

<sup>50</sup>Yesus arye ayupu nyabukop ura, Yerusalem mutuku el minop bayuk ura, el mapu nirya ara aminyan bisik banmek. Banmeka ani, Betania mutuku dam biyikop ura, ‘Allah arye anang teleb updeipnamle’ tenen, Yesus el taruk amubuka, Allah ati morobuk. <sup>51</sup>Yesus arye Allah tuba moronmok talak ara, Allah arye Yesus el nong erepdakuka, im deice doprobukce, anang asukum uk batakuk. <sup>52</sup>Akunum im deice biyukop ura, anang nirye arye Yesus ati, kibuka, el si erenmek. Erenmekce, kanye fia deibik ura, Yerusalem mutuku tamubuka biyik. <sup>53</sup>Yerusalem mutuku biyikop ura, daulamikce, Allah arilbalamik aik dam, fia asum-asum wekelbalamikce, Allah si erelamik.

Telebe, na Lukas arye ayupu akunum sekeipsine.